




清代傳記叢刊·綜錄類 ⑦  
周 駿 富 輯

國朝耆獻類徵初編 (四)

卷三一九至

(清) 李 桓 輯



明文書局印行

Wt 4/10/17

國朝耆獻類徵初編卷三百十目錄

將帥五十

李光顯

馬瑜

德格

馬元

宗室緒莊

宗室興肇

子成寬

宗室伊鏗額

常忠

德楞額

楊秀

汪啟

樊雄楚

王占鼇

羅鳳山





國朝耆獻類徵初編卷三百十

通奉大夫前署江西巡撫江西布政使司布政使湘陰李桓輯

將帥五十

李光顯

李光顯，建同安人。乾隆四十二年，由行伍拔補金門鎮標左營外委。四十六年，升臺灣澎湖協右營把總。五十一年，逆匪林爽文滋事，光顯守打鼓汛南路賊黨莊大田等陷鳳山，率眾來攻擊，退之。五十二年，隨遊擊鄭嵩攻克竹仔港。五十三年正月，隨參贊大臣海蘭察攻破枋寮等處賊寨，追賊至瑯嶠山，斬獲甚眾。二月，臺澎平。賞戴藍翎。五月，署閩安左營千總。五十四年，補澎湖協右

營千總五十九年調督標水師營千總嘉慶元年七月隨參將李長庚至浙江右石浦洋會剿艇匪十月獲賊渠吳興信等八名三年三月遷督標水師營中軍守備時海盜蔡牽在洋滋擾四月捕獲夥匪洪節等二十餘人於白犬洋下部議敘五月追剿蔡逆夥匪蔡雷於浙江普陀洋獲之十二月招降洋盜沈振元五年在東涌水澳四驢等洋先後獲盜多名六年四月遷閩安協水師左營都司 賞換花翎七月復於白犬洋緝獲蔡逆夥盜王什等七十餘人七年三月擊賊於東滬洋獲逆黨陳東冬四月遷海壇鎮標右營遊擊十月蔡逆自浙洋竄入閩洋光顯隨副將陳名魁在橫山洋截剿擒賊目邱成三等三十餘人八年蔡逆復竄至閩省東

南外洋游奕光顯偕總兵孫大剛等併力截擊殲戮無算復追至  
四嶼洋大敗之捷 聞下部議敘九年遷廣東平海營參將十年  
六月在新安零丁洋東莞沙角洋香山虎洋屢殲賊眾並招撫  
賊黨多人尋擢福建臺灣澎湖協副將九月兩廣總督那彥成以  
粵洋捕務緊要疏留之訓廣東順德協副將十二年正月以蔡逆  
復竄粵洋隨眾圍剿未能就擒部議降三級調用 上加恩改爲  
畱任十四年六月擢浙江温州鎮總兵九月蔡逆爲官兵剿敗赴  
水死光顯隨浙江提督邱良功駛至閩洋搜捕餘黨旋經福建巡  
撫張師誠調赴近省洋面防禦九月蔡逆餘黨朱渥在浮鷹洋劫  
掠光顯復隨邱良功往剿十五年三月與海壇金門二鎮舟師會

明史紀事本末卷一百一十一  
二  
勤於石圳洋奪獲盜船賊斃六十餘人五月調黃巖鎮總兵十月  
捕獲盜犯賀自光等七十餘人於大鹿洋十六年二月署浙江提  
督三月調定海鎮總兵十七年自南鹿洋追賊至福建臺山洋擊  
沈盜船獲盜首陳烏青及夥匪六十餘人二十一年擢廣東水師  
提督二十四年卒子鳴玉候選通判

右 國史館本傳



馬瑜

馬瑜甘肅張掖人寄籍四川華陽縣乾隆四十七年以武生效力督標游升慶甯營千總五十七年隨將軍福康安出師廓爾喀累功授瀘甯營守備加都司銜六十年閏二月松桃廳苗匪闖入秀山縣境隨總督和琳帶兵堵剿攻克各路賊寨 賞戴花翎五月擢冕山營都司十月擢督標左營遊擊是月進抵高多寨生擒首逆吳半生下部議敘嘉慶元年命赴達州軍營二年三月攻克大園包 賞大小荷包復擊賊於棋盤石奪其卡六月進攻安子坪等處槍斃首逆並擒其家屬 予達春巴圖魯名號七月迎探賊蹤至甯羌州安撫州城三年三月殲首逆齊王氏姚之富於沙狐

嶺餘賊竄歷時瑜首先偵探官兵得以分路截剿 上嘉其奮勇  
擢參將四月朔白號賊高均德於雒南六月追擊於鐵釘埡斃賊  
二百餘名均德與其黨冉文儔等竄踞大神山七月官兵分路進  
剿瑜攻其東面克之文儔等由龍鳳坪遁走箕山坡下九月克箕  
山賊匪羅其清退據大鵬山寨十月合兵圍剿瑜等冒雨攻寨燬  
其南門槍斃其父從國其清遁十二月生擒於巴州濛子灘洞中  
事 聞 詔以升缺儘先補用文儔自箕山竄入通江之麻壩寨  
負岫抗拒四年元旦瑜隨副都統德楞素等分兵三路燬寨而入  
生擒冉文儔及其子添受並賊黨千餘人奪獲牛馬器械無算加  
副將銜三月補四川督標副將七月追賊入楚十月擒高均德於



大市川五年正月川北川西賊勢猖獗仍隨德榜泰統兵入川二月攻江油之烏龍寨生擒綠號首逆 詔給功牌三月進攻重華堰賊伏於火石埡者萬餘瑜等分號環擊擒首逆冉添元等下部議敘復勦賊於劍州之石門寨賊搶渡潼河瑜偕副都統賽冲阿等擊走之四月追賊至開封廟乘賊搶渡嘉陵江斬殺二千七百餘人殲藍白號賊於麻柳場閏四月勦藍號賊於七孔溪瑜伏兵山下俟賊過溝時擊之五月攻長池壩賊巢得 旨嘉獎六月擢貴州安義鎮總兵七月調重慶鎮總兵八月賊至長壩方渡河瑜領馬步兵掩至白號首逆度向瑤赴水死九月殲賊於母子埡六年正月逆賊徐添德並黃號股匪白洵陽北竄瑜追至乾溝擒斬

甚眾餘匪奔鎮安瑜等領精兵八百間道出野豬坪雪夜奮擊二月  
月勦黃號賊龍紹周於五里埡復蹙之於宮渡河淹溺無算四月  
黃白藍三號賊匪自陝入楚與徐添德合瑜隨德楞泰追擊於陝  
之黃石坂斬獲二千餘名五月勦賊於昆河鋪賊勢瓦解徐添德  
奔河灘溺死七月追賊入川敗黃號賊於菜子埡峯竹廠賊走巴  
東復敗之於雲霧溪九月由老木孔入山搜勦賊西趨陝瑜偕總  
兵蒲尙佐等冒雪進攻殄龍逆於平利之岳家坪黃號賊匪殆盡  
十一月殲賊於白果壩賊竄至通江之劉家壩瑜等分路繞上山  
梁大兵繼進俘獲無算七年二月隨德楞泰至巫山十二峰掃除  
綠號散賊四月勦賊於雞公梁擒斬千餘人五月擊賊於水溝後

山埡口擒斬八百餘人六月追擊於觀音碭首逆樊人傑就擒下  
部優敘十月賊竄施家溝爲先山極險處瑜步行入山督兵兜剿  
首逆趙鑑等就擒殲青黃兩號賊三百餘於中子洋坪復偵知巴  
巫接界賊匪屯聚月夜擣其巢穴擒斬之均下部議敘 恩賞拔  
指荷囊時賊勢窮蹙瑜由巫山向北搜剿十一月斃賊於銅盆溪  
十二月追擊於栗子坪等處斬馘百餘擒青號賊於鳳凰山八年  
正月於黃柏溝及太陽河剿除零匪二月獲白號首逆王三槐之  
弟三魁於馬家壩餘股零星掃蕩而楚匪復偪入川瑜偕副都統  
色爾滾合兵迎擊閏二月從閒道進攻鐙蓋窩雨霧瀰漫瑜由山  
頂衝下斬馘五十餘人隨於豐玉坪天池子草堂河黑樓門等處

沿途搜緝川陝楚餘匪殲除殆盡乃於三省邊界分段巡防瑜派  
守川省之徐家壩十月突有陝界伏匪由南山竄出裹脅漸多因  
自川東探勦入陝十二月由八義寨獐廬崖而進擒斬數十名復  
躡之於尹家臺子賊恃險抗拒瑜設伏敗之九年正月擢江南提  
督爾辦善後事宜二月賊竄湖北之興隆坡瑜勒兵兜勦殲斃苟  
文華等 上嘉之 賞翎管板指荷囊復追賊於日曬溪漁峒子  
四月調雲南提督仍畱辦善後事宜六月賊屯柴扒老林瑜偕提  
督豐仲由添紫城在賊北進攻賊潛遁經略額勒登保偕德楞泰  
等奏言添紫城在賊屯之南最爲緊要專派豐仲馬瑜在彼扼截  
竟任乘閒偷越實難辭咎 命革巴圖魯名號摘去花翎時餘匪



專向老林奔竄瑜帶兵二千追窮賊所向七月進攻鳳凰寨有名  
賊目數殲擒下部議敘八月斃首逆苟文潤等於魚峒子奏入  
賞還花翎及巴圖魯名號九月瑜率將備先後搜獲賊匪陝境肅  
清仍於川境沿邊分緝尋苟朝九被獲於漢中府全功告蒞下部  
議敘十月檄撤陝西從征鄉勇十年八月赴雲南提督任十五年  
調江南提督十八年四月調直隸提督七月隨 駕熱河 命射  
布靶中三矢 賞穿黃馬褂九月河南教匪滋事陷滑城 命瑜  
馳往剿辦十月至滑之畱固村殲賊二百餘人於南湖北湖與總  
督溫承惠合兵會剿斃賊五百餘名奪獲槍礮器械甚多復由道  
口之運河西岸進兵賊匪淹斃無算 上傳示方略 命瑜偕副

都統富蘭由濬縣繞道速赴開州以北逐一搜捕向南進剿瑜等探知滑縣之潘章李家莊袁家莊等處距開州甚近俱有賊屯聚十一月進燬賊巢殲斃二千八百餘人十二月攻復滑城瑜畱駐開州搜捕竄匪九百餘人事竣下部議敘尋因失察都司曹綸從賊入教部議革職 詔改爲革職畱任十九年二月調江南提督四月以防守東明時失察所屬將弁買帶婦女降補徐州鎮總兵二十二年調山東兗州鎮總兵二十三年 上以其怠忽捕務嚴飭之二十四年四月仍授江南提督六月卒 諭曰馬瑜前在軍營著有勞績著加恩照提督例賜卹諡壯勤

右 國史館本傳

德格

德格阿蘇特氏蒙古鑲紅旗人西安駐防乾隆三十八年金川不靖德格由領催隨副都統書麟赴剿屢戰有功四十年攻科克布曲山斃賊甚多受槍傷得與恩賞四十六年甘肅循化應撒拉爾逆回蘇四十三等爭立新教滋事攻陷河州經官兵剿敗退華林山拒守四月德格隨將軍伯伍彌泰擊賊於龍尾山進抵華林寺破之戮蘇四十三等四十九年四月逆黨田五張文慶等復煽誘新教回人以報復爲名擾通渭伏羌等縣田五尋爲官兵所殲張文慶等踞石峯堡爲巢穴德格隨將軍公傅玉進剿屢有殺獲功列一等五十二年授驍騎校五十九年升防禦嘉慶元年湖北



教匪會士興等起於竹山陷縣城二月德格隨將軍宗室恆瑞往  
剿破賊於竹山連戰棗陽蔣家壩曲家灣張家壩諸處累敗賊眾  
二年四月升佐領十月授協領五年五月賊分竄蓋屋郿縣一帶  
陝甘總督長齡以岐山山徑紛雜令德格率西安馬隊隨涼州副  
都統和興額赴岐山防堵尋楊開甲股匪萬餘從盩厔之辛峪竄  
出擊卻之伍金柱股匪數千人復至德格等分兩路截擊斃二百  
餘人餘賊西遁十一年八月隨副都統祥保堵截甯陝叛兵陳達  
順等有功十九年遷荊州左翼副都統二十年因西安協領任內  
失察佐領觀德責打閒散扎坤珠致斃得旨交部議處降一級  
畱任二十三年年班 陛見 上以德格年老重聽不勝副都統

之任賞副都統銜令回防所以協領補用二十四年三月補鑲藍旗協領十月卒

右 國史館本傳



馬元

馬元四川松潘廳人乾隆五十二年由行伍隨松潘總兵穆克登  
阿出師臺灣授行營外委五十三年隨穆克登阿出師西藏五十  
五年授松潘鎮標左營外委五十六年隨大學士公福康安征廓  
爾喀有功 賞戴藍翎授阜和協標把總六十年隨大學士公福  
康安征湖南苗匪解永綏圍攻克滾牛坡藍草坪膺受槍傷嘉慶  
元年進攻平隴等處殲擒首逆石柳鄧吳半生等遷懋功營千總  
二年以軍功加行營守備銜會苗匪既平而湖北教匪竄擾川東  
延及陝境經略大臣額勒登保檄元領阜和協屬各營兵並五寨  
團練馳赴四川達州軍營勦辦協同收復東鄉縣腰受石傷咨部

議敘九月擢維州協標右營守備三年隨廣州將軍明亮在王家山周家坪等處打仗受傷請以積功 賞換花翎四年春擒賊首趙金武等六月擒林定相殲其眾七月進剿綠字號股匪擒龔其位龔文玉等全股淨盡八月擒賊首卜三聘五年正月由陝西襄城追賊至甘肅秦州擒賊首陳得俸三月殲擒賊首冉添元等賞給庫吉推巴圖魯名號既而藍號各股匪合聚劍州占石門寨元領馬步隊隨參贊德楞泰等進攻破之擒偽總兵李斌等餘賊由南郡鹽亭搶渡潼河屯據蓬溪縣屬新店子元領步隊隨副都統銜阿穆勒塔由右山梁壓下會德楞泰等軍夾擊擒殺賊首雷世旺王作唐等遷雲南督標中軍都司八月擢直隸正定鎮標左



營遊擊十二月殲趙麻花股匪六年正月從提督賽沖阿迎截賊首高會會德楞泰軍追及於野豬坪射殺之獲何良佐王儒等殲斃多名膝受石傷咨部議敘二月復從賽沖阿追擒金占鼇等六十餘名三月追賊至黃花廟賊匪辛聰撲元營甚急會賽沖阿以吉林兵來援元督兵勇夾擊敗之進抵葛藤口隨德楞泰等軍會剿殺賊多名協擒馮爲棟謝大義等四月隨德楞泰尾躡青號賊匪至紅花塚擊敗之擒陳天壽胡世富等五月追擊賊匪擒李如相等五十三名擢陝西延安營參將七月同副將李應貴由三溪子河追擒僞先鋒楊貞禮僞總兵李懷玉等百二十名餘賊走史家堽元同李應貴領步隊追及之賊據隘抗拒會德楞泰以馬軍

繼至賊眾大潰擒唐成俸等五十三名八月賊竄元狐嶺元領兵  
勇踵至賊首支茂乾據險持矛率眾抗拒元躍入賊隊立截殺之  
斃賊百餘名擒李文彩等八十七名追殺二十餘里擒支茂乾妻  
陳氏及閻忠林熊敏書等百數十名餘賊折竄野苗巖老林元同  
李應貴會賽冲阿軍進剿殲斃無算協擒王宗仁鄒炳萬昌貴等  
百數十名賊窮蹙竄巴東界之板倉坪元率千總史定川高星文  
等追躡至陳家坡等處截殺數十名擒劉自耀等二十七名連夜  
攻抵天池庵雲霧溪賊巢破之擒廖其元楊學通等數十名時元  
追賊兼旬屢著勞績及元狐嶺捷疏奏入 上命傳諭德楞泰曰  
撲入賊隊將支茂乾截殺之參將馬元甚爲奮勇著加恩以應升



之缺卽行升用旋 賞給副將銜先換頂帶九月賊屯汝溪元領  
步隊乘夜冒雪進剿時賊意官軍阻水不設備比黎明大霧瀰漫  
諸軍皆會元督眾衝殺遂殄賊 龍紹周餘黨悉平十月楚來賊  
匪二百餘名擾紅茶園元會總兵蒲尙佐參將馬應國軍夾擊擒  
田國柱等十二月在東鄉前河山梁與賽冲阿夾擊劉朝選餘匪  
斃賊二百餘名擒殺數十名七年正月隨總兵蒲尙佐等追賊至  
彈子壩及大竹所屬四方山華嚴寺等處擒獲旗手黃文魁排頭  
唐正佐等二月授四川維州協副將五月藍號賊撲營同總兵蒲  
尙佐擊卻之擒賊王允恭瞿仁等一百七名六月進剿蒲添寶於  
鮑家山會總兵蒲尙佐營總富登阿等軍擒何三忠楊添福彭士

明等二百餘名八月賊首蒲添寶屯中蓬子杉樹凹等處元同蒲  
尙佐進攻至蘭溪溝適川省截回熊姓股匪由天星小寨偷渡元  
領兵勇進勦於茅坪山下追及擒米良貴等賊乘夜率眾奪卡元  
擊敗之擒袁維新等九月進攻謝家坪與副都統富僧德等夾擊  
擒僞元帥廖澤元老教師張書漢僞總兵董星堂等數十名十月  
同蒲尙佐折回川省攻勦劉姓股匪於黃泡池擒僞帥陳侍學等  
殲其眾十一月領兵勇進勦王道河李家溪等處零匪殲擒邱亮  
等數十名八年閏二月元率守備周志林等追賊至乾溝與委辦  
團練縣丞楊沛雲合兵勇夾擊殲斃賊首曾芝秀擒王國儒等咨  
部議敘四月在雲陽開縣地方搜捕黃號唐大信餘黨殲斃賊首

李顯碧擒僞總兵王開聰等數十名追抵夾耳槽會諸路官軍擒  
僞先鋒孔紀龍等五十七名九年調阜和協副將十一年軍政卓  
異引見 命交軍機處記名並賞緞匹十二年戡眉嶺夷滋事  
四川總督勒保檄元就近領兵協同建昌道鄭成基勦辦將首逆  
竹嗎策登等拏獲十三年趕山坪等處野夷潛出焚掠復領兵協  
同鄭成基勦辦擒獲首逆神仗一名五月遷陝西漢中鎮總兵仍  
畱軍營旋會四川提督豐伸進攻大小板房抄抵鹽井溪殄夷目  
雷都督獲頭目黑鬍子降其眾七月調甘肅涼州鎮總兵十七年  
陞見 命射中四矢 賜紗二襲十八年河南教匪陷滑縣隨陝  
甘總督那彥成攻克道口賊巢 上命那彥成保奏帶兵大員實



在出力者尋以元奏入 敕部議敘道口既破而桃源股匪二千餘人冀入保滑城提督楊遇春督兵迎擊城中賊匪潛由北門出應元偕署河南巡撫高杞領兵堵截斃賊百餘名生擒十九名餘眾乃退還城中外來賊眾遂爲官軍殲盡十二月大軍收復滑縣元奮勇首先登城獲賊目牛亮臣徐安國等 諭曰此次攻克滑城勦滅賊眾實屬辦理完善那彥成等先將尤爲出力者奏請鼓勵著照所請加恩將首先登城之總兵馬元賞加提督銜先是關中歉收南山木廂匪徒因乏食糾眾滋事會潛滑軍功告蒞直隸總督那彥成檄元領固原河州兵馳赴商州山陽隨陝甘總督長齡勦辦十九年春搜捕淨盡八月擢廣西提督二十五年七月卒

諭曰廣西提督馬元前在軍營著有勞績茲遽溘逝殊堪軫惜馬元著加恩照提督例賜卹應得卹典該衙門察例具奏其任內所有一切處分悉予開復九月 賜祭葬諡壯勤

右 國史館本傳



宗室緒莊

宗室緒莊正藍旗人乾隆五十七年補宗人府筆帖式嘉慶六年升經歷七年遷副理事官九年遷正理事官十三年兼公中佐領十四年遷湖廣道監察御史十五年命抽查漕糧疏言大通橋較製糧米拋撒斛外者向不准埽收入斛卽作爲土米查斛外之米均係袋內之糧儻糧不足數應責令經紀賠補不但該經紀苦於賠累而狼籍亦爲可惜請嗣後拋撒之米仍許隨時埽歸斛內在經紀等可免意外短欠而粒米亦不致遺棄下部議行十六年擢正白旗蒙古副都統十八年二月調正紅旗護軍統領三月調正白旗滿洲副都統四月調盛京副都統十一月訪獲承德縣民



王士青等素習京都民婦高張氏一炷香教本年五月閒高張氏  
交義州民人李中連帶回符式書信糾約關東教徒定期進京滋  
事奏入得 旨嘉獎並 賞戴花翎緒莊尋以失察地方潛匿邪  
匪自請議處部議革職 上加恩改爲畱任嗣經部臣訊明王士  
青等止於習教傳徒實無逆謀緒莊前奏誣輕爲重 命拔去原  
賞花翎先是山海關副都統額勒金布盤獲匪犯王立安供與新  
民屯之張姓勾結滋事經盛京將軍和甯等緝獲該屯居住之張  
建謨等刑偪誣認張建謨復誣攀張學勝同謀十二月緒莊會讞  
其獄張學勝堅不承認緒莊不能據實平反經刑部訊係無辜  
敕部議處尋議降調 詔改革職畱任十九年四月因謫居盛京

宗室裕瑞買有夫之婦爲妾降 旨查詢緒莊訊明奏參並自請  
察議 上以緒莊身係宗室有心袒護 諭部嚴議部議革任  
詔賞四等待衛仍畱四品頂帶充庫車辦事大臣二十年擢二等  
侍衛調西甯辦事大臣二十一年因違犯高二丙誣回民馬祥行  
竊弁兵等復用刑拷逼致馬祥情急自戕緒莊以例案不符不能  
定讞請交刑部覈議 諭曰庫車頗有大清律例及續纂條例卽  
應按律定擬乃謂案與律不符不能擬罪試思案情安能與律字  
字合符準情比例自無枉縱況誣良及刑拷各條均例有明文無  
難引斷乃欲交刑部擬罪刑部爲刑名總匯各省奏咨案件所定  
罪名是否允當該部應分別准駁若先代外省案犯擬定罪名國

家豈有此規制耶緒莊因循推諉太不曉事豈復能勝西甯辦事  
大臣之任著仍降爲四等侍衛卽行來京在大門上當差二十三  
年仍 賞二等侍衛授英吉沙爾領隊大臣二十五年正月以病  
回旗九月卒

右 國史館本傳

宗室興肇 子成寬

宗室興肇鑲藍旗人乾隆三十年封二等輔國將軍賞戴花翎乾清門行走三十一年充十五善射三十三年率健銳營兵赴雲南軍營三十四年圍攻西焚受傷上嘉其奮勉授正白旗護軍統領三十五年副將軍阿桂征緬甸撤兵太驟興肇隨同畫押革去護軍統領三十七年十月襲奉恩輔國公授正藍旗護軍統領旋充領隊大臣赴金川帶兵十一月兼宗人府右宗人三十九年授荊州將軍仍留軍營四十年十一月大軍進取碾占興肇在巴扎木帶兵接應擒獲甚眾十二月定邊右副將軍明亮等攻克乃當興肇占據山頂及官六直抵獨松復在後策應均下部優敘



四十一年正月協辦大學士阿桂檄撤荊州滿兵赴將軍任二月  
金川平奏捷圖像紫光閣 御製贊曰憶當國初勦業開基宗室  
王公宣力率師承平錫慶安享榮華董軍建勳斯爲可嘉五十二  
年調西安將軍五十三年調安遠城將軍五十七年以所管旗兵  
藥神保等偷盜銀兩審擬輕縱部議革職 上從之 命退出乾  
清門仍畱公爵罰俸五年旋授散秩大臣五十八年復授荊州將  
軍六十年五月率滿兵二千赴湖南協勦苗匪因行走迅速 賞  
大小荷包七月 諭曰興肇帶兵二千名自當沿途偵訪賊蹤就  
近勦殺以期廓清後路再赴鎮筸會同攻捕方爲無負任使乃途  
次並未打仗及到鎮筸又復漫無調度僅將帶往之兵分駐城外

殊不可解前因帶兵迅速尙復加之獎賞今不料其糊塗至此著  
交部嚴加議處尋議革職 詔改爲革職畱任十月隨貝子大學  
士福康安等連克馬腦寨豬草寨殺苗坪竹子寨等處復分路進  
攻高多寨生擒首逆吳半生下部議敘是月攻克大坡腦得勝山  
等處木城石卡三十餘座復 賞荷包十一月獲賊目吳八月於  
臥盤寨十二月由鏢木營山坡乘雪未融奮勇截殺斃賊無算復  
攻克禽頭坡一帶要隘疊邀 優賞嘉慶元年正月偕鑲藍旗蒙  
古都統額勒登保進攻吉吉寨奪據山梁乾州屬之大隴峒趕子  
坪河洛坪各寨長及斗角巖尾坡九十九峒苗匪俱先後乞降三  
月 特賜蟒袍是月由高吉垞乘勝追至巴金灣將苗寨全行燒

熾於兩義溪礮擊藏伏苗匪進至平逆坳奪獲賊卡三處六月隨  
總督和琳分路進剿生擒石老秦等十六名八月首逆石柳鄧據  
平隴興肇等由強虎哨進攻奪獲麻里灣等賊卡十餘處九月連  
克黃土坡蒼茅坪木城石卡六處復從牛心地象心地至山家坳  
將平隴賊巢併力攻擊斃賊三百餘名復 賜蟒袍十二月由平  
隴後山右隆等處進兵生擒苗匪一百餘名下部優敘二年二月  
命偕總兵王文雄率湖南撤回各兵迅抵襄陽與湖北巡撫惠齡  
等合剿教匪三月偵知賊首姚之富等由泌陽鄧州分股竄逸卽  
偕文雄擊之於裕州古石灘興肇伏兵山坳追剿三十餘里 上  
嘉其調度有方 賞青玉扳指並大小荷包七月由白洋坪率領



馬隊斃賊百餘名生擒賊匪十七名八月由石窯灰小道繞至江岸殺賊無算復追至襄陽小河口星夜圍剿賊眾披靡時賊將渡茨河鎮興肇隨明亮等自楓樹埡追剿殲賊甚眾九月復由吳家灣截擊斃賊千餘人賊竄入湖北竹谿縣之水坪欲與小河口賊聚興肇等由椒嶺岡協擊賊西逸十月賊匪自雞心嶺折回復隨明亮率各路官兵隱伏峽口連剿四晝夜斃賊五千餘 賞玉扳指荷包十一月追賊於周家壩上高川斃賊千餘名生擒二百名賊首姚之富等入漢中復與賊黨齊王氏李全張漢湖等股匪會合於唐家壩興肇等分帶馬兵由涼埡子鐵嶺關追剿三十餘里三年正月齊王氏等由西鄉渡江竄至石泉 上以興肇疏於防

卷之三十一  
三十一  
才

範嚴飭之二月賊黨李全由懷陽東趨盤屋攻北城垣興肇等四面兜圍殲賊八百餘名生擒三百餘名復敗之於姚村三月追至尹家衛殲賊無算五月擊張漢潮於南漳殲賊六千餘名生擒九百餘名搜獲大小礮位及兵器五百餘件六月擊之於司馬岡時賊匪自楚竄陝復由陝入川上切責之七月勦賊於袁家廟斬級六百又於平壩開縣等處斃賊千餘八月復敗賊於西河口時張逆由太平竄至石泉縣境奏入諭曰張漢潮一股屢經勦殺勢已潰散乃明亮等任其竄至石泉焚掠所辦何事明亮興肇均著革去花翎帶罪自贖十月追勦張漢潮於火石嶺十一月復擊之於石塘壩獲器械無算張逆由固城八里關竄至五郎興肇等



於兩河追殺六十餘里賊由火燄溝前竄復倍道抄擊俘斬五百餘名四年三月擊敗張逆於馬伏城五月賊竄入豫境興肇等分路進剿賊越南嶺竄六月至金竹溝焚掠興肇等擒斬百餘人七月復敗之於紅河寺八月賊走探玉寨舊縣關一帶興肇等追殺五十餘里斬獲甚眾九月賊由老林乘夜偷渡前竄 諭曰明亮奏稱張漢潮又從深林密箐中偷渡前竄竄出情理之外不知伊等是何肺腸其上次所奏三面合圍之語想亦未必確實今將伊等前摺抄寄那彥成松筠閱看著卽切實詳查如果前次奏報盡屬虛言竟將明亮恆瑞興肇三人奏明革職拏問治以欺妄之罪尋在張家坪殲斃張漢潮下部議敘十月又 諭曰興肇與明亮

種種欺飾之處扶同入奏著革職拏問交松筠嚴審定擬尋擬發往伊犁奉 詔改發烏魯木齊效力贖罪以其子成寬襲公爵十二月丁母憂 命回京五年 特予三等侍衛爲和闐辦事大臣七月遷二等侍衛十月調塔爾巴哈臺參贊大臣十年二月審辦哈薩克拜託燒燬房一案未能徹底根究所擬佐領穆特布罪復失之輕縱部議降三級調用 詔改爲革職畱任九月因前在軍營收受備賞銀 諭曰前因湖北省清查軍需銀款內有地方官呈送興肇備賞銀三千四百兩諭令貯繳前據興肇具摺陳辨祇自認賠而不認收受朕恐外省查辦或有舛誤諭令吳熊光詳細確查經該督將呈送收數月日並經手之員逐一查明具奏當令

宗人府軍機大臣傳問供認收受屬實前奏實屬無恥巧辨著交宗人府酌議懲處尋議以不准用四品頂帶亦不准食宗室錢糧上從之十二年仍授二等侍衛在大門上行走十三年六月擢鑲紅旗漢軍副都統十一月授杭州將軍十四年調荊州將軍十五年調察哈爾都統十六年因民人在牧廠內偷宰黃芪拒傷官兵未經奏辦部議降三級調用上改爲降二級授頭等侍衛十七年正月遷正紅旗蒙古副都統十二月授密雲副都統旋授江甯將軍十九年授正藍旗漢軍都統二十二年上以興肇年老命以二品頂帶休致二十五年卒子成寬自有傳

右 國史館本傳

宗室成寬

宗室成寬鑲藍旗人乾隆四十七年授三等侍衛四十九年封三等輔國將軍嘉慶三年因其父奉恩輔國公荊州將軍興肇在西安貽誤軍務革職發烏魯木齊效力奉旨襲輔國公爵命在散秩大臣上行走五年九月授鑲白旗漢軍副都統管理火器營事務十月管理健銳營事務六年正月調正白旗滿洲副都統九月命署馬蘭鎮總兵兼署總管內務府大臣十一月陵寢重地失竊上以成寬未能先事豫防交宗人府察議七年正月命來京供職四月奏爲其父興肇在和闐辦事資斧維艱請將本身在京應領公俸銀於伊父差所就近支領諭曰興肇係獲咎



施恩派往新疆辦事之員本無得項可支成寬卽欲將本身得項  
資給伊父何難自行寄往豈有以奉養私情而越例呈請之理所  
請不准行著傳旨申飭尋復管理火器營事務九月授右翼前鋒  
統領八年三月因失察瘋犯達清阿叩 闕一案部議罰俸一年  
准其抵銷 上以該管大臣不能先事約束非尋常失察可比所  
有成寬罰俸一年之處著不准抵銷七月進班之期拏獲賭博內  
務府披甲永舒等懲治 上嘉之 諭紫禁城進班之王大臣等  
嗣後進班之日務照成寬實力巡查是月授烏里雅蘇臺將軍九  
年十一月奏拏獲搶劫商人駝馬什物賊匪楚魯水等訊明依蒙  
古律擬斬立決 上是之十一年二月奏拏獲私往唐努烏梁海



總管達瑪林扎卜等所屬卡內偷收帳目之烏里雅蘇臺館商孫福佩訊實治罪再請確查烏梁海人等實欠之多寡利息之輕重分別定例寬展年限令其還完奏入如所議行並 命成寬嚴禁烏梁海人等嗣後互相交易必給見銀什物十二年九月成寬庶長子繼純與嫡子繼綱不相能臚繼綱忤逆諸款於 聖駕迴蹕御園時在陳設鹵簿內突出控告 命交宗人府會同軍機大臣刑部堂官嚴審定擬具奏尋議將繼純繼綱各折圈三年 諭曰繼純狂謬已極繼綱任性乖張不孝不弟若僅折圈三年不足示懲繼純著發往吉林嚴加管束繼綱著發往盛京嚴加管束至輿肇見係閒居並無官職免交宗人府覈辦成寬失於教訓本應嚴

議姑念其見在外任著交宗人府議處尋議罰公俸二年十月卒  
諭曰成寬在烏里雅蘇臺將軍任內一切事務俱實心經理今忽  
溘逝殊堪憫惻著加恩賞給成寬之父興肇二等侍衛在大門上  
行走

右 國史館本傳

國朝詩林卷之三十一

三

宗室伊鏗額

宗室伊鏗額鑲藍旗人父和碩簡親王豐訥亨自有傳伊鏗額於乾隆四十九年由應封宗室襲三等鎮國將軍授二等侍衛嘉慶四年擢委散秩大臣七年補公中佐領授伯都訥副都統九年調墨爾根城副都統十二年仍調伯都訥副都統十三年閏五月調吉林副都統七月以甯古塔地方有山西民劉源與直隸民人陳萬倉爭奪糧石被傷致死情節支離請將原驗之防禦倭克吉訥承審之佐領依成額褫職防禦德西和勒解任歸案質訊讞定按律治罪如律十四年六月 命以副都統銜作爲葉爾羌辦事大臣十二月授喀什噶爾參贊大臣十五年六月奏回疆軍臺外委

有經管臺務約束回戶之責見無頂帶殊不足以資彈壓請照舊例賞給外委虛頂以昭體制疏入下部議行七月以吉林私種蕩苗該管官於解到商買餘蕩多係秧蕩 命大理寺少卿文幹內閣侍讀學士松霖前往吉林查辦尋究出前任副都統伊鏗額侵用銀兩據實劾奏 諭曰吉林私種秧蕩多收蕩餘銀兩弊竇叢生前任副都統伊鏗額侵用銀千餘兩著革職審訊八月復 諭曰伊鏗額於蕩務弊竇不能查察輒敢侵用公項殊屬戩法俟解到訊明定擬外所有伊鏗額家產著嚴密查鈔毋任隱匿獄成坐監收自盜律論罪限內完贓照例折圈禁九箇月十六年圈禁期滿十八年 賞藍翎侍衛充伊犁領隊大臣十九年八月已革守



備韓朝佐控告吐魯番領隊大臣蘇精額印房協領納丹珠舞弊各款 上命會同都統劉芬往鞫尋訊明納丹珠謬執已見朦朧上司蘇精額辦事不知律例任性妄爲問擬杖徒韓朝佐借用棉花餘利計贓科罪疏上經部議駁 上以案情疑竇多端罪名有關出入復 命署陝甘總督高杞往按得實蘇精額仍擬杖徒納丹珠坐藉勢攬權遣戍伊犁二十年喀什噶爾城外番民搶燒馬廠 命伊犁參贊大臣長齡挑選伊犁兵丁四五百名交領隊大臣二人管帶前往聽候調遣以伊鏗額素不更事不令派往二十一年 召回京二十二年授三等侍衛二十四年 賞二等侍衛充阿克蘇辦事大臣二十五年卒子德珩刑部郎中德誠倉場侍

國史館本傳

郎

右 國史館本傳

三

常忠

常忠瑪佳氏滿洲鑲黃旗人先世荊州駐防康熙六十一年移駐成都乾隆三十六年四月金川逆酋滋事官軍分路進討上命成都副都統鐵保率滿洲兵前往備用常忠以領催隨征三十七年調舒景安爲副都統馳赴軍營領滿洲兵常忠先派駐翁古爾壑尋駐納木覺爾溝口三十九年大軍攻日旁山常忠隨舒景安由西南山麓分翼並進克戰礪十餘平礪二百餘奮勇深入左鬣角受槍傷及骨受恩賞事平歸成都駐防五十一年補鑲白旗驍騎校嘉慶元年九月四川教匪作亂由達州擾及東鄉屯聚數千人焚掠常忠隨副都統勒禮善會護總督英善勦辦十一月官

軍攻袁家石壩適滿洲兵新到出賊不意由檀木場乘雪夾攻常忠等爭先拆卡拋擲火彈賊眾奔潰殲戮無算並燬汪家山賊寨擒賊首夥九十餘名復由太平寨勦入冉家壩賊抵死格鬪我兵合力攻撲賊分股遁追斬千餘平毀賊巢五年升鑲藍旗防禦十年調正白旗防禦十一年升正白旗佐領十三年八月成都左翼鑲黃正白兩旗協領缺出將軍特清額奏請以右翼佐領哈達哈擬正常忠擬陪咨送引見諭曰本翼員缺應於本翼應升內揀選保舉常忠係本翼佐領且在軍營奮勉得傷以之擬陪辦理甚屬錯謬著以常忠擬正咨送引見十二月授鑲黃正白兩旗協領兼正藍旗佐領二十一年擢甯夏副都統二十三年來京 陛

見 上察其年邁重聽 賞副都統銜回旗以協領缺出補用二  
十五年卒

右 國史館本傳



同身法言廣類彙編

卷三

十一

三

德楞額

德楞額烏蘭哈特氏滿洲正藍旗人涼州駐防乾隆四十六年三月蘭州逆回蘇四十三等糾眾滋擾德楞額由前鋒校隨署涼州副都統額爾恆額往勦四月由金城關渡河進援賊蜂擁迎拒我軍奮力截擊賊退據山梁官兵兩面仰攻斃賊無算五月偵勦龍尾山殲賊八十乘勝追抵八蜡廟水磨溝大敗其眾六月勦賊於華林山斃賊渠蘇四十三等於陣尋搜餘匪於華林寺盡殲之四十九年四月甘肅逆回田五等不靖德楞額隨涼州副都統圖桑阿帥師協勦時賊眾圍犯靖遠經援兵馳擊竄據馬家堡我軍分路圍攻克之五月擊賊於馬營街殲擒甚夥旋因賊犯通渭城我

師倍道抄擊賊敗竄進攻伏羌雲霧山等處疊有斬獲六月敗賊於底店殲斃三百生擒三十餘奪獲器械無算七月賊據石峯堡負嶠固守我兵先於西北山包截其汲道復設伏堡口痛加殲戮擒賊目張文慶馬四娃楊墳四餘匪俘馘殆盡捷聞下部議敘五十四年補驍騎校五十九年升防禦嘉慶三年升佐領五年因城守尉烏靈阿將空缺馬匹草豆變價私修官學堆撥德楞額未經阻止降二級畱任十五年升協領二十三年授成都副都統二十五年卒子穆精阿二品廕生

右 國史館本傳

楊秀

楊秀貴州大定人乾隆三十三年由行伍拔補外委三十四年升把總三十六年隨攻金川三十七年以收復革布什咱功遷水城營千總三十八年攻克翁古爾壘等處賊巢擢黔西協右營守備三十九年進克達爾圖山梁奪獲碉卡敘功以都司升用四十一年金川平授陝西神木協都司四十四年遷江南壽春鎮中軍遊擊五十一年升直隸保定營參將五十三年擢湖南衡州協副將五十六年遷陝西延綏鎮總兵嘉慶元年湖北教匪滋事四月陝甘總督宜縣以商州接壤鄖陽檄秀駐商州防堵旋令赴襄陽爲巴東聲援五月首逆林之華覃家耀等屯聚長陽縣之榔平賊氛



甚熾。上以巴東兵力已厚，命秀赴榔坪會剿。未至，會鍾祥縣賊首姚之富糾眾滋擾湖廣。總督畢沅飭秀往援之。奏入，諭曰：延綏官兵本令前赴榔平搜捕林之華等。今據稱鍾祥地方緊要，調令該鎮順道前往堵截，亦祇可如此辦理。俟該處賊匪剿淨，仍令速赴榔坪。六月，率副將白守忠等分道進剿賊窟。鍾祥之香花園秀自樂豐驛追剿，設伏於東山口，又敗之。七月，偵知姚之富欲由臥牛山南竄，請濟師畢沅派總兵觀祥往助。八月，署廣州將軍明亮督師至鍾祥，飭秀偕觀祥扼土門衝要路。賊率三千人來撲，秀等併力抵禦，槍斃數十人。賊少，卻明亮督兵前據其險隘，賊潰。首犯秀營於西南，秀率兵出擊，觀祥等復邀之於東，北大敗之。

賞戴花翎賊別隊圍西北山岡欲劫糧臺秀用礮轟擊傷斃甚多賊移寨匡家衝明亮督兵躡其後豫令秀營於宋家衝賊至秀勝之賞加提督銜九月總統永保亦以師至秀隨同進剿連戰皆捷賞玉韉大小荷囊十月賊逸至河南滹河鎮欲渡唐河窺南陽永保令秀防唐河西岸賊眾數千亂流進秀擊退之十一月上簡京營兵會剿連破賊姚之富收合餘匪潛匿黃龍檔永保派秀防滾河各渡口官兵分三路蹙之賊捏稱難民於老凹灘偷渡諭曰楊秀係派在滾河專司防堵之員乃漫無查察致賊渡河竄逸著革職留軍前效力贖罪二年六月姚之富逸入川與達州賊首徐添德東鄉賊首王三槐等合湖北巡撫汪新派委赴川會剿

時各路賊匪分青黃藍白各號羅其清稱巴州白號冉文儔稱通江藍號屯踞方山坪九月秀隨署四川總督宜縣往攻氈帽山賊守甚嚴秀密令知縣呂朝恩等繞擊山後自攻其前克之餘匪奔方山坪宜縣率兵圍攻秀直趨山後之鷲平寺燬其巢賊驚潰我兵遂克方山坪捷 聞 賞加參將銜三年二月白號王三槐青號徐添德黃號樊人傑等欲由太平通江入陝總統勒保令秀守太平六月王三槐偪太平秀截退之七月總兵富森布追勦月藍號林亮功及太平界秀迎擊殺賊三百餘五年三月太平黃號龍紹周等偷渡嘉陵江擾四川總督魁倫調秀赴巴州南江一帶會勦七月補雲南提標中軍參將十一月以病休致二十五年卒子

朝樑直隸保定營守備天榮二品廕生

右 國史館本傳



國朝詩林類稿卷三十一

三

汪啟

汪啟四川西昌人乾隆三十二年由行伍隨征緬甸三十六年隨征金川累功拔外委把總升千總尋擢建昌靖遠營守備四十年以捕獲賊番奮勇受傷 賞戴花翎四十四年遷維州協右營都司 賞換花翎四十五年調左營都司四十六年率屯練兵隨剿蘭州逆回蘇四十三等有功四十七年升陝西鞏昌鎮遊擊四十九年四月逆回田五等復聚眾滋事啟隨固原提督剛塔擊賊於打喇赤土堡連奪其巢五月賊竄馬營街啟偕遊擊高人傑先往追剿大兵繼之擒賊屬男女三十二名口進擊馬家灣殺賊數十六月大軍圍攻石峯堡啟疊受箭石傷斬獲百餘人擒賊目李自

賞奏入、命以參將卽補十一月追議失察石峯堡匪徒滋事各員啟應革職 命送部引 見仍以遊擊補用五十一年補固原提標後營遊擊六十年升廣西鬱林營參將調剿黔楚苗匪尋遷廣遠協副將嘉慶二年二月苗疆平隨內大臣威勇侯額勒登保剿賊入楚首逆林之華覃加耀踞芭葉山啟從枇杷塘趨五尖嶺於密箐中突入殲戮甚眾燬其茅棚又擊之於高嶺頭右指被槍傷骨 賞大小荷包九月追剿歸州馬湖營山賊抵巴東高梁寨殲斃甚眾復受石傷三年三月賊首高均德等經官兵剿潰欲由雒南竄豫我兵分路抄截啟由藍田牧護關偏入兩岔河殲擒二千七百餘名戮僞元帥高大僞總管高二僞先鋒崔德友等餘賊

竄入秦嶺深林七月追勦入川賊奔蒼溪之龍感山啟帶兵三百堵山溝口官兵左右抄殺斃千餘人戮高逆族弟高玉春五年二月擢甘肅甯夏鎮總兵三月在陝甘界徽縣兩當等處防賊通棧道之路四月移駐川陝界桅杆石五道梁一帶並分防江口壘獲竄匪經略額勒登保奏 聞 上以汪啟堵禦認真尙未著有殺賊功效 命俟立功後再行保奏六月賊竄入甘啟移駐雷壩武關等處八月逆首楊開甲辛聰等竄李家店火燒店一帶啟恐其入棧率兵緊勦擒賊七十餘又偵至大壩溝李家灣搜獲一百八十餘名九月移駐鐵鑪川賊首曾芝秀由白家店山梁逸出棧道啟偕總兵德忠分路協勦斃七十餘人賊奔雷壩德忠扼江口賊



由獅子嶺竄整屋之二郎壩啟由藤牌溝折向梨園沿途屢有殺獲十月在甯陝廳四畝地鐵鑪川等處截剿伍懷志股匪十一月逆首冉學勝從瓦脊溝偷渡漢江北走四畝地寒風洞有與伍逆竄合之勢啟偕副都統綸布春由石泉銀杏壩一帶兜截賊由雷壩擾及棧道啟等躡及玉皇廟分路截剿擒斬七百餘名餘匪奔廢邱關十二月賊向商南圖東出武關竄河南界經官兵截回逸入太吉河魚洞河等處啟偕綸布春連次殲斃及墜巖溺水死者五百餘人又擊之於布政溝追及趙川戮七八百人擒四百餘名獲騾馬器械無數六年正月分防紫陽一帶龍紹周唐朋萬股匪從汝河口大力灘分撲江岸啟禦卻之五月冉逆復由石泉入紫

陽界撲瓦房店營卡徑趨江岸啟同協領德勒格爾冒雨迎擊斃  
五十餘人賊遁徐添德樊人傑二逆由西鄉竄黃瓜溪紅椿壩啟  
邀擊之徐逆奔仁河新灘溺死九月搜剿紅崖溝尙家壩零匪十  
月擊高見奇股匪於黃瓜溪疊有斬馘七年賊目黃爾星由西鄉  
入麻柳壩啟擊退之八年二月同將軍興奎搜捕巫山垵大梁擒  
賊目陳文海戮姚馨佐等七月三省肅清啟畱駐陝界之河口壩  
十二月殲通巴零匪於陶家洞分派弁兵寨勇排搜南江通江哨  
鳳樓海口壩等處餘匪淨盡九年赴本任十四年因失察所屬都  
司濫刑斃命且於補製軍械斤兩不符褫職二十四年 仁宗睿  
皇帝六旬萬壽 恩旨以守備補用二十五年卒

右 國史館本傳

樊雄楚

樊雄楚湖北襄陽人乾隆四十三年一甲二名武進士授二等待衛四十七年授山東撫標遊擊尋遷卽墨營參將五十一年升江西九江協副將丁母憂五十四年服闋補直隸河間協副將五十六年丁父憂五十九年服闋補江西袁州協副將嘉慶元年九月湖南苗匪滋事帶兵赴湖北歸州堵截各要隘十二月隨將軍惠齡擊賊於楓箱樹四年七月擊賊於黃草坪賊退屯八石坪八月賊由巴東湘泗嶺繞至房縣之五里坡雄楚馳勦之斬三百餘生擒石映蓮等二十九名餘匪由洛陽河竄九道梁又截擊敗之五年二月官兵追羅士青股匪至三座庵等處賊翻山遁會夜大雪



雄楚乘賊無備冒雪抄至河嶺兜剿賊前竄無路復折回官兵分道突出雄楚從中橫擊殺賊多名三月賊由白虎嶺折竄雄楚由罐子壩追至桃花店進攻土地嶺斬獲甚眾七月賊撲潘家寨雄楚偕參將德興等沿河進衝賊後隊殺四百餘生擒賊目黃駿業駱楊氏等並男婦二百餘名 賞戴花翎八月偕侍衛富翰等生擒賊匪鄭貴等三百餘名奪獲騾馬器械無算九月攻賊於徐家坪十月攻賊於上龕六年六月隨湖北提督長齡進剿范家壩十月進攻土地嶺十一月會芝秀股匪走巴東雄楚繞至界牌壩截其去路先後殲賊甚眾十二月追賊至天保寨斃五十餘名十年遷廣東高廉羅鎮總兵十五年搜捕高雷等處陸路餘匪會同水

師鎮將籌辦善後章程復查粵洋西路各島岸情形搜獲餘匪旋  
調浙江甯海鎮總兵因不諳水師畱於閩浙以陸路總兵補用十  
六年署建甯鎮總兵十七年以病就其子常州督糧通判學淦任  
所調理十八年豫東匪徒滋事經兩江總督百齡奏請帶兵前赴  
徐州堵禦十九年正月署徐州鎮總兵八月署狼山鎮總兵二十  
一年休致二十五年卒

右 國史館本傳



## 王占鼇

王占鼇四川新津人乾隆五十九年由行伍拔補外委六十年隨  
剿黔楚苗匪擒首逆吳半生在事有功遷把總 賞戴藍翎嘉慶  
二年正月以川陝楚三省教匪滋事隨欽差威勇侯額勒登保赴  
湖北長陽縣剿捕六月遷四川懋功營千總十一月剿首逆覃加  
耀於宜都縣朱里寨力戰受傷三年擢湖北武昌城守營守備四  
年八月川匪李淑辛聰等竄入楚李淑屯聚南漳縣界之歇馬河  
占鼇隨副將孫清元等分路進擊九月辛聰竄東湖縣高龍寺占  
鼇截擊賊退入南漳馬良坪官軍敗其後隊賊回拒占鼇等麾兵  
衝擊生擒賊目黃金國奏入 賞換花翎十月以竹谿縣增設營



卡總督倭什布派占鼇同都司孫應奉帶兵駐守五年二月黃號賊樊人傑之弟人貴擾房縣界之獐落河官兵駐黃龍堰賊乘夜撲營占鼇設伏以待賊至伏發獲人貴八月青號賊徐添德竄遠安縣之石馬槽孫清元等由蔡家灣追躡之占鼇偕侍衛富翰等前往策應斬獲甚眾得旨嘉獎九月徐逆遁入陝西洵陽白河縣境占鼇督兵追勦身受石傷上嘉其奮勉命以應升之缺升用十月藍黃白綠四號賊匪逃竄入川餘匪偽作難民混跡楚境占鼇等帶兵搜捕節次擒獲葉萬全等百七十餘名十一月遷江西鉛山營都司六年二月徐逆竄入竹山縣界圍太平寨占鼇復隨侍衛富翰等迎擊陣擒賊目張禮等三月賊偪南漳縣楊柳

寨占鼇隨副將王懋賞等以步隊進剿擒賊目李貴等徐逆遁入尹家坪陰雨連日伏不出官兵分路剿擊占鼇隨提督長齡取中路賊潰八月陝西賊匪王山經總兵穆克登布剿敗繞近湖北竹谿縣界占鼇偕侍衛呢瑪善夜撲賊營殲其眾十一月升河南南陽鎮左營遊擊時會芝秀戴家營兩股賊匪散竄房縣竹山界內會逆由八卦廟南遁占鼇伏兵老林截殺逸匪戴逆糾合川省青藍等號賊眾二千餘人竄踞白河口占鼇隨長齡由柏山坪西剿敗之 命交部議敘七年二月會戴各股逸匪屯聚高良坪長齡乘夜進兵占鼇由偏坡躡道進官兵隨入賊登高指麾招集矛手占鼇槍斃之賊眾驚潰生擒僞軍師楊茂林六月隨參贊大臣德

楊泰追勦樊人傑於馬盧坪賊勢窮蹙樊逆赴水死捷 聞 賞  
齊吉拉克巴圖魯名號尋擢江西吉安營參將十一月協勦賊首  
陳侍學於巫山巴東界內之黃泡池獲之九年以楚匪廓清赴參  
將任尋遷袁州協副將十八年丁母憂二十年服闋二十一年補  
江甯城守協副將二十四年升江南徐州鎮總兵官二十五年卒

右 國史館本傳

羅鳳山

羅鳳山浙江黃巖人嘉慶五年五月由行伍拔補外委九月遷黃巖鎮標左營把總剿賊於東日洋擊沈盜船擒王正等二人遷右營千總六年二月捕獲陳贊等於主山洋八月復獲沈秋等於三盤山洋八年隨總兵張成捕盜於大東洋躍過賊船手刃二人奪獲礮械無算九年復於琳門洋獲盜陳曉等多名十年擢江南蘇松鎮標中營守備十三年遷廣東澄海協中軍都司十四年朱渥盜船五十餘竄入沙港寄旋鳳山帶兵迎擊礮斃多人賊遁十五年遷廣海寨遊擊十七年擢水師提標中軍參將十八年遷香山協副將先後捕獲賊匪盧阿益等八十餘人二十年三月擢南澳



鎮總兵未赴任香山協左營米艇被劫總督蔣攸銛奏請視職  
上特宥之責令出洋緝捕鳳山督舟師捕獲首從各犯歐阿四等  
攸銛上其功九月仍命署南澳鎮總兵二十一年署水師提督  
二十五年五月實授南澳鎮總兵十二月遷福建水師提督道光  
元年二月獲盜張充於臺灣六月卒諭曰福建水師提督羅鳳  
山歷任水師鎮將著有勞績茲聞溘逝殊堪軫惜其任內一切處  
分著加恩寬免所有應得卹典該部察例具奏尋賜祭葬子邦  
華二品廕生

右 國史館本傳

國朝耆獻類徵初編卷三百十一目錄

將帥五十一

本智

伊昌阿

百祥

常祿

色玉慎

羅聲皋

張志林

孫大剛

王兆夢

蘇爾慎

高萬春

明敘

李廷臣

魏大斌

洪蕃鏘

成文

富登阿

張鑑



國朝耆獻類徵初編卷三百十一

通奉大夫前署江西巡撫江西布政使司布政使湘陰李桓  
將帥五十一

本智

本智劉佳氏蒙古鑲白旗人乾隆二十四年襲三等輕車都尉世職三十四年授印務章京三十八年兼公中佐領四十五年遷副參領五十五年升參領五十九年遷印務參領六十年遷鑲黃旗漢軍副都統尋授浙江乍浦副都統嘉慶八年調回京授鑾儀衛鑾儀使九年十一月兼公中佐領十二月兼鑲藍旗滿洲副都統十二年正月授直隸天津鎮總兵九月以糧船不戒於火未請議



處 諭日本智係天津鎮總兵所有入境軍船均所管轄乃不能  
隨時防護尙復卸過不言著交部議處尋議降調 上加恩改爲  
畱任十三年三月 賞戴花翎七月請添建北倉兵房 允之十  
四年調京營右翼總兵兼鑲黃旗漢軍副都統十五年七月調正  
藍旗滿洲副都統十一月兼理藩院右侍郎十二月以民婦馬譚  
氏母女白晝被殺日久未獲兇犯部議革職 上改爲降二級畱  
任十六年三月失察鑲白旗滿洲馬甲慶幅緹城入倉盜賣米石  
復降一級畱任閏三月授直隸秦甯鎮總兵六月以前在右翼總  
兵任內失察地方匪徒局賭及其家轎房聚賭 諭日本智雖逾  
六旬伊前任右翼總兵係屬武職卽理藩院侍郎亦非六部侍郎

可比本不應坐轎伊於總兵任內犯賭各案已有失察之咎伊驕  
夫又有開局聚賭之事獲咎較重著交部嚴加議處卽來京聽候  
部議尋如部議革職畱世職在本旗當差七月授察哈爾副都統  
十七年以奸民縛毆牧丁夥劫官牛失於覺察部議降調 上加  
恩改爲畱任十八年擢廣州將軍失察驍騎校與亮私販鴉片煙  
復降一級畱任二十三年調江甯將軍道光元年二月 召回京  
授正黃旗漢軍副都統管理火器營七月扈 蹕謁 西陵卒於  
途次 諭曰本智在途溘逝朕心甚爲憫惻著加恩將任內降罰  
處分悉予寬免應得卹典該衙門察例具奏並准其入城治喪尋  
賜祭葬子承惠一品廕生龔三等輕車都尉官刑部員外郎

右 國史館本傳

伊昌阿

伊昌阿烏勒甲特氏蒙古正紅旗人乾隆四十九年由健銳營前鋒隨參贊大臣復興勦甘肅石峯堡逆回奮勇殺賊事竣敘功名列超等五十年升副前鋒校五十七年擢前鋒校嘉慶元年隨勦湖北邪匪二年由楚入陝時姚之富股匪竄陝境之澇峪口伊昌阿隨荊州將軍興肇帶兵在塔寺溝迎擊斃賊百人擒百餘人授額外委前鋒參領三年七月補委前鋒參領九月升副前鋒參領六年二月升廣東羅定協副將六月再學勝股匪竄至孫家坡小雙河口伊昌阿隨提督楊遇春分路進勦殲斃多名賊遁復追殺三四百人伊昌阿身受矛傷賊首伍懷志在漢江北岸率其黨將



由舊縣關東竄總兵穆克登布督兵勦捕擒伍逆於一層巒全股肅清伊昌阿在事有功賞戴花翎十月樊人傑苟文明唐大信及藍白等號賊匪竄至花石溝盤踞分黨在廟埡子坡下圍攻民寨穆克登布檄伊昌阿赴花石溝口阻賊來路我兵先勦攻寨之賊大敗之賊竄回花石溝日伊昌阿殲斃數十人進擣其巢復斃百餘人七年二月穆克登布督勦戴家營股匪於漳河口伊昌阿同遊擊王成傑等在硝洞溝阮家溝等處分路扼截斬獲無算九月分帶減撤廣東官兵回營九年擢雲南開化鎮總兵道光元二月命來京七月行至河南卒

右 國史館本傳



百祥

百祥烏朗哈爾吉們氏蒙古鑲白旗人乾隆四十四年由藍翎長  
授前鋒校四十九年遷前鋒參領五十一年投陝西督標右營參  
將五十四年遷靜甯協副將嘉慶元年三月以川楚邪匪滋事陝  
甘總督宜縣派往湖北竹山縣剿賊收復縣城五月由興山前往  
長陽堵禦七月會勦孝感縣屯聚之賊匪悉殲之 賞戴花翎十  
二月擢四川重慶鎮總兵二年三月勦賊於巴州王家寨克之生  
擒逆首冉文儔之胞兄文傑殲賊三百餘人 賞加提督銜五月  
帶兵二千駐劄大羅坪扼要防守 賞玉韞大小荷包及洋玻璃  
盒八月攻賊於方山坪九月偕副將雷仁等搜捕長灘河一帶賊

匪殲戮甚眾十月賊由通江圖竄入陝百祥等縱兵迎截賊竄據巴州南背山百祥星夜繞出賊前與總兵富爾賽朱射斗三路夾攻殲斃七百餘人生擒八十六名復蹙之於馮家山殲二百餘人會雨甚賊遁去冒雨追躡敗之於排埡口聞巴州被圍乘夜馳抵河岸接戰竟日賊由巴州竄保甯折向蓬州營山縣百祥與富爾賽至石山鋪賊來拒分路擊之由石山鋪繞赴渠縣大竹一帶偵知賊攻營山縣城甚急偕富爾賽往援先後殲賊二千餘人十一月賊首王三槐竄至渠縣百祥偕總兵索費英阿倍道迎勦於廣安州踰水橋敗之十二月又偕署同知李在文擊賊於華蓋山擒斬多名經總統勒保飭百祥帶兵一千馳赴重慶防禦三年正月

中黃茅嶺進抵邵家場自卯至酉追逐五十餘里殲擒無算旋  
賞喜字玉鍊大小荷囊二月賊眾偪太平百祥等由豆坪寺白沙  
河兜剿賊復折向通江追至茶尖坪擊之三月賊屯踞巴州河白  
山寺分趨永興場將窺渠縣百祥等先派兵伐竹密爲預備乘夜  
雨於上游花石磐設礮轟擊下游沙溪灣紮筏徑渡分兵兩翼直  
搗賊營出其不意克之又斜趨車谷山擊散山溝內伏賊搶上磨  
子溪對面山梁殲獲甚眾遂由黃柏溪搜剿前進五月遇賊於觀  
音巖石梯關鐵索橋等處亦多殲戮八月進攻安樂坪拔其木城  
奮力截殺值兵勇四面兜圍首逆王三槐就擒尋剿匪黨冷添祿  
至亂若窩撲卡擊賊並分攻祖師觀賊寨十月賊來撲營與富爾

匪類猖獗者元... 卷三十一  
三  
資夾擊之十二月剿賊於溫湯井四年焚老鸛嘴賊巢復於紫水  
壩元壩驛等處追躡五年四月派往龍安堵禦賊由甘境竄入南  
坪過象鼻關至平武縣葉堂堡焚劫 諭曰百祥係派在龍安防  
守何以任賊匪由甘竄入著勒保查明此股賊匪如在百祥防守  
地方縱令入川卽將百祥革職拏問按律治罪儻實因該處山徑  
叢雜賊匪竄入之路與百祥相距尙遠將該路防堵官員革職百  
祥係督防大員仍應嚴參懲辦時有由番地竄入川境賊匪高二  
馬五等僞立三色旗號屯聚舊堡子百祥截之於野狐山閏四月  
復擊之於豆口寺賊眾分股散竄內有黃旗號賊欲折竄回甘百  
祥擊敗之賊由王家灣躡淺渡河爲我兵追截淹斃甚多勒保慮



匪眾深入番地分軍爲三親率一軍由東北而進一軍由南令百祥由西北一路兜剿賊由崖溪溝翻山而逸躡之於平家崖溝內伏匪突出奮力抵禦適遇搜山官兵兩路掩殺追剿三十餘里斃賊百有餘時龍安境內餘賊將奔竄石泉百祥與副將薛大烈追剿四十餘里於徐坪壩大敗之五月高馬二股賊匪由滾水河危家壩奔逃百祥馳赴龍安督同土官等扼要堵剿旋由小河營追至三舍迎截賊匪因官兵緊逼由羊肝山併力撲營參將增順不能抵禦賊遂回踞南坪先是賊匪竄入川境上命勒保查明具奏至是以該鎮係督防大員本難辭咎惟與賊匪竄入之路相距較遠見因帶兵乏人請將百祥革去提督銜拔去花翎諭曰百



祥係帶兵龍安一帶督防大員前此賊匪自甘竄入川境已難辭咎今於增順疏縱賊匪又不能預爲督率防範僅行革去提督銜拔去花翎不足蔽辜百祥著降爲參將戴罪效力尋與阿哈保帶兵五千赴甘剿賊六月同遊擊張超追剿餘匪於徽縣馬鞍巖罐子山椿樹壩等處及東岔河敗之奪獲器械無算八月參贊大臣德楞泰奏山東萊州營參將員缺請以百祥補授 諭曰百祥本係總兵前在龍安一帶防堵不力又因該管參將增順疏縱賊匪不能預爲防範將伊降爲參將數月以來並未見出力打仗著有勞績何得與應補人員一例請補卽該員果知愧奮殺賊立功亦當候朕特旨加恩況伊見不在川豈有輒行奏補之理所有百祥

補授參將之處著不准行六年正月補陝西波羅營參將尋升定邊協副將署陝安鎮總兵八年遷涼州鎮總兵十一年擢甘州提督十二年勦辦大通縣賊番在事出力經都統興奎保奏 賞還花翎十四年以署提標參將楊殿弼冒領缺額馬乾銀百祥未能查明經陝甘總督松筠奏參褫職遣戍烏魯木齊十五年 賞藍翎侍衛充和闐幫辦大臣十六年二月 賞三等侍衛充葉爾羌幫辦大臣三月充辦事大臣十九年回京在三等侍衛上行走二十五年以疾解任道光元年卒子克興額理藩院郎中吉謙內閣中書福通藍翎侍衛

右 國史館本傳

日本書紀卷之二十一

十一

常祿

常祿齊普齊特氏滿洲鑲白旗人嘉慶三年三月由護軍校補山東范縣營守備六月升山西太原鎮標右營都司十一月隨理藩院尙書惠齡等圍勦巴州白號逆匪羅其清於大鵬山寨分路設伏乘夜進攻克之羅逆竄清觀山官兵跟蹤追擊賊復占據山梁恃眾抗拒有負嶠之勢常祿等奮勇直前合力仰攻賊鋒披靡我兵乘勝兜截殺賊三百餘人焚其巢常祿受槍傷十二月生擒羅其清敘功 賞戴花翎四年升陝西略陽營遊擊五年十一月川匪將竄陝境常祿隨總兵楊奎猷分路防堵十月襄陽黃號股匪辛聰竄近兩河口常祿駐守巫山垵乘勢奮擊賊窮蹙竄映水壩



我兵尾追之生擒賊目黃勇林羅宗正餘黨潰散尋襄陽白號股  
匪楊開第通江藍號首逆冉文儔復糾眾嘯聚互爲策應分路撲  
營常祿率兵截擊四面圍攻賊死拒麤戰官兵鼓勇衝殺大敗賊  
眾奏入得 旨嘉獎七年升山西新平路參將八年分防鐵爐壩  
帶兵接緝餘匪執賊目陳文海於巫山埡老林尋升貴州遵義協  
副將十年擢古州鎮總兵十二年調陝西延綏鎮總兵十八年署  
固原提督十九年調甘肅西甯鎮總兵二十一年因病陳請開缺  
道光元年卒子額勒登文舉人

右 國史館本傳

色玉慎

色玉慎赫舍里氏滿洲鑲黃旗人乾隆四十九年由前鋒授藍翎侍衛五十五年擢三等侍衛五十七年升二等侍衛嘉慶四年七月命赴四川軍營勦辦教匪十一月隨經略額勒登保勦首逆徐添德冉添元焚人傑等於巴州馬板灘賊踞何家院山頂色玉慎率眾登山賊攢矛下刺猝受重傷上憫之擢頭等侍衛五年二月勦張添倫股匪於甘肅兩當縣二郎壩賊屯聚深溝色玉慎等急古山梁賊不得上官兵三路進攻斬獲甚眾四月楊開甲辛卯宋麻子三股賊匪竄至陝西雒南縣將入河南境色玉慎率都司吳廷剛等追擊之於輝峪砦殲擒一千三百餘人獲槍械旗幟

驟馬無算又攻張添倫戴四等股匪於維南之兩岔河殲數十人  
賊奔南麻街黃柏岔復連敗之擒偽副元帥徐添俸等閏四月首  
逆張漢潮餘黨劉允恭劉開玉等掠洵陽之大中溪小中溪色玉  
慎偕提督楊遇春等由兩河關繞赴大中溪口設伏捉賊出路額  
勒登保帥師攻其背賊奔溪口伏兵出盡殲之下部議敘五月勦  
首逆伍金柱於鎮安手板崖賊踞左右山梁色玉慎偕副將豐伸  
等從右山梁後澗之下賊伏於溝以劈山礮擊之轟斃無算擒偽  
副元帥白士淮餘賊奔銅錢窖色玉慎由花樹灣趨小銅錢窖會  
各路兵截殺斬獲五千餘人戮首逆龐洪勝擒其子有兒 賞伊  
清阿巴圖魯名號並銀百兩六年四月高二馬五由甘肅趨四川

龍安縣色玉慎偕楊遇春等於二郎壩三面設伏賊至萬弩齊發賊子馬秉泰秉金秉明僞元帥朱泗林等悉就擒餘黨斬獲無遺五月冉學勝股匪竄至洵陽之高唐嶺劉家河一帶色玉慎偕副將楊芳等由中路進擊斃賊二千餘人擒僞元帥陳國倖僞副元帥張善等獲騾馬七百餘匹事竣回京十二年賞副都統銜授呼倫貝爾總管十六年充巴里坤領隊大臣二十三年授墨爾根副都統道光元年卒孫瑚連德二品廕生

右 國史館本傳





羅聲皋

羅聲皋四川雙流人乾隆五十二年由行伍授提標右營外委五十四年遷維州協左營把總嘉慶元年四川總督孫士毅帶赴湖北軍營勦來鳳旗鼓寨賊匪臂受槍傷升永甯營千總二年攻建始芭葉山二壠口賊卡耳受箭傷遷江西建昌營守備進攻大壠口右手受槍傷 賞玉韞大小荷包調四川越嶲營守備三年經四川總督勒保調回達州勦白號賊首王三槐屢立戰功升梁萬營都司四年隨副都統銜額勒登保勦青號徐添德白號冷添祿股匪敗之於墊江雲臺鋪手受槍傷遷靖遠營遊擊五年正月升提標中軍參將七月勦藍號賊冉添士於南江長池壩與遊擊

馬斌等奮勇擊賊破之 賞戴花翎十二月白號賊楊開第自渠  
縣竄入巴州聲皋隨勒保沿途襲擊疊有斬獲六年三月同副將  
田朝貴等擊藍號賊於南江桂門關殲僞元帥曹世倫五月同副  
將永甯等追白號賊湯思蛟劉朝選至湖北竹山柳林店俘斬千  
餘人青藍號賊擾東鄉隨總兵薛大烈等擊之於華尖壩殲藍號  
僞元帥鮮倬先苟文通擒青號僞元帥何子魁七月隨副都統阿  
哈保攻青藍黃號賊匪於巴州石塽山擒徐添德弟添壽及賊目  
王登高 賞濟特庫勒特依巴圖魯名號八月白號張見奇股匪  
竄通江盧家灣與藍號賊冉學勝合聲皋與阿哈保等分兵掩擊  
殺賊九百餘人擒冉學勝下部議敘十一月白號賊蕭焜竄太平

白崖峒偕副將張績擊擒之十二月黃號餘黨屯太平茨竹溝薛大烈派聲皋由花角園進攻大兵繼其後擒賊首葛士寬王朝安僞總兵王學書等七年正月升督標中軍副將三月白號僞元帥張簡合湯思蛟股匪由東鄉太平壩走樟木溝聲皋偕副都統銜達斯呼勒岱追擊百餘里擒旗手李大礮等四月復偕達斯呼勒岱搜勦老生園楊家壩一帶賊匪獲白號賊首張子聰子廷桂僞先鋒李開元張學貴抵華尖壩遇總兵田朝貴等沿河追勦青白二號餘匪聲皋等合兵蹙之賊淹斃者百餘人擒湯思蛟弟思武及僞先鋒馬金保僞總兵周明禮追至太平梧桐坪又擒其僞總兵汪貴五月白號賊首庾向瑤率餘黨七八十人竄回東鄉鳳凰



山聲皋等分兵圍捕盡殲之獲度向瑤得旨嘉獎下部議敘六月偕達斯呼勒岱搜剿東鄉開縣餘匪殲白號賊首亢士洪擒賊目羅元昭王曰學周志連朱世華時川境賊匪漸就肅清有楚匪竄入雲陽境內聲皋與達斯呼勒岱馳往堵剿攻賊於閻王塢射斃黃號賊首賴飛隴餘眾四五百人悉就殲獲九月湯思蛟復由楚竄川聲皋率兵追擊敗其眾於東鄉麻壩寨搜獲思蛟於芝包口村店中疊奉恩獎下部議敘十一月偕副都統達勒精阿等會剿黃藍線三號賊匪擒藍號偽總兵何添秀於通江木蘭坪殲黃號偽元帥黃如巡擒偽先鋒劉連伯於南江沙溪場八年六月復赴雲陽搜捕零匪擒青號賊目張朝隴李明學七月三省平調

赴達州辦理凱撤兵勇事務九年回任十三年隨總督勒保赴馬邊廳勦辦涼山夷匪攻曲曲烏夷寨克之 賞加總兵銜十四年授重慶鎮總兵十九年調松潘鎮總兵二十年中瞻對野番滋事聲皋帶兵往勦攻克滄龍溝賊寨殲番目雍巴等番酋洛布七力乞降聲皋受之撤兵歸總督常明劾其辦理輕縱請革職 諭曰中瞻對番酋洛布七力連歲侵擾各部落並敢拒傷官兵情罪重大必須勦辦示懲乃羅聲皋率聽洛布七力畏懼兵威之詞遽准所請遣令回巢卽一面撤退官兵專擅糊塗辦理錯謬並恐有受賄情弊羅聲皋著革職擊問交該督嚴審定擬具奏常明尋奏聲皋實未受賄援殲雍巴功求免治罪 諭曰羅聲皋獲咎甚重豈

能以小功恕其大罪著枷號軍前俟事竣發往伊犁效力贖罪二十一年到戍二十四年釋回道光元年故子應魁四川綏甯協副將

右 國史館本傳

張志林

張志林四川縣州人乾隆三十六年由行伍隨征金川有功授松  
潘鎮標小河營外委四十年二月升中營把總攻克噶爾丹寺及  
喇嘛寺勒烏圍官寨等處 賞戴藍翎十一月升右營千總時大  
兵攻克噶拉依賊巢志林生擒索諾木家屬下部議敘四十一年  
署行營中軍守備駐兵美諾辦理屯防事宜四十九年甘肅逆回  
田五等聚眾滋事志林率屯兵赴剿殺賊受傷事竣得 旨以守  
備升用五十年補建昌鎮標左營守備旋調松潘鎮標中營守備  
五十二年八月臺匪林爽文圍嘉義縣志林隨將軍福康安往勦  
十一月圍解 賞換花翎五十三年林爽文就擒志林以功優敘



五十五年升四川維州協左營都司五十六年隨大將軍福康安  
追剿廓爾喀以攻撲礪卡屢著戰功得 旨加一等升用五十七  
年擢松潘鎮左營中軍遊擊事平因藏中新設番兵畱志林駐防  
訓習秩然有條先是唐古忒地方毗連外番界址不甚分明易致  
爭擾志林隨駐藏大臣和琳沿邊履勘一律堆設鄂博各界清釐  
闕 志林等至下染新寨克之奪卡七賊眾既散復聚又敗之帶兵  
二百名駐防黔省後路嘉慶二年克復乾州志林駐平塊防堵尋  
以傷發回川五年四月剿捕松龍一帶教匪由巴都河行抵磨壩  
山溝適藍白等號賊眾自家定堡竄出欲奔安縣迎擊之五月升  
阜和營副將隨總督勒保追剿白號賊匪行抵舊關偵知老林有

伏分路進攻生擒楊開陽等五十餘名殲斃百餘大兵乘夜直趨  
新寨生擒賊目白朝貴及餘匪二百餘名奪獲器械無算九月擢  
廣東高廉鎮總兵仍防禦松龍一帶六年正月勒保以嘉陵江爲  
川省西南門戶賊屢窺伺檄志林與總兵許文謨防禦是月賊匪  
樊人傑等自陝入川謀渡嘉陵江我兵擊退之志林等復敗賊高  
二於昭化縣之桔柏渡十二月雲陽萬縣餘匪滋擾志林於忠州  
屬之萬金灘剿之殲斃百餘生擒僞元帥何贊古復於大竹達州  
開縣雲陽等處搜剿餘匪殺獲無算七年五月雷波廳屬之猓夷  
滋事志林馳往協剿事平畱辦善後事宜八月調四川建昌鎮總  
兵八年查辦馬邊廳生番夷務下部議敘九年甯越廳屬逆夷庚

兒等聚眾焚掠志林督兵生擒之 上嘉其辦理妥速道光元年  
卒子長庚二品廕生見官通判

右 國史館本傳

孫大剛

孫大剛浙江鎮海人乾隆四十七年由行伍擢定海鎮標左營把總五十四年升提標右營水師左哨千總五十八年遷乍浦右營守備嘉慶元年升黃巖鎮標右營遊擊三年四月隨總兵岳璽殲獲在洋首夥各盜巡撫玉德奏入 上嘉之七月在東西柱外洋緝拏疊劫盜犯大剛偕遊擊余金彪等躍過盜船殲擒盜犯四十餘名獲盜船三五年遷福建烽火門外海水師參將六年升廣東順德協副將七年擢福建海壇鎮總兵九年以溫州鎮總兵胡振聲攻捕洋匪蔡牽被害大剛等援救不力下部嚴議部議革職諭曰此案失於救援之總兵孫大剛本應照部議革職姑念該省



見當追捕洋匪之時若將水師各員槩予革職未免均換生手孫大剛著加恩改爲革職畱任如伊等果能感奮將逆犯早行擒獲不特予以開復尙當另加恩獎儻仍前怠玩卽著該督嚴參治罪十年蔡牽盜船自臺灣內竄大剛隨浙江提督李長庚追至三盤洋面奮勇爭先迴環攻擊燬盜船一擊沈盜船二生擒彭求等二十八名十一年因遊擊陳振元縱容堂弟陳茂充兵聚賭兵丁許元陞盜典軍裝等事並不據實揭參部議降三級調用得旨大剛僅止失察於先其後仍復列款具稟尙非有心徇隱改爲革職畱任十二年六月蔡逆幫船由粵竄回閩省北洋往來大剛率署參將周國泰等在馬齊外洋及七星洋面擊沈盜船淹斃賊匪無

數並生擒賊夥王松等二十七名擊斃穿紅馬褂賊目一名 上  
以大剛尙屬奮勉下部議敘十月在迨山洋面追擊蔡逆坐船因  
逆船上挂牛皮魚網重疊遮護槍礮難入僅止傷斃從賊多名蔡  
逆又向東南外洋逃逸經閩浙總督阿林保奏入 諭曰蔡逆匪  
船經官兵南北追捕總未追及今孫大剛等業經追及稱該逆坐  
船有牛皮魚網重疊張挂是以攻打不能得力致又任令免脫所  
言殊不足信焉知該鎮等非因攻打不力賊船遠颺藉詞推諉卽  
使該逆坐船真有牛皮魚網遮護亦必有破之之法見在兵船內  
各處俱有賊營投首出洋圖救之人伊等稔知賊船情事卽可向  
其詳細詢問牛皮魚網如何卽可攻破果能銳意設法進攻何堅

不入豈得束手無策任其逃遁見既探明蔡逆幫船由北竄過鼓嶼洋面南下務當查探確蹤大加剿辦殲擒巨憝不可稍涉鬆懈爲要十三年正月阿林保奏提督李長庚率同大剛等拏獲蔡逆之子蔡三並曾受僞職拒敵官兵之逆犯鄭昌先是蔡逆賊船潛泊温州洋面因瞭見兵船趕到向南逃逸經大剛等連夜追及蔡逆本船乘風注定奮力攻剿自辰至戌直追至閩省之黃岐洋面路行一千餘里逆船之板片大蓬均被官兵用礮擊壞殲斃賊匪無算蔡逆已將次就擒適因三更後忽起暴風兵船不能攻剿暫行收泊上命李長庚統率各鎮兵船卽由莆田洋面緊力駛追勿予以暇五月蔡逆遠竄粵洋有分幫匪夥在閩洋潛匿出沒肆

劫阿林保檄飭大剛等各帶兵船分路剿捕獲盜船七殲斃無數  
生擒二百餘名下部議敘七月蔡逆由粵洋遁入夷洋改換烏底  
大艇竄回閩界令賊目不懂消駕坐快船在前駛探官兵消息並  
招集畱閩夥黨經大剛等追及生擒賊目不懂消並奪獲艇船礮  
械得旨嘉獎諭阿林保向所獲賊目根訊蔡逆實在情形巡  
撫張師誠尋奏蔡逆從烏底船上搬過白底船駛近澳口經官兵  
連轟大礮擊中逆船尾樓該逆驚懼急招各夥船向東北外洋竄  
去得旨所有捕盜等事卽責成孫大剛暨署提督周國泰督率  
兵船合力攻剿毋得貽誤九月蔡逆由嶺山一帶竄脫入閩阿林  
保奏請將專辦該逆稽延之總兵分別示懲諭曰此次蔡逆竄



入浙洋總兵周國泰孫大剛係專辦該逆之人所帶兵船多於賊船數倍又有浙省舟師與之夾擊乃該鎮等毫無振作仍復一味遷延若不明示創懲賊匪何時辦竣孫大剛著降爲參將銜暫留護理總兵印務戴罪緝捕以觀後效如果各知愧奮認真出力將來尙可恩施如再有畏葸恇怯情事並當從重治罪十四年三月蔡逆船自北洋南竄至竿塘洋面大剛督率兵船追捕斃賊甚多並擊斃蔡逆船內穿紅賊目一名匪船連夜奔逃復追及於北茭洋鉤翻賊船一隻並擒獲多名四月在崇武洋面截擊蔡逆盜船大剛身受槍傷仍督率弁兵攏近賊船斬殺多名 上以大剛出力俟再殺賊立功卽行保奏五月大剛率弁兵在白犬外洋圍剿

蔡逆船隻攻沈盜船一傷斃甚眾逆船蓬索俱盡狼狽脫逃九月  
隨提督王得祿於魚山外洋督率水師圍攻逆船蔡逆受傷落海  
淹斃捷 聞 賞還總兵原職仍 賞戴花翎十五年剿除閩洋  
餘匪大剛偕溫州鎮總兵李光顯在石訓保洋獲盜船一生擒首  
逆夥陳據等四十六名十六年在祥芝外洋獲匪船一生擒盜犯  
許智明等十四名十七年九月閩洋盜首吳屬率夥眾五百餘人  
呈繳盜船九隻在大剛舟次顛懇投首總督汪志伊入奏 上命  
免死發往黑龍江安插十一月偕提督王得祿於壁頭內港捕獲  
匪犯陳加舵等四十五名匪船三十八年正月在洋緝獲盜犯許  
又等五名何平等九名查拏小船草湖匪犯並赴罄山各禁島

搜獲匪犯楊安美等八名蔡十四一名三月偕黃巖鎮總兵叻恩  
詔緝獲匪犯邱金等十六名盜船一道光元年卒子奉堯候選知  
州鼎鼐浙江乍浦左營千總

右 國史館本傳

王兆夢

王兆夢江蘇陽山人由世襲雲騎尉學習期滿以守備選用乾隆五十九年選廣東陸路提標中營守備嘉慶二年升廣西慶遠協中軍都司時川陝楚教匪滋事兆夢奉檄調赴陝西軍營四年三月殲滅賊首冷天祿兆夢在事出力有功 賞戴花翎十月遷廣東潮州鎮標中營遊擊五年五月升增城營參將七月賊匪張添倫爲官兵剿敗與伍金柱冉學勝諸賊合由秦州東竄總兵慶成帶兵迎擊兆夢偕副將游棟雲白山梁下壓賊潰遁乘勝追躡復殺賊二百餘人十月遷廣西廣遠協副將七年以殲斃賊匪苟文明功下部議敘八年閏二月擢甘肅肅州鎮總兵八月調陝西陝



安鎮總兵九年三省平下部議敘十一年七月甯陝鎮新兵陳達順等叛陷洋縣欲趨石泉八月兆夢率兵往援督同署知縣陳澍移民入城僉丁協守賊來攻兆夢擊斃偽戴翎頂賊目二人並從賊百名賊退城獲安十二年本鎮瓦石坪汛新兵周士貴等叛旋剿平之以兆夢失於防範部議降調 上加恩改爲畱任十五年丁母憂十七年服闋十八年補廣西左江鎮總兵十九年擢廣東陸路提督道光元年卒 諭曰王兆夢前在軍營著有勞績茲因患病溘逝殊堪軫惜著加恩照提督例賜卹任內一切處分悉予開復應得卹典該衙門察例具奏尋 賜祭葬 予諡勇慎子廷彥一品廕生

右 國史館本傳

國史館本傳

三

皇朝通志卷之二十三

三

--	--	--	--	--	--	--	--	--	--

蘇爾慎

蘇爾慎蘇都里氏滿洲正黃旗人黑龍江駐防乾隆五十六年隨征廓爾喀有功 賞空藍翎嘉慶二年赴四川軍營剿賊五年三月授三等侍衛改隸京旗時線號逆匪合各股竄入重華堰蘇爾慎隨參贊德楞泰兜剿於火石埡射首逆冉添元墜馬生擒之擢二等侍衛在乾清門行走十一月進攻大埡口蘇爾慎以索倫兵衝入賊隊斃十數人身受矛傷 賞西林巴圖魯勇號六年四月躡賊至紅花埡時分兵爲三總兵蒲尙佐等由左馬瑜等由右蘇爾慎從德楞泰自中路進殲獲四百餘人追至鯽魚埡復大敗之賊竄入陝境屯聚黃石坂蘇爾慎偕吉林前鋒委官法靈阿先衝



賊陣生擒藍號僞元帥龐士應僞總兵方文魁 上嘉其奮勇  
命以應升之缺升用五月賊匪徐添德等東竄洵河蘇爾慎追之  
沿途擒斬甚眾至仁河新灘添德赴水死九月馳抵洛陽河搜剿  
藍號餘黨多有斬滅十月剿賊於岳家坪乘夜冒雪掩擊時黃號  
賊匪龍紹周就殲餘黨搜剿無遺十二月偕副都統銜色爾滾斬  
賊匪苟朝獻於木耳巖七年二月復偕色爾滾等率兵勇二千餘  
由巫山登舟順流而下三月攻鳳凰山蘇爾慎等繞上二臺坪從  
旁突入擒斬百餘人四月官兵兩路進攻雞公梁蘇爾慎等從石  
路迎剿殲獲多名六月擊賊於興山桂連坪蘇爾慎等因路徑險  
窄率吉林索倫兵棄馬步行而進自午至申搶上山梁直搗其巢

賊潰遁十年凱旋十四年升頭等侍衛十八年逆賊林清倡亂以  
在禁城勦捕出力 賞加副都統銜及西林達春巴圖魯勇號並  
下部議敘時河南山東教匪作亂 命蘇爾慎爲領隊大臣帶巴  
圖魯侍衛四員赴山東協勦十月巡撫同興奏蘇爾慎與護軍參  
領福英阿等到營 諭曰此數人皆可一人當百蘇爾慎更爲出  
眾必須好馬乘騎斷不可令其步戰保護愛惜用之尋勦平曹州  
武定賊巢十一處得 旨嘉獎下部議敘事定回京十九年授鑲  
紅旗蒙古副都統因凱旋時攜帶軍營幼孩部議降調 上加恩  
改爲降三級畱任二十二年充上書房讀達二十四年 上幸熱  
河途中所乘馬蹶蘇爾慎控止之擢鑲藍旗蒙古都統二十五年

八月 賞紫禁城騎馬道光元年 上詣 昌陵校尉爲蘇爾慎  
馬所突致 御輿落肩革部統及 御前侍衛補藍翎侍衛二年  
二月以病請解任 賞二等待衛休致三月卒 諭曰蘇爾慎因  
病不能當差賞二等待衛休致蘇爾慎前在軍營著有勞績茲因  
病故普加恩賞給副都統銜所有應得卹典該部察例具奏尋  
賜祭葬子多斯輝黑龍江佐領

右 國史館本傳

高萬春

高萬春貴州貴陽人由武舉入提標學習期滿以千總用乾隆六十年黔楚逆苗滋事隨雲貴總督福康安赴銅仁軍營勦平松桃等處克復圍城殲首逆石柳鄧擒賊渠吳半生萬春俱在事有功賞戴藍翎嘉慶元年補黔西協右營千總時川陝楚教匪不靖隨一等威勇侯額勒登保赴湖北軍營攻克四方臺中保等寨三年調赴四川軍營協勦羅其清王三槐等賊匪四年四月升威甯鎮標左營守備仍畱軍營十月遷上江協左營都司五年正月遷下江營遊擊八月賊匪伍金柱竄甘肅成縣欲掠階州官兵分三路截之萬春由左路抄擊殺賊甚眾六年正月賊匪高二馬五等據



陝西紫陽縣鳳凰山官兵至賊眾飛石如雨萬春奮勇登山身冒石傷直前撲殺官兵乘勢殲賊千餘擒八百人奏入 賞換花翎三月賊匪高二等由白玉河奪竄官兵進抵龍池場萬春領兵別爲一路剿賊四百餘人擒百餘人十月賊眾屯紫陽縣三里寨萬春隨總兵豐伸往剿帶兵六百先擊賊寨賊潰遁官兵分路進擊萬春從中路衝殺擒賊渠高見奇及僞元帥周萬友等官兵繼之殲斃三千餘人下部議敘因左臂石傷不能卽痊由經略大臣額勒登保奏 聞 諭令回黔調養辦理本任營務十五年遷雲南順雲營參將十八年緬甯夷匪張輔國滋事經雲貴總督伯麟檄調往剿擒之下部議敘十九年擢龍陵協副將二十一年署普洱

侯總兵道光元年補鶴靈鎮總兵二年正月調昭通鎮總兵十月  
卒子繼魁貴州提標右營把總有恭二品廕生光祿寺署正

右 國史館本傳

RECEIVED IN THE OFFICE OF THE  
SECRETARY OF THE ARMY  
JUN 19 1944

明敘

明敘博爾濟吉特氏蒙古鑲黃旗人由健銳營教習期滿議敘以  
中書用嘉慶三年補內閣中書充 實錄館纂修官八年以 實  
錄館議敘列超等 賞額外主事籤分戶部十一年補主事十三  
年升員外郎十五年升郎中十八年遷內閣侍讀學士充文穎館  
提調官二十年 聖訓清文告成下部優敘二十一年轉大理寺  
少卿二十三年七月升光祿寺卿十一月遷內閣學士兼禮部侍  
郎銜尋授鑲白旗漢軍副都統十二月充經筵講官二十四年正  
月擢盛京工部侍郎十一月 賞副都統銜作爲喀喇沙爾辦事  
大臣道光元年奏請改撥軍臺回戶地畝略言喀喇沙爾所轄軍



臺當差之回子前准撥給開都河北荒地五頃烏沙克他爾屯工  
餘地六頃令其耕種以資貼補惟此項地畝土脈鹹薄水澤缺乏  
不敷灌溉且向由本城派撥回子代爲耕種長途往返尤形苦累  
似宜量爲變通請將此項地畝耕種停止照數改撥庫爾勒各愛  
曼隙地五百餘畝布古爾各愛曼隙地六百餘畝令其開墾耕種  
再查庫車所轄之喀喇布拉克軍臺係由布古爾派撥回子當差  
地處戈壁不可耕種請撥布古爾各愛曼隙地二百畝一體開墾  
輸派回子代種所收糧石照數分給藉資調濟實於回戶生計軍  
臺事務兩有裨益 允之二年五月疏劾印房章京塔青額私赴  
游牧並牽及土爾扈特汗家屬事涉曖昧經伊犁將軍慶祥訊無

實據以明敘誣劾入奏得旨明敘辦理此案幾成冤獄肇衅邊陲非尋常錯誤可比必應徹底根究有無別情從重定擬不可稍涉含混旋命視職逮問九月審結明敘劾奏塔青額情事係屬得自風聞草率定案並究出印務章京常興敘供家丁王興借端婪索明敘毫無覺察請從重治罪讞定遣戍黑龍江十二月故

右 國史館本傳

四庫全書類傳卷三十一

三十一

三十一

李廷臣

李廷臣四川廣元人乾隆三十八年由行伍隨將軍阿桂討金川以功拔外委旋升把總五十三年升成都城守左營千總六十年黔楚教匪滋擾調赴軍營累戰有功升軍標右營守備八月拏獲首逆吳半生派廷臣檻送進京嘉慶元年四川教匪滋事上命馳赴四川軍營交總督宜縣差遣二年四月大兵勦賊於鷹背菁賊悉眾迎拒廷臣分兵燒燬王家寨賊巢賊退我兵進擊殺賊五百餘名生擒二十餘名滾崖死者無算遂乘勝攻克茨菇梁富家寨兩處賊卡奏入下部議敘五月升太平營都司六月竄回占踞竹峪關與逆首徐添德相距百里勢將合廷臣堵禦各隘口賊不



能越八月賊犯太平廷臣與參將永明遊擊謝開先分兵擊卻之  
會大兵躡賊於金竹山賊復分黨數千攻太平廷臣等力戰殺三  
百餘名射斃執旗賊目一名賊不退沙河知州王嘉猷率鄉勇夾  
擊謝開先自上下壓廷臣衝出北門掩殺賊始潰復追斃五六百  
名生擒七十九名四年升綏靖營遊擊五年擢越檣營參將尋隨  
大兵勦賊於大竹河殺賊六百餘名生擒三百餘名 賞戴花翎  
七年遷新設太平營協副將九年調四川軍標副將十三年升甘  
肅肅州鎮總兵道光二年懇請休致 諭曰總兵李廷臣年老衰  
頹豈可復膺專閫重任著以原品休致該員曾經出師著有勞績  
著加恩賞給全俸尋卒子景靈二品廕生

右 國史館本傳

國史館本傳 卷五十一 三

--	--	--	--	--	--	--	--	--	--

魏大斌

魏大斌廣東長樂人乾隆二十六年武進士揀選二等分發福建以守備試用隸督標三十三年改撥水師營尋補金門鎮標左營守備三十七年升右營遊擊四十二年升烽火門水師參將四十五年上南巡派往浙江祇候分班押緯仍隨班較射賞大綬紹皮荷包四十六年調水師提標中軍參將四十八年遷閩安協副將五十年調澎湖協副將五十一年八月擢浙江温州鎮總兵十一月福建臺灣奸民林爽文結黨滋事攻陷諸羅五十二年二月總兵柴大紀克復諸羅守之四月閩浙總督常青檄大斌帶浙兵赴臺剿捕賊擾鹽水港鹿仔港等處截通臺郡要路以困諸羅



六月大斌率兵往援抵埔心大崙等莊賊萬餘來撲大斌力戰破圍出收屯鹿仔港七月復率兵二千七百名進至半天厝遇賊數萬突至鏖戰逾時斃賊無數殺賊目一適城中兵接應併力衝擊直抵諸羅 上嘉之 賞戴花翎尋以大兵在鹿仔港起行時糧餉火藥俱爲賊阻兵丁傷亡過半及抵諸羅又株守城中未能出城勦賊疏通道路 命褫職交將軍福康安留軍前差遣效力九月城外禾稻方熟賊數千人往刈官兵擊之忽山頂伏賊繞至數千大斌等分投奮擊擒斃多名賊敗退總兵柴大紀奏 聞 諭曰魏大斌前以無能降旨革職今伊能堵禦殺賊可降補都司以觀後效旋由雲霄厝等處屢殲匪黨獲烏槍旗幟雜械賊復率眾

侵西北二門大斌偕遊擊李隆分東南兩路夾攻斃賊百餘名獲  
大旗三面十月賊萬餘擾西北二處營盤大斌等分路截追殺賊  
數百名五十三年二月臺灣平四月福康安奏稱魏大斌自革職  
以後深知感懼守禦出力請補授安平協左營遊擊 上從之十  
一月以緝獲洋匪奮勉 命以參將用五十四年三月擢廣東左  
翼鎮總兵十二月調福建南澳鎮總兵五十五年因失察所屬得  
受陋規革職 命仍留粵東差委五十九年署碭洲營都司六十  
年閏二月率弁兵巡洋擒斬盜匪數十名 命以水師都司卽用  
七月丁父憂服闕補香山協中軍都司嘉慶元年兩廣總督朱珪  
奏大斌平日出洋緝捕不畏風濤實爲得力之員 命升署廣海

寨遊擊四年兩廣總督覺羅吉慶奏大斌巡緝勤勞老成穩練請  
升署龍門協副將 從之五年廣東學政萬承風按試瓊州事畢  
因海口白沙港外盜船停泊未能北渡奏入降 旨查詢以該處  
洋面係大斌所轄部議降二級調用 上加恩改爲降三級畱任  
八年 賞參將銜護理左翼鎮總兵九年六月廣東提督孫全謀  
以洋匪登岸劫掠降都司 上命大斌署理提督 諭將一切營伍  
緝捕事宜實力整頓尋因前在左翼鎮總兵任內匪船登岸劫掠  
交部嚴議部議革職 上加恩改爲畱任十年總督那彥成奏大  
斌不勝提督之任 上以水師人材難得 命再察看尋 諭曰  
魏大斌係棄瑕錄用之員經朕格外施恩命其署理提督該省正

當緝捕緊要之時該署提督統帶兵船出洋一月之久所巡不出  
五百里之內且因管駕不善致船隻遭風損壞又復藉詞修理遷  
延時日魏大斌庸懦無能著降補千總十二年告病回籍道光二  
年卒

右 國史館本傳

卷之三十一

三



洪蕃鏘

洪蕃鏘福建海澄人由武舉充兵部差官期滿發往福建以水師營守備用乾隆五十九年補提標水師守備嘉慶二年升閩安鎮標右營都司三年遷海壇鎮標右營遊擊六年升廣東海門營參將七年擢順德協副將十年以疎防洋匪乘潮登岸入室擄劫部議降二級調用上加恩改降三級畱任尋升碣石鎮總兵時洋匪蔡牽朱瀆擾閩粵各洋十一年蔡牽竄臺灣蕃鏘會同南澳鎮總兵杜魁光在閩粵交界處堵截尋朱瀆竄閩省外洋蔡牽竄出鹿耳門與朱瀆合幫有竄往南澳之信諭兩廣總督吳熊光飭孫全謀帶領水師由水路抵閩幫同杜魁光追捕朱瀆截擊蔡牽

四庫全書 廣東通志 卷三十一 三十一  
再添派洪蕃鏘不分畛域併力殲擒十二年正月朱瀆匪船由閩  
省詔安縣南澳洋面竄粵省澄海縣長山尾外洋蕃鏘偕署澄海  
協副將孫全謀順德協副將李光顯等連夜剿捕擊沈盜船二又  
奪其一船擒賊四名旋由放雞洋進剿至南皋表山頭見匪船六  
十餘隻齊向東南逃竄蕃鏘等追及長山尾外洋槍礮並施斃賊  
無算朱瀆竄詔安縣澎默外洋獲綠頭艇一擒賊黃阿朵等十二  
名溺斃甚夥獲礮械多件二月蔡牽竄粵省大星洋蕃鏘由南澳  
馳赴汕尾隨廣東水師提督錢夢虎進剿旋調回南澳防守四月  
上以蕃鏘年近六旬兩耳重聽 命以原品休致道光二年卒

右 國史館本傳

成文

成文鈕祜祿氏滿洲鑲黃旗人乾隆四十六年由藍翎侍衛升三等侍衛五十一年揀發雲南以都司用五十三年補楚雄協都司五十八年升普洱鎮標中軍遊擊嘉慶元年二月隨將軍福康安赴湖南剿辦苗匪四月進攻納共山成文從右路協剿克貴道嶺七星坡各處城卡焚苗寨三百餘戶乘勝直抵長吉山連克茨巖茶山各賊寨進兵結石岡賊負嵎抗拒我兵破其石城克之五月由火麻營分隊進攻克廖家衝連峯坳諸隘口成文受槍傷敘功命以參將升用七月補廣西鬱林營參將雲南總督勒保以成文熟悉邊情奏准畱滇補用三年補雲南城守營參將五年署楚雄

協副將七年二月維西廳獠匪恆乍綑等糾黨焚掠成文偕維西協副將那林泰分兵兩路向樹苗進剿斬獲甚夥三月賊復由城西來犯我軍成文與遊擊什通阿迎擊之賊大潰餘匪復由城北石門坎竄出分截糧運成文聞聲赴援合兵圍剿殲戮殆盡四月賊日出亨結漢奸禿樹糾合散賊屯聚諾別古山寨我兵分路進擊並派鄉勇潛往縱火時夜雨泥濘賊不設備成文行抵寨後山梁望見火起催兵下壓槍斃禿樹於陣旋攻克小維西賊卡夷民禾聰等縛賊目腊者布以獻捷入 賞戴花翎尋以攻克康普剿淨北路獠匪下部議敘六月抵磨盤山搜剿賊寨賊竄出抵禦我兵奮勇攻擊賊乞降復進攻高軒井橋頭村稗子溝各賊寨克之



乘勝抵阿羅蓋成文偕遊擊富謙前後夾擊賊大敗尋搜勦迴龍  
廠屯匪由山後攻撲賊潰督兵奮追殲其眾七月進抵工江偵知  
打古梅大坡頭爲賊匪出沒之所遂分紮兩卡扼其隘賊由峩恩  
箐底潛出我軍設伏左右山巖敗之九月江外野獠復偷渡過江  
旬結降獠肆劫十月敗賊於獨石坪十一月克安邦吉那二寨焚  
賊巢八年正月師次土瓜嶺偵知賊首泥巴藏匿諾別古山督兵  
由白帕塘三分梁繞至寨後四面圍擊殲之九月署督標中軍副  
將十月以生擒主謀賊目別的扒下部議敘時恆乍綑逃匿其棲  
拖羅兩箐界內成文偵得之雪夜馳往督率弁兵攀崖競上恆乍  
綑就擒捷聞 上嘉其始終出力 命以副將升用九年補雲南



龍陵協副將十五年署普洱鎮總兵十七年署開化鎮總兵十九年升騰越鎮總兵二十一年入覲諭曰成文見已年老著留京賞給頭等待衛在大門上行走二十五年守護昌陵道光二年召回京以原品休致尋得旨成文曾經出兵打仗殺賊捉生受傷得功著給與全俸以養餘年三年卒年七十六

右 國史館本傳

富登阿

富登阿索勒鄂拉氏黑龍江滿洲鑲黃旗人乾隆二十九年襲雲騎尉世職五十二年調赴臺灣勦逆匪林爽文戰甚力 賞戴花翎五十三年二月臺灣平擢額外佐領五月補佐領嘉慶元年擢副總管二年七月隨署廣州將軍明亮勦四川教匪十一月湖北黃號首逆姚之富齊王氏等竄至漢江勢欲北渡富登阿沿江截殺大敗之 賞博起巴圖魯名號四年隨副都統銜德楞泰勦賊入楚以生擒線號首逆卜三聘功擢額外總管五年正月藍號冉添元等五股賊匪搶渡嘉陵江富登阿隨參贊德楞泰回川勦之三月敗賊於劍州李家坪閏四月賊犯達州隨德楞泰往援遇賊

於楓香埡富登阿由山右梁家埡進剿斬獲甚眾十一月累戰有功下部議敘六年正月復隨德楞泰追剿白號高二至陝西山陽縣敗之於乾溝乘勝追躡殲高逆於野豬坪下部議敘五月升黑龍江總管六月青號徐添德竄陝西西鄉縣境富登阿於仁河新灘追及之徐逆溺水斃九月賊與藍號僞元帥張添貴合竄湖北竹山縣富登阿等追至鳳竹木夜襲賊營殲二百餘人十二月剿白號苟文明於四川廣元縣槽子溝賊踞王家壩高山我兵仰攻不利富登阿帶索倫兵五十棄馬步行攀援而上射斃賊匪十餘人眾畢登殲戮無算 上嘉之 命以應升之缺升用七年二月藍號陳朝觀餘黨奔湖北巴東縣富登阿隨德楞泰追至兩河口

賊方攻張家峒立解其圍賊搶踞山梁副將鄭啟貴率眾先登疊受矛石傷幾爲賊獲富登阿帶索倫兵繼進救啟貴出大軍乘之賊潰 上嘉其奮勇三月搜剿線號白號餘匪於四川奉節雲陽縣境斬獲甚眾六月勦藍號蒲添寶於湖北興山縣桂連坪七月蒲逆踞興山房縣交界之鮑家山大軍抵連三垭路徑險仄馬不能進富登阿同參將張應貴先行眾從之直搗其巢殺賊七百餘名蒲逆乘閒逸去獲其家屬八月蒲逆走竹谿縣瓦屋溝墜崖死賞副都統銜尋搜剿湖北餘匪陸續殲獲無算楚地肅清八年三省平九年授甯古塔副都統十五年以局員私收羨餘銀未經奏參降二級調用十八年九月河南教匪滋事富登阿帶墨爾根布



特哈兵赴軍營隨剿十一月授副總管十二月賊平二十年九月  
授西安副都統十二月調吉林副都統道光三年卒子齡善佐領  
齡惠副總管齡壽二品廕生副總管齡明佐領

右 國史館本傳

張鑑

張鑑直隸天津人乾隆五十年由行伍拔補天津鎮標右營外委五十二年遷把總五十三年升千總嘉慶二年川陝楚教匪不靖隨直隸提督慶成西安將軍恆瑞敗賊於司渡河七里溝復截擊於甯河之桑樹灣斬馘無算旋入四川敗襄陽黃號首逆王廷詔巴州白號首匪羅其清於保甯營山等處又破太平黃號首逆龍紹周於儀隴之楊柳寨獲賊目陳友珍復勦襄陽白號首匪高均德合通江藍號冉文儔及龍紹周諸賊踞營山之大神山擊敗之奪取香安坪土門埡諸卡進破賊巢復敗賊於龍鳳坪賊竄箕山與羅其清合我兵分路兜截破賊於鳳凰寺賊退踞大鵬山寨攻

克之四年經略大臣額勒登保奏其功擢插箭嶺守備是年復隨  
西安將軍恆瑞赴陝西追斬襄陽藍號首匪張漢潮於東叉河并  
追其餘黨至山陽東溝前處斬獲甚眾旋赴鎮安擊賊於竹凹山  
擒賊目周遇順訊知襄陽黃號股匪伍金柱糾眾數萬將竄商雒  
卽由陽高壩店擊卻之五年復以奮勇出力經額勒登保奏聞  
升直隸河屯協中軍都司八年賊平凱撤回營九年調廣昌營都  
司十二年軍政卓異十三年升四川督標右營遊擊十八年十月  
授普安營參將十二月署夔州協副將十九年三月調署提標中  
軍參將六月署越巂營參將二十年署懋功協副將二十二年三  
月署阜和協副將十二月升督標中軍副將二十五年擢松潘鎮

總兵道光元年三月署重慶鎮總兵六月調建昌鎮總兵八月署  
四川提督三年卒子懷普候補光祿寺署正

右 國史館本傳





國朝耆獻類徵初編卷三百十二目錄

將帥五十二

博勒忠阿

熊德謙

吳紹麟

金保

許文謨

興奎

穆騰額

德興保

永海

穆通阿

呢瑪善

圖興阿

托雲泰

穆克登布

福智

林孫

周國泰

馬建紀

錢夢虎

張大振

皇朝通志卷之三十三

--	--	--	--	--	--	--	--	--	--

國朝耆獻類徵初編卷三百十一

通奉大夫前署江西巡撫江西布政使司布政使湘陰李桓輯  
將帥五十二

博勒忠阿

博勒忠阿博郭羅特氏蒙古鑲藍旗人乾隆三十九年山東壽張  
縣奸民王倫王聖如等聚眾滋事博勒忠阿由馬甲隨大兵征勦  
有功兼公中佐領嘉慶二年 命發陝甘以參將用尋署陝西循  
化營參將四年循化野番搶劫蒙古人戶牲畜並槍斃章京巴特  
瑪等五人博勒忠阿奉檄帶官兵八百名偕甘肅按察使蔡廷衡  
赴循化廳之宗喀寺巡防彈壓嗣野番投誠繳所掠人戶復還蒙



古五年以勦撫貴循番族出力經西甯辦事大臣台費蔭疏奏下部議敘六年補甘肅平羅營參將十年擢金塔協副將時野番復肆搶劫並殺傷青海扎薩克貝子齊墨特達巴眷口十二年七月甯夏將軍興奎等咨調博勒忠阿赴保安勦撫九月進攻沙卜浪番族賊潛匿林箐中官兵轟以礮分數路繼進博勒忠阿繞山右衝殺并燒燬各溝口土房賊潰敗隨入山窮搜殲擒淨盡十三年署西甯鎮總兵旋署肅州鎮總兵十九年授伊犁鎮總兵二十四年調涼州鎮總兵道光元年 上以博勒忠阿年老 命來京另候簡用旋授頭等侍衛在大門上行走三年卒孫奇成額二品廕生廣東提標前營遊擊

右 國史館本傳

國史館本傳

--	--	--	--	--	--	--	--	--	--

熊德謙

熊德謙四川崇甯人乾隆五十四年由行伍拔補四川提標右營外委五十七年隨將軍福康安征廓爾喀以功升把總六十年二月隨征黔楚苗匪由四川秀山縣進攻貴道溪川蓋河克之進抵湖南之黃板峒牛圈灣等處燒燬苗寨殺賊多名三月大兵解永綏圍德謙與有功復敗賊於蘭草坪四月隨攻黃瓜寨蘇麻寨皆克之嘉慶元年升崇化營千總二年以川陝楚教匪滋事調赴四川軍營四年攻賊於忠州花橋寺身受矛傷五年隨參贊德楞泰剿賊於江油馬蹏岡首逆陳得俸就獲 賞戴藍翎尋以賊目冉添元雷世旺先後殲擒德謙皆有戰功擢貴州安順城守營守備

六年正月追賊於陝西山陽縣之乾溝賊走鎮安縣二峪河德謙等閒道趨野豬坪擊其前會固原提督賽冲阿兵至兩面夾擊大破之射殺賊首高二事 聞下部議敘九月賊首龍紹周逸入湖北竹山縣屯雲霧溪德謙統精兵二百徒步轉戰直搗其巢賊驚潰馬步大隊繼進擒僞先鋒胡世貴僞總兵徐國倫戮紹周弟紹華賊西趨陝境屯平利縣岳家坪官兵分路進剿德謙等由中寨子潛繞賊巢之南會大雪賊不設備我兵三路掩擊悉殲之十月擢四川夔州協都司七年隨德楞泰剿賊首樊人傑等於湖北竹山縣之漁沱蹙之河溺斃無算奏入 賞戴花翎仍下部議敘九年七月隨提督馬瑜敗賊於川陝交界之鳳凰寨擒斬僞元帥羅



思蘭符廷伏李如玉等八月擢甘肅嘉峪關遊擊十二年二月調赴西甯剿捕番賊十月撤回十五年調靖逆營遊擊十八年九月河南教匪滋事調赴軍營十一月賊四千餘人竄輝縣司寨官兵分路圍剿德謙偕侍衛伊勒通阿等繞出山前截擊之斬馘二千餘人遂克司寨將首逆李文成焚斃並殲賊目劉國明 命以應升之缺升用先換頂帶尋復滑縣得 旨獎賚十九年正月遷花馬池參將十月調烏魯木齊提標中軍參將二十四年擢甘肅瑪納斯協副將尋調陝西靜甯協副將道光元年擢貴州古州鎮總兵三年卒姪宇輝二品廕生

右 國史館本傳

國朝耆儒類從初編

卷三百二十一

四

吳紹麟

吳紹麟原名紹璘廣東羅定州人由武生襲雲騎尉世職發標學習嘉慶四年授黃岡城右營守備六年因誤釋閩省移緝盜犯周阿爲命革職交總督覺羅吉慶巡撫瑚圖禮嚴審紹璘於被參後追捕周阿爲至柘林洋面及之阿爲被槍傷墮海死吉慶等上其狀釋回籍九年四月稟請出洋效力九月隨左翼鎮總兵林國良捕賊於瀝隔外洋十月巡緝神泉外洋烏塗洋等處獲賊匪林阿集等二十餘人十年四月追賊於長山尾外洋白沙洋疊有斬獲六月拔補左翼鎮標中營把總十一月率兵擊賊於蟒洲外洋獲陳得有等十三名先後奪獲礮械無算十二月升左營千總十

五年二月總督百齡以紹璘明白幹練洋務夙嫻奏准升署平海營中軍守備五月獲盜首烏石二紹璘在事有功經百齡奏入命以應升之缺卽行升用十六年升香山右營都司十八年授廣海寨遊擊改名紹麟二十年擢平海營參將先是大虎山海面及江牡外洋有盜匪行劫商民之案二十一年五月紹麟帶領師船陸續獲盜林亞美魯亞歡等十餘名悉伏法道光元年五月遷澄海協副將九月總督阮元奏紹麟穩練老成有才有識爲水師第一出色人員堪勝總兵之任尋授陽江鎮總兵三年卒子德威水師提標中營額此外委

右 國史館本傳

金保

金保庚克勒氏吉林滿洲鑲黃旗人嘉慶二年七月川陝楚教匪不靖由前鋒隨三姓副都統賽冲阿赴陝西軍營協剿十月襄陽藍號首逆張漢潮竄至平利之會家壩官兵由東北山後抄截殲獲多名乘勝追剿黃號首逆齊王氏姚之富等入川敗之於黑虎廟箭斃賊目張世虎賊眾向繳子坪周家壩一帶狂奔我兵緊躡賊蹤克之十二月齊姚等逆竄陝境糾眾嘯聚羅村壩我兵分路追剿金保首先衝入賊隊俘馘甚眾餘賊走黃官嶺欲渡漢江大軍分路夾擊殲賊千捷入 賞戴藍翎三年駐兵川陝邊界往來堵剿疊有斬獲四年四川雲陽縣藍號賊首蕭占國張長庚等由



閩州折擾營山金保迎擊連戰於黃土牆譚家山一帶殲賊六千  
斬蕭占國張長庚於陣時東鄉白號賊首冷添祿屯踞岳池我兵  
乘勝進攻賊敗走廣安州追及之殲冷逆於石頭堰餘匪斬俘無  
算敘功 賞伊勒達穆巴圖魯名號五年補驍騎校六年生擒襄  
陽白號股匪高二馬五於陝西鐵鎖關金保在事有功升三等侍  
衛七年四月偵知巴州白號股匪苟文明由平安寨折竄秦嶺金  
保追敗之於福安寨戮偽先鋒苟文清新級百生擒六十四人六  
月賊竄龔家灣金保率兵兜截執逆屬七月擒苟文明於花石崖  
捷 聞升二等侍衛九月張芳苟朝九兩股零匪爲官兵所偪竄  
龍鍋子山屯聚金保率兵勇乘夜潛襲四面圍攻殲賊目張芳與

僞總兵吳廷召等奪獲器械無算八年凱撤回京十五年補前鋒  
參領十八年九月直隸長垣教匪肆擾延及豫東據滑城金保隨  
直隸總督溫承惠往勦十月賊分屯桃源道口等處官兵由輝縣  
進攻道口賊眾造橋將渡河而西金保分兵截殺毀其橋賊蜂屯  
抗拒我兵飛越濠溝大破之十一月抵滑城桃源集賊匪來援殲  
俘甚眾十二月復於滑城南門掘地道密置地雷藥發城裂拔之  
欽差大臣那彥成上其功 賞加副都統銜凱旋時陝省南山匪  
徒因木廠停工乏食糾眾倡亂隨固原提督楊遇春移師往勦十  
九年正月行抵西江口偵知龔貴股匪屯踞三元壩併力圍攻賊  
據山梁憑高抗拒金保奮勇衝突短兵相接斃賊一百餘人二月

國朝通志卷三百十一  
吳抓抓股匪南竄黃官嶺將入川金保率吉林索倫馬隊兜剿殲  
賊五百餘匪復由階州竄川我兵乘勝抄截斬級四百生擒三百  
餘人奏入下部議敘二十一年 命以副都統銜授伊犁領隊大  
臣二十五年九月 召來京補鑲黃旗漢軍副都統十月調鑲藍  
旗蒙古副都統道光二年署鑲白旗護軍統領三年因病陳請開  
缺得 旨金保染患足疾未痊著照所請准其回旗調理該員前  
在軍營曾經得有巴圖魯名號其應作何給俸之處著兵部照例  
具奏疏入 諭曰原任副都統金保著以原品休致該員前在軍  
營打仗殺賊捉生受傷著有勞績著賞給全俸以養餘年九月卒

右 國史館本傳

許文謨

許文謨四川成都人父世亨廣西提督 贈三等壯烈伯自有傳  
乾隆五十五年文謨由武舉襲爵在頭等侍衛上行走五十九年  
二月期滿發往湖廣以參將卽用七月補湖北興國營參將 上  
追念世亨奮勇捐軀深明大體 賞文謨花翎六十年署黃州協  
副將嘉慶元年正月枝江縣教匪聶傑人滋事據長嶺衝圍截官  
兵巡撫惠齡派文謨搜捕勦散夥匪會兵方家大山二月逆匪遁  
入灌灣腦屯太和山文謨從山覓路猝至山頂賊驚潰竄深衝口  
據鳳凰山以守文謨攻克之五月官兵進逼灌灣腦賊巢地雷突  
起賊奔竄文謨設伏掩賊卡首先躍入斬賊百餘名餘墜崖死者



甚眾事 聞 賞給繼勇巴圖魯名號以副將卽用八月賊謀劫營令其黨鄧之學詐降訊得其實賊果乘夜由灌灣腦箐箕壩兩路下溝官兵潛伏俟其半入卡內文謨等帶兵三路突出生擒賊匪六十餘名死者無算二年九月隨總兵慶溥由黃柏山堵截十月賊入利川縣境擾及施南文謨帶兵千餘往剿之十一月補廣東三江口協副將仍畱營剿賊三年賊匪冉文儔高均德屯踞大神山文謨隨副都統德楞泰由中路進剿斃賊四百餘旋由消水河駐兵團土包嶺斃賊匪多名四年六月遷四川建昌鎮總兵八月賊匪王登廷被迫東遁文謨率兵由鎮龍關搜剿復擊賊於岳溪場安家山均有斬獲旋與總兵德齡副將褚大榮分兵三路



攻賊於陳家場勦斃百餘會德齡後隊失利文謨分兵馳擊復斃賊二百餘五年正月截擊賊匪冉添元於大竹縣閭四月德楞泰令文謨偕副將托雲泰等帶兵三千赴涪州協勦復以藍號賊由鶴遊坪分竄江岸令文謨等由梁山忠州躡之至沙河場分路抄擊賊敗走石橋官兵乘勝窮追生擒陳隴光等四十餘人六月賊匪冉添泗王士虎攻圍南江縣峒寨德楞泰分兵爲三令文謨率馬步兵由小路從右直取長沙壩賊巢乘雨突入賊潰亂俘馘甚眾下部議敘七月赴合州定遠西岸巡防六年正月黃藍白三股賊眾由陝省竄回川境欲搶渡嘉陵江文謨力戰賊始遁奏入上嘉之 賞加提督銜二月派赴廣元防範七月調赴上游守禦

十二月至白水卡隘與參將沈宗文等併力堵截七年七月川北  
肅清以陝省尙有逆匪苟文明未除畱文謨川北防堵時餘匪宋  
應伏竄入南江九角山文謨於南廣禦之九月調廣東高廉鎮總  
兵八年正月搜捕南江陳家坪零匪十年五月升廣東提督閏六  
月調福建水師提督十一年二月洋匪蔡牽滋事文謨渡海剿之  
賊匪數千撲鹽水港營文謨擊殺甚眾復將竹園尾太史宮莊賊  
巢焚燬七月福州將軍賽沖阿奏請撤兵得旨將凱旋兵酌畱  
一半暫停內渡畱文謨彈壓八月調陸路提督道光四年正月調  
浙江提督七月卒諭曰浙江提督許文謨係許世亨之子由武  
舉承襲伯爵在頭等待衛上行走嘉慶年閒曾經出師打仗著有

勞績仰蒙 皇考仁宗睿皇帝賞給繼勇巴圖魯名號升福建提督本年正月調補浙江提督茲聞溘逝殊堪軫惜許文謨著加恩照提督例賜卹所有任內一切處分悉予開復應得卹典該部察例具奏尋 賜祭葬 予諡壯勇

右 國史館本傳



興奎

興奎瓜爾佳氏滿洲鑲白旗人乾隆三十一年由健銳營藍翎長補前鋒校三十六年升前鋒參領四十一年正月授貴州黔西協副將三月調陝西慶陽協副將十月擢直隸宣化鎮總兵四十六年調甘肅西甯鎮總兵五十四年擢烏魯木齊提督嘉慶四年八月調烏魯木齊都統十二月以軍機大臣議准駐防保舉人員遇各省綠營缺出准其升用惟伊犁烏魯木齊等處與內地情形不同請 敕交將軍都統議奏興奎偕伊犁將軍保甯奏言伊犁烏魯木齊地處極邊官兵必技藝精銳始足以資捍衛升用各省一員卽少得一人之力況與內地風土人情不能熟習且駐防人員



遞有應升之缺不虞壅滯請仍其舊又以禮部議准駐防官兵聽其就近應歲科兩試復奏言伊犁烏魯木齊俱係用武之地總當以騎射爲本向雖設有官學習讀漢書不過爲鈔寫文移起見無庸令其考試從之七年正月丁母憂七月授西安將軍時大兵征勦川陝楚三省邪匪將屆竣事命搜捕陝西餘匪九月經略大臣額勒登保以甯河一路爲川陝門戶奏令興奎駐守十月以川匪二百餘人窺陝西花石梁卡隘移咨總督惠齡防堵又偵知南山餘匪有西竄之勢移營鐵鎖關禦之八年二月南山賊匪由金池院南竄興奎派遊擊劉英魁等擊斃多名賊逸至鐵鎖關復派把總李永和等截擊之餘匪遁入卦子山興奎督兵搜捕四月

以青海蒙古被野番劫掠 敕惠齡回蘭州查辦南山餘匪專責  
興奎督勦六月由洋縣取道入山與總兵楊芳合兵搜勦殲擒淨  
盡仍回甯西巡防邊界八月三省底定撤兵歸伍仍畱兵分守各  
要隘 命興奎統陝西防兵九年調甯夏將軍十二年四月奏滿  
營兵丁生齒日繁請於庫貯馬價等項撥銀二萬餘兩發商生息  
擇其弓馬嫻熟者按月給賞 從之五月甘肅大通縣野番肆擾  
上以興奎爲都統 命赴西甯偕辦事大臣貢楚克扎布勦之尋  
番目尖木贊率眾來降願爲官兵前導貢楚克扎布疑其詐發兵  
捕之遁 上以貢楚克扎布失信損威奪其職興奎未能阻止又  
不據實奏參交軍機大臣會同兵部議處尋議革職九月官兵進

克沙卜浪番族番目完木古等降番地平 諭曰興奎督辦軍務尚爲妥協本應加以獎敘惟於妄擊尖木贊一事經軍機大臣等議以革職茲念其帶兵出力功過尚足相抵著加恩免其革職毋庸交部議敘十四年復授烏魯木齊都統十五年四月以和闐辦事大臣色克通阿在吐魯番患病率令回京 上責其專擅下部議降調 上加恩改爲革職畱任十一月請借鎮迪道庫貯銀六千兩設典生息以濟孤寡旗人 從之十八年以已革領隊大臣恆傑揭告興奎收受屬員餽送及虧缺倉庫等款革職 命伊犁將軍松筠會同新任都統長齡鞠明受餽屬實餘坐誣 上以興奎業經革職已足蔽辜飭令回旗道光四年卒子額勒德理

右 國史館本傳

國月曆狀實錄乃編  
卷三十一 將帥五十一  
三





穆騰額

穆騰額瓜爾佳氏滿洲正白旗人由馬甲充吉林烏拉前鋒乾隆五十三年校射中布靶 賞戴藍翎遷驍騎校五十八年擢防禦嘉慶元年升佐領二年川陝楚教匪不靖調赴軍營十月隨四川將軍明亮勦賊於陝西平利縣之鎮坪斬獲甚眾 賞換花翎四年隨參贊德楞泰追勦賊首羅其清獲之 賞吉利杭阿巴圖魯名號旋於四川達州麻柳場遇賊衝入其隊射中賊目李繩英殲入九十人五年德楞泰勦冉添士股匪於南江縣包家嶺穆騰額由長池壩以師會之殲擒九百餘人專 聞下部議敘六年五月賊首徐添德竄逸陝西鎮安縣穆騰額等兼程追之及仁河賊舟

覆添德溺死奏入下部議敘尋授委協領八月隨剿賊首龍紹周  
於湖北竹山縣雲霧溪直擣賊營大破之七年二月在四川萬縣  
彈子壩隨將軍賽沖阿擊賊賊負嵎抗拒我兵繞上山梁擊走之  
又敗賊於大竹縣時白號餘匪屯聚梁山柏林槽踞險設伏官兵  
冒矢石仰攻穆騰額等會各路兵連隊而進賊驚潰殲擒百數十  
人奪獲器械無算三月授三姓協領六月復於湖北竹山縣馬鹿  
坪追剿賊首樊人傑由黃茅埡自上下擊賊大敗薄諸河人傑赴  
水死奏入下部議敘八年凱撤回營十四年擢黑龍江副都統十  
八年河南教匪滋事調黑龍江官兵會剿尋攻克輝縣司寨山悉  
殲之遂復滑縣 上以穆騰額平素訓練得宜下部議敘二十四

年調阿勒楚喀副都統道光四年卒子鳳麟二品廕生

右 國史館本傳

國朝五十一



德興保

德興保瓜爾佳氏滿洲正白旗人荊州駐防乾隆三十八年由披甲前鋒隨征金川有功四十四年升驍騎校四十九年遷防禦五十五年升佐領六十年二月湖南苗匪吳半生等倡亂德興保隨荊州將軍興肇往剿六月由辰州進攻巖門殲賊百餘復敗之於楊柳坪九月連克馬腦寨豬草寨殺苗坪等處十月賊竄高多寨恃險抗拒我師分路夾攻擒賊渠吳半生十一月改攻龍角峒克木城石卡三十餘十二月分擊高斗山牽制賊眾大軍進克擒頭坡嘉慶元年正月克吉吉寨三月敗賊於高吉坨追至巴金灣盡燬苗寨下部議敘七月進克李坪鴉溪等十三寨下部議敘尋偵



知賊眾圍竄山家劫我兵合力截殺斃賊三百餘生擒二十七人  
十二月進勦石隆賊寨殲擒無算斃首逆石柳鄧於陣捷聞下部  
優敘五年二月川陝楚教匪滋事隨荊州將軍宏豐防堵襄陽賊  
竄保康之高家鋪官軍往荊門州堵截遏南竄之路四月隨宜昌  
鎮總兵明亮敗賊於遠安之苟家埡賊竄霧渡河官兵繞出西布  
口截殺賊匪二百餘生擒八十七人旋赴均州堵禦五月青號餘  
匪竄至我兵併力兜擊賊大潰下部議敘九年升協領二十三年  
擢甯夏副都統二十五年八月因病陳請休致 允之以曾經出  
兵打仗殺賊 恩賞全俸道光四年卒子三多文舉人以知縣用

右 國史館本傳

永海

永海瓜爾佳氏吉林滿洲正紅旗人嘉慶二年川陝楚教匪滋事  
永海由馬甲隨三姓副都統賽冲阿赴剿時襄陽藍號首逆張漢  
潮等竄至平利縣境官兵連敗之於樹河口繳子坪等處又敗襄  
陽黃號首逆齊王氏姚之富於甯羌州三年破襄陽白號首逆高  
均德於洋縣殲齊王氏姚之富於鄖西之三岔河永海均在事有  
功五年參贊大臣德楞泰移師入蜀破通江藍號賊首冉添元於  
梓潼縣馬蹏岡擒之並獲偽總兵鮮其順錄永海功 賞戴藍翎  
七年追襄陽黃號首逆樊人傑至竹山縣平口河腦賊窮蹙斃諸  
河敘功 賞換花翎八年授驍騎校十年正月擢伯都訥防禦三

月調阿勒楚喀防禦十二月遷伊通赫爾蘇佐領十八年八月河  
南教匪李文成倡亂陷滑縣城隨吉林副都統德英阿領吉林兵  
赴衛輝等處截擊數戰皆捷賊首李文成潛竄輝縣屯司寨十二  
月欽差大臣那彥成攻拔之吉林兵先登殪文成及賊目劉國明  
捷 聞 賞永海幹勇巴圖魯名號十九年隨提督銜總兵楊芳  
追勦陝西南山賊匪於沔縣賊焚關廂南竄黃官嶺我兵馳至翦  
子河扼其入川之路賊自山梁搖旗下壓永海與副都統達斯呼  
爾岱遊擊萬彪等分統馬步隊奮勇迎擊殺賊五百餘追至塘子  
口與伏兵夾攻斬賊渠吳抓抓吳奇於陣餘黨解散二十年首逆  
龔貫就擒南山肅清永海以功擢協領 命先換頂帶旋授拉林

協領道光三年擢伯都訥副都統以前在協領任內那移庫銀經  
吉林將軍松筠鞠實部議革職諭曰前任拉林協領今升伯都  
訥副都統永海交卸庫項時擅指未給發之款捏報開除於所屬  
義倉工程漫無覺察著卽革職該革員那移庫銀業經如數補還  
著免其治罪四年卒子庚音官阿勒楚喀佐領

右 國史館本傳

同身官屬類律考  
卷三十一  
律



穆通阿

穆通阿薩克達氏滿洲鑲白旗人乾隆五十二年由護軍考補印務筆帖式五十六年補驍騎校嘉慶四年充印務章京九年遷副參領十五年遷參領二十一年四月擢鑲藍旗蒙古副都統七月署正黃旗護軍統領二十三年兼公中佐領二十五年四月調正黃旗滿洲副都統十一月充葉爾羌卡倫臺站侍衛 上允之道光元年偕喀什噶明陽阿爲葉爾羌卡倫臺站侍衛 上允之道光元年偕喀什噶爾參贊大臣武隆阿等奏葉爾羌阿奇木伯克邁哈莫特鄂散呈報有伯克密爾回子愛孜圖拉來城呈出英吉利夷人木爾齊哈普寄伊夷字一紙並有給愛孜圖拉照票及火膠圖記欲到葉爾

羌買馬貿易傳訊愛孜圖拉係溫都司坦人其地被英吉利征服  
己五六十年英吉利酋長欲往西北一帶及布噶爾貿易遣使二  
人至推巴特因聞葉爾羌地方安靜欲向此行走先以字遣伊來  
求入境臣等以英吉利從無與葉爾羌貿易之事且溫都司坦爲  
該夷所據而音底克什密爾亦其所屬各該處非不產馬匹之地  
窮荒如布噶爾不及溫都司坦遠甚未必能售英吉利之貨是貿  
易買馬其說俱不可信惟該夷遞字以禮來求自應示以寬大仍  
飭邁哈莫特鄂散以己意覆書駁斥其照票圖記交愛孜圖拉持  
回並密遣回子孟幹等往推巴特地方探訪情形來意 諭曰英  
吉利係海外夷人向在廣東貿易溫都司坦地方並非伊國泊船

口岸今愛孜圖拉執夷字來求貿易穆通阿等令邁哈莫特鄂散以己意作字駁斥所辦甚是葉爾羌英吉沙爾喀什噶爾一帶卡倫均與外夷接壤地方緊要總要留心稽察不可大意該夷究有多少來意何居侯探有確據卽行速奏尋覆奏據孟幹等云

關

上是之二年正月瓦罕伯克章罕遣人赴葉爾羌及喀什噶爾等處呈遞訴詞以被柰滿愛曼之布魯特掠去人馬牛羊求爲查追穆通阿等駁斥不准賞給皮衣羊隻米麪令其回牧奏聞諭曰卡倫以外愛曼甚多彼此搶劫事所常有若代爲查追則各愛曼遇有搶失之事難保不架詞呈訴此次經穆通阿等駁斥並賞給皮衣等物令回游牧所辦甚是此後遇此等案竟可置之不問

免致別滋事端四月 上命各將軍提鎮定擬操練章程穆通阿以兵丁之在城者每月定期分校各技藝卽予賞罰俾知勸懲覆奏 諭曰葉爾羌爲回疆邊地兵丁與內地不同關係尤爲緊要詳閱所定章程於在城兵丁定日操演明示勸懲著照所擬辦理尋覆奏據孟幹等赴推巴特詳探並無別情因慕內地安靜思由葉爾羌行走但伊國與廣東通商本有限制自應駁斥不准見飭知各卡倫官兵儻該夷果來卽阻其入境稟報酌辦 允之四年卒

右 國史館本傳







夥匪劉光義三十八人下部議敘七年六月擢湖北竹山協副將  
十月監號首逆戴世傑竄施家溝參贊德楞泰圍之呢瑪善偕總  
兵馬瑜由山梁下擊斬戴逆擒僞元帥趙鑑 賞戴花翎八年以  
搜剿陰峪河餘匪行走遲緩褫花翎九年川陝零匪圖竄入楚呢  
瑪善在竹谿縣界奮力防堵楚地肅清 賞還花翎十年閏六月  
擢河南河北鎮總兵十一月調湖北鄖陽鎮總兵十七年傷疾作  
回旗調理十八年二月病痊 命在頭等待衛上行走三月授浙  
江衢州鎮總兵九月調河南南陽鎮總兵二十五年擢成都將軍  
道光元年雲南永北廳土司所屬野夷唐貴等糾眾滋事 命呢  
瑪善赴滇進剿旋經雲貴總督慶保勅平呢瑪善搜獲餘匪 諭

曰呢瑪善遵旨赴滇比到軍營雖已掃穴擒渠尚有零匪竄匿山谷該將軍不事貪功分派員弁入山搜捕深合機宜著加恩交部議敘並賞玉韞黃辮大小荷包二年以果洛克番賊叛調兵勦捕擒土目曲俊等五十五人殲斃無算賊平得旨嘉獎下部議敘四年卒諭曰成都將軍呢瑪善由侍衛出兵川陝楚三省洊升南陽鎮總兵朕御極後特昇以將軍重任前派辦雲南永北軍務迅速妥協甚爲出力平日整飭營伍控制番夷均能認真任事方謂得一有用良臣長資倚任遽爾長逝實深痛惜著加恩贈太子少保銜賞銀一千兩照將軍例賜卹到京之日准其入城治喪所有任內一切處分悉予開復應得卹典該部察例具奏尋賜祭

皇朝通志卷之三十三

葬 子諡勤襄

右 國史館本傳

圖興阿

圖興阿赫舍里氏滿洲正紅旗人乾隆四十六年由護軍校發往甘肅以守備用五十年授陝西延綏鎮標左營守備五十四年遷甘肅赤金營都司五十九年升涼州鎮標左營遊擊嘉慶元年川陝楚邪匪滋事隨肅州鎮總兵索費英阿帶兵一千由西鄉赴川省之太平勦賊甫抵西鄉陝甘總督宜綏飛檄調赴紫陽由蒿坪河一帶進至汝洞二河時汝河賊匪盡數併入洞河在五作雲合力抗拒其地舊名板廠寨居萬山之中五峯環列各高十餘里賊倚爲巢穴壘石築卡防守嚴密惟賊寨東北有花梨岡小路可通圖興阿隨巡撫秦承恩帶領兵勇潛由花梨岡前進賊眾六百餘



人據卡抵死固守我兵鼓勇奮擊值賊礮炸裂延燒卡內火藥煙  
燄衝起圍翼阿督率兵勇乘勢撲進將賊卡奪獲卡內賊匪盡數  
殲斃二年正月經宜縣保奏得旨以參將升用賞戴花翎東  
鄉賊首馮得祿趙可徵等既踞縣城復分黨屯聚張家觀於中前  
後三河險要之處多設賊卡又令從賊分屯周家河梁家崖接引  
巴州通江賊匪爲窺伺太平之計圖與阿偕遊擊李逢春各帶兵  
勇五百由中河前進勦辦梁家崖賊匪二月行抵安家河偵知梁  
家崖賊匪因官兵將到退至清溪場金峩寺兩處屯聚與張家觀  
相距二十餘里爲犄角之勢時巴州方山坪賊首羅其清嘯聚六  
七千人通江賊首冉文儔又與其黨三四千人竄至方山坪迤東



之王家寨屯聚相爲首尾意在併力抗拒乘閒竄附張家觀我兵分路截擊生擒賊匪一百三十四名斬賊目李興元桂士常等閏六月補陝西陽平關營參將七月官兵進攻燕子山賊寨生擒周世賢等十一名餘匪向蒲家山奔竄復有賊匪數千人竄至老道嘴地方總兵百祥飭圖興阿由萬斛坪一路迎擊百祥仍率遊擊王相龍等於大地溝余家嘴一帶接應官兵追賊至龍洞溝殲斃九十餘名奪獲刀矛器械無算九月隨百祥帶兵勦須峯寨賊悉眾迎拒我兵奮力衝擊斃賊甚多賊眾首尾不能相顧向岳家院等處潰逃乘勢追躡殺斃賊匪千餘名三年調直隸固關營參將九年升大名協副將十一年軍政卓異得 旨准其一等十三年

經總督溫承惠保舉堪勝總兵引 見奉 旨交兵部記名十四  
年授天津鎮總兵十五年正月圖興阿來京 陛見 上以圖興  
阿清語生疏人亦平庸天津爲繁劇之區恐到彼不能經理妥協  
諭溫承惠留心察看或於該省簡缺總兵內酌量奏調若竟不能  
勝任卽據實奏聞尋溫承惠覆奏查圖興阿於大名協任內營務  
頗能認真操守亦屬廉潔且前在陝西四川等省軍營勦捕賊匪  
著有勞績惟天津鎮有催趲漕運事宜非僅料理營務者可比臣  
恐圖興阿未能辦理妥協卽直隸總兵尙有馬蘭泰甯宣化正定  
四缺查各該鎮料理營務妥貼而於天津繁劇之缺均未見其相  
宜請另行 簡放或於外省總兵內 簡員調補 諭曰此奏未

免太速朕令該督畱心察看原非刻不可緩之事該鎮甫經到任何以卽知不能勝任若人本平常從前該督何以將該員遽行保舉堪勝總兵又據稱該員尙能經理營務於漕運事宜恐未諳悉等語見在漕船尙未到境何以卽知其不能督催著溫承惠仍遵前旨畱心察看俟試看半年如實難勝任再行奏請更換二月圖興阿偕巡漕御史福克精阿奏言東糧首幫挽入直境先抵安陵測量水勢并催趲豫省糧船飛行知會天津道迅委妥員沿河一帶疏濬深通以便南糧入境仍親身督率營汛催提在後各幫稽查積弊報聞尋調宣化鎮總兵十六年以年老召回京賞頭等待衛在大門上行走道光四年卒子貴保原任伊犁撫民同

知孫熙春工部郎中熙敬工部筆帖式熙純內閣中書

右 國史館本傳

托雲泰

托雲泰瓜爾佳氏滿洲鑲黃旗人由前鋒校洊升鑿儀衛雲麾使  
嘉慶三年授四川普安營參將四年升維州協副將時川省教匪  
滋事五年二月四川總督魁倫令托雲泰偕遊擊李光晟赴緜州  
金山驛防堵三月白號賊匪張子聰等竄聚梓潼之元山場托雲  
泰與副將唐朝臣赴剿遇賊於大毛山敗之賊匪旋由射洪王家  
嘴竄渡潼河托雲泰赴新店子趙家渡一帶守禦四月甘省賊匪  
高二馬五由卡狼寨敗竄入川參贊大臣德楞泰令赴龍安偕總  
兵百祥就近截擊托雲泰復偕副都統阿哈保等敗張子聰及藍  
號賊冉添元於嘉陵江賊眾先在江口陳家渡龔家灣柳樹灘四



處搶渡托雲泰等分兵四路擊之斬獲無算閏四月劉朝選賊眾擾涪州鶴遊坪托雲泰同總兵許元謨由梁山忠州追勦七月偕總兵李紹祖敗苟文明股匪於堰塘灣賊眾乘夜累次撲營我兵擊卻之斃偽總兵苟文貴偽副元帥白迴擒賊目趙學廉等數十人八月調甘肅中衛協副將隨德楞泰勦匪於九龍場陡坎子山梁與總兵馬瑜分兩翼進攻斬獲甚眾九月升安義鎮總兵十月湯思蛟賊眾竄東鄉開縣之柏木園德楞泰令托雲泰設伏後山觀音巖官兵從山上奮擊賊潰竄托雲泰乘勢掩捕獲思蛟弟思川十月偕總兵永甯搜捕太平大甯老林餘匪旋追賊於核桃壩敗賊於徐家壩殲擒二百餘時賊勢窮蹙圖自川竄陝十二月德

榜秦以城口地居萬山爲川陝交界令托雲泰帶兵駐防六年正月到朝選等合藍號楊步青股匪竄川東馬家營老林四川總督勒保檄托雲泰往剿追賊於寒溪寺蔥子坪屢有斬獲二月敗冉添泗股匪於雄板斃復敗黃號王國賢股匪於彭家山三月苟文明冉添泗餘匪屯聚沙光子托雲泰令都司孫斯禮由張湖山繞出賊前設伏白率參將李芝榮從白馬廟進擊賊竄至觀音巖我兵從山頂壓下伏兵起兩面截殺殲僞先鋒李應來擒僞總兵趙士良得 旨嘉獎四月由城口取道乾溪溝一帶剿捕湯劉餘匪五月回駐城口七月敗賊於南津關追至通天觀復敗之殲斃無算獲僞先鋒于仲十二月勒保劾奏副將褚大榮參將周廷翰等

一 二將帥五十二

三

防守不力私買民婦 諭曰托雲泰係統兵大員於褚大榮等防  
勒不力及兵勇滋事漫無覺察本應革職念平日帶兵尙爲奮勉  
著以遊擊降補七年 賞頭等侍衛充伊犁領隊大臣十年班滿  
回京十二年授直隸通州協副將十三年升雲南臨元鎮總兵十  
六年奏請調劑滿洲生計裁汰綠營虛額名糧 上責其妄言降  
三等侍衛充阿克蘇辦事大臣十九年三月奏請將阿克蘇庫貯  
普爾錢文折銀散放官兵鹽菜暫停內地撥解本年經費銀兩得  
旨允行四月以參審局員失寶革職先是托雲泰在阿克蘇同喀  
什噶爾參贊大臣鐵保於十七年奏參阿克蘇糧餉章京官成多  
收銅斤侵吞餘錢旋因官成訐控經伊犁將軍松筠遵 旨按問

以餘銅本出火耗並非多收覆奏下部嚴議托雲泰係新疆辦事之員從前會同鐵保辦理局務於官成多收銅斤之案並不將官成有無多收銅斤如何應有火耗餘銅之處詳細確查僅據鐵保主持查辦聯銜具奏實屬昏愆應照溺職例革職旋又以違例具奏謝 恩有 旨切責 命發往烏魯木齊效力道光三年期滿回旗四年卒子珠琳護軍參領兼世襲佐領瑚琳侍衛處筆帖式瑞林護軍

右 國史館本傳





穆克登布

穆克登布穆爾扎氏滿洲正白旗人由烏槍護軍補護軍校乾隆三十七年隨征金川 賞戴藍翎四十年二月遷前鋒校十二月遷委護軍參領四十一年金川平解送逆酋索諾木至京 賞銀一百五十兩四十二年授直隸宣化鎮滴水巖都司四十五年調倒馬關都司五十一年遷廣西左江鎮標中軍遊擊五十六年擢融懷營參將嘉慶二年五月貴州逆苗竄入粵境泗城府苗匪應之總督吉慶檄穆克登布守西隆州盡力抵禦屢有斬馘城賴以全六月隨吉慶攻克夏雄亞彙等寨遂渡江協勦黔省逆苗進攻板蚌諸寨身受槍傷仍奮勇殺賊多名八月遷鎮安協副將 賞

換花翎十二月升左江鎮總兵三年苗匪平赴左江任十八年三月擢西安將軍九月河南山東教匪作亂命穆克登布簡駐防兵一千交陝甘總督那彥成帶往軍營剿賊穆克登布留西安防守十九年閏二月調甯夏將軍三月調江甯將軍二十三年以年老召回京授正藍旗漢軍都統二十四年四月因前在江甯將軍任內防禦瑞祿有疾未經奏參降鑲白旗蒙古副都統九月擢正藍旗蒙古都統十一月管理火器營道光元年擢理藩院尚書二年閏三月以章嘉呼圖克圖赴藏違例請添給車馬罷理藩院尚書任十一月以年老休致賞食全俸三年八月萬壽聖節上幸萬壽山玉瀾堂賜十五老臣宴穆克登布與焉繪圖紀事

御製詩有久歷戎行志敵愾裹創血戰殲梟槍之句並賞御書壽字及蟒袍如意諸珍物四年卒 諭曰原任都統穆克登布自乾隆年間由行伍洊升總兵疊經出兵打仗受傷屢著勞績嘉慶年間歷任將軍都統宣力有年朕御極後簡任理藩院尙書嗣以年老由都統任內休致賞食全俸以養耆年茲聞溘逝殊堪軫惜著加恩賞銀五百兩由廣儲司給發照尙書例賜卹所有任內一切處分悉予開復應得卹典該部察例具奏尋 賜祭葬 子諡勇肅子蘇勒法原任兵部司務孫鍾科見官鑾儀衛雲麾使曾孫福興見官泰甯鎮遊擊

右 國史館本傳

匡章子方屏美有示級

名三百十二

三

福智

福智額爾圖特氏蒙古鑲黃旗人乾隆四十一年由親軍授藍翎侍衛四十三年遷三等侍衛四十四年遷二等侍衛四十八年升頭等侍衛五十一年充查續辦事章京嘉慶八年授四川夔州協副將十一年六月署松潘鎮總兵十二月以果羅克番賊疊擾西甯邊界福智率官兵馳往查辦由青海邊境前進分投搜捕殲賊甲益等六人生擒桑務等三名奪獲牛馬烏槍無算十二年署維州協副將十五年正月擢松潘鎮總兵八月署四川提督十一月回任十六年以川省邊界防範宜周其建昌之南坪龍安兩營距文縣營較遠未便隨時會哨議令文縣營都司按三月一次至交



界之馬尾墩與南坪營都司會哨後再至摩天嶺與龍安營都司會哨其餘各營仍按月定期巡哨庶匪徒勢難溷迹而疆圉自臻  
敕定經四川總督常明據議奏入得 旨允行十七年入 覲十  
八年復署四川提督十九年九月調甘肅涼州鎮總兵十二月果  
羅克番賊在厄身木錯住古地方搶掠福智督兵抵阿霸冒雪進  
剿獲賊喀蚌等六十六名時首逆板登借兀雞等屯聚加拉寨高  
踞山巔小寨千數圍繞四旁勢極陡峻且冰雪滿山不辨坡坎福  
智派署參將德印等督率土目番兵攀躋而上冒險攻撲以火彈  
燬其巢克大小夷寨十五陣殲首逆兀雞斃賊數十人生擒板登  
借等七十七名寘之法二十三年署甘肅提督二十四年調伊犁

鎮總兵道光四年卒

右 國史館本傳

司馬史氏傳  
卷三十一 將帥五十二  
三

西華大學生會

附

林孫

林孫廣東澄海人嘉慶元年由行伍隨陽江鎮廣海營遊擊師船出洋捕盜四年三月拔補左翼鎮標左營外委四月升春江協右營把總五年在南澎外洋協緝有功升香山協右營千總七年隨總兵黃標勦博羅賊匪攻克羅溪營孫首先登山殲擒甚眾八年四月擊賊於大潭沈其舟賊皆就擒十月升平海營守備九年巡緝至涌鞋洲遠洋擒盜首翁亞六并餘匪四十四人十年五月擊盜船於高瀾外洋沈之六月追賊至亞公角洋薄諸風灣山碎之賊登岸竄逸追獲甚眾閏六月敗賊於馬尾外洋七月追至廣州灣焚其舟擒七十餘人十一月賊船竄沙底澗洲以礮擊沈之擒

戮無算十一年升龍門協左營都司十二年二月隨廣東提督錢  
夢虎破賊於高瀾四月隨浙江提督李長庚擊賊於佛堂門外洋  
斬擒數十人獲其舟五月隨夢虎追剿首逆朱瀆破之於三澎外  
洋賊棄舟遁餘匪盡殲九月以賊首蔡牽竄入粵省截剿不力部  
議降調 上加恩改爲留任十三年二月追獲賊舟於濶洲三月  
復入山搜緝賊匪四百餘人咸就縛七月擊沈賊船於黑水深洋  
擒盜首徐亞文等一百餘人奪獲器械無算十四年四月賊竄香  
山荷包灣孫等燬其舟賊俱沈溺六月官兵出洋剿賊由梳甲門  
至磨刀洋面賊首總兵寶率黨抗拒護總兵許廷桂被戕孫往援  
射中賊目賊乘風縱火孫被焚墮海遇救獲免事 聞 賞戴花



翎 命以遊擊卽用十一月補碣石鎮標左營遊擊旋於新安赤  
澀角殲斃賊首張保仔兄生仔 命以應升之缺卽行升補十五  
年三月升浙江鎮海營參將尋以張保仔竄逸部議褫職 上加  
恩改爲畱任四月破賊於電白放雞外洋孫獲大舟擒六十四人  
五月隨廣東提督章鎮陞剿賊於儋州新英洋沈賊舟九焚賊舟  
五擒盜首烏石二孫復獨獲賊舟四奏入 頒賞玉韞等物十七  
年巡緝至福建東涌黑水外洋搜賊舟斬獲殆盡 命加副將銜  
署理福建金門鎮總兵二十年實授二十二年擢浙江提督二十  
三年入 覲二十五年 召來京尋丁父憂道光三年服闋因病  
乞假四年卒子光謙一品廕生雲南鎮南州知州緣事革職

國史館本傳

三

右 國史館本傳

周國泰

周國泰浙江鎮海人乾隆五十三年由行伍拔補鎮海營額外外委六十年補定海營外委在吉祥門擊獲閩匪石義等十二名嘉慶元年升定海鎮標中營把總在潭頭外洋首先攻破盜船一又弋獲盜船一獲盜首王杜等二十名三年隨定海鎮總兵李長庚追盜至東山黑水洋面首先過船二樂堵郭斛又圍擒蘇柳等四十一名獲盜船三又獲盜王棟等於普陀外洋並奪獲盜船槍械藥彈等物尋升定海鎮右營千總五年升溫州鎮標中營守備八年六月在漁山洋面擊獲盜船三攻沈賊船一生擒葛九等三十七名斬首七級九月升瑞安左營中軍都司十年升黃巖鎮標中

營遊擊十二年五月署黃巖鎮參將隨總兵孫大剛在臺山外洋  
獲盜船一盜犯十四名六月攻逆匪蔡牽幫船於馬齊山礮斃無  
算又於七星洋面追獲盜船一及盜犯王松等二十七名射斃穿  
紅馬褂賊目一名又在南鹿山外洋焚蔡逆大幫船一燒斃賊目  
多名 諭曰蔡逆匪船此次由粵竄回閩省北洋往來游奕經總  
兵孫大剛署參將周國泰率領兵船在馬齊外洋七星洋面先後  
擊沈盜船淹斃賊匪無數並生擒賊夥王松等二十七名擊斃穿  
紅馬褂賊目一名起出礮位鳥槍火藥食米等項甚多勦捕尙屬  
奮勉俱著交部議敘尋 諭周國泰著賞加參將銜護理福甯鎮  
總兵十月追擊鳳尾幫張河治幫匪於北鹿外洋攻破賊船一擒



邱登等十名又於披山外洋面攻勦鳳尾幫獲盜船二擒盜八十  
九名十一月會同浙江提督李長庚在浮鷹洋面獲盜船二燒燬  
盜船一擒王澤江金等九十六名奉 諭此次李長庚周國泰等  
兵船追勦蔡逆在浮鷹洋面分投赶上賊船大加攻勦李長庚一  
路拏獲賊船一隻生擒賊目王澤等五十名周國泰一路燒燬賊  
船一隻拏獲賊船一隻生擒賊目江金等四十六名各船兵勇多  
有力戰受傷所辦甚屬認真均著加恩交部議敘十三年四月兵  
船巡至深滬洋面探有蔡逆船二十餘在獺窟大隊一帶滋擾國  
泰乘夜霧迷漫分兵兩路僞作商船由內外洋抄襲獲盜船七沈  
盜船三擒獲邱古等二百餘名射斃穿紅賊目一名國泰手足槍



傷 諭曰護總兵周國泰在洋督勦手足帶傷並親自射倒穿紅賊目率領弁兵生擒匪犯多名實爲奮勉可嘉該員丁艱後例應開缺但見在海洋督兵勦捕正當喫緊之際自未便令其回籍更易生手周國泰著加恩升署福甯鎮總兵俟服闋後再行實授該員惟當倍加感激勉圖報效五月在烏坵鯨殼澳等洋面擒獲匪犯林貴等七十四名 諭曰蔡朱二逆幫夥匪船在烏坵宮仔洋面經總兵周國泰率領兵船趕往追捕分投擒獲七十四名其粵東匪船竄至柑桔外洋亦經擒獲十七名官兵均尙屬奮勉閏五月追勦蔡逆於圍頭外洋擒王少等七十八名獲礮械食米等物甚多 諭曰蔡逆黨分幫匪船向東逃駛經總兵周國泰等一路

舟師追至圍頭外洋痛加剿捕用火攻燒共計獲犯七十八名並奪獲大礮器械食米等物甚多實屬勇往可嘉六月東獅洋面獲犯顏柳等十八名七月兼署福建水師提督九月閩浙總督阿林保奏參國泰等辦賊稽延請分別示懲 諭曰所參甚是水師積習疲玩出洋剿匪往往以燂洗船隻爲名藉詞推諉致賊東奔西竄來往自如閒或赶上賊船又稱陡遇風雨收入內港遷延避賊任意懈弛實爲可恨此次蔡逆竄入浙洋總兵周國泰孫大剛係專辦該逆之人所帶兵船多於賊船數倍又有浙省舟師與之夾擊乃蔡逆在定海北洋潛匿多日而周國泰等追至浙洋卽以燂洗船隻在三盤洋面停泊入日迨經開舟至定海復又燂洗五日

前後兩旬之間燂洗二次以致該逆乘風免脫直竄回閩而兵船  
反又向北駛進以致折回遲延終於未能追及試問該總兵等又  
由何處探此不確之信其爲託詞延緩子賊以暇情事顯然見當  
勦辦喫緊之時經朕屢降諭旨明示激勸乃該鎮等毫無振作仍  
復一味遷延若不明示創懲賊匪何時辦竣總兵周國泰所帶兵  
船較多不知上緊追勦其咎尤重著照該督所請降爲千總隨同  
舟師出洋立功自贖十四年在烏坵外洋擊沈盜船一轟斃賊匪  
多名國泰右臂受傷因病請休回籍道光四年卒子德沛瑞安協  
左營千總德潤提標中營外委德洪定海鎮標左營把總

右 國史館本傳

馬建紀

馬建紀四川巴縣人乾隆三十二年由行伍隨征緬甸打仗受傷三十六年隨征金川以戰功拔重慶左營外委尋遷綏甯營把總四十八年升千總六十年黔楚逆苗不靖延及四川秀山縣境建紀隨都司何元卿擊退之命以守備升用旋補綏甯營中軍守備嘉慶元年四月湖北教匪作亂屯踞來鳳縣小坳山梁徧四川西陽州界建紀隨署總督孫士毅閒道進攻身受矛石傷各一仍奮勇殺賊多名遂克賊寨賞戴花翎七月小坳逸匪竄入旗鼓寨成都將軍觀成勦敗之賊向西北奔竄建紀截殺數百人十月隨觀成勦首逆覃加耀於巴東縣譚家村由山後小路直撲賊巢



縱火焚之賊驚潰官軍乘勢剿殺殲斃無算 命以應升之缺升  
用二年四月補夔州協都司六月升湖北襄陽城守營遊擊三年  
隨總督勒保剿王三槐等股匪於四川儀隴縣趙家山總兵百祺  
等擊其中路建紀偕參將尤漢玉由左右山坡斜衝而入殲賊八  
九百名追至觀音河力戰被傷五年二月隨總兵孫清元敗賊於  
湖北房縣黃龍堰追至馬尾塘溝突有騎賊衝撲後隊建紀奮力  
抵禦殺賊二十餘名賊始遁嗣以傷發回襄陽接管營務十二年  
升山東萊州營參將十八年九月教匪李文成據河南滑縣滋事  
分遣其黨陷山東定陶巡撫同興令建紀偕運司劉清進剿兵抵  
髡山獲賊謀數人偵知東南兩路村莊均有賊匪屯據分兵剿殺



大敗之遂復定陶連破蕭家廟長寨馬家集諸賊十月擊賊於韓家大廟殄其前鋒百餘人餘眾奔潰進克賊巢獲教首趙文祿及賊渠蕭保事 聞下部議敘十月定陶賊匪竄入曹縣扈家集建紀復偕劉清往攻火其寨賊眾潰出官兵合圍殲戮殆盡 上以建紀奮勇出力賞加副將銜卽換頂帶並賞四喜玉扳指旋有滑縣賊匪數百人竄至定陶郝家集建紀帶兵迎勦與劉清兩路夾擊賊大敗追殺二十餘里擒賊目曹光輝殲僞元帥袁興邦僞將軍周姓得 旨嘉獎時山東境內肅清賊眾尙據滑縣 命建紀嚴防邊境十九年三月調曹州營參將九月遷臨清協副將十月升登州鎮總兵二十一年調廣東陽江鎮總兵二十二年調福建

漳州鎮總兵二十四年以病乞休 諭曰馬建紀屢經出師打仗  
身受多傷著有勞績茲因年老傷病復作懇請開缺回籍調理著  
以原品休致並加恩賞食全俸以示體卹道光四年卒子承德湖  
北提標左營把總承舉四川甯越營都司孫垂昌四川候補千總  
垂榮二品廕生戶部候補主事

右 國史館本傳

錢夢虎

錢夢虎浙江甯海人乾隆四十四年由武舉效力水師營四十九年補定海鎮左營千總五十一年獲洋盜鮑文相等升守備五十三年遷提標水師營遊擊五十六年在淡水洋面追捕盜船格殺多匪身受重傷巡撫福崧奏入 上嘉之五十七年八月復獲洋盜王孝治等十九名十二月升廣東平海營參將五十九年署澄海協副將嘉慶元年四月在五嶼洋擊沈盜船一獲蔡阿臣等二名尋授澄海協副將八月署碣石鎮總兵十一月在南澳洋獲盜犯林亞桂等十八名二年二月兩廣總督覺羅吉慶保奏夢虎緝捕奮勇不畏風濤堪勝總兵之任報 聞尋因失察夷匪入粵劫

掠降一級調用六月在蒲臺外洋擊沈盜船六斃盜首總兵林獲  
楊亞長等六十六名得旨錢夢虎本係副將緣事降爲參將今  
督擒洋盜多名尙爲出力著加恩開復仍實授副將十二月借左  
翼鎮總兵徐忠等在甲子洋擊沈盜船二獲王亞大等二十一名  
殲海南二等八名溺斃無算三年正月升江蘇蘇松鎮總兵二月  
吉慶以夢虎熟諳舟師勇幹有爲緝捕洋匪甚爲得力奏請調補  
碣石鎮總兵從之七月在遮浪外洋獲盜犯江亞森等八名八  
月擊盜於烏山外洋沈其船一於汕尾外洋追及之擒楊亞歪等  
十一名五年捕獲盜船於桅夾洋射傷執旗盜首擒總兵興等四  
十四名賞戴花翎六年因病解任回籍命病痊後仍畱粵東



補用十年擢廣東水師提督十二年二月洋盜蔡牽經浙江提督李長庚追剿緊急由閩洋竄粵上命吳熊光督飭夢虎等統領舟師探蹤迎擊與李長庚收兩面夾攻之效尋長庚奏參夢虎自汕尾洋合幫後並未跟幫助剿諭曰蔡逆前由閩洋竄粵屢經諭令吳熊光錢夢虎一體認真督飭緝捕今該逆由沱瀾洋駛逃經李長庚等回環攻擊不難生擒巨憝乃錢夢虎等所帶兵船並未跟幫前進坐失事機厥咎甚重吳熊光錢夢虎均著傳旨嚴行申飭並著該督查明錢夢虎因何未經跟幫如係無故遲延卽行據實奏參一面仍嚴飭錢夢虎督率舟師會同李長庚上緊圍捕如能速擒蔡逆尙可將功折罪猶當加以恩施儻再有玩誤嚴譴



即至矣旋吳熊光覆奏夢虎在汕尾洋與李長庚同幫巡抵糧船  
灣時李長庚師船直抵外洋夢虎見有賊船十餘恐其勾結閩匪  
當即往捕駛至担杆洋適坐船舵壞收泊更換尋遇賊於高瀾洋  
擊沈其船二溺斃無數其一船逃往大金洋率兵追勦擒粵匪亞  
婆帶夥盜文亞發等十五名查夢虎不及與李長庚聯幫見經獲  
盜審辦尚非虛捏但蔡逆爲奉 旨飭拏要犯自應先行截勦乃  
因追捕粵匪致失機會實屬不知緩急請交部嚴議 上加恩免  
議仍 命會同李長庚注意蔡逆奮勉勦捕五月吳熊光奏言屢  
奉 訓諭專注蔡逆併力殄除餘匪且從緩辦而錢夢虎等因途  
遇鄭一匪船就便截擊未免不知緩急其蔡逆下落亦未踴探確

實 上以夢虎統領師船總不免在洋觀望於水師疲玩習氣全未湔改下部議處尋議降三級調用 上加恩改爲革職畱任九月在仰船洋見有匪艇往來夢虎率將弁追捕於紅香鑪九龍等處洋面沈賊船十一獲船三溺斃甚夥盜匪等仍恃眾抗拒夢虎射斃執旗賊目一乘勝復奪船十先後擒盜犯無算得 旨嘉獎開復革職畱任處分十三年二月追擊土盜於澗洲洋獲船四擒盧德容等八十七名六月偕福建水師提督王得祿等統領三省舟師於澗洲洋進擊蔡牽駛至烏石洋陡起風浪漂沒寄棹兵船多有損壞 諭曰蔡逆由鯉魚洋東上與錢夢虎師船相隔甚遠若乘勢折回閩洋則王得祿係該省提督自應緊躡窮追回赴閩

省錢夢虎卽無庸隨同過閩見在粵省尙有烏石二亞婆帶等盜匪幫船亟須次第剿除剋日肅清正不必舍己之田而芸人之田若蔡逆尙未折竄回閩錢夢虎等能在粵洋就地殲擒更爲妥善必當渥沛殊施優加錫賞七月追擊土匪於遮浪外洋沈賊船七獲船五擒徐亞文等一百八名十四年四月因病解任回籍十一月兩廣總督百齡圍攻洋盜張保仔於大黃埔水師提督孫全謀會剿失期 上逮問全謀並以夢虎在粵四年養癰貽患革夢虎職解交刑部治罪尋發往烏魯木齊效力十九年釋回二十四年上六旬萬壽 加恩以守備用仍發浙江水師營道光元年補乍浦營守備二年升定海鎮標中營遊擊三年因病解任回籍四年

卒于治平湖北武昌衛千總

右 國史館本傳

國朝通志卷之五十二 將帥五十二 五十二

170-248

170-248



張大振

張大振陝西長安人乾隆四十七年由行伍拔補督標中營外委四十八年升右營把總四十九年隨總督李侍堯剿捕甘肅石峯堡逆回五十一年隨總督福康安往剿福建臺灣逆匪林爽文均在事有功遷中營千總五十六年隨將軍福康安出征廓爾喀殺賊多名 賞戴藍翎六十年俸滿引 見 上以大振屢次出征著有勞績 命畱部遇有守備缺出卽行坐補嘉慶元年正月授甘肅松山營守備 賞換花翎四月經陝甘總督宜綏調赴軍營隨剿教匪以在湖北鄖陽府泥河口等處打仗奮勇遷涼州鎮標前營都司十一月敗賊於陝西興安府將軍山二年三月宜綏剿

賊入川攻克太平縣通天觀等處賊寨九月遷大靖營遊擊旋擢  
烏魯木齊濟木薩營參將五年白號賊高二馬五等犯龍安提督  
七十五由鐵籠堡進勦大振率土通判王璣長官司王璵夾擊之  
擒斬多名七年回營九年調烏魯木齊提標中軍參將十二年升  
甘肅永固協副將十五年調陝甘督標中軍副將十八年九月河  
南教匪李文成作亂陷滑縣隨欽差大臣那彥成往勦賊據道口  
鎮傾巢來犯副都統格布舍等率眾迎擊大振隨那彥成在後策  
應併力勦殺賊敗退十一月分路進勦護軍統領慶祥等由右副  
都統富僧德等由左大振與總兵馬元徐錕等直取中路賊眾萬  
餘紛來抗拒大振等奮勇截殺復用大礮轟擊賊驚竄官兵飛越

濠塹遂入道口滑縣賊匪出城救應復經大振截回事 聞下部  
議敘十二月收復滑縣 上大振首先登城 賞強勇巴圖魯  
名號十九年升直隸正定鎮總兵道光元年以病休致在籍食俸  
四年卒子魁二品廕生

右 國史館本傳

國朝通志卷之三十四  
禮部  
四

國朝耆獻類徵初編卷三百十三目錄

將帥五十三

年德

佛安

巴彥巴圖

張廷楷

楊逢春

安慶

宗室永芹

祥保

舒明阿

西林布

高杞

謝成貴

張起龍

卓爾琿保

郁宗海

慶湖

舒凌阿

國朝耆獻類徵初編卷三百十三目錄





國朝耆獻類徵初編卷三百十三

通奉大夫前署江西巡撫江西布政使司布政使湘陰李桓輯

將帥五十三

年德

年德瓜爾佳氏滿洲鑲黃旗人西安駐防嘉慶元年由委前鋒校  
隨西安將軍宗室恆瑞剿捕陝西教匪二年在西鄉縣司渡河奮  
勇殺賊肋受矛傷 恩予賞賚四年升驍騎校五年遷防禦九年  
隨將軍賽冲阿剿川陝餘匪十年事竣回防所十二年升佐領十  
八年岐山三才峽匪徒滋事竄入盤屋地方年德隨副都統額勒  
金泰往剿有功十九年遷協領二十二年西安滿洲營正黃旗佐

領伊林圖以軍政被劾訴於巡撫朱勳稱爲年德所誣致被將軍成德參劾朱勳奏入 命交陝甘總督長齡審辦先是成德 陛見回任聞年德有扣兵賞銀挑甲不公事因密行查訪年德屢謁未見心生疑懼稟請朱勳代向成德剖白伊林圖誤以年德所稟係控成德有侵吞公項情事誣伊從中唆使致成德將伊參革至是長齡訊明年德於兵丁應領賞銀並無剋扣挑選馬甲亦無贖徇且具稟祇爲己分割並無控告將軍之事伊林圖實係懷疑妄訴惟年德因將軍未准謁見卽向巡撫稟請分訴亦有不合奏請交部議處尋議降一級補授西安防守尉道光元年四月擢歸化城副都統八月偕將軍成祿奏土默特兵司掌印參領德恩伯呼

勒商同參領等私立小票木戮勒令來城各蒙古及在蒙古貿易人赴司領票擾累外藩請革德恩伯呼勒職隨同附和各參領議處 上以所奏情節未確 命巡撫成格確訊嗣成格訊明小票木戮係佐領鄂爾吉呼起意刊刻德恩伯呼勒被其蒙混率意准行降革各有差年德以未能審出起意之人遽請將參領革職辦理草率與成祿俱下部議處尋議降二級畱任三年因病休致 賞食全俸五年卒子珪達布文舉人

右 國史館本傳





佛安

佛安□□□□□□□□□□嘉慶二年由黏桿處拜唐阿升藍翎侍衛四年遷三等侍衛十三年遷二等侍衛十七年升頭等侍衛十九年授庫爾喀喇烏蘇領隊大臣二十二年召來京二十三年擢正藍旗漢軍副都統尋命管理火器營事務道光元年三月署正藍旗護軍統領五月授廣州副都統二年二月偕廣州將軍孟住奏廣東駐防旗籍文武舉人進京會試資斧維艱請將入旗扣存馬價銀一萬兩發商生息遇會試之年每名除例給水腳銀二十兩外加賞銀三十兩又驍騎校領催前鋒筆帖式等官進京引見向例在籌備軍裝息銀項下給銀二十兩實不敷用亦

請加賞銀三十兩以資盤費此項籌借生息銀兩除酌賞文武舉人外其餘贖銀兩俟積有成數陸續歸還原款均得 旨允行三月偕將軍孟住議覆操練章程奏言滿漢八旗水師旗營請於春秋二季開操之後先看官員騎射次將兵丁槍箭馬步技藝輪演一次分別優劣予以獎黜並請於五月至七月例應停操之時酌擬閒日令兵丁輪流演習技藝疏入 諭曰孟住等奏遵擬操練章程著照所擬認真訓練分別勸懲惟每年五月至七月因該省暑熱停操定例已久該將軍等所擬閒日輪流演習之處殊屬紛更仍照舊停操可也九月署廣州將軍五年卒

右 國史館本傳

巴彥巴圖

巴彥巴圖郭佳氏滿洲正白旗人父阿滿泰鑲紅旗蒙古副都統  
隨征廓爾喀陣亡廢騎都尉世職自有傳乾隆五十八年巴彥巴  
圖由間散襲騎都尉嘉慶六年授三等待衛十三年擢二等待衛  
十七年以曠班降三等待衛二十年 上閱侍衛步射巴彥巴圖  
中五矢升頭等待衛授伊犁領隊大臣二十三年班滿 命回京  
二十四年十月授鑲黃旗蒙古副都統會文穎館不戒於火巴彥  
巴圖偕王大臣撲救迅速 命交部議敘十二月兼鑲藍旗護軍  
統領是歲除夕 上御保和殿筵宴 命巴彥巴圖管轄丹墀因  
失察跟役入內革護軍統領副都統降爲二等待衛在大門上行

走二十五年擢正紅旗蒙古副都統道光二年閏三月署鑲紅旗  
護軍統領六月授鑲藍旗護軍統領三年 賞副都統銜命爲喀  
什噶爾幫辦大臣先是嘉慶二十五年回部逆裔張格爾糾眾潛  
入卡倫滋事爲官兵擊敗逃竄四年復自浩罕至阿賴糾約布魯  
特數百人於奈曼部落地方窺伺欲由英吉沙爾所屬之圖木舒  
克烏魯克兩卡倫來喀什噶爾滋事參贊大臣永芹令巴彥巴圖  
偕領隊大臣色普徵額率兵馳赴相機擒捕適賊至烏魯克卡倫  
焚搶我兵奮勇接戰斬布魯特賊匪二十餘名獲賊目邁瑪第伊  
斯拉木等張格爾聞官兵至先遁出卡外巴彥巴圖出卡追捕獲  
逆黨那爾巴他及其弟西爾頭人阿玉巴什並賊匪二十餘人偵



知賊黨西爾噶孜匿罕鐵列克山內率兵捕斬之復誘擒助逆賊  
目噶爾察與其弟沙布他於鐵勒索斯山 上嘉獎之尋劾奏協  
領巴克唐阿帶兵堵截逆賊去路行程遲誤且輕聽詐言退兵致  
張格爾乘閒竄逸 上褫巴克唐阿職發黑龍江充當苦差 諭  
曰巴彥巴圖辦理此案鎮靜周密本屬妥善惟張格爾等逃竄未  
獲雖係巴克唐阿輕聽詐言所致究由該大臣用人不當以致坐  
失機宜毋庸給予恩敘五年張格爾復糾合薩雅克部落布魯特  
等至卡外窺伺羣莽令巴彥巴圖帶兵二百餘人出卡剿捕張格  
爾潛竄巴彥巴圖行至都爾伯津縱兵剿殺夷目汰劣克家屬百  
餘人汰劣克遂同眾布魯特追圍官兵力戰一晝夜全軍陷歿巴



彥巴圖中槍傷自刎死永芹奏言巴彥巴圖帶兵出卡已殺賊百餘名於撤退時誤入山險被圍致與隨往官兵同時陣歿 上以辦理雖失機宜其爲國捐軀之情實堪憫惜加恩晉贈都統銜照例賜卹旋 命參贊大臣慶祥查奏剿賊被害確情慶祥疏言張格爾於七月閒至薩雅克部落居住經阿奇木邁瑪薩依特等稟報參贊大臣永芹令巴彥巴圖帶兵二百名以查卡爲名往捕巴彥巴圖妄殺汰劣克家屬致眾布魯特追圍官兵陷歿 上以巴彥巴圖輕率出卡致張格爾先期竄匿罪有應得念其被圍受傷事急捐軀 命仍畱都統銜及加賞世職餘應得卹典槩行停止六年又 命揚威將軍長齡確查歷任喀什噶爾參贊辦事大臣

賢否旋據實奏明 諭曰上年張格爾潛至卡外永芹與巴彥巴圖並未確探情形又不詳慎勦辦巴彥巴圖率將汰劣克家屬妄行誅戮旋至全師被害若使其身尙在亦當從重治罪見已身故著革去都統銜及加賞世職

右 國史館本傳

人  
名  
錄  
三  
七

張廷楷

張廷楷四川成都人祖學聖官雲南普洱鎮總兵乾隆五十一年  
廷楷由行伍拔補提標右營額外外委五十三年巴勒布逆番滋  
擾隨提督成德往征以打仗奮勇補外委五十六年調赴廓爾喀  
攻克擦木賊寨升軍標右營把總五十七年升提標左營千總五  
十八年調前營千總六十年二月黔楚苗匪滋事調赴湖南軍營  
三月攻克蘭草坪解永綏圍 賞戴藍翎四月官軍克黃瓜寨通  
鎮算路九月破高多寨獲首逆吳半生廷楷俱著有戰績嘉慶元  
年正月進攻連雲山寨胷受槍傷二月升疊溪營守備六月隨內  
大臣額勒登保收復乾州十二月克平隴二年六月由鎮算至湖

北剿教匪覃加耀等於芭葉山賊竄宣恩建始等縣廷楷偕侍衛  
薩克丹布等分搜芭葉山餘賊殲獲甚多閏六月升廣西平樂協  
左營都司三年正月覃加耀率餘黨百人折入歸州終報寨其地  
懸崖峭壁官軍梯繩而上廷楷偕遊擊游棟雲等先登擒之並獲  
僞軍師張正潮等斬馘百餘奏入 賞換花翎九月擒四川藍號  
賊首張漢潮之子正澇於張公橋十一月獲首逆羅其清於大鵬  
山四年三月殲賊首蕭占國等於譚家山斃賊首冷添祿於廣安  
州石頭堰廷楷俱在事出力七月升廣東廉州營遊擊九月協剿  
首逆阮正澇於雲霧山殲之十一月黃青藍各號賊匪併力抗拒  
經略額勒登保督廷楷等剿之於巴州何家院五年二月追賊至



甘肅擒僞元帥詹世貴進攻魯家巖乾溪溝斃僞元帥何鬍子擒  
僞元帥余作凱五月擢四川永甯營參將是月斬白號賊首楊開  
甲於洋縣之茅坪十月攻長嶺溝射殺僞元帥陳元保六年二月  
躡黃號首逆王廷詔於川陝邊界擒之三月白號賊首高二馬五  
等逸入南鄭廷楷等追至百雄關會合各路官兵夾擊之殲擒五  
百餘名獲僞元帥王凌高及老教首張什旋擒高二馬五於甯羌  
州鐵鎖關得 旨優敘五月擒僞先鋒高大貴於天池山六月獲  
首逆伍懷志於秦嶺七月獲首逆王士虎冉添泗於通江報曉壇  
八月遷浙江湖州協副將時白號首逆高見奇辛斗等擾甯羌九  
月辛斗於南江倒水峒被擒高見奇率數百人奔通江鐵廠河廷

楷同參將特依順保由桂門關趨黃柏埡十月剿賊蟒洞溝俘斬八十餘人餘匪東遁由青磁子聚躡之適股匪李彬竄入南江額勒登保檄廷楷協剿於達州獲僞元帥冉添潢僞副帥朱印七年正月擒黃號賊首辛聰於南江五寶山時賊勢日蹙遁伏老林首逆苟文明敗竄秦嶺廷楷與副將張瑗遊擊黎炳分路搜剿窮賊所向六月於龔家灣痛殲之獲其妻孥苟逆奔入黃龍峒廷楷等擊之於秦山廟光腳嶺沿途疊有斬獲七月偕總兵李應貴等進斬僞先鋒王世貴苟逆竄匿黃柏扒官兵圍攻老林廷楷等入林搜捕追至花石巖逆自投崖下兵勇以矛斃之盡殲餘匪捷入得旨嘉獎下部優敘九月黃藍白三號餘匪由楚入陝廷楷偕總兵

喜明等分路急追斬獲五十餘人賊復南竄繞向西南迎擊又擒  
十餘人八年二月搜捕南山零匪事竣六月回任十年四月擢山  
東登州鎮總兵六月調湖南鎮筵鎮總兵二十五年以母老告養  
回籍道光五年卒

右 國史館本傳



楊逢春

楊逢春四川崇慶人兄遇春陝甘總督一等侯自有傳逢春以武生效力軍標乾隆五十六年從征廓爾喀以打仗奮勇授督標左營額外外委五十九年升成都城守左營把總六十年二月隨官軍剿黔楚苗匪解松桃圍克蘭草坪拔蘇麻寨逢春皆有戰功賞戴藍翎六月升城守右營千總嘉慶元年調督標右營千總檄赴川楚軍營隨剿邪匪四年遷越嶺營守備五年五月擢督標中營都司七月隨經略額勒登保追剿賊匪陳傑於甘肅徽縣獲之賞換花翎十三年涼山夷匪烏卜旬結生番侵擾馬邊峨眉等處逢春隨總督勒保往剿之事平 命以遊擊升用先換頂帶十四



年補重慶鎮標中營遊擊十九年正月陝西洋縣賊匪私立五色旗號分渡漢江擾及川境成都將軍賽沖阿令逢春往禦賊竄西鄉縣木竹壩恃險負嵎參將朱成受等由左路衝擊逢春偕遊擊余步雲由右山梁俯攻賊潰擒青號僞元帥楊榮僞先鋒孫應材李定興等 賞加副將銜遇缺卽補二月隨賽沖阿擊藍號股匪於洋縣碾子溝會雪甚賊椎牛會食我兵冒雪進攻賊奔據山梁朱成受余步雲等左右夾攻逢春由太陽灘繞攻其背殲二百餘人擒藍號僞先鋒蘇容盧倖劉成舉追及紅號綠號二股賊匪於北巖子賽家嶺偕朱成受余步雲三路兜剿斬獲千人擒紅號僞總兵羅懷綠號僞先鋒劉添華等賊平四月補陝甘督標中營副

將二十年甘肅省城卡樓燬於火焚斃弁兵甚眾逢春坐疎防部  
議降調 上加恩改爲畱任二十二年擢山東曹州鎮總兵二十  
五年十月調登州鎮總兵十二月調兗州鎮總兵值其兄陝西提  
督遇春 陸辭出都 命山東巡撫錢臻傳諭逢春迎赴河南途  
次面受其兄教導道光元年以病解任五年卒子國柱湖北候補  
知州國棻二品廕生候選通判

右 國史館本傳

Vertical text on the right margin, likely bleed-through from the reverse side of the page.

安慶

安慶直隸清苑人由行伍拔補督標後營把總嘉慶元年川楚教  
匪滋事四月派赴湖北軍營剿賊七月隨直隸提督慶成敗賊於  
紅土山獲賊目黃玉貴奏授行營千總九月剿賊於溇河鎮陳家  
河手受矛傷十一月經烏魯木齊都統永保奏請剿賊於草店有  
功 賞戴藍翎二年正月隨理藩院尙書惠齡破賊於槐樹岡擢  
行營守備復追賊於淡家岡杏兒山擒賊目劉起榮補易州營千  
總時川匪由雲陽一帶偪近川江圖竄楚七月隨惠齡由香坪追  
賊抵梅子壩偵賊聚雙河口洞裏壩惠齡分兵先踞山梁賊持紅  
黃白三色大旗分撲官兵安慶首先衝入黃旗賊隊斃十餘名我

兵從進殲獲無算八月敗賊於太平縣亭子廟追至官塘壩安慶  
射騎馬賊目斃之餘盡竄十月升直隸插箭嶺守備十一月隨西  
安將軍恆瑞擊敗賊於司渡河塵戰三日殺賊數千生擒賊目王  
廷基等五百餘人 賜強勇巴圖魯名號 賞換花翎三年四月  
升沿河口都司四年復隨恆瑞敗賊於張家坪斃藍號賊首張漢  
潮 命以遊擊升用五年隨恆瑞剿賊於鎮安之竹凹山梁我兵  
分三路進攻安慶從中路首先撲入殲賊七十餘名八年三省底  
定大兵凱旋補直隸督標後營遊擊九年署河閒協副將旋調順  
德營遊擊十二年署涿州營參將十三年升閩浙督標左營參將  
十四年署福州城守營副將十五年署汀州鎮總兵十六年補福



州城守營副將二十二年升四川松潘鎮總兵二十五年命來  
京另候簡用道光元年賞頭等待衛在大門上行走五年五月  
授廣東潮州鎮總兵九月卒子長庚二品廕生四川夔州府通判

右 國史館本傳



宗室永芹

宗室永芹正藍旗人乾隆五十五年襲三等鎮國將軍嘉慶元年授三等待衛七年隨扈熱河以監視大營奏報遲誤降四等待衛八年命在乾清門行走十三年復升三等待衛十八年升二等侍衛授喀喇沙爾辦事大臣十九年調喀什噶爾辦事大臣二十年九月塔什密里克回匪攷牙墩句結布魯特等焚燒馬廠戕害官兵永芹帶兵捕拏賊眾逃竄永芹止於附近回莊搜拏餘匪未曾追捕出卡諭曰永芹身係宗室曾充乾清門侍衛且年力方壯伊既親身帶兵追賊乃並未出卡藉搜拏爲名在中途駐劄實屬畏葸無能著卽革職回京無庸畱彼效力十一月首逆攷牙墩

就擒回莊肅清 上以永芹接據稟報立即查拏首夥各犯以次就擒辦理迅速尙有微勞可錄加恩免其革職降三等侍衛復投爲喀喇沙爾辦事大臣二十一年 命回京二十五年七月升二等侍衛十一月升頭等侍衛道光二年五月授鑲黃旗蒙古副都統六月仍以副都統爲喀喇沙爾辦事大臣十一月屯弁趙登福等虧缺倉糧奏擬革職並請枷號示眾 諭曰該千總等虧缺倉穀永芹等擬以革職是其罪所應得至請於屯工加枷號一箇月示眾殊屬非是官員犯法其應得罪名刑律自有專條若荷校之罰原非一槩而施其有情罪較重者皆有特旨枷以示懲臣下豈容妄擬十二月擢喀什噶爾參贊大臣四年九月喀什噶爾營兵

海常祿偷出卡倫與安集延回子句結經永芹等拏獲究辦 上  
嘉其認真十一月逆裔張格爾糾合回匪黃夜搶卡經永芹等督  
率營弁剿捕並將助逆搶卡各賊目誘獲疏入 諭曰永芹辦理  
此案鎮靜周密本屬妥善惟張格爾等逃竄未獲雖係巴克唐阿  
輕聽詐言所致究由該大臣等用人不當以致坐失機宜毋庸給  
予恩敘十二月授鑲黃旗漢軍都統五年五月張逆又至伊爾古  
楚卡倫外仍圖窺犯並數次差人詐降永芹等疊派伯克護衛出  
卡申約曉諭該逆始終猶豫尋又竄去無蹤事 聞 諭曰該逆  
如敢再來該大臣當相機盡力殲擒不可輕信其言致墮奸計見  
已竄逸無蹤亦不必徒勞兵力尾追卽再來逞詐約降正可置之



不理永芹等見派協領等帶兵在木吉地方防其復來所有各卡  
倫著卽嚴密巡緝加意防範毋稍疏虞九月糾約布魯特夷匪汰  
劣克拜巴哈什等在卡外滋擾永芹派令幫辦大臣巴彥巴圖帶  
兵出卡剿捕已殺賊百餘名於撤退時誤入山險被賊截圍致與  
隨往官兵同時陣沒奏入 諭曰逆夷張格爾屢次在卡外滋擾  
本年夏間復逞詐約降事洩遠竄前經降旨令永芹等加意嚴防  
卡倫安撫喀什噶爾回眾及卡外布魯特等相機辦理永芹自當  
確探該逆蹤跡嚴密防範不可輕墮奸計乃因邁瑪薩依特報稱  
該逆劫掠出卡貿易回子輒調派官兵遠出卡外三站希冀擒捕  
巴彥巴圖於賊匪退敗後旋師並無紀律復被逆賊截追抵禦無

計又無救援與官兵同時陣沒永芹身爲參贊大臣祇知株守城中諸凡調度未能得當重失事機其輕率冒昧之咎實無可辭此時邊防緊要未便驟易生手著從寬免其治罪暫行畱任以觀後效又 諭曰逆夷張格爾此次復潛赴薩雅克部落布魯特等處句結滋事何以布魯特等附和者甚多前此逞詐約降何以卽知官兵欲出擒捕輒行遠竄此次潛來卡外糾結多時何以直至屢次劫掠貿易回子之時該阿奇木邁瑪薩依特始行報知是否永芹照察不周致有回眾伯克等潛通消息之事邊疆地方緊要不宜稍涉顛預其此次永芹所奏該逆滋事及官兵勦辦情形是否確切抑或有不實不盡之處在永芹固不克輕離職守何以並不

酌量派兵往援坐令巴彥巴圖孤軍盡沒著慶祥密加查訪據實具奏十月永芹偵知張逆竄至碩拉地方與助逆之布魯特頭目汰劣克及賊目拜巴哈什等潛相團結 命伊犁將軍慶祥往喀什噶爾督同永芹相機妥辦法殲擒十一月 上以永芹毫無應變之才辦理不善難勝參贊之任革去都統飭令來京是月卒尋經慶祥奏陳官兵出卡失利被害實在情形 諭曰永芹身爲參贊既已調度失宜又復奏事不實若使其身尙在必當革職拏問按軍法治罪前已降旨革去都統不足蔽辜其子縣煥縣星俱著革去輔國將軍二等待衛降爲奉恩將軍永不准挑選別項差使以爲貽誤軍務者戒六年 上命揚威將軍長齡確查近年歷

任參贊大臣在任賢否尋疏劾永芹貪功率忽咎無可貸 諭曰  
上年張格爾在卡外游奕永芹並未確探情形又不詳慎勦辦伊  
子縣煥縣星前已降爲奉恩將軍著將縣星再行革去奉恩將軍  
以示懲儆

右 國史館本傳

國朝文獻通考卷之三十三

十一

--	--	--	--	--	--	--	--	--	--



祥保

祥保鈕祜祿氏滿洲鑲黃旗人乾隆三十九年由閒散襲佐領四十年授三等待衛在乾清門行走四十六年升二等待衛嘉慶四年二月擢頭等待衛三月遷鑲白旗漢軍副都統五年調西安右翼副都統十一年甯陝賊匪滋事隨征之西安軍標滿洲兵於方柴關潰散經欽差大臣德楞泰奏參 諭曰副都統祥保在任有年不能認真訓練以致官兵不知軍紀且此次官兵等臨陣逃走該副都統豈竟毫無覺察乃亦相率緘默咎實難辭祥保著退出乾清門仍交部嚴加議處並著卽來京聽候部議尋議革職 上加恩改爲降四級調用 賞藍翎侍衛在大門上行走十二年二

月德楞泰奏審明西安滿洲兵實係接仗竟日並無見賊逃竄情事 賞祥保二等待衛仍襲佐領職三月擢伊犁領隊大臣五月調烏里雅蘇臺參贊大臣十三年 賞副都統銜調塔爾巴哈臺參贊大臣十四年本臺安置蒲大芳等聚謀不軌祥保偕領隊大臣百順立即擒獲下部議敘十五年三月調鑲藍旗蒙古副都統六月遷西安將軍十六年以參贊任內失察游牧總管福珠靈阿於所部索取駝隻並侵那勒價部議降調 上加恩改爲降二級畱任十七年三月調成都將軍四月 賞都統銜爲駐藏幫辦大臣十九年閏二月復調西安將軍十二月調察哈爾都統二十一年偕副都統貢楚克策楞劾奏參領旺楚克於秋審句決絞犯延

不行刑 諭曰外省自九月二十日起至十月二十日止停止行刑該都統等接到部文已在停止行刑期內卽應將部文封存署內以免漏泄俟應行刑之期計算程站發往方爲正辦不應先行發往祥保著交部察議尋經祥保等據實檢舉復下部議處議降二級畱任得 旨此案祥保於停刑期內將絞犯薩拉圖等處決不諳定例轉將呈報商阻之署參領旺楚克奏參革職實屬糊塗兵部議以降二級畱任尙覺過輕祥保本應降調姑念一時更換乏人改爲降三級畱任二十二年調甯夏將軍二十四年調福州將軍二十五年 召還京道光元年七月授正白旗漢軍都統八月 賞紫禁城騎馬二年以軍政卓異濫保劣員部議降調 諭

日祥保見已年老不能管理旗務無庸降調著卽以原品休致六年卒 諭曰原任都統祥保係自乾隆年間充當乾清門侍衛洊升將軍都統宣力有年前因年老以原品休致茲聞溘逝殊堪軫惜著加恩照都統例賜卹所有任內處分悉予開復應得卹典該衙門察例具奏尋 賜祭葬

右 國史館本傳



舒明阿

舒明阿佟佳氏滿洲鑲黃旗人高祖佟國綱領侍衛內大臣自有傳曾祖夸岱工部尙書祖納穆圖一等公散秩大臣父嗣存一等公散秩大臣乾隆三十九年舒明阿由閒散襲一等公爵四十二年命將所有承恩公爵俱改爲三等公世襲罔替舒明阿改三等公爵五十一年投頭等侍衛嘉慶元年兼公中佐領四年擢委散秩大臣十一年上幸木蘭行圍以舒明阿管圍疎懶擅離所管地方革散秩大臣賞頭等侍衛在大門上行走十三年八月仍授委散秩大臣十一月授鑲紅旗漢軍副都統十六年命管理健銳營事務先是健銳營奏定更改出借兵丁紅白銀兩章程



十七年六月舒明阿不遵新章令翼長祥保照舊支借九月拾獲  
匿名揭帖控告祥保等因虧空庫項兵丁借款改議章程以聞  
諭曰舒明阿派管健銳營事務在改議章程之後乃伊先向翼長  
祥保諭令將庫銀照舊支借該翼長以奏定章程不敢擅改稟復  
舒明阿仍欲飭令遵辦於操演兵丁時復對眾揚言將該翼長申  
飭其意欲於兵丁前見好市恩以致在旁聞者心生覬覦遂有投  
遞揭帖之人舒明阿沽名釣譽致招浮言著先行交部議處又  
諭曰健銳營奏改兵丁借款章程借帑調劑原係有益兵丁之事  
舒明阿妄意更張交部議處尙覺稍輕著改爲嚴加議處議上得  
旨舒明阿毋庸管理健銳營並革去副都統散秩大臣畱其公爵

賞給頭等侍衛在大門上行走十八年九月復授正黃旗蒙古副都統十月 命管理圓明園八旗內務府三旗事務十九年調正白旗漢軍副都統二十四年文穎館不戒於火舒明阿以撲救出力下部議敘二十五年十月充崇文門副監督十二月授散秩大臣道光元年調正白旗滿洲副都統二年正月遷工部左侍郎十月 諭曰據英和等奏查明鑲黃旗冊檔內載佟圖賴前有軍功晉加子爵康熙年閒追封一等承恩公嗣於乾隆四十三年改爲三等承恩公見在公爵卽舒明阿承襲等語本年十一月舉行冊立皇后典禮皇后之父舒明阿應照例封爲一等侯惟舒明阿見已承襲公爵此次應封侯爵著該旗卽將舒明阿之子俱行帶領

引見候朕簡定一人令其承襲十一月 賞戴花翎四年偕睿親  
王端恩等恭送 仁宗睿皇帝寶錄聖訓前赴盛京尊藏禮成下  
部議敘五年授杭州將軍六年卒 諭曰杭州將軍舒明阿前在  
京供職有年上年由工部侍郎簡放杭州將軍甫經到任旋卽身  
故殊堪軫惜著加恩照將軍例賜卹並賞給銀三百兩由浙江藩  
庫給發俟到京之日准其入城治喪其應賠崇文門短收盈餘銀  
兩並著全行寬免任內一切處分悉予開復應得卹典該部察例  
具奏應襲公爵著該旗於伊子百日孝滿卽帶領引見照例承襲  
尋 賜祭葬四月 諭曰舒明阿所襲公爵由伊始祖佟養正高  
祖佟圖賴疊著功勛累加至三等子晉封爲一等公與並無軍功

僅由推恩加封承恩公爵不同此次舒明阿所出公爵仍著遵康熙年間諭旨作爲一等公世襲罔替子裕誠襲一等公文華殿大學士裕寬襲一等侯委散秩大臣裕祥頭等侍衛裕瑞四川總督裕保戶部主事孫廣林承襲一等侯委散秩大臣豐林一品廕生岳林鑾儀衛整儀尉

右 國史館本傳





## 西林布

西林布瓜爾佳氏滿洲正黃旗人西安駐防乾隆四十九年由委前鋒校升驍騎校五十年遷防禦五十二年擢佐領嘉慶元年十月四川達州教匪徐添德等倡亂陷東鄉西林布隨陝甘總督宜綏勦賊於興安府屬之安嶺攻破賊卡殺數千人 上嘉之尋進攻將軍山西林布偕遊擊托克托布永明率兵五百由北路攻破簡垞山賊卡與諸軍會攻斷賊汲道破其寨獲賊首馮得祿趙可徵 命以應升之缺升用十二月隨勦洞汝二河賊眾二年正月復勦賊於太平縣之南津關通天關高家寨諸處均有斬獲三月署廣州將軍明亮等自湖南移軍與宜縣合勦徐添德等方據金

我寺爲巢穴官兵進擊連破雞爪嶺王家寨青溪場諸隘西林布俱在事有功十月遷協領十二月川匪李樹等闖入陝境攻撲安康南天門隘口宜縣督兵往援賊攻黃金溝宜縣令西林布馳剿賊自高頭壩直趨界嶺西林布斃數百人四年四月賊首張漢湖復竄陝西擬華陽署陝西巡撫永保率西林布等截擊賊匪敗入老林西林布偕副都統銜穆克登布率數騎追殺賊矛傷額奏入賞濟特庫勒忒巴圖魯名號尋隨將軍富成欽差大臣那彥成剿賊於石草溝龍山鎮牛蹠鎮諸處均有功二十年 賞副都統銜授和爾辦事大臣道光二年以年老患病呈請開缺調理 諭曰西林布年力已衰又復患病著加恩以原品休致准回西安駐防

原旗調理該員在陝西軍營打仗受傷其應如何給俸著兵部照例辦理尋議以二品銜休致支食全俸三年因吐魯番圍城與牙木什開墾地畝所收租銀自嘉慶元年以後歷任領隊大臣等未經奏明妄行支用部議降二級調用 命降一級仍支食全俸六年卒子托精阿三等侍衛托永阿官防禦

右 國史館本傳

四時四氣表

三

高杞

高杞高佳氏滿洲鑲黃旗人祖高斌官大學士自有傳高杞由監生考取內閣中書乾隆三十七年充軍機章京四十一年改捐通判分發山西五十年以從堂兄伊桑阿巡撫山西迴避調赴陝西五十二年 諭曰原任大學士高斌宣力年久伊之子孫皆經獲罪見在並無服官者著將伊孫候補通判高杞調取來京以內務府郎中補用以示朕眷注舊臣之意尋補都虞司郎中調戶部銀庫郎中五十四年授山西道監察御史五十六年 命巡視北城五十七年正月京察一等閏四月轉兵科給事中七月 命巡視西城八月授湖北襄陽府知府五十九年調武昌府六十年二月



湖南苗匪石三保滋事隨總督畢沅赴常德等處辦理糧餉軍火  
閏二月升荆宜施道嘉慶元年正月湖北教匪聶傑人等滋事隨  
畢沅馳至枝江等處剿之二月教匪楊起元等陷當陽縣高杞偕  
原任副將黃瑞帶兵先進與豫省官兵合剿三月墮其東門匪眾  
由城缺衝出逆僧心愿率賊二百餘撲營高杞督兵以大礮斃之  
餘匪燬焉 賞戴花翎七月擢按察使尋以克復當陽 賞瑪尙  
阿巴圖魯名號並 賜玉鞞大小荷包二年升福建布政使 命  
俟軍務完竣再赴新任三年四月白號張漢潮股匪二萬餘竄至  
襄陽一帶官兵僅二千高杞與總督景安先據白雲山山梁於左  
右山溝設伏賊至敗之其別股由山溝抄至復與景安分路迎截

轉戰二日殺賊二千餘名 上以高杞與景安設法布置能以少擊眾殲賊多名 賞給金盒玉鞞大小荷包以示嘉獎尋擢湖北巡撫白雲山剿敗賊匪由武堰鎮東北逃逸高杞復偕景安連敗之於九宮山烏蛇嶺石門老虎溝等處五月賊竄至宜城圍攻縣治高杞等帶兵猝至擊斃多名賊復由新店麗陽一路往攻荆門州高杞遣將倍道赴援解其圍賊匪竄踞當陽之積山寺將奔荆郡圍掠沙市適副都統銜額勒登保荆州將軍興肇帶兵馳至夾擊大敗之又於南漳縣及穀城之章村棚疊次斃賊五千餘生擒九百餘名襄陽下遊一帶俱就廓清高杞卽駐劄襄陽 諭曰襄陽地方從前招撫投誠之人甚多高杞到襄後自應畱心防範毋

致復有句結以期賊黨聞風解散方爲妥善六月奏稱荊州距城十五里之沙市鎮爲川楚水陸通衢賊屢窺伺當飭道府激勸商民於南面水次排列檣木東西北三面築立土堡堡外濬濠足資捍衛此外緊要市鎮亦飭倣照辦理報 聞八月蒲圻縣洋泉團教匪王添萬等滋事高杞馳往剿之立奪其卡 諭曰外省習氣遇有地方搶劫小事往往張大其辭以爲邀功地步及至激成事端則又心存畏葸束手無策高杞新任巡撫尤當引以爲戒尋奏報擒斬賊首王添萬餘匪搜捕淨盡 上嘉賚之下部優敘是月川省通江竄匪擾陝省將由石泉江岸東奔楚境高杞馳防巴東邊界十月張漢潮股匪經副都統銜明亮興肇等剿敗由川竄至



巴東明亮等從開縣抄道追躡高杞與總兵王凱領兵合剿賊大  
敗仍竄回川境。諭以仍當督率鎮將實力防範探蹤截剿四年  
七月荆門潛江等處被水。諭曰川匪距楚尚遠見在荆門等處  
被有水災是巡撫應辦之事高杞著卽馳往撫卹辦竣後卽回武  
昌不必又至巴東軍營也九月以前調盛京官兵將次入境赴襄  
陽辦理軍需嗣與河南巡撫吳熊光會商楚省見無竄匪新調官  
兵應由南陽改道入陝高杞將豫備軍需各項改交南陽就近支  
放所調馬匹亦統行解豫。諭曰吳熊光高杞能以國事爲重無  
分畛域不稍拘泥均爲實心任事可嘉五年正月奏賊匪經大兵  
痛剿到處狂奔復竄入楚境並據道員伊精阿稟報德楞泰統

領大兵已至陝西鎮坪地方自卽來楚會剿軍需甚關緊要藩庫無項可支請 敕部撥銀八十萬兩以濟急需 諭曰德楞泰經額勒登保奏稱業於正月二十日行抵褒城會剿甘省大股賊匪而高杞於二十一日摺內猶率據道員稟報遽爾入奏不知楚省督撫所謂確探信息者何事可見伊等全在夢中尙望其能認真辦賊匪耶著卽傳旨申飭至奏請酌撥餉銀一節該督撫等當賊匪未經闖入境內之時於防堵漫不經心及一聞賊匪竄入邊界之信並不思如何剿辦輒以撥發餉銀奏請豈餉銀一撥賊匪卽可辦畢耶但伊等旣稱存項無多朕若不酌加撥給伊等轉以軍需不能充裕藉口難辦著卽於部庫內撥銀四十萬兩解往楚省



備用又奏稱本省交辦控案見在趕緊催提審辦得 旨聞汝頗有執袴習氣若果如此是孤負國恩朕不能容汝敗壞封疆應深自刻責效法書麟之行爲時時加勉從儉去奢爲要二月授刑部右侍郎五月兼鑲紅旗漢軍副都統八月調戶部左侍郎十一月調鑲白旗滿洲副都統六年三月充會試知貢舉六月永定河水漫溢 命督辦盧溝橋西岸決口工程並偕兵部右侍郎那彥寶等經理賑濟七月 召回京偕工部右侍郎莫瞻棗查勘護城河及早河等處工程奏請於戶工二局豫領制錢二萬串趕緊挑濬諭曰局錢經費有常一切工程豈能槩行取給莫瞻棗係工部右侍郎錢局是其專管高杞雖未管錢局但見任戶部左侍郎於本

部局錢多寡亦應知悉乃率爲此請殊屬不曉事體 命於內務  
府廣儲司撥銀一萬兩交高杞等趕緊興工嗣因戶部奏稱七月  
搭放兵餉錢文六成見在局中存錢較少請於八月搭放三成九  
月以後搭放一成 上以高杞亦復列銜具奏 命軍機大臣詢  
問既知局錢不敷何以前奏請發錢文二萬串之多高杞尋偕莫  
瞻菴自請交部嚴議 諭曰伊二人於本管部務漫不經心其所  
請多發錢文不過自圖省便之計若人人自圖省便則那彥寶見  
辦河工請銀一百萬兩亦當奏請俱發錢文有是理耶似此再添  
數百卯仍屬不敷支給而添卯一事詢之戶部堂官僉以爲難行  
昨大學士等議覆御史汪鏞條奏請添卯鑄錢一摺亦均議駁高

杞莫瞻棗均係與議之人是竟如御史游光繹所奏挨次畫題又安用此堂官爲乎戶工二部職任較繁高杞莫瞻棗憤憤乃爾豈能勝任高杞著調兵部左侍郎莫瞻棗調補禮部左侍郎所請嚴議之處著加恩改爲交部議處尋議罰俸一年九月署工部左侍郎十一月 命偕莫瞻棗疏濬通惠河下游及大通橋至通州一帶運道七年授湖南巡撫八年四月偕總督吳熊光會題請以臨湘縣知縣周凝遠調補湘潭縣知縣經部以歷俸未滿駁之高杞與熊光均議罰俸八月高杞奏前請將臨湘縣知縣周凝遠調補湘潭見經部駁議以罰俸此案吳熊光並未畫稟不敢不據實陳明 上責其專擅錯誤寬熊光處分十月復請以周凝遠調補湘



潭縣知縣十一月以未陽縣知縣熊維培驗訊命案不實奏請革職諭曰昨已據吳熊光奏到高杞此奏遲矣高杞於此案本無欲行參辦之意及聞知吳熊光已另案將該員奏參始將此案參出因而不與會銜亦未可知看來該督撫於辦理地方公事竟未免心存蒂芥十二月吳熊光奏參高杞於湖南州縣紛紛調署卽如湘潭一缺豈通省無一合例之員乃以不合例之周凝遠調補並不商酌卽列銜具題迨吏部議駁又歷至十月俟周凝遠俸滿仍請將該員調補保無有任用私人藉爲擇缺情弊又採買倉穀旣經署藩司韓封稟稱綏靖兵米早經各州縣批解而該鎮魁保於八月下旬尙稱五月以來顆粒未曾解到見今該省控告短價

浮買之案既多而兵米仍復欠缺亦恐有那移虧空借採買以爲彌補之弊至己革未陽令熊維培於濫禁監生胡世凝一案高杞既已明知不加參究轉將調繁而於該革令承審徐顯森命案任意出入如果五月稟請覆審何以遲至十一月始行詳參顯係爲之開脫 上命高杞來京候旨適欽差刑部侍郎賡音光祿寺卿邵自昌至湖南鞠案 命將各情節詳悉確查秉公覆奏九年正月賡音等奏詳查三事均無舞弊營私之處止於辦理遲延請將高杞等交部察議 諭曰各省督撫於地方事件自應和衷妥辦上緊清釐似此因循廢弛吏治何由整飭賡音等僅請將高杞等交部察議未免過輕著交部議處尋議高杞降一級調用上加



恩賞給副都統銜爲喀什噶爾幫辦大臣二月調烏魯木齊領隊大臣五月湖南巡撫阿林保奏稱湖南清查案內應追虧缺變賠倉穀五十萬九千六十餘石已買補穀三萬一千九百七十餘石未買穀四十七萬七千餘石經督臣吳熊光奏明各按時價追銀自行買補嗣經前撫臣高杞以時價長落靡常照六錢五分例價追銀仍於有穀之家按糧均買查州縣私虧倉穀非因公動用可比自應按照市價著追令該州縣自行買補若祇照例價追交復照例價派買在民間約計賠銀不下二十萬兩民力實有不支應請照督臣原奏辦理並酌定價每石追銀一兩交見任官買補還倉毋許派累百姓 上命軍機大臣會同祖之望議奏如所請行

諭曰此項虧缺變賠倉穀前經吳熊光具奏時特降諭旨准行不許顆粒派及百姓乃高杞輒議更張既以例價追銀仍於有穀之家按糧均買按市價覈計民間應賠銀二十萬兩是以官之虧缺令百姓代爲賠補而原虧各員轉得以半價完款朘削民膏莫此爲甚高杞辦理實屬錯謬交部嚴加議處卽著回京聽候部議尋議革職先是戶部右侍郎初彭齡奏參吳熊光得受沔陽州知州秦泰銀一萬兩及每年收受匣費銀六萬兩又將貨物密送回家交伊親家李世望營運三款高杞有應行質審之處 命陝甘陝西山西各督撫查明高杞不拘行至何處卽派委道府大員解交軍機大臣會同刑部審訊七月由陝西遞至京師先是高杞由湖

南巡撫來京 上詢以吳熊光操守何如高杞奏稱熊光實屬廉潔願以身家相保旋經初彭齡奏參 上究問彭齡此語得之何人以高杞對復 召見高杞詰詢奏稱收受秦秦銀兩係湖北通判魏耀所言 命湖北巡撫全保查奏尋以吳熊光實無貪鄙情事而魏耀向高杞所言亦堅不承認其匣費一項久經裁革吳熊光槩無劣蹟覆奏並將魏耀解京與高杞對質耀以秦秦餽送一節係高杞先問隨口迎合實無影響所有匣費及李世望營運二款訊未得實高杞旋供稱彭齡將密奏事及面奉 諭旨向其一一傳述 上褫彭齡頂帶與高杞下軍機大臣滿漢尚書定擬尋擬高杞發往新疆效力贖罪初彭齡請 旨定奪 諭曰初彭齡



本應革職發往新疆姑念其見有老親著革職加恩令其在家養親閉門思過高杞以二品大員本有言事之責經朕再三詢問吳熊光操守既力保其廉潔而於魏耀傳說餽送之語當時不行陳奏轉向初彭齡傳述實屬巧詐著照議發遣伊犁交與將軍松筠派委苦差效力贖罪十二年 賞三等侍衛爲葉爾羌辦事大臣十四年因病解任十五年三月病痊 命以員外郎用七月補景陵禮部員外郎十一月授熱河道十六年擢浙江巡撫十七年給事中陸言疏稱浙江溫台處三府麥豆收成無望糧價日增民食拮据 上命高杞迅速查辦適高杞奏報全省二麥漸次結實雜蔬茂盛民情歡悅糧價尚非昂貴 諭曰該撫於奏報糧價情

形將温台處荒歉地方與各府一律籠統入奏詞意掩飾豈非有心諱匿若竟不知無能已極著傳旨嚴行申飭卽遵照前旨嚴飭温台處地方官將荒歉情形迅速查明實力籌辦如仍前玩泄必從重治罪不貸十八年三月授刑部左侍郎六月兼總管內務府大臣七月 命署河南巡撫八月授熱河都統九月河南滑縣教匪滋事城陷直隸長垣山東曹縣均有教匪竄擾高杞行抵直隸臨洺關聞信卽馳赴大名一帶札調正定弁兵督率搜捕 上是之並 諭已派温承惠同提督馬瑜前往長垣一帶堵剿直隸地方無須高杞在彼督辦速行赴豫仍接署河南巡撫印務所有豫省查拏防堵俱責成高杞悉心經理尋奏賊匪攻圍濬縣前經官



兵殲斃數千名餘皆竄向李家道口滑縣等處連日仍來窺伺督同總兵色克通阿等殲斃三百餘名生擒著名賊目蔡成功徐夢林及餘匪五十餘名奪獲廐馬器械甚夥並搜出冊檔四本得旨嘉獎下部議敘又奏賊匪約二萬餘人附近村莊尙多潛匿豫省兵力單弱不敷剿辦 上命陝甘總督那彥成爲欽差大臣率西安官兵赴滑濬一帶相機進剿十月高杞奏言賊匪既退之後復聚集八千餘人潛分三股蜂擁撲營督同參將張拱辰首先迎敵斃賊六七百人其攻劫糧臺之賊亦經糧員帶領兵役奮勇擊退 上嘉之十一月大兵攻克李家道口賊巢 上以高杞等督率調度俱屬奮勉先行下部議敘 賜高杞四喜扳指鼻煙壺大

小荷包十二月克復滑城事平 賞頭等輕車都尉世職紫禁城  
騎馬並 賞給烏雲豹馬褂玉鐲鑲寶石帶扣大小荷包先是關  
中歉收南山木廂匪徒滋事 諭令高杞一俟滑城攻克卽帶領  
西安滿兵並酌帶陝甘兵一二千名迅速前往交與長齡勦辦是  
月高杞馳抵陝省奏懇留陝幫同長齡勦辦 諭曰陝西帶兵大  
員見有長齡楊遇春朱勳足資經理高杞此時毋庸前往惟甘肅  
地方緊要省城不可無大員彈壓著卽馳赴蘭州署陝甘總督印  
務辦理地方事宜十九年正月調烏魯木齊都統仍留陝甘總督  
十月奏稱甘省嘉慶二十年應支兵米估撥不敷請撥銀五十五  
萬七千餘兩照數採買下部覆議經戶部查明甘省倉貯數日足

敷支放得 旨舍見存之糧不用轉請動項採買竟似從前按例  
冒賑甚屬可惡下部議罰俸一年十一月赴都統任二十年奏稱  
廢員奇玖管理鐵廠出力請援例酌減三年 上以高杞摺內未  
將廢員在戍若干年方准奏請之例先行敘明朦混具奏殊屬取  
巧邀譽下部議降二級調用 上加恩改爲降三級畱任二十二  
年三月因甘肅已革知州沈仁樹盜賣倉穀侵蝕運腳經欽差工  
部尙書英和刑部侍郎帥承瀛查訊係高杞任內批准之事 諭  
曰高杞爲人聲名平常再逐細查訪如有貪婪確據卽據實奏參  
四月英和等覆奏高杞無貪婪實跡惟於沈仁樹領運倉糧率行  
批准且以運腳銀數萬兩由藩司先行私發該督並未查究又於

不應承運倉糧之知府黃方准令輓運以致該革員等私侵盜賣  
倉庫兩虧亦有應得之咎請交部議處尋議革職 從之二十四  
年恭值六旬萬壽加 恩以六部員外郎用二十五年二月補兵  
部員外郎十一月以前署工部侍郎派員承修 奉先殿供奉  
孝淑睿皇后神龕甫屆二十年卽有虧朽之處下部議處尋議降  
三級調用 上加恩改爲降五級畱任道光二年以年老休致六  
年卒

右 國史館本傳



謝成貴

謝成貴四川華陽人由行伍拔補建昌左營外委乾隆五十七年升把總嘉慶元年三省教匪滋擾隨剿達川賊匪有功升貴州松桃協千總五年隨參贊大臣德楞泰分路進兵攻破石門寨柵生擒偽總兵李斌偽先鋒董廷華等十七名及首逆陳得俸之妻郭氏等並殲斃賊眾千餘名奪獲旗幟刀矛馬匹無算捷入 賞戴藍翎尋調四川重慶鎮右營千總六年五月升酉陽營守備十月陝西平利之岳家坪有賊首龍紹周合曾家壩股匪踞山蟻伏我兵冒雪進擊分道扼截以爲犄角成貴由左首楊溪山梁走大柴溝西面扼賊去路合力兜擒會霧氣瀰漫雪深及膝全師三路進



攻賊遂大潰七年六月賊首樊人傑曾芝秀由白鐵河蜜蜂塘向羊耳溝意圖竄入老林成貴隨總兵馬瑜由廟坪一路進剿兩山夾峙溪河一道延長二十餘里道途險峻我兵奮勇前進抵黃柏垭賊復遁馬鹿坪大山萬峰叢立高出雲霄幸有小路可以分兵競上兼值霧氣大作官兵直前衝殺賊眾潰散復據黃嶺抗拒大兵分路圍剿成貴隨馬瑜由觀音偏邀擊斃賊數百餘匪盡行偪下溝底樊曾二逆投河淹斃捷聞下部議敘尋經德楞泰保奏川楚兩路節次辦賊出力人員成貴賞換花翎九年八月生擒首逆羅思南等在事出力奏補城口營都司十月疊獲川境零匪二名十年三月四川將軍德楞泰籌辦會哨章程四川太平協城

口營汛與陝西平利安康紫陽三縣接壤派令成貴偕陝西鎮坪營都司馬仕相會哨六月陝西化龍山有零匪十餘人竄逸川界成貴入山追捕之又有賊黨藏匿十坪老林外委王明達前往擒拏賊持械抗拒成貴領兵進擊大敗之十一年調太平營都司十二年陝西瓦石坪賊匪滋事偕太平協副將羅思舉帶兵進剿成貴奮勇力戰賊大敗潰奏入 命以遊擊升用十三年馬邊戡邊夷匪猖獗督兵進剿疊有斬獲十四年補太平營遊擊十九年四川總督常明以成貴熟悉川省邊務夷情奏請留於本省以參將升補 從之二十一年升會川營參將道光元年升阜和協副將三年總督陳若霖保送堪勝總兵送部引 見五年授建昌鎮總

唐史補遺卷三十三  
三十一  
三十二  
三十三  
三十四  
三十五  
三十六  
三十七  
三十八  
三十九  
四十  
四十一  
四十二  
四十三  
四十四  
四十五  
四十六  
四十七  
四十八  
四十九  
五十  
五十一  
五十二  
五十三  
五十四  
五十五  
五十六  
五十七  
五十八  
五十九  
六十  
六十一  
六十二  
六十三  
六十四  
六十五  
六十六  
六十七  
六十八  
六十九  
七十  
七十一  
七十二  
七十三  
七十四  
七十五  
七十六  
七十七  
七十八  
七十九  
八十  
八十一  
八十二  
八十三  
八十四  
八十五  
八十六  
八十七  
八十八  
八十九  
九十  
九十一  
九十二  
九十三  
九十四  
九十五  
九十六  
九十七  
九十八  
九十九  
一百

兵六年卒

右 國史館本傳

張起鼇

張起鼇河南新野人嘉慶元年三省教匪滋事湖北藍號逆首張漢潮姚之富等擾及豫境起鼇練義勇千餘人隨剿有功拔補直隸順德營外委尋升臨洺關千總三年調赴川省軍營四年大軍追剿張漢潮起鼇率鄉勇由關追擊與大兵會於張家坪殲漢潮下部議敘五年四月高二馬五股匪敗竄工部尙書那彥成追至卡狼寨分三路進擊起鼇攻其東多所殲擒五月隨經略大臣額勒登保剿伍金柱大股賊匪於銅錢窖斬獲五千餘人殲首逆龐洪勝擒賊目楊六燕等 賞戴藍翎六年二月遷山西大同鎮甯武營守備十月張添倫股匪西奔廣元之溫水壩提督慶成遇之

於流沙坡賊退據大山起鼇偕參將吳亨衍等奪踞山梁賊敗走擒首逆楊開甲之子楊麟生僞先鋒張文喜奏入 諭曰張起鼇分帶兵勇直入賊隊斃賊甚多亦屬奮勇著加恩以都司升用七年正月辛卯劉永受股匪竄礪橋溝慶成掘溝口令起鼇偕遊擊張奉廷由老林扼擊斃賊百餘二月劉永受股匪由廣元南江竄陝境起鼇偕守備李如緒躡蹤窮勦賊折回棧東奔王家場谷岔河追斬百餘人四月魏洪升並張漢潮餘匪竄棧西入略陽慶成敗之於煎茶鋪起鼇偕李如緒聞道繞出賊前戰於太陽山擒斬百餘官兵繼至賊大敗竄老林由兩當折而西奔慶成令起鼇等抄其前敗賊於黑松店擒張添倫之姪張喜餘匪分竄追至汪家



溝擒逆首魏洪升餘皆殲斃捷入 賞換花翎五月補邠州營都  
司八月斬士黃股匪竄秦嶺起鼇隨副將張垓追擊斃偽總兵胡  
登朝黃明德十月剿捕各股零匪熊翠分股擾太平起鼇等追至  
五里了黑溝賊聚插鼓臺民舍三路圍攻殲斃無算復敗賊於虎  
溪山八年隨總兵楊遇春搜剿南山老林零匪疊有殲擒九年成  
都將軍德楞泰以平利縣屬東多羅河毗連三省令將弁分路截  
剿起鼇偕守備齊慎由娘娘廟小河口繞至太平河防賊東奔賊  
竄西南追至白果坪擒李思貴等五名訊知逆首苟朝九改易名  
姓竄竹峪關巴州一帶欲出安康之輒坪趨江岸德楞泰令起鼇  
等南北夾擊搜捕賊伏賊復自尹家臺繞出民安寨欲襲我兵起

鼇擊斬十餘人賊走關十年升延綏鎮右營遊擊十一年甯陝營新兵叛首逆蒲大芳由盤屋郡縣竄甘肅起鼇由盤濊河進抵良玉與官兵合擊斃賊數十蒲大芳墜馬跳而遁餘匪潰十二年賊平命以應升之缺升用十四年遷甯陝營參將十八年陝西岐山縣三才峽木廂匪徒萬五等滋事起鼇馳至老水磨擒斬百餘斃賊目楊四旋偕漢中鎮總兵吳廷剛闕十九年正月偕遊擊朱福壽伏兵於沙壩斃賊二百生擒二百餘賊遁太白老林蹙而殲之捷入諭曰吳廷剛一路官兵追剿萬五股匪連獲勝仗將首夥殲除淨盡實屬奮勇出力參將張起鼇賞給健勇巴圖魯名號二月起鼇追尤九陳四股匪至黃草坪斃賊三百餘眾與尹朝貴

合復隨廷剛敗之於賀家灣殲其眾苗小一以餘黨遁追敗於月  
亮堽賊旋平 命以副將用先換頂帶尋擢神木協副將二十年  
調靜甯協副將二十一年調潼關協副將道光元年擢陝西陝安  
鎮總兵二年丁母憂五年服闋補河州鎮總兵六年卒子陟雲二  
品廕生光祿寺署正

右 國史館本傳

日本書紀卷之三十三

三十一

卓爾琿保

卓爾琿保達古爾幹明氏滿洲正藍旗人世居齊齊哈爾乾隆五十九年由前鋒升驍騎校嘉慶四年三省教匪作亂大兵進討廣州將軍明亮自川省勦賊入楚卓爾琿保隸焉時襄陽藍號股匪張漢潮欲竄河南大兵躡蹤追勦賊竄入紅河寺一帶我兵分三路夾攻賊踰山遁追及柿坪山溝內伏賊突出卓爾琿保等率馬隊衝擊殲斃甚眾敘功 賞戴藍翎五年四川賊匪徐添德經大兵自陝抄截竄湖北鄖縣穀城官兵追至長坪轉戰百餘里斃賊千餘擒偽總兵熊方青獲槍礮旗幟無算卓爾琿保累戰有功 賞換花翎六年二月賊在余家河高尖山一帶焚掠官軍擊之於



沙窩山梁步賊千餘人分股抗拒卓爾琿保麾兵擊殺擒斬數百餘眾潰三月賊攻南漳楊柳寨甚急卓爾琿保偕侍衛慶福花尙保等往援賊據山梁死拒槍斃執旗賊目冒雨追過六道山梁殺二百餘名生擒二十餘名圍解得 旨嘉獎七年升佐領十二年升協領十八年九月隨欽差大臣那彥成剿辦河南教匪李文成等賊平 賞加副都統銜二十五年授甯夏副都統道光五年調西安右翼副都統六年回部逆裔張格爾入喀什噶爾滋事攻陷四城 上命大學士揚威將軍長齡督師往討 命卓爾琿保揀選精銳帶領會剿七年二月由樹窩子進兵攻賊於洋阿爾巴特賊眾二萬餘人高踞沙岡大兵三路進剿卓爾琿保隨長齡居中奮

擊殲戮無遺捷入得 旨優敘復於沙布都回莊卓爾琿保以馬  
隊橫衝賊陣賊大敗擒斬幾盡進至阿瓦巴特張格爾擁眾十餘  
萬來拒官軍乘勝擊之斃賊數萬生擒二千餘遁奏入 上嘉之  
喀什噶爾克復隨楊遇春收復英吉沙爾葉爾羌二城得 旨交  
部優敘事平 命管帶陝甘四川等營官兵凱撤歸伍八月因病  
請回籍調理尋卒子巴爾金保官驍騎校蘇布通阿官佐領

右 國史館本傳

廣東省銀行

ATM

170-336

郁宗海

郁宗海湖北江夏人乾隆六十年正月黔楚逆苗石柳鄧吳半生等句結煽亂宗海由行伍隨湖廣總督福甯往剿戰於王家寨潭江諸處疊有斬獲六月苗匪圍攻鎮筵城宗海力戰有功奏賞行營外委旋隨大兵進攻連克烏沙河貓頭諸處十月官軍進攻鴨保寨賊巢宗海率鄉勇焚燬木城手刃賊十餘人奪獲大礮一賞六品頂帶嘉慶元年湖北邪匪謀亂賊黨胡正中攻來鳳縣甚急五月隨福甯自永順移師往剿時賊屯旗鼓寨官兵攻破之盡獲賊首二年正月補鄖陽協右營把總時福甯奉命以兵隸內大臣額勒登保宗海隨大軍連克蜈蚣山四方臺諸卡賊眾遁踞

苞葉山五月福甯偕額勒登保分路會攻由鄖陽關進撲吳家坂宗海率眾先登連奪賊卡擒斬賊眾甚多命存記俟始終奮勉咨部議敘六月賊眾因官兵圍逼於大坑口諸山隘增築石卡木城聚眾死守我兵分道進攻斬馘無算額勒登保奏言節次攻勦官員出力者甚多而宗海等殺賊更爲奮勇命賞戴藍翎三年遷湖北遠安營千總五年授湖南九谿營守備七年升辰州城守營都司二十三年擢綏靖鎮中軍遊擊道光元年遷撫標中軍參將三年湖廣總督李鴻賓以宗海久任苗疆熟悉人情風土疏請升署乾州協副將上允所請四年實授六年署綏靖鎮總兵官七年閏五月擢山西太原鎮總兵十月卒



右 國史館本傳

國史館本傳 卷之二十三 將帥五十二

四

皇朝通志卷之九

三

慶溥

慶溥章佳氏滿洲鑲黃旗人祖尹泰東閣大學士父尹繼善文華殿大學士兄慶桂文淵閣大學士均有傳慶溥初以大員子弟特賞藍翎侍衛乾隆四十五年授鑿儀衛治儀正四十九年遷雲麾使五十四年擢湖南澧州營參將五十八年升永順協副將六十年正月湖南逆苗石三保等滋事慶溥隨提督劉君輔援保靖擊敗賊眾三月賊屯新寨慶溥奮力進攻斃賊百餘名燬其寨諭曰慶溥向未經歷行陣竟能將沿途苗寨盡行燒燬甚屬可嘉且係尹繼善之子著賞戴花翎並賞勵勇巴圖魯名號俾其益知感奮四月攻上官壩花園苗寨均有斬獲七月駐古丈坪防堵有

功又安撫辰乾一帶降苗辦理妥協先後得旨獎賞是時苗匪未平而湖北教匪胡正中聚眾踞來鳳縣旗鼓寨嘉慶元年三月賊分擾湖南之龍山縣湖廣總督福甯檄慶溥赴龍山截剿俘馘甚眾賊退入來鳳境內七月隨福甯攻旗鼓寨賊首胡正中從山溝竄逸慶溥伏兵擒之並其母彭氏弟胡正連奏入命以總兵升用尋補廣東碣石鎮總兵八月攻克旗鼓寨擒賊目田谷敦等餘匪竄鳳馬山慶溥與總兵諸神保平之十月移剿長陽縣教匪賊首覃加耀等屯黃柏山慶溥隨福甯進攻連敗賊於支井河苦桃溪秀峯橋金竹坪等處二年正月克雷家坳將軍巖賊卡四月進圍黃柏山賊從山後隆坪竄至紅沙鋪慶溥偕諸神保追及之

兩路夾擊斃賊五百餘名疊奉 恩旨獎賞並下部議敘三年二月覃加耀就擒慶溥隨副都統銜前領侍衛內大臣侯額勒登保由巴東赴陝西剿賊三月抵商州適齊王氏等股匪竄至州屬之九間房慶溥偕副都統綸布春設伏邀擊殲六百餘名擒賊目曹如松等是月調江西南贛鎮總兵五月敗李全股匪於興安之紫溪嶺又敗之於蔡家坪擒賊目楊鳳額勒登保旋督兵赴省慶溥畱駐五郎之兩河廳剿高均德股匪十一月移兵西鄉剿樊人傑龍紹周等股匪力戰數晝夜殲賊千餘名四年二月樊人傑等與高均德合由西鄉趨紫陽慶溥率兵躡剿遇賊於王黑壩殲百餘名賊乘夜遁 上責其于賊以暇 命拔去花翎四月追至平利



之孟石嶺殲擒四百餘名將賊匪偪入川境得 旨嘉獎九月高  
家灣股匪由湖北竹山竄入平利慶溥率兵掩擊敗之於董家梁  
及銅錢關殲擒六百餘名賊仍竄回竹山 諭曰慶溥自春夏以  
來在平利一帶節次堵禦賊匪俱屬出力茲由竹山竄至平利之  
一股賊匪復經慶溥督率兵勇殲斃多名殊爲奮勉可嘉著加恩  
賞爲花翎並下部議敘五年二月張洪榮等股匪數千夜撲得勝  
坡軍營慶溥奮擊走之又借道員溫承惠夾勦苟文明等股匪於  
蘭河殲擒二百餘名賊走二節坪慶溥乘勝追擊復破其眾閏四  
月楚匪王刺賢等竄近平利慶溥偕溫承惠帶兵迎勦殲敗之於  
賈元河石牛河柳溪山豐口壩等處殺賊五百餘名擒賊目龔恩

秀等八月授三姓副都統仍留陝省平利白河一帶辦理防堵事  
務九月敗徐添德股匪於烏龍池又敗龍紹周股匪於甄坪六年  
三月調正紅旗漢軍副都統六月經略大臣額勒登保檄令赴甯  
河南鄭邊界堵剿賊匪九月四川南江賊匪高見奇魏棒棒姚馨  
佐等竄入甯羌之鐵嶺關守備孫奉朝以疏防革職上以慶溥  
係統轄之員亦難辭咎下部議處高見奇旋爲額勒登保所敗餘  
匪百餘人由甯羌卦子山乘間西竄十一月慶溥偕總兵韓自昌  
追及於洋縣之小香鑪溝盡殲之諭曰慶溥前因高魏股匪竄  
入甯羌伊有統轄之責是以交部議處此次竄近黑河之賊並非  
由慶溥經營汎地逸出伊帶領兵勇上緊跟追尙屬奮勉所有前

國朝通志卷之三十三  
次交部議處之處著加恩寬免七年七月授湖南永州鎮總兵十月額勒登保檄令仍回湖北協捕零匪十二月諭曰慶溥係湖南總兵今赴湖北帶兵恐呼喚不靈著調補湖北鄖陽鎮總兵以資得力八年二月赴巴東二塘埡剿渣鬍子等股匪閏二月追剿陳姓股匪於房縣後山坪賊分竄諭曰楚境見有三股零匪慶溥等分投躡剿自應搜獲淨盡乃並未打一仗殺一賊而擊賊受傷者皆係寨勇可見帶兵鎮將並不奮勉緊追慶溥著傳旨嚴行申飭九月以楚省零匪無多慶溥未能趕緊捕淨復傳旨申飭九年三省賊氛肅清下部議敘十年擢湖北提督十一年陝西甯陝營新兵陳達順等糾眾滋事命慶溥馳往楚省邊界防堵十二

年署荆州將軍十四年授廣州將軍十五年正月疏言廣州駐防漢軍丁口繁多昂籌養育請於八旗馬價穀價兩項內見存藩庫銀四萬六千二百餘兩借支生息卽於漢軍閒散中挑設無米養育兵一千一百餘名每名月給銀五錢與甲兵等一體訓練以次挑補俾餘丁得資養贍於生計操防兩有裨益奏入如所請行七月命來京另候簡用八月授烏里雅蘇臺將軍兼正白旗漢軍都統十六年以伊犁將軍晉昌呈進馬匹例外多帶沿途饋送慶溥率行收受並濫與供支部議降調上改爲降二級畱任十九年授都察院左都御史二十一年遷理藩院尙書二十二年四月授熱河都統九月以所屬防禦烏爾袞太妄擊無辜拖斃二命經



直隸臬司瑞弼關提慶溥不令前往並代奏懇免赴質 上斥其  
謬妄下部議處尋議降調 上改爲降三級畱任十一月 諭曰  
本年屆應軍政之期熱河都統慶溥辦理旗民刑名事件不能勝  
任著來京以都統用旋調鑲黃旗蒙古都統二十三年調察哈爾  
都統二十五年六月奏請添設達哩岡愛牧場總管 諭曰察哈  
爾牛羊牧場總管向係兼管達哩岡愛牧場事務事閱多年並無  
貽誤茲該總管齊巴克多爾濟以達哩岡愛牧場相距較遠辦事  
不便呈報顯係推諉慶溥卽應飭駁乃遽行奏請添設三品銜總  
管甚屬冒昧所奏不准外慶溥著交部議處尋議上得 旨慶溥  
擅改舊章著照部議降一級調用補正黃旗蒙古副都統十月授



守護 昌陵都統道光二年 命以原品休致因前在軍營殺賊  
捉生著有勞績仍 賞全俸以養餘年七年卒 賜祭葬子福嘉  
工部郎中

右 國史館本傳

國朝通志卷之三十三

三

舒凌阿

舒凌阿舒拉氏滿洲正黃旗人乾隆五十六年由護軍隨征廓爾喀五十七年大兵攻熱索橋等處舒凌阿冒雨登險克獲賊礮擢四等侍衛嘉慶四年隨征四川教匪以功升三等侍衛五年升前鋒二等侍衛七年五月授安徽壽春鎮標中營遊擊十二月宿州賊匪戕官滋事舒凌阿隨總兵王集率兵入城賊眾盤踞州署盡閉各門戶以拒官軍地勢偏狹槍礮難施以火礮破其門督兵奮勇直入短兵相接鏖戰逾時全數剿滅生擒賊匪二十餘名次日復行搜捕餘黨淨盡下部議敘十年升直隸涿州營參將十五年調固關營參將十七年升督標中軍副將十八年九月河南教匪

李文成等倡亂陷滑縣山東曹州府各縣及直隸長垣東明均與河南接壤賊黨相繼蠢動山東巡撫同興捕獲金鄉縣教匪崔世俊等供係直隸長垣人徐安國傳教直隸總督溫承惠令舒凌阿馳往查拏會徐安國已由曹縣遁入滑城與李文成合舒凌阿率兵駐守開州遇賊東北奔竄之路時滑縣賊匪四出劫掠散布諸村落溫承惠督舒凌阿等敗之於梁莊殺獲百餘人復與提督馬瑜合兵進擊南湖北湖之賊殲斃五百餘名餘匪四散奔竄十二月大兵圍賊於滑縣賊憑城死拒逆首李文成潛竄輝縣司業官兵攻破之李文成自焚死旋克復滑縣盡獲賊黨徐安國牛亮臣等餘匪蕩平舒凌阿以隨營攻剿奮勇出力 賞戴花翎二十五

年擢直隸宣化鎮總兵道光元年調山東兗州鎮總兵七年卒

右 國史館本傳

國朝通志卷之四十三 將軍 五十四 五十五



同治三年六月二十三日

三十一

國朝耆獻類徵初編卷三百十四目錄

將帥五十四

尚年

許松年

張清亮

王萬清

劉清

國朝詩林卷之三十三

國朝耆獻類徵初編卷三百十四

通奉大夫前署江西巡撫江西布政使司布政使湘陰李桓輯  
將帥五十四

嵩年

嵩年張氏內務府漢軍鑲黃旗人乾隆五十四年由內務府筆帖  
式委署主事五十七年實授五十九年升員外郎嘉慶三年充正  
白旗佐領四年遷郎中六年九月授驍騎參領十月調圓明園郎  
中九年 命監督江南織造十年因解帛滯延下部議處十一年  
奏關稅一年期滿盈餘比較不敷自請嚴議 上念龍江關工稅  
因江浙木植滯銷積壓商運木籜較少西新關戶稅因上年蠶絲

欵薄棧戶停織者多絲斤紬緞出入較少其短絀尙屬有因 加  
恩寬免其盈餘不敷銀兩仍照數分限賠繳十三年九月 命來  
京十二月補郎中兼驍騎參領十四年四月授熱河副總管五月  
命驗收熱河廣仁嶺以下等處旱河工程 諭曰此項工程嵩年  
甫經到彼無所用其迴護惟當實力實心認真稽查如果各工辦  
理妥協卽據實奏明准其報銷若有草率偷減情形亦卽據實奏  
參著賠毋稍徇隱嵩年不行詳查率意驗收將來朕駐蹕熱河  
月派大臣前往覆驗一經查有弊竇不特估計承辦等員立即究  
懲並當治嵩年以徇隱之罪六月奏參草率要工之知府喜步昌  
阿請交部議處七月因陰雨連縣山水泛漲奏請將挑挖旱河衝



淤之處停止工作 上允之八月 命巡視長蘆鹽政十五年六月因嘉慶六年直隸省奏修被水營房借撥運庫銀十四萬兩原限三年扣解還款迄今逾限已久未能依限咨催據實檢舉下部議處九月 上以查緝私鹽督辦認真屢有緝獲交部議敘又續獲私犯十二起 賞戴花翎十六年二月直隸添造剝船動用東商生息本銀奏請於長蘆商捐濩課項下代爲籌補 諭曰濩課雖屬常課卽遇有動撥亦當繳補何以籌補生息本銀卽在原濩課額內影射作爲商人報效實屬朦混取巧嵩年著交部議處其借動本銀仍著另行籌補歸款尋議降二級調用十一月補慎刑司主事十七年 賞給四品頂帶作爲熱河總管十八年兼署熱

河道事務二十年 上臨莅避暑山莊閱視周圍苑牆一律加高  
工程鞏固所用錢糧四萬六千有餘亦頗節省 賞給內務府參  
領三品頂帶二十一年七月復 命巡視長蘆鹽政十一月奏請  
長蘆鹽斤半文加價全數歸商 諭曰前因蘆東商力疲乏准其  
正餘引票官鹽每斤加制錢一文以一半歸商俾資成本一半交  
官抵完各商積欠此係朕特沛恩施自加價以來該商歲得一半  
歸商所加之價其交官之項僅於十八年交過一限十九萬二千  
餘兩其餘屢經奏請展緩今該鹽政復奏請交官之半文加價一  
併歸商是該商人貪得無厭而官欠必致竟歸無著嵩年甫抵長  
蘆鹽政之任卽輕聽商人慫恿率爲乞恩除不准外嵩年仍交內

務府議處二十二年三月因天津添設水師 命同郎中廣惠天  
津道李干培並爲監督將該處廠臺營汛衙署兵房晝夜趕緊購  
料興修尋奏海口舊有廠臺首先趕緊改築高大以備閩廣等省  
運到廠位即可隨時安設新城池地方見有遊擊官署一所卽係  
當年都統舊署因歷年久遠風雨摧殘坍塌過甚若照舊式拆葺  
改爲總兵衙門不惟地處適中合宜修建亦覺稍易其餘參遊都  
守千總各衙署兵房亦擬次第趕緊辦理務期工堅料實用副委  
任 上是之八月仍畱鹽政任二十三年奉 命再畱尋以病開  
缺二十四年病痊補熱河副總管二十五年轉正總管道光元年  
授內務府大臣二年授馬蘭鎮總兵兼管內務府大臣辦理 萬

年吉地工程承修 裕陵 隆恩殿三年 裕陵琉璃門銅帽釘  
被竊貝子縣岫鎮國公永康等奏 聞並奏參嵩年以忽視 大  
典及身已獲罪猶怠忽不前並更改舊章冀圖迴護各款 上命  
協辦大學士英和戶部右侍郎湯金釗往讞之以縣岫永康失於  
覺察所參嵩年各款均欠覈實且措詞亦多過當殊失協恭之道  
嵩年疏於防範且於銅帽釘一案七次奏稟會銜者五不會銜者  
二事出兩歧實屬不應 諭縣岫永康各降三級折罰世職俸九  
年半無庸議抵嵩年本應革職姑念其查拏案內人犯尙屬迅速  
無一漏網著降爲主事在 萬年吉地工程效力七年卒

右 國史館本傳



許松年

許松年浙江瑞安人由武舉效力温州水師鎮標於乾隆五十九年補黃巖鎮標左營千總六十年升鎮海水師營守備嘉慶四年隨定海鎮總兵李長庚擊土盜鳳尾幫匪於温州三盤嶼沈其艇一尋松年船爲賊困長庚往援之與松年內外夾攻船得出賊遁五年超擢定海鎮標左營遊擊六年正月隨李長庚擒楊烏等十九人於徐公洋四月隨黃巖鎮總兵岳璽擊洋盜蔡牽於衢港擒王山等十七人奪船一經浙江巡撫阮元奏入 上嘉其出力下部議敘七年隨提督李長庚擒張如茂等十四人於潭頭洋復獲金人飛等八十七人於南麂洋奪船二沈船一焚船一九年二月



升水師提標參將三月蔡牽泊於浮鷹洋松年隨李長庚擊敗之擒男女四十餘人斃十餘人奪船二焚船一獲紅衣礮刀械百餘十年正月蔡牽竄臺灣閩浙總督玉德疏劾金門鎮總兵奇貴延玩貽誤褫職逮問以松年在水師中最爲勇幹奏請護理金門鎮總兵率兵渡臺協剿上允之二月擊蔡牽於小琉球洋面斃賊數十人沈船一三月廣東艇匪烏石二竄入福建與洋盜朱潰合黨滋擾松年自琉球回至廈門卽日出大擔門駛至銅山追及於宮仔前洋面斃賊無算四月在鎮海洋與李長庚合兵進擊驟見匪艇向鬣殼澳南竄追敗之於閩粵交界之甲子洋獲船二沈船二救出商船及被劫難民六月蔡牽與朱潰合竄浙洋李長庚檄

松年會剿敗之於青龍港獲彭求等二十八人奪船一沈船二賊遁八月追及於斗米洋連擊二晝夜擒翁進壽等七十三人奪船二焚船二獲礮械百餘是月蔡牽與朱瀆分竄南洋十二月蔡牽復竄臺灣密結臺地奸民攻郡城自北汕口至洲仔尾一帶排列多船與岸上賊往來接應並於鹿耳門鑿沈船隻堵塞口門以拒外援李長庚統舟師寄碇口外松年偕澎湖協副將王得祿率兵數百乘小船入安平十一年正月進攻洲仔尾賊以槍礮抗拒松年首先陷陣乘勢火攻焚船二十有三奪船九賊焚溺死者八百餘人擒林望等一百六十八人得 旨嘉獎二月松年復潛師夜薄洲仔尾登岸焚賊寮及其船蔡牽自鹿耳門來劫安平松年返

延擊敗之沈船二旋與賊戰於海岸殲斃甚夥焚賊寮七八里還  
至海又焚其船四十餘蔡牽窮蹙欲遁以大船駛近鹿耳門李長  
庚統舟師南北截擊松年亦率兵夾攻獲賊百餘人奪船四焚船  
五葭海潮驟漲蔡牽乘潮遁舟師復追敗之獲賊二百餘人焚船  
九沈船六松年左手受槍傷以蔡牽未經就擒偕李長庚奏請革  
職治罪 諭曰此次官兵攻剿賊匪大加殲戮該逆亡命奔逃其  
潰敗情形實屬顯然但不能將蔡逆立時殲獲李長庚許松年等  
疎虞之罪實無可辭惟查閱李長庚許松年二人兵船駐防之處  
李長庚係在北汕許松年係在南汕蔡逆係在北汕口內漸次竄  
出是許松年之營較李長庚稍輕且許松年此次奮勇殺賊被賊

槍子穿過左手功過尙足相抵況見在受傷可憫著免其革職仍  
留頂帶以觀後效尋追蔡牽於東港外洋斃百餘人沈船一蔡牽  
又以大船遁六月蔡牽竄鹿耳門朱潰竄銅山李長庚渡臺期捕  
蔡牽聞浙總督阿林保檄松年於海壇竿塘一帶扼要截擊遂於  
張坑返埕等洋擒林祖建等七十四人獲船一沈船三阿林保奏  
朱潰匪船見竄古雷洋檄許松年移赴崇武一帶堵截不使與蔡  
牽合黨 上是之七月擒曾左等二十四人於崇武洋八月蔡牽  
經李長庚期敗竄水澳松年率兵截擊擒蔡三來等七十六人獲  
大船一九月阿林保奏臣細詢李長庚水師各鎮勇懦情形據稱  
各總兵祇可駕馭均難膺總統之任惟署總兵之參將許松年沈



勇有謀可獨當一面報 聞十月在三盤洋與浙省舟師會剿蔡  
牽擒李來等十七人獲船一沈船一 上嘉之十二年正月蔡牽  
竄粵洋松年與李長庚合剿二月追及於大星嶼松年率兵先進  
直攻蔡牽所乘船風浪陡起賊拋擲火器松年頭面手足均受傷  
收軍還泊肇慶戩船澳 諭曰許松年在洋捕盜二年緝獲多犯  
並拏獲盜目大船昨在粵洋隨同李長庚攻圍蔡逆首先衝攏賊  
船身受多傷甚爲奮勇著加恩實授金門鎮總兵五月追蔡牽於  
急水洋遇粵匪鄭一幫船擊敗之沈其船獲首犯十一月擊蔡牽  
於浮鷹洋松年躍入賊船擒王澤等五十人獲大船一得 旨下  
部議敘十二月李長庚在黑水洋追捕蔡牽中礮卒十三年正月



議松年借提督王得祿等速擒蔡牽二月松年與福建提督張見  
陞在龜齡洋合擊粵匪擒王瑞等五十五人獲船二焚船一六月  
朱瀆竄閩洋松年於料羅一帶截勦九月金門洋有賊船自臺灣  
私載硝磺內渡松年緝獲之得 旨嘉獎十月以朱瀆久在東浦  
外洋潛匿 命松年放洋東渡會同臺郡舟師探蹤協勦十二月  
朱瀆復竄南洋松年率兵入粵會同閩粵南澳鎮總兵胡于鉉追  
至長山尾見賊船四十餘內大船一知爲朱瀆所乘松年督官兵  
併力攻圍槍礮並發溺斃無數朱瀆受礮傷遁餘船紛逃舟師復  
追擒二十六人獲船一焚船三十四年正月朱瀆因傷斃阿林保  
奏入 諭曰朱瀆在洋行劫稔惡已久雖不若蔡牽之豎旗稱王

亦係著名首逆今被官兵用礮打傷越十餘日斃命卽與臨陣殲斃無異總兵許松年率同守備黃志輝趕攏該匪大船專注攻擊槍礮齊施用能傷斃渠魁奮勇可嘉許松年著賞戴花翎給雲騎尉世職八月粵匪張保仔竄閩洋金門廈門一帶松年遣漁船數十誘之而以舟師出其不意突出痛剿復追至外洋乘風衝壓擒何來等六十六人獲船七沈船六 上嘉其勇往下部議敘十五年正月以傷發解任回籍調理十六年丁母憂十八年服闋十九年正月授甘肅西甯鎮總兵尋調陝西延綏鎮總兵復調福建漳州鎮總兵二十二年直隸天津新設水師調松年爲天津水師總兵道光元年裁天津水師調廣東碣石鎮總兵尋升廣東陸路提

督調福建水師提督三年四月渡臺閱兵適噶瑪蘭匠匪林允春等滋事松年督師入山搜獲首犯正法餘匪分別懲辦 上嘉之六年四月臺灣北路有閩粵兩籍民人分類械鬪之案匪徒乘機煽惑焚掠村莊延及嘉義淡水等處時松年渡臺閱兵 命其就近會同臺灣鎮總兵蔡萬齡知府陳俊千查辦七月以起費及蔓延情形奏入 上以松年未將煽惑糾鬪要犯究明擒獲所奏費起實情及蔓延村莊亦未明晰 命武隆阿爲欽差大臣馳驛前往會同閩浙總督孫爾準妥速籌辦自許松年以下聽其調遣尋福建巡撫韓克均奏松年在臺查拏解散將次完竣孫爾準見已渡臺督辦不日即可蒞事 諭武隆阿無庸前往八月孫爾準疏

劾提督許松年辦理錯謬 諭曰此案臺灣匪徒李通等挾黃文潤搜賊之嫌糾眾尋鬪黃文潤集眾抵禦格殺二人匪徒遂造分類械鬪之謠乘機焚搶經該縣王衍慶拏辦數賊匪徒遂竄彰化境內該提鎮等誤執民自械鬪官兵祇有彈壓不便加誅之說致該匪等益無忌憚具結復鬪見因官兵雲集均已解散提督許松年未能痛加懲辦乃邀集總董勸令講和失體損威辦理已屬錯謬又監提尙未定讞之兇犯吳谿等作線並在行間乘坐肩輿何以率先將士許松年著卽革職畱臺交孫爾準差遣效力贖罪十二月因病呈請回籍調理經孫爾準奏入 命俟病痊後送部引見七年卒子錫麟襲雲騎尉世職嶽生候選州同廷恩議敘把總



右 國史館本傳

公姓許氏諱松年字蓉嶺浙江瑞安人也當乾隆嘉慶之交川楚  
奸民蔓延海盜乘間嘯聚蔡牽爲大朱潰次之挾岸奸結聯夷船  
合數百艘擾浙閩粵三方海上凡數千里垂十數年而後破滅時  
語水師良將推壯烈伯李忠毅公長庚及忠毅所識拔裨將若公  
及王公得祿邱公良功等忠毅之擊牽潰公等嘗爲軍鋒臺灣之  
役公及王公別將洎忠毅戰歿訖滅潰者公滅牽者王公邱公三  
公後皆位提督繼李公任王邱並膺五等封而公亦以破斃朱潰  
特予孔雀翎世襲雲騎尉其後十餘年公任福建提督總督以事  
劾罷公家居一年旋卒卒後又十餘年英吉利寇中國浙閩粵三



方駛授殆徧時承平久水師積隳舟楫窳敗而公等部曲亦散亡  
略盡矣不獲已取征川楚時一二宿將臨之水陸不習輒無功或  
敗剴至誅死於是世乃歎公等當日衝歷風濤冒鋒鏑煙火搏死  
戰於洪波駭浪之中其事爲尤難又重歎公年壽之不永脫今猶  
在不過七十餘古名將垂蔀樹功名多矣以公材畱遺至於今日  
賊殆不足滅何文吏牽掣如冒之患卽封侯賞豈足道哉公之卒  
也不得蒙易名之典其葬也誌石未具道光二十四年四月於是  
仁和邵懿辰始因其子錫麟之請爲文以列於外碑按年譜公貌  
魁偉異常人幼隨諸兄讀輒逃塾馳馬乃就武試年二十中武舉  
再會試不中入營效力以千總擢鎮海守備護參將時李忠毅公

爲定海總兵統官軍剿牽等以公爲先鋒自是每戰必倚公度重  
洋追捕屢有擒斬先後獲賊目及舟船礮械無算嘉慶初擢定海  
遊擊李公擢提督公亦署玉環參將旋擢福建水師提標參將仍  
領北洋舟師始蔡牽踞閩洋朱濟踞粵不相攝未幾牽獲閩商巨  
艇劫臺灣米分餉瀆遂與瀆合連舸百餘入閩洋戕温州總兵胡  
振聲復合犯浙海鋒銳甚時忠毅總統浙閩水師遇於扁礁洋二  
賊結爲橫陣公秉李公令分舟師爲兩翼左右擊而自帥銳師突  
貫其中賊不支遂大潰幾獲牽牽委敗於瀆瀆怒黨復分是時賊  
艘多倍我方戰公勇氣踔厲銳矢傷面不避李公大賞愛益內親  
公乃請公女妻其嗣子十年護金門總兵四月敗瀆甲子洋六月

擊青龍港當是時蔡牽數大創乃謀奪臺灣爲窟穴大舉賊眾盡載所掠財賄入臺灣樹旗稱王攻府城他賊萬人別屯洲仔尾沈舟塞鹿耳門以拒官兵之赴援者李公至不得入諜知南汕北汕大港門可通小舟令公及潮澎副將王公乘澎船入攻之公與王公議曰我師少難以力勝賊船巨而重誘使膠於淺且用火攻乃可破也明年正月伏兵淺沙親挑戰賊果入伏中火敗之連戰皆捷二月朔公夜率銳師躡海水登洲仔尾焚其寮牽反救公與李公夾擊大敗之明日復夾擊大敗之牽窮蹙將就禽忽鹿耳門潮漲颶所沈舟牽得竄出公復與李公夾擊敗之是役也公爲軍鋒冠前後奪舟大小數十焚寮及舟無算殺賊數萬橫尸數十里臺

灣獲全威名振海上十一年春及李公追牽至廣東沱浦外洋奮力衝擊頭面手足皆傷 詔褒美實授金門總兵其年冬李公戰沒於廣東黑水洋公聞憤甚明年春追牽至粵洋及虎門鎮孫公全謀合力擊破牽所乘大船牽易他舟遁入夷海十二月至長山尾洋追及朱潰大戰至夜潰百餘艘列陣如長蛇最中一巨艦悍不可制度爲潰舟集力攻擊潰及親黨皆斃獨潰弟渥脫去明年官兵殲牽於北洋渥率其眾降於閩於是二巨寇皆滅海洋謐清公亦傷疾發告歸尋丁母憂服除授甘肅西甯總兵未至調陝西延綏又調福建漳州居漳州四年海上無事聞爲民興利去害甚得軍民心嘉慶二十二年英吉利兵船駛入內海謀設異廷議



豫防乃增天津水師總兵以公宿將移任之居天津又四年夷艘  
迄不至道光元年議裁撤調公廣東碣石鎮俄擢廣東陸路提督  
調福建水師提督爲提督五年總督趙文恪公慎畛深相知愛言  
計悉聽從代趙公者嘗與公不相能乃坐臺灣民械闖公馳按不  
卽決爲遲誤軍事並鎮協官劾之並落職尋格衆論請仍以都司  
遊擊起用而公已病不能興矣公生於乾隆丁亥年閏七月二十  
八日卒於道光丁亥年三月二十二日葬以己丑年十一月十日  
曾祖寅祖宗衛父灑並 贈振威將軍母張氏 贈一品夫人娶  
胡氏子四人錫麒錫麟錫禎錫祥皆側室出墓在其縣一都麗輿  
翠筆山之原



右墓表邵懿辰撰

國朝書林校刊局 卷三十三 將帥五十四 三



張清亮

張清亮廣東香山人嘉慶十年閏六月由行伍隨參將李光顯出洋巡緝十月偵知香山縣之浪白洋有盜船滋擾卽往剿捕賊船潰竄舟師追及於大虎洋面然礮轟擊生擒盜首陳亞和等殲賊甚眾十四年洋匪張保仔等聯踪百餘於荷包灣牛角灣浪白瀆等處停泊清亮隨署提督孫全謀往捕賊恃眾迎拒我兵奮力攻擊礮折其船桅賊猶死戰官兵擲火器燬其船賊墜海死者無算餘匪竄泊龍鼓洋舟師四面圍攻沈賊船一獲船四擒賊目馬阿九等清亮以力戰受傷拔補香山協左營外委十五年四月盜首烏石二吳知青等率匪船百餘在高廉雷瓊等府洋面伺劫兩廣

總督百齡集師船分隊西下清亮隨副將洪龍擊賊於高州府屬之碭洲洋面沈其船十獲船十六擒盜首張亞安等一百三十餘人餘賊向西南逃逸五月追至儋州新英外洋沈燬賊船十餘獲船十七擒盜梁烏石二及賊目烏石大烏石三鄭耀章並賊黨千餘吳知青乞降盡獲大小匪船軍械槍礮及其眾四千清亮均在事有功十八年授右營把總二十一年升千總二十三年六月遷大鵬營中軍守備十二月升碭洲營都司二十四年升閩粵南澳鎮標右營遊擊道光二年遷平海營參將三年升澄海協副將四年擢瓊州鎮總兵六年因所轄崖州營千總王應清擅入黎地嚇詐得贓上以清亮毫無覺察不勝總兵之任惟年力尙強從前

剿捕洋匪曾經受傷 命降為參將酌量補用以觀後效旋擢大  
鵬營參將七年卒子汝霖香山協額外外委

右 國史館本傳



國朝年月日  
永樂  
卷三十四

七

王萬清

王萬清直隸大城人乾隆五十五年一甲三名武進士授二等待衛五十七年揀發江西以遊擊用旋補南贛鎮標左營遊擊嘉慶七年調江南河標右營遊擊十四年擢雲南城守營參將二十二年雲南臨安江外夷匪滋事經總督伯麟保奏在事出力各員萬清以軍功 賞戴藍翎二十三年三月偕都司曹得周破賊於羅家寨擒賊目曹波韋旋經伯麟調集官兵令過江分爲兩路督同土練剿捕萬清偕遊擊石成玉由東路前進行至蟻夏地方會夜霧迷漫賊匪潛來劫營萬清等先伏兵於蟻夏左右聞人馬聲伏起賊奔潰擠巖墜死者無算四月萬清偵知大宗哈寨左首右峒

內有賊伏匿地陡削僅通樵路一線官兵至峒口然草塞而熏之  
賊冒煙突走斬獲殆盡六月萬清偕知縣文燧攻賊於賴蕨破其  
巢擒首逆高老五等以功 賞換花翎下部議敘八月擢雲南維  
西協副將二十四年署督標中軍副將道光元年兼署城守營參  
將二年復署督標中軍副將擢普洱鎮總兵六年邊俸期滿調回  
內地七年入都候 旨簡用旋卒子安城二品廕生

右 國史館本傳

劉清

劉清貴州廣順人由拔貢生充四庫館膳錄乾隆四十九年議敘縣丞分發四川五十四年補冕甯縣縣丞五十七年升南充縣知縣嘉慶元年九月達州教匪徐添德等不靖清率鄉勇隨署總督英善赴剿十月攻克麻柳場賊寨餘匪竄袁家石壩尋來撲東山廟營卡遊擊尙維岳戰歿清急馳往援賊潰事聞命以應升之缺升用官兵旋克袁家石壩又敗賊於柏楊場賊欲由大東林水口偷渡清隔河拒之斃賊匪多名賊折竄茅坪張家觀等處十二月徐逆與東鄉教匪王三槐冷天祿等股合陷東鄉分屯曾家山張家觀及金峩寺清溪場等處二年二月官兵攻克張家觀曾

家山復東鄉總督宜縣委清署縣事三月官兵分五路攻金峩寺清溪場清借副將玉柱抵楊柳坪冷天祿糾黨來犯大營清等擊卻之四月攻克清溪場擒僞軍師王學禮訊之王三槐徐添德等均投順意清親至賊營賊跪謁清知賊蹤詭祕諭以大義陽爲招撫令於十八日納降而仍設備以待屆期王三槐於雙廟地方詭稱投降果有伏匪沿途接應將爲掩襲計我兵識其計大敗賊眾八月賊分青藍黃白等號羅其清稱巴州白號冉文儔稱通江藍號併聚方山坪而以蓋頂山多福山甌帽山爲障蔽我兵三路進攻清借總兵百祥奪多福山賊卡復會各路兵勇同克方山坪賊竄通江巴州一帶與達州青號徐添德東鄉白號王三槐等股



合十月羅舟二逆由南背山折竄江口清與參將阜常保分路截  
剿殲斃多名卽畱駐江口以截賊眾竄回達州之路十一月羅舟  
股匪屯聚永興場經官兵敗之折竄鐵釘埡張家場會清率鄉勇  
馳至出其不意痛加剿洗賊退遁三溪口譚家嶺等處清復率鄉  
勇分路進攻賊遁入巴州之碾盤壩靈剛寺偵蹤追擊殲擒千餘  
賊窮蹙追擊營山之來定寺又敗之三年三月總統勒保以廣元  
縣爲北棧門戶委清署縣事四月 諭曰朕聞川省剿辦賊匪州  
縣中有劉清平日官聲甚好每率眾禦敵賊以伊廉吏往往退避  
引去劉清如果始終奮勇民情愛戴著勒保據實保奏五月奏稱  
南充縣知縣劉清平日居官辦事深得民心自教匪滋事以來節

次帶勇殺賊甚爲奮勉賊匪亦稱爲清官眾口如一得旨以同知直隸州用 賞戴花翎九月襄陽白號高均德股匪由陝境竄廣元之旺蒼壩副都統額勒登保由甯光一路迎剿清圍集鄉勇於隘堵禦獲賊黨劉正名等三十五名四年正月 上以勒保爲經略大臣 諭曰同知用劉清平日官聲尙好著勒保奏明量予升擢以從民望尋奏請擢清忠州直隸州知州並懇 賞加知府銜 允之五月白號股匪張子聰藍號股匪冉添元在竹峪關爲參贊額勒登保剿散飭清於通江巴州一帶設法招撫先是三年剿辦王三槐時勒保議招撫之令清迭次赴三槐營宣諭三槐乃詣軍門勒保擒獲奏捷至是清招徠賊累至賊營懲三槐事不肯

出以清廉吏亦不忍加害八月署總督魁倫據實奏聞賞加  
道銜時左副都御史廣興赴川畱辦達州軍餉諭劉清隨同幫  
辦遇有道員缺出著魁倫奏請升補九月額勒登保期辦青白各  
號股匪將連次擒獲被脅之人及自行投首者均飭清安爲安撫  
上嘉其所委得人魁倫又以撫恤難民請交清覈實經理從之  
十月補建昌道五年正月毋添元張子聰合黃號徐萬富青號汪  
瀛線號陳得倖各股匪共五萬人搶渡嘉陵江魁倫退守鹽亭之  
鳳凰山以潼河上下三百餘里淺灘八十餘處令清於居民中團  
集鄉勇設卡防守旋將前派防河之官兵陸續撤回三月賊爲參  
贊德楞泰勦敗由泰和鎮上游之王家背涉淺偷渡事聞魁倫



職逮治並奪劉清職。命署總督勒保查明賊匪偷渡之處如係劉清專轄亦應拏問。閏四月勒保覆奏魁倫因賊匪竄至鹽亭令百祥薛大烈將沿河兵勇一併帶回。又將參將張績所帶兵勇撤回大營王家背地方祇有團勇百餘人防守亦未有責成。專管之員劉清奉檄在潼縣一帶統率巡防王家背非其專管。曾因太和鎮以上淺灘要隘鄉勇實難專恃稟請魁倫添兵未經批准。劉清係總巡之員業經遵旨革職。兩於軍營劉清去年在通江巴州一帶招撫被脅難民夏秋閒從賊內投出者實有二萬數千人。因此黨與解散賊勢大衰。茲查各股竄匪大半在通巴境內正當乘此被勦情急之時招歸安業。臣見派劉清帶同候補通判劉星

渠仍照上年所定章程認真招撫 諭曰此事卽責成劉清經手  
專辦如果認真奮勉卽加恩將伊原官開復亦無不可十一月白  
號賊匪楊開第由陝境竄入通江之芝坪清飭縣丞銜劉炳從九  
品徐若瀛帶同前在鮮大川股內投首之王忠等假冒賊黨乘夜  
深入賊營猝焚賊驚遁追奔二十餘里斬僞先鋒杜星貴殲斃三  
百餘人投出者一百餘人六年二月黃藍白各號股匪由新鎮壩  
碑灣寺敗走巴州清率鄉勇進至恩陽河夜襲賊營殲賊百餘投  
出者五十四名德楞泰勒保先後奏入 諭曰前曾降旨將劉清  
加恩以知縣補用並准畱營效力以觀後效今劉清辦理保甯一  
帶堅壁清野及招撫團練等事俱能認真出力節次帶領鄉勇打



仗亦屬奮勉劉清著賞還道銜在川候補不必賞戴花翎仍帶革職留任俟四年無過再行開復五月白號餘匪高見奇等被陝省官兵偪入通江之西有溪清率鄉勇勦斃百餘名招出難民一百五十六名六月高逆又合陝省竄匪擾至南江之斜巖高廟子清率鄉勇追勦二十餘里斃賊二百餘名九月藍號賊匪李彬合王冉餘孽由巴州折竄通江清迎勦於謝家山尋李彬股內李元受帶賊目雷仕榮等十九名投首清令寄信賊營陸續招出男婦一百八十七名十一月額勒登保奏稱劉清帶領壯勇數百人於通江巴州一帶勦撫兼施節次斬獲多人招撫亦復不少百姓既聽其指使賊隊亦靡不信從連日隨臣在營臣察其辦理各事實心

實力不辭勞瘁洵屬川北地方官中最爲出力之員仍懇量加鼓勵俾各員觀感奮興得旨賞還花翎十二月復授建昌道七年二月謀報李彬率眾竄至南江之鐵廠坪清豫派典史猶啟祥帶領寨勇遏賊西竄及入老林之路度賊敗後必走五方坪乃設伏以待清率鄉勇楊家霸策應別遣軍功李仕玉等從白巖山直趨鐵廠坪賊猝不及防果走方坪伏勇齊出猶啟祥亦馳至遂擒賊首李彬及辛聰之弟辛文僞先鋒曹世連劉玉藩唐仕武等餘匪斬獲甚眾捷入賞加按察使銜並玉鞬荷囊諭曰前曾降旨令各督撫責成地方文武員弁遇賊匪在境內隨時認真搜緝分別勸懲今四川道員劉清所帶祇係鄉勇並無官兵能將首逆李

國朝通志卷之三十一  
三  
彬及辛文擒獲得邀獎賞地方官皆當以劉清爲法三月白號張  
魏餘匪經官兵追剿竄南江之劉家坪清迎截於青趕渡殲斃多  
名四月又與遊擊馬績等擊賊於通江之貓兒壩賊竄入陝境尋  
折回廣元又偕總兵豐伸敗之於麻柳壩六月追剿藍號楊布青  
餘匪於通江之七星包斃賊三十餘人俘獲四名投出者三十六  
名 上嘉其奮勉八月授按察使十二月敗藍號齊國典餘匪於  
兩河口清飭軍功賊青雲等抄赴南江之東渠迎擊賊竄黃草坪  
又奔沙溪場賊青雲乘夜追及擒僞元帥葛成勝會達斯呼爾岱  
達勒精阿所帶官兵亦至前後夾擊殲斃無算得 旨嘉獎是月  
大功告成下部議敘八年閏二月陝西藍黃白各號匪徒從南山



竄出棧道清馳赴廣元堵剿三月賊眾經參將羅思舉剿敗遣僧  
人通天至廣元報信投首清遣軍功李植德偕通天前往招撫旋  
被戕害 諭曰劉清本當治罪姑念其平日官聲清潔暫從寬免  
並著勒保嚴飭劉清認真搜捕儻再輕信賊匪之言仍事招撫致  
該匪得以延喘奔逃輾轉滋事必將劉清治罪不貸清尋遣賊青  
雲率鄉勇探蹤追剿藍黃白各號投出首夥共九十三名七月在  
南江之鑽天坡獲白號僞元帥邱高科十一月 命勒保將糧餉  
搜捕各事交劉清羅聲皋遵辦九年正月清分派員弁兵勇搜捕  
零匪疊有斬獲九月陝省裁撤鄉勇過綏定者均經逐一清查或  
充當兵役或回籍安業以次散歸十月續撤鄉勇偕提督馬瑜一

律安爲安置十年入 覲 賜詩曰循吏清名遠邇傳蜀民何幸  
見青天誠心到處能和眾本性生來不愛錢有守有爲績昭著無  
偏無欲志貞堅空羣羨爾超流俗明慎咸中治理宣十一年丁繼  
母憂十三年服闋授山西按察使十四年七月升布政使十月署  
巡撫初彭齡審辦臨晉縣假裝銀鞘案清請將錢文石塊情節刪  
去經初彭齡奏參 上以其袒護屬員計圖消弭下部嚴議尋議  
降四級調用得 旨以從四品京堂補用先是清自陳才力不勝  
藩司之任懇請開缺至是奏入 上斥其冒昧陳奏以員外郎降  
補十五年五月補刑部員外郎十月充熱河都統衙門辦事司員  
十七年授山東鹽運使十八年九月河南教匪李文成滋事煽及



山東賊黨朱成良糾眾熾聚陷定陶曹縣清力請從戎巡撫同興  
派令偕參將馬建紀帶兵進剿抵定陶之髻山搜剿匿匪殲擒千  
餘名賊匪復出抗拒又敗之旋攻克韓家廟賊巢生擒賊首趙文  
祿斬獲無算餘匪竄曹縣扈家集 上嘉其勇敢下部議敘十月  
官兵分三路進攻扈家集清偕協領哈哈岱馬建紀先由定陶攻  
其東面初賊以扈家集爲巢穴築牆樹柵外植荆棘周圍約四五  
里守護頗密猝不易攻清乃策勵官兵奮勇撲入賊退避屋內我  
兵乘風拋擲火彈偪賊出賊大潰餘匪奔竄適南北兩路官兵至  
合擊之殲二千餘人斃賊首朱成良擒僞副元帥王奇山 諭曰  
劉清前在川省軍營著有勞績朕所深知今年逾六旬且係文職

能身率士卒直取賊巢殲賊多名實屬勇敢可嘉著賞加布政使  
銜卽換頂帶並賞給四喜扳指一箇並大荷包一對小荷包二箇  
是月有賊匪數百由河南滑縣潛奔定陶之郝家集清偕哈哈岱  
馬建紀分兵截剿執賊目曹光輝殲僞元帥袁興邦僞將軍周姓  
斬賊匪四百餘人十一月賊平曹縣定陶金鄉及附近各縣難民  
漸次復業清偕堯沂曹濟道熊方受督率州縣編排保甲並辦理  
撫恤事宜十九年五月授雲南布政使七月 諭曰劉清在山東  
帶兵剿賊民情甚爲愛戴雲南布政使一缺與伊不甚相宜著以  
二品頂帶仍畱山東鹽運使之任二十一年四月因病奏請開缺  
諭曰劉清前在川省軍營著有勞績十八年剿辦山東教匪尤爲

出力此次因病開缺伊籍隸貴州若回原籍調理病痊再行來京候補道路遙遠往返不易著於解任交代後就近來京醫治安心調理一經病痊卽具摺請安候朕賞給差使八月病痊 特授山東登州鎮總兵二十五年調曹州鎮總兵道光二年以年老休致命在籍支食全俸七年卒 諭曰原任曹州鎮總兵劉清於嘉慶年間由知縣洊升藩司獲名後蒙 皇考仁宗睿皇帝棄瑕錄用改任總兵曾在四川山東軍營出力服官三十餘年清勤素著道光二年因年老休致回籍經朕賞給全俸以養餘年茲聞溘逝殊堪惋惜伊孫兵部候補主事劉熾昌著加恩遇缺卽補文生劉瑩賞給舉人准其一體會試所有任內一切處分悉予開復其應得

卹典該衙門察例具奏尋 賜祭葬道光十二年奉 旨入祀貴州鄉賢祠山東名宦祠子廷榛軍功六品頂帶前候選知縣孫熾昌二品廕生前官江西九江府知府緣事革職瑩 欽賜舉人

右 國史館本傳

孔門無兵法而有吏治有勇知方合將吏之術而一之仁者無敵之師也仁人之師生之而仁殺之而仁生殺俱仁賊化爲民故曰賊服者侯賊畏者仇不仇而侯勿侈兵謀吾於故總兵劉公而愈信之公諱清字天一號松齋貴州廣順人嘉慶中天下所稱劉青天也先是 睿皇帝卽位之三年 詔曰朕聞川省勦辦賊匪州縣中有劉清平日官聲甚好每率眾禦敵賊以伊廉吏往往退避



引去劉清如果始終奮勇民情愛戴著勒保據實保奏無何賊首  
王三槐聽公諭降而總統以生擒入告 廷訊時三槐供言四川  
好官惟劉青天一人由是青天之名上徹 宸座薄海內外識與  
不識皆以青天呼公當是時川中賊四起分青黃藍白線五號最  
强者孫士鳳徐添德擾川東冉文儔羅其清王二槐擾川北各萬  
餘人殺劫官吏獨相戒勿犯劉青天三槐之降也本受公約束許  
以不死及公爲總統所賣而三槐臨刑仍稱公好官不以被給悔  
其深服賊心至於如此然而公殺賊未嘗不力也嘉慶元年十月  
敗徐添德於麻柳場二年三月敗冷天祿於楊柳坪四月敗王學  
禮於清溪場八月敗羅其清冉文儔於多福山逐之於碾盤壩來



定寺諸處連敗之每戰必斬賊千百戰畢駐營卽單騎入賊壘曉以大義勸之降賊終以王三槐故懷疑貳畱公宿帳中供食導閱各巢迎送拜跪均如民禮此與漢張綱討廣陵賊張嬰單車直造嬰壘者三千年來得公而兩綱之事得自主故其功卽成公之事不得自主故其功不卽成公不以王三槐之故而廢勸賊之心賊不以王三槐之故而萌害公之意戰血未乾訓語倏至出入虎穴坦若門庭見羅其清等則大哭賊亦大哭蓋不待戰而其心已爲公奪矣公嘗率子廷榛出探賊賊不知爲公譟而逐之公策馬過河陷泥淖中賊攢矛刺之已及中有識公者曰此劉青天也各棄矛泗水負公父子登岸餘賊牽馬爲整鞍轡而去故曰賊畏者仇

賊服者侯侯而不仇勿侈兵謀然則川陝楚三省之亂卽以公一人定之有餘也五年夏公招降二萬數千人賊勢由此遂衰經略額勒登保等以次剿除公復破擒楊開第高見奇李彬辛文楊布青齊國典葛成勝等且戰且撫願歸農者皆投麾下功竣晉爵至按察使 陸見 御製詩以賜有蜀民何幸見青天之句用王三槐供中語也十八年九月山東妖人朱成良反陷定陶曹縣勢張甚公爲山東鹽運使請於巡撫得兵五百率奴趙升朱壽符貴閔榮王德等皆從蜀賊中拔出經百戰者是時民從賊者多其未揭竿者公予以紅旗上書盛世良民令曰勿動動則斬由是朱成良勢孤僅成四千餘人公敗之於方山復定陶又敗之於張家廟

屠家集復曹縣河南賊奔曹縣者並殲之嗚呼公以五百人旬日  
閒滅賊數千過皇甫嵩朱雋遠矣而其妙用則在散賊黨且保全  
民命無算公之心猶是招撫蜀賊之心也仁也仁人之師生之而  
仁殺之而仁生殺俱仁賊化爲民此之謂也公在蜀大小近百戰  
所率皆鄉兵無異驅市人而戰之惟曹定之役乃用官兵當川督  
魁倫退屯鹽亭時公料王家背灘淺賊必由此偷渡請勿撤防守  
兵魁倫不可未幾果如公料魁倫轉劾公以自解宰廣元時關廂  
民畏賊爭入城公堅不許曰入城一步卽棄城一步令止一子今  
率之宿關外與汝等共守民各感奮遂與公共擊賊羅思舉者東  
鄉人橫行川楚境有年公以計縛之奇其才釋爲鄉勇首思舉遂

以軍功起家至提督每語人曰生平知己只吾青天師也復定陶  
日兵不敢入城公騎馬周視曰城有烏此空城也入宿縣廨洞開  
城門五百人頗自危公曰無害賊黨眾而我兵單示之以壯賊必  
連夜遁是夜賊潛三十里內謀襲公究以不測虛實而遁公之膽  
識大率類此卽以將才論亦足與古名將爭雄千古而況又能爲  
循吏耶 本朝用漢官沿明制文武不互授職破格用者趙公良  
棟父子岳公鍾琪父子梁公爾劉公世明楊公遇春皆以武轉文  
睿皇帝知公深 特授爲總兵官以文轉武功名之盛躒諸公而  
上之非 睿皇帝不能如此用公非公不能如此受 睿皇帝之  
知夫天生奇才必破常格以待之而後得盡其用才奇而格不破



是猶未欲盡其才也公之才奇 睿皇帝之知公奇自知縣以  
至布政使皆破格以從民望凡投首之賊被脅之民堅壁清野之  
議熱河刑名之司無不 特旨命公卽南山餘賊戕李植德一事  
且有劉清本應治罪姑念平日官聲暫從寬免之 旨孰非破格  
待之耶 御製詩曰空羣羨爾超流俗其簡在豈偶然哉余嘗求  
公遺事以爲公仁人也其所以服賊者在政事不在兵謀必有州  
書縣譜昭其生平大事及考諸傳記聞諸故老殊多未具然亦足  
覘大槩公初至蜀攝大竹縣丞民有訟債者賒貸家獻金賂公求  
不直子錢家公計其數抵所負之半陽許之升堂出金斤賒貸家  
曰汝賄官何如償債令更出其半以完母而令子錢家讓其子立



子判結兩造各感泣南充故脂膏地公於法錢外一無所取故食  
常不給民爭以酒米爲壽公擇其尤貧者受酒一盃米一龠崇慶  
州俗悍睡眦輒殺人公導之以情教之以禮風蒸蒸變廣元天荒  
久公延名宿課士公餘自教之不數年甲乙科相續有入翰林者  
熱河舊無都統嘉慶十五年新設並設理刑司鉅細草擬定自公  
手如謹園場分稅界文武舉劾蒙漢交易皆歷久遵行而刑名尤  
明慎蒙古男女亦皆呼青天山東鹽政疲公不受陋規清其積弊  
商人紆而課以中程登州海中有物嘗食營馬兵將每苦之公莅  
任爲文禱海怪遂以減曹州河隄屢廢於水公倡築之手植柳一  
株令曰汝等其視此柳民亦爭各植一柳一日種柳盈萬隄遂以

固選童子四十人教以兵法日練之曰此兵成他日無足當者春  
秋行屬縣靡村不到爲男女講 聖諭廣訓犒以銀牌紙筆環而  
聽者日千人他府民亦走百餘里來聽講故事總兵餐錢出於虛  
糧公自甘淡食而以虛糧予兵去任日兵民送數百里不忍別餽  
食物者皆慰謝之一老婦奉雞卵十枚強納輿中曰吾寡婦也不  
可卻公下輿勞之乃受嗚呼此青天之名所由來也公長身蘊立  
風度凜然御物無稜岸親疏皆以家人畜之政如春雨不同枯不  
已以故所在處施無不宜今夫天之生才無古今有治亂孫吳白  
韓足以亂亂而不足以治治龔黃卓魯足以治治而不足以亂亂  
治治者循良爲一書亂亂者兵法爲一家雲蒸龍變文武分途孔

門仲氏合而一之以有勇知方爲都三代以後降才非殊至於公而後孔門之效乃始不誣公生時太夫人夢飛熊入帷故小字曰夢熊三歲失恃事繼母篤孝兩兄爲析產構訟公泣而勸之讓以己產訟始息及公以乾隆四十二年登拔萃科不能入都兩兄感公義各賣所讓產爲治裝嗚呼此青天之名所由來也青天者仁仁者孝弟也有子曰孝弟爲仁之本孫子亦曰將以仁爲本未有不孝弟而能合循吏名將一以貫之者也民以爲侯賊不敢仇宜哉宜哉公以四庫館議敘得縣丞籤發四川署大竹縣丞補冕甯縣丞受知於總督孫士毅升南充知縣調廣元東鄉署崇慶州嘉慶三年 賞戴花翎以同知直隸州用四年經略勒保保奏擢忠

州直隸州知州加知府銜升建昌道以賊渡王家背降知縣六年  
經略額勒登保奏開復建昌道七年升按察使自嘉慶三年以  
後皆在軍營未履任也十年入 覲 賜御製詩十一年丁繼母  
憂十三年服闋補授山西按察使升布政使以巡撫事逆欽差大  
臣意大臣旋署巡撫公自劾才不勝任請開布政使缺 睿皇帝  
斥其冒昧署巡撫亦以臨晉事劾公降爲員外郎十五年補刑部  
山東司員外郎充熱河都統衙門辦事司員十七年升山東鹽運  
使十八年平曹定教匪 賞布政使銜並玉鞬荷包十九年授雲  
南布政使仍留山東鹽運使任二十一年乞病 睿皇帝不許回  
籍病愈 陸見 授登州鎮總兵二十五年調曹州鎮總兵道光



二年與巡撫議裁兵事不合部如公議公遂乞休 命在籍支食  
全俸七年卒於家 上聞震悼官其孫熾昌兵部主事瑩舉人祭  
葬如例山東四川民爲公建祠無數十二年奉 旨入祀山東名  
宦祠貴州鄉賢祠二十四年熱河都統薩迎阿率司官鮑繼培姚  
近寶奉公主於夏典史舊祠祀之蒙漢人民大和會懸祠額四字  
曰如見青天

論曰公習苦出於天性所官無不裁陋規者大府不以爲然故有  
州縣有餘方面不足之考公於是不樂居方面也戰功見於章奏  
者多與人共遺命子孫勿爲行述碑志其高致豈後世賢者所能  
及哉



右傳蔣湘南撰

公諱清號松齋貴州廣順州人由乾隆丁酉科選拔貢生分發四川知縣歷著廣元等縣補南充縣公於書無所不讀尤嗜左氏傳識兵法居官豁達無兵民吏役皆呼爲兒所得廉俸盡以施予所至稱劉青天嘉慶元年川楚教匪起公團練鄉勇拒賊王三槐者賊之渠魁諭其黨勿犯公公因賊重其名軍中旗號大書劉青天賊望見輒引避是時經略勒公保督勦累年未平公請往諭降賊皆露刃相覘公冒刃進直抵王三槐臥榻宣布 國家威德弗從護送公還營後再往王三槐聽公言經略恐其有詐使司道府偕公於古廟中受降司道上座府中座公下座王三槐跪稱犯民司

道大言曰死囚虜 朝廷何負於汝而反王三槐起立白爲公等  
反耳徐步出馳逃歸眾環顧錯愕廣西布政使前川北道李公鴻  
爲余言當是時司道慙欲以招降不實罪公經略謂反覆賊之常  
情劉令以單騎出入賊營未可深咎乃免公公三往卒降王三槐  
檻車送京師 仁宗親鞫之於瀛臺則呼云使官如劉青天百姓  
斷不反故 御賜公詩首二句云循吏聲名遠近傳蜀民何幸見  
青天頌示天下督撫而四方海徼始無不知有劉青天者公以軍  
功洊升至按察使丁艱回籍服闋 簡山西布政使晉撫初公彭  
齡劾公無威儀失大臣體降員外郎十五年外放山東鹽運使十  
八年逆匪林清滋事河南滑縣山東曹縣皆戕官東撫同公興欲

請兵公謂烏合之眾易滅請立軍狀不聽請以百口立軍狀乃與公五百人抵曹賊已脅從至數萬公誓眾曰爾曹富貴在此一與進退視吾旗鼓有返顧者斬與賊遇旗三颺賊前者敗蹂躪後者死傷不可億算公收軍立營造飯謀者云賊至公命軍士食單身立營門外賊卻疑不前食畢乃入城立木柵益以守城民兵千人眾心大定賊巢聚胡家集往來圍攻曹城夜三鼓公令守堞兵東北喊自率兵出西南門縛賊三百眾問故公曰此兵家虛實相掩之法也勞以酒食與之招降帖各數百紙使歸後密搆貳其眾次日天未曙公直擣胡家集拋火毯賊驚潰追斬數十里悉擒其僞首餘散遣使復爲民所得金銀布帛盡以犒軍曹地平時東撫駐

曹州府公欲乘勝往破滑東撫攜公手曰老將軍保山東境足矣  
滑有陝甘督那公彥成提督楊公遇春在毋重勞公乃止事竣  
陞見 仁宗問巡撫抑勒汝乎公頓首奏撫臣不遣臣臣安能成  
功軍機大臣皆善公對升雲南布政司使未行改登州鎮總兵余  
時在京謁見公問公兵法皆出左氏傳乎公荅以兵無成法古人  
云胥臣蒙馬以虎皮藥枝曳柴而偽遁從何處得來在讀書者善  
領之而已既抵登州任重修蓬萊閣與都人士嘯詠其上絕口不  
言兵移曹州鎮年老引退食全俸卒年八十有六  
論曰聞公之未生童謠云拔貢總兵 國朝漢官文武不相兼公  
以拔貢作登曹二鎮竟符其謠公功在四川山東曹州立生祠百



姓過公祠無有道公之官爵者皆曰劉青天祠

右家傳劉鴻翔撰

公諱清字天一貴州廣順人以拔貢生歷官布政使終總兵然人皆呼爲劉青天從其官四川縣令時民所稱也嘉慶元年達州王三槐以教匪倡亂時公以縣丞遷知縣數以鄉兵破賊於南充廣元間公撫民及士卒皆以兒子畜之人樂爲死賊自爲民時知公名戰莫爲用故遇公輒逃 睿皇帝知之由南充縣驟遷至建昌道 賞戴花翎後屢起屢躓先是 上以賊久未平有進招撫說者試行之經略大臣念撫賊莫如公宜隻身入賊營者數返三槐遂降而冒功者詭言生得之三槐誅他賊首疑憚不出故功不時



就而官兵持鋤撫兩端戰不力然賊卒深信公前後降黨與二萬人及行堅壁清野議 上命經略大臣一委公賊卒由是破散捕餘匪裁撤鄉勇公功爲多八年大功告成入 覲 賜詩取民所呼青天者以爲句由四川按察使改山西遷布政使以屬吏事責授刑部員外郎轉山東鹽運使時嘉慶十七年矣逾年而教匪朱成良陷曹縣定陶公自請從戎以官兵五百敗賊於髡山復定陶又敗之於韓家廟殺賊二千時賊保扈家集於曹縣樹土牆荆棘四周公自定陶攻其東縱火拔柵賊突出多死稍逸者南北官兵至合擊之誅賊首朱成良王奇山賊在山東者皆盡而河南賊自滑縣奔定陶者亦殲於公十一月賊平公之平扈家集也 上諭

曰劉清年逾六旬且係文職能身率士卒取賊巢勇敢可嘉賞布政使銜至是遂授雲南布政使旋以二品頂帶留山東鹽運使任二十一年八月改登州鎮總兵復改曹州鎮總兵今上卽位二年以疾乞休在籍食全俸七年終於家上深惜之子廷榛先候選知縣乃官其孫熾昌兵部主事瑩舉人賜祭葬

梅曾亮曰國朝漢總督以武起家者岳公鍾琪楊公邁春是也公以布政使官總兵遇尤奇矣公軍中久坦率厭苛禮改是官未必非意所便然復定陶時專將有功亦不能無中於上官之忌云

石家傳梅曾亮撰

劉青天之名自公爲縣丞時始及宰南充縣而名已徧川中矣嘉

慶元年達州東鄉妖賊起總督檄公從軍理糧餉公見官兵屢避賊乃募鄉勇五百四十人自成一隊賊素易官兵每戰尾而笑嘗之及遇公輒敗再戰再敗賊首羅其清冉文儁頗怪異之曰此誰何竟不畏死者公覩賊出掠直衝其巢斬首千餘級賊退守方山坪坪高萬仞難仰攻賊又下木石雷轉公思出奇計遣探兵袁華諜其山後華被獲告賊曰我劉青天所使也賊始知死戰者爲劉青天因以禮待華曰藉汝報劉青天伊愛民清官我等不忍與戰但事須面稟請伊明日來坪上公次日率羅思舉赴坪賊聲礮隊接跪供酒食無敢立語者公勸之降賊曰茲事體大恐非爺所能主公慷慨自任賊許以三日覆命公乃與思舉返而東鄉已於是

日爲王三槐所破殺都統佛住羅冉二賊爲三槐要不果降此公  
第一次招撫余於道光初晤羅公於京師聞其親述者如此後見  
唐永勤所紀本與羅說合而近人書有謂羅其清舊受公恩且謂  
公拔營宵遁賊遣百餘騎禦而追思舉者皆誤也

公怒羅冉二賊之背約也必欲生擒之以思舉知方山坪徑令率  
前鋒擣賊巢而賊已先下令曰吾負劉青天此後遇劉青天不可  
戰以故望見公旗輒避去公屢逐不獲因回攻徐添德添德王三  
槐黨也陷東鄉後三槐出掠以添德守豐城寨時東鄉無官總督  
令公攝縣事公與羅思舉火藥攜入賊巢深處散線草木間而自  
揀大樹蔽其杪候賊息爇之公伏山下望火鼓而大譟賊驚起不



知所爲奪路自相殺踏崖死者無算天明公登山已無一賊覓思舉不知所往思舉竇酣眠樹上久之始徐徐下

白號賊目王學禮乃賊首徐添德之舅也公設伏擒之將因學禮以繩添德學禮亦言諸賊皆可降公請於總督率學禮詣徐添德壘並詣冷天祿王三槐王作經孫士鳳各壘嘉慶二年四月十六日也諸賊鳴礮出接供酒食公宣示招撫賊唯唯旣而曰爺雖能作主我等仍要親見大帥公許之約以十八日到大營是夕公宿賊帳中諸賊首以次擊刁斗衛公次日歸十八日王三槐等八人至紅豆梁遲疑不敢前公馳往迎之總督不見川東道李憲儀見之犒以牛酒令繳其兵八賊叩頭期三日畢繳臨行憲儀曰汝等



俱免死宜推擇同夥者預備正法諸賊出咋舌曰劉青天不能作主我等投誠無望也公知憲儀失言賊必中變令將雙廟場戰馬匿他處並設伏以待憲儀不可公更遣幕友劉星渠往諭之賊已出五千人乘夜來劫馬幸馬已匿僅焚場而去

王三槐等之初降也本信公許以不死及聞李道有預備正法之語而後意變然終不以公爲欺故各賊相約不與劉青天戰大帥因令各路兵皆張公旗公亦卸糧務專領鄉勇勦賊賊被各路兵追急亦往往反圍與公值無不敗者公率鄉勇千餘人勇首桂涵李子青麻鶴子等尤驍雄殺賊最惡賊於石壁上粉書大字曰劉青天劉青天與你無讎又無冤不識時務將我趕我若拏住你叫

你喊皇天公見而駐營卽隻身造賊壘傳語曰劉青天來賊開壘  
跪接仍不敢害公王三槐感公誠所以有第二次之降

王三槐旣被擒其黨半歸冷天祿半歸徐添德故川賊以命徐爲  
最悍而川東川西川北羣賊蟻起狡而善謀者惟冉天元數敗諸  
大帥公與之戰於渠縣大敗之追至淨邊寺中伏兵四潰公單騎  
走賊首大呼曰生擒劉青天者賞賊眾不敢施銃礮公因得脫還  
川賊之起也巴州東鄉達州通江南江諸處習邪教者尤眾然有  
子習教而父不習者有兄習教而弟不習者故賊雖突竄往來而  
經過桑梓無不歸問家事公訪知其情因駐營要害夜勦晝撫凡  
著名之賊有父兄子弟在家者遣人厚結之賊有投誠意則潛令

圖其賊首苟文耀之戕苟文明鮮文炳楊似山之殺鮮大川皆公謀也立大旗上書 皇恩浩蕩投誠免死八字令人持至賊寨前勸之復令降賊射書與所親曰見在劉青天辦理招撫我等已冠帶榮身爾等休執迷不悟空遭誅戮後悔何及賊甲轉相告語無戰心公率鄉勇乘夜攻之遂以次瓦解

鮮大川巴州人爲藍號賊首頗知兵法前隊回首後隊刃之官兵畏其死戰不敢敵其羣從鮮文炳鮮路保及僞先鋒楊似山皆勇而有謀公至巴州與知州田文煦密議厚恤鮮文炳楊似山家兩人感公恩願效死公令文炳說大川降如不可則因而刺殺之文炳乘閒言大川大川果疑文炳招楊似山入帳議殺文炳似山遂

斬大川首付文炳提潛山洞而率所親與羣賊戰鮮路保報公公  
統鄉勇援似山別令王茂才等接文炳巴州之賊從此遂盡公獻  
大川首於將軍德楞泰將軍賞贏二匹而未入奏公欲官湯似山  
亦未能似山願從公勦賊先登陷陣如楊再興之從岳武穆也次  
年三月戰於廣元之三家壩中礮死

公所降共二萬七千餘人其有業者遺歸田里無業者令爲鄉勇  
有業而願從軍者亦登鄉勇籍後立功有名者苟崇勛苟文耀李  
彬辛文李世王趙文相皆僞元帥也張登岸張登貴何成龍鞏貴  
孔傳世李世壽王敦忠傅敏德鮮其壽郭成盛皆僞總兵也伍玉  
龍羅萃然張儒萬張陽吳青陽何悠然邱高金言朗司家忠樊國



壽蘇登科牛永大苟新兒皆僞參將都司也凡三十餘人皆賞  
戴藍翎苟崇勛卽苟文通某大帥奏稱臨陣殲斃者其實非也投  
降後公爲易名曰能新屢立奇功又易名曰崇勛

嘉慶六年大功將竣公奉大府檄凡投降之賊不宜再畱營致濫  
軍需公念諸賊田廬已焚蕩驟散之勢必復爲賊將蔓延益不可  
制因不領餉而自犒之所到處富戶商人有可貸者皆給以券諭  
帖一至百餘里慨然響應以故事平後公之逋負不下十萬

嘉慶八年撤鄉勇之令旣下公所率尙一千二百餘名皆降賊經  
百戰者也其中桀驁無歸者潛萌異志天陰道蒲藍翎弁海察督  
促過急八月十六日圍於南江縣之長江場戕海察叛去者五百

餘人公方飯於廢寺中聞之召未去之七百人立而諭之眾跪泣曰從大人血戰數年恩如父子一旦捨去殊不忍言已放聲哭公亦泣下曰此國家功令非我甘捨汝等汝等歸爲良民勝於從我也幕友唐永勤飛騎追二十餘里招五百人還公一一安慰之住三日從容遣散公幕中多奇士劉星渠唐永勤其最著者

公之莅登州鎮也以蓬萊閣爲防海要地自宋代以來久廢不修倡議修所屬紳民各踴躍醵金三萬餘時但爲蓬萊閣未及大成殿也需巨柱四不時得將遣人浮海購諸關東黃縣有富人丁樹蘭者家治屋取大木於勞山召工師卽山成之候海潮至由海而轉於黃忽海風大作漂其五入登登人歡呼以聞公量其周徑

國朝書目卷之三十一  
惟一柱不合然不知爲誰家物也分令張示傳知失柱家予以值  
逾日丁樹蘭至不受值而蠲其柱於是用四畱一以待他用閣工  
既竣贏金萬遂議新大成殿殿折而一柱朽圻其丈尺正合所畱  
之柱遠近謠傳以爲海神獻柱云

右書事蔣湘南撰

嘉慶三年四川賊首王三槐俘至京 廷訊時供言官徇民反  
上曰四川一省官皆不善耶對曰惟有劉青天一人烈青天者南  
充知縣劉清也由貴州拔貢生令於蜀得民心凡教匪所至清輒  
身入其營諭降賊皆不加害當是時劉青天之名聞天下初嘉慶  
元年宜縣督四川時使清招撫王三槐三槐隨清至宜縣營約率

所部出降然實詭覘虛實無降意還營復叛二年清復至羅其清營其清故爲清部民德清清望之卽大哭羅其清亦哭卽去所服白袍請罪蓋白蓮教衣白也畱清宿其營奉牛酒聽約束甚恭復遣帳下導清徧入徐冉王冷各賊營皆開壘列隊迎送如禮惟孫士鳳蟒服翎冠踞座清望之拱手亦卽下座東西抗禮語多桀驁然亦終不害清翌日清爲檄使鄉勇羅思舉持諭羅其清其清恃其眾終無降意及三年勒保攻王三槐於安樂坪數日不下策無所出乃復令清赴賊營招撫時清已擢兵備道矣三槐恃前此出入大營無忌約重質始出勒保乃令前隨劉清至賊營之貢生劉星渠及都司某質賊營三槐乃詣軍門勒保俘報大捷劉星渠亦



乘亂眾中逃出惟都司某被殺清前後招降川東賊二萬餘散遣歸農然清不惟撫賊有恩其戰賊亦最力其所練鄉勇亦最敢死嘗破羅其清冉文儔於方山坪破王三槐於巴州江口轉戰川東數載與各賊大小百十戰斬獲萬計見奏牘者僅十之二三入營撫賊出營殺賊往返虎狼之穴如慈母訓撻嬰兒蓋史冊所希有也嘉慶四年魁倫代勒保爲總督冉天元渡嘉陵江大猖獗劉清稟請防守潼河魁倫反盡撤沿河兵勇入城自衛及賊渡潼委罪於清 上素知清不之罪也以其廉介 命總理達州軍餉達州知州劉加琦詭報河運爲陸運冒餉巨萬勒保奏其與劉清齊名川民稱二劉擢加琦知綏定府清先後勦撫川賊勞烈甚著事平擢

四川按察使勒保劾清民社有餘方面不足改山東鹽運使嘉慶十八年河南滑縣蠢動山東曹州賊應之巡撫同興不敢發兵清力爭三日始從其請卽以清將兵承平日久兵習宴安步行四五十里卽足腫清乃自躡草屨先之日行八九十里士卒皆感動卽首請清騎馬誓以死殺賊時賊皆烏合清身先士卒衝鋒陷陣所向披靡一戰於定陶之髡山再戰於韓家廟三戰於扈家集山東賊先後破斬殆盡時總兵陳某反率眾在後爲清策應云事平授山東布政使清不合於大吏又不耐簿書錢穀自奏請改武職於是改授登萊鎮總兵論者謂清以書生而將兵以循吏而殺賊以方面而改武有國士風道光初卒惜未見其行狀

古今圖書集成

右記魏源撰

三

國朝耆獻類徵初編卷三百十五目錄

將帥五十五

倪起蛟

慶廉

蕭昌

陳夢熊

雷仁

祿成

顧隆武

賽冲阿

宗室晉昌

國朝耆獻類徵初編卷三百十五目錄



陽春三月美香不流  
卷三十一

十

國朝耆獻類徵初編卷三百十五

通奉大夫前署江西巡撫江西布政使司布政使湘陰李桓輯  
將帥五十五

倪起蛟

倪起蛟浙江鎮海人由武舉揀選千總分發本省嘉慶九年補溫  
州鎮中營千總旋署黃巖右營守備隨浙江提督李長庚赴臺灣  
剿蔡牽十一年舟師追賊風大作泊鹿耳門賊船於口門向背排  
列爲內外抗禦之計風息官兵自口內攻出會起蛟等偕南汕北  
汕舟師四面駛集賊船亂乘勢攻擊斬馘甚多又於張坑及返埕  
等洋面獲賊黨及洋匪陳煩等十二年隨黃巖鎮總兵童鎮陞生

擒盜匪劉泳等於南漁外洋十三年隨童鎮陞追捕盜匪張阿治  
獲匪黨陳角等於金門洋擒郭英等於披山洋復隨水師提督張  
見陞追剿蔡牽自汕尾望見匪船奮前迎擊焚燬賊船生擒賊目  
多名焚溺無算是年擢補玉環營守備尋獲盜金昌祥等於滿山  
洋十五年署温州鎮中營遊擊十六年署黃巖鎮營遊擊十七年  
補温州鎮左營遊擊十八年調中營遊擊旋署乍浦營參將十九  
年總督汪志伊以起蛟才長技優緝捕向前具疏保舉二十三年  
署玉環營參將二十四年補江南吳淞營參將二十五年調川沙  
營參將旋擢京口協副將道光元年署壽春鎮總兵兩江總督孫  
玉庭疏稱起蛟歷任水師在洋面先後獲盜甚多並赴閩省追捕

獲蔡逆渡臺匪黨游升副將本年三月委署壽春鎮總兵統率巡防辦理裕如該員明習水務訓練有方堪勝水師總兵之任奏入得旨授海壇鎮總兵七年卒

右 國史館本傳





慶廉

慶廉伊爾根覺羅氏滿洲鑲白旗人嘉慶四年由拜唐阿授護軍校洊升副護軍參領十一年揀發江南以參將用十二年補鎮江營參將十三年調撫標中軍參將十八年擢督標中軍副將二十年於安徽和州地方緝獲散布逆帖人犯嚴士隴究出賊渠方榮升並夥匪均寘之法 旨加總兵銜並 賞戴花翎二十一年授甘肅西甯鎮總兵官道光二年調涼州副都統五年授烏什辦事大臣六年七月奏偵聞喀什噶爾回匪不靖八月奏添官兵收糧供軍並畱兵防守九月道路不通一面飛咨伊犁將軍酌發精銳赴援仍傳諭烏什回眾務各安靜勿因調動官兵致生疑惑疏入

諭曰烏什回戶係由各城移駐慶廉須不露聲色加意防範並偵探各路軍情隨時馳奏八月奏烏什距阿克蘇甚近西南各卡倫有通喀什噶爾要路迤北山內俱係布魯特游牧近聞逆裔有取烏什之信該處偏僻孤城腹背受敵在城官兵不滿三百勢難抵禦請添派官兵速赴烏什截堵又奏烏什舊貯糧石見供軍需至本年新禾不必循照舊例於九十月收納入倉飭令成熟後隨時碾收又請將烏魯木齊巴里坤撤防官兵以備更替防守均從之九月奏設臺站拏獲回匪十月賊匪竄入烏什焚燬軍臺當卽帶兵截堵賊眾逃竄出境所有被燬之處一律修整並安設臺站以資防護巡緝奏入 上嘉其調度合宜又奏烏什奎巴克庫曲

爾二回莊糾眾將往從逆經訪明截堵拏獲並在臺音爾等同莊查出附逆回匪治如律其各城投誠回眾仰體 皇仁妥爲安插仍出示曉諭使知順逆兩途有所勸懲 上躉之十月奏設馬匹十一月因庫圖魯克滋事經揚威將軍長齡劾參先是烏什回子逸失馬匹慶廉疑爲小布魯特偷竊將噶爾察庫圖魯克兄弟傳問囹禁釋放後復檄傳該布魯特比前赴大營因其託病未到派令木薩往查致庫圖魯克心懷疑懼拒傷派查之員釀成事端命撤任降爲二等待衛七年<sup>閏</sup>奏上 諭曰慶廉辦理不善咎無可辭見又患病不勝辦事大臣之任著卽撤回交部議處念其數月以來籌辦防守等事尙爲出力仍令前赴大營交長齡差遣以觀



後效尋議降三級調用上加恩降爲二等侍衛七年閏五月授烏什幫辦大臣旋經長齡陳奏以慶廉病尙未痊請於押解逆犯阿里雅進京之便飭令隨同護送九月到京仍在二等侍衛上行走八年卒

右 國史館本傳

蕭昌

蕭昌漢軍鑲藍旗人乾隆四十七年由領催補驍騎校五十一年補印務章京五十五年四月擢副參領九月補公中佐領嘉慶十一年授參領十六年補印務參領俱仍兼公中佐領十七年二月授正紅旗漢軍副都統六月調廣州副都統十八年九月偕將軍本智等會奏鑲藍旗滿洲甲兵和全抱養民人趙權之子趙添祿爲嗣捏名全恆冒領錢糧挑補馬甲全恆向不知情因趙權向和全索幫銀米爭鬧始將過繼情由私告全恆經全恆赴旗首訴將和全全恆馬甲均革退審訊和全擬罪如律仍令全恆歸宗並於和全名下著追所領銀米疏入下部覈議奏明和全冒支錢糧數

目分別辦理十月又奏正白旗滿洲甲兵恩特賀壽殺伊母趙氏  
將恩特賀依律凌遲處死報 聞十九年以副都統年班來京隨  
帶驍騎校興亮攜帶鴉片煙偷渡關津經步軍統領衙門查出十  
餘斤之多 上責昌失於查察下部嚴議卽行開缺尋議上降三  
級調用二十五年 命軍機大臣行查吏兵刑三部將未復原官  
人員緣事原案摘敘簡明事由繕單呈 覽昌未准開復道光八  
年卒子廷玉門干總

右 國史館本傳

陳夢熊

陳夢熊福建侯官人由行伍游升千總嘉慶元年遊擊曾攀鶴在洋遇盜淹斃夢熊等救護不力經水師提督哈當阿奏參革職畱任十年升臺灣水師右營守備十二年粵東洋匪朱瀆滋擾夥黨分竄閩省柑桔洋面夢熊隨提督張見升環攻轟斃賊首潮州八生擒賊匪張之勝等六十八名奪獲器械無算十三年正月在雞母澳外洋追捕朱逆分竄匪船夢熊射盜首方台立斃並擒獲夥匪二十九名得旨交部議敘三月超擢臺灣水師左營遊擊四月追剿艇匪於懸鐘外洋夢熊射倒賊目數名顛骨中破傷仍擊沈盜船一獲盜船一生擒匪犯葉兩等三十名餘船遁回粵洋閩



浙總督阿林保奏入下部議敘閏五月夢熊偕署總兵官周國泰等追剿蔡牽朱瀆幫船於宮仔等處洋面燒斃盜匪多名生擒賊目三十一名經阿林保上其功 諭曰遊擊陳夢熊首先攏近賊船得受多傷尙能親督弁兵生擒賊目實爲勇往可嘉著加恩遇有參將缺出先行補用賞戴花翎用昭優獎十四年崇武外洋有朱渥等匪船越竄夢熊偕定海守備官印方等擊沈盜船一撈獲盜犯九名生擒匪犯二十五名五月補銅山營參將六月署浙江温州鎮總兵官十五年署金門鎮總兵官先後擊獲盜首陳丕洪天陳墨林助黃實等並夥犯數百名奪獲船礮器械無算十七年升澎湖協副將二十年擢浙江黃巖鎮總兵官二十一年六月因

病呈請開缺九月病痊二十二年復署温州鎮總兵官二十三年授定海鎮總兵官道光三年升廣東水師提督五年命來京另候簡用六年以原品休致八年卒

右 國史館本傳

國朝典章類考卷一百一十五

十一

雷仁

雷仁甘肅甯朔人乾隆三十七年四月由行伍隨護軍統領明亮出師金川十一月進攻眞登梅列十二月奪噶察丹嘉礪寨三十八年二月進剿當噶爾拉連克礪卡十月克得布甲拉約一帶山梁十一月奪取河南之達什思巴爾河北之扎覺木各礪寨直抵僧格宗克之補甯夏洪廣營經制外委三十九年二月由墨壘溝取道克馬奈卡卡角三月改攻駱駝溝疊有殲擒仁在事有功超擢湖南九谿營千總 賞戴藍翎四十一年克噶拉依賊巢生擒逆酋索諾木大小金川蕩平署鎮算鎮標右營守備四十六年三月甘肅撒拉爾逆回蘇四十三糾眾滋擾據河州屯華林山屢犯

蘭州城仁隨欽差大臣海蘭察帥師進剿五月官軍分左右翼合力夾攻賊驚竄復從龍尾山踰溝襲取之賊傾巢出拒我兵奮力兜擒賊大敗閏五月設伏華林山西南越濠截擊奪卡四賊堅守爲負岫計我師由五泉山進發直撲大卡盡殲其眾六月乘勝進攻賊營燬其巢賊遁華林寺官兵偪寺立柵以截其奔竄之路賊大潰殲蘇四十三於陣事平論功升陝西提標右營守備九月升延綏鎮孤山營都司五十三年升鞏昌營遊擊五十七年廓爾喀賊匪擾後藏經陝甘總督勒保檄赴青海口外安設臺站五十八年將軍福康安以仁往來東西兩路臺站並督運軍需火藥不辭勞瘁奏請獎勵疏入 命以應升之缺升用尋升蘭州城守營參



將嘉慶元年川陝楚三省教匪不靖陝西安康境之青山溝一帶  
賊匪屯聚仁帶領兵勇分投進剿獲賊首宋之仁吳漢東並俘賊  
無算越日別攻小壩子賊卡躡蹤追捕賊眾於因連橋岸排列槍  
矛恃險抗拒官兵潛於下游躡淺渡河翻越山梁抄出賊後併力  
攻擊賊遁大敗其眾捷入得 旨賞戴花翎以應升之缺升用二  
年正月巴州通江各賊匪意圖竄入東鄉我兵分堵魯家塢黃泥  
嘴三登坡等處扼其要路二月賊黨復聚周家河梁家崖接引通  
江賊匪仁偕遊擊王相龍謝開先各領勁旅由後河前進與重慶  
鎮總兵百祥兵會直趨王家寨併力追擊殄其眾四月賊眾分屯  
重石子香鐘坪據險設卡以爲障蔽我軍由古隘口進發合力鏖

戰敗走之五月克方山坪七月賊匪分率醜類一由蓋頂山一由  
金華寨兩路衝壓我兵設伏以待乘機突起槍箭並發殲賊無算  
仁復領兵潛繞賊後乘勢迎擊大破之是月升四川阜和協副將  
八月進取氈帽山奪卡十三偵聞巴州白號首逆羅其清通江藍  
號首逆冉文儔等與東鄉白號首逆王三槐合仁由長灘河三溪  
口一路搜勦殲擒甚眾十二月王三槐等退屯板橋場天華山等  
處官兵奮勇衝擊進攻天華山賊眾抵死抗拒仁偕參將王清弼  
督兵連環轟擊殲賊三百三年二月王三槐等復協同白巖寺瓦  
鐵寺兩股賊匪盤踞臨江市九龍山地方我兵由彈子壩進攻賊  
聞風奔逸復由豆坪寺偵蹤兜勦敗之於固軍壩三月王逆復興

達州青號首逆徐添德等由白沙場竄蚊蟲溪我師從下流三匯一帶設法堵截尋偵得賊眾由白山寺分股直趨永興場有窺伺渠縣之勢仁進兵插旗山奮力抄殺奪卡五殲賊五百賊敗走復於土溪場一路進擾仁帥師從草街子繞出賊前扼要堵禦官軍由土城埡大神山兩路攻撲大敗之四月賊走蓋茶寺大軍由木寨子進攻仁繞至梁灣河互相夾擊殲賊二千俘賊三百五十四人五月餘匪由杜市街竄大竹境橫互五六十里分夥屯聚仁由渠縣之卷峒門直趨大竹帶兵迎勦盡殲其黨五年調廣西平樂協副將仍畱川省軍營七年歸化汛界外夷人與漢民陳奇等爭界起釁在峩眉縣屬之園木溝乘機滋擾仁帶兵前往彈壓夷目

悔罪乞命飭令回巢陳奇等治如律九年正月升重慶鎮總兵官  
十月經成都將軍德楞泰檄赴太平後坪至龍灘河三十九處督  
搜川陝零匪十一月偵知百里荒一路逸匪向黃官壩北竄我兵  
四面圍截敗賊於化龍山十年復於紅池壩一路偵蹤抄截餘匪  
殲戮無遺十一年丁父憂十二年因前在四川總兵任內添置軍  
裝率照前任濫支營員廉俸銀兩事覺調赴川省質訊讞定奪職  
遣戍伊犁十四年二月釋回十月 諭曰本年朕五旬萬壽閭澤  
覃敷所有參革各員特令開單進呈朕詳覈案由雷仁在重慶鎮  
總兵任內因冒支營員廉俸革職發遣旋經釋回伊屢曾出兵打  
仗受傷著有微勞著加恩以營千總補用十五年補甯夏鎮右營



千總十七年以疾告休道光八年卒

右 國史館本傳





祿成

祿成赫舍里氏蒙古正紅旗人西安駐防嘉慶元年由委署前鋒校隨西安將軍宗室恆瑞勦湖北邪匪二年正月升驍騎校擊賊談家岡有功 賞戴藍翎四月賊分竄陝西商南山陽一帶祿成隨恆瑞馳赴山陽進至周家河賊退走山梁祿成偕防禦扎勒杭阿等仰攻追踰數山擒斬七百餘人聞賊首王廷詔等將犯山陽縣城馳回磨溝口遇賊於十里鋪擊退之祿成受矛傷 賞巴圖魯名號五月升防禦十月遷佐領十二月升協領八年遷山東德州城守尉十四年擢熊岳副都統十六年復州民人呈訴荒歉卽親赴奉天告知將軍府尹借給口糧 上嘉其關心民瘼十七年

朝鮮國有土賊嘯聚據城劫掠該國與鳳凰城邊界接壤僅隔一江 命祿成前往督率弁兵嚴密巡防十八年官兵征勦河南滑縣邪匪祿成由驛奏請帶領盛京官兵前往軍營 諭曰祿成係熊岳副都統既經該將軍和瑛派出照料所過之兵自當妥爲辦理不得瀆請前赴軍營伊卽欲奏請或申明和瑛轉奏或具摺差人呈遞乃竟由驛具奏且又欲帶領盛京官兵前往甚屬非是如當用盛京官兵朕必豫爲酌量調用豈待伊奏請祿成甚屬冒昧不曉事體除交部議處外仍嚴加申飭祿成人本糊塗且又好事不必令其照料所過之兵卽逐回原任尋議降四級調用上加恩改爲畱任二十一年調吉林副都統二十三年擢綏遠城將軍

二十四年奏駐防兵丁拴養馬匹每年出青時存城二百匹以備  
差操見因派撥官兵赴大青山後設卡巡緝存城馬匹不敷應用  
請添馬一百匹 從之二十五年奏沙拉穆楞地畝請由喇嘛自  
行交收經戶部議駁 諭曰吉林開墾地畝由喇嘛自行收取經  
戶部咨駁有案此次該將軍等復稱該喇嘛情願自行交收不必  
官爲經理是啟私相盜賣之弊且恐招集多人滋生事端所奏不  
准行祿成交部察議先是民人被眾搶劫因盤獲形跡可疑之達  
都提訊吉克密特指稱卽係同夥逸犯達起遂請照夥眾搶劫爲  
首擬以絞候嗣審係挾嫌誣扳 上以其草率定讞下部議處尋  
議降三級調用 上加恩改爲畱任道光二年調黑龍江將軍八

年緣派兵草率及交站牧養馬匹變價並家人徐添桂擾累商民  
命吏部尙書文孚刑部侍郎英瑞前往查訊鞠實奏請革職研審  
諭曰黑龍江將軍祿成於上年派兵時並不親赴公所考驗復於  
派定後任意更換數人且將馬匹發交站丁餽養並交給馬匹代  
爲變價又不能約束家丁致有短發物價情弊祿成著卽革職並  
著文孚等將伊任所貲財什物一槩嚴密查封候旨施行斷不准  
令其隱匿偷漏卽提同全案人證嚴加審訊務得確情據實具奏  
不可稍爲含混尋經查出徐添桂於驅逐流民案內指撞銀兩等  
情祿成於取供後自戕 諭曰此案祿成所供各款若就見在情  
節而論其挑派出征官兵陸續更易數名祇係聽受阿勒精阿等



懇求並無賄囑情弊交站養馬變價亦祇見小圖利其家人徐添桂詐騙亦非伊自行勒索雖有應得之咎何至於取供後遽爾輕生恐查訊各情尙有不實不盡見在祿成業已身故正可向其家人徐添桂及案內人證逐細嚴究並須加以開導勿再代爲隱飾期得實情以成信讞文孚等覆奏祿成實係忿悔交加自尋短見並無別項情弊 諭曰此案祿成於取供後自戕身死據文孚等復向伊家人徐添桂及被累之流民賈錦義撤退之兵丁諾們濟爾噶勒等隔別訊問反覆開導均堅執原供不移是尙無不實不盡之處祿成業經身故所有查封家產卽行發還交伊親屬具領姪貴當阿一品廕生

右 國史館本傳

碩隆武

碩隆武黃郭羅特氏蒙古正紅旗人駐防伊犁嘉慶七年由總催補驍騎校洊升本旗協領二十一年 賞副都統銜 命爲伊犁領隊大臣道光六年六月回部逆裔張格爾糾約安集延布魯特等夷人入卡滋事圍喀什噶爾城參贊大臣慶祥咨調伊犁官兵策應將軍長齡令碩隆武及領隊大臣祥雲保帶兵二千由冰嶺馳赴事 聞 諭碩隆武等沿途偵探酌量兵力如可迅速救援各城卽著前往如必須厚集兵力卽在阿克蘇防堵俟大兵雲集會合前進七月張逆陷喀什噶爾葉爾羌等四城犯阿克蘇南境我兵敗之於渾巴什河賊竄回葉爾羌餘黨屯洋阿里克阿克蘇

辦事大臣長清令碩隆武率兵九百分段堵禦先是以碩隆武帶兵行走遲延。命長清查明奏參十月長清奏言碩隆武帶兵分起行走因冰嶺南五臺路徑極險值陰雨過多山徑尤滑日行祇三四十里甫達北路又遇溝河漲發阻滯五六日以致遲延。命免其議處奮勉圖功以贖前愆七年正月揚威將軍大學士長齡整旅進討自樹窩子取路至大河拐張逆遣其黨乘夜劫營我兵擊敗之偵知賊眾五萬於洋阿爾巴特迎拒遂鼓眾前行賊悉眾陳沙岡上長齡分軍爲三令參贊大臣楊遇春率碩隆武等擊其左三路抄截槍箭所至賊勢披靡逐北三十餘里盡殲其眾進至沙布都爾莊賊馬步十餘萬排列莊外長齡令步兵居前碩隆武

等領馬隊繼之前鋒與賊鏖戰逾時短刃相接馬隊潛由左右抄擊截賊眾爲數段賊大潰捷奏得 旨嘉獎二月隨提督楊芳再敗賊於阿瓦巴特直抵喀什噶爾復隨楊遇春奪據東北要隘官兵合力圍攻遂復其城長齡等以碩隆武奮勉出力入奏 諭曰伊犁領隊大臣碩隆武因上年帶領官兵行走遲緩本應革職治罪從寬責令圖功自贖此次隨同出力功過僅足相抵無庸給予議敘八年正月大兵生擒張逆於喀爾鐵蓋山西陞蕩平二月碩隆武領伊犁馬兵凱撤回營六月卒子圖克唐阿見任伊犁防禦

右 國史館本傳



圖書集成醫部全錄

卷

賽沖阿

賽沖阿赫舍里氏滿洲正黃旗人乾隆四十年閏十月由藍翎長  
挑十五善射十二月襲雲騎尉世職四十六年授健銳營委署前  
鋒參領四十七年升副前鋒參領五十一年升前鋒參領五十二  
年七月聖湖逆匪林爽文滋事派隨將軍福康安往剿十二月攻  
克大埔尾大埔林各莊連夜進攻斗六門 賞斐靈巴圖魯名號  
臺灣平列後三十功臣中繪像紫光閣 命儒臣製贊五十六年  
授委署翼長五十七年升翼長五十九年擢吉林副都統嘉慶二  
年五月調三姓副都統七月以川楚教匪滋事 命領吉林官兵  
赴軍營協剿十月抵將軍明亮護軍統領德楞額泰軍營時張漢潮

張世龍張世虎李潮張世爵阮學明等股匪繼至平利縣之曾家壩賽沖阿從德楞泰抄擊殲獲多名又敗之於大甯縣之黑虎廟箭斃張世虎賊分股狂奔連敗之於織子坪周家壩白沔峽等處均得 旨嘉獎 賞玉鞞大小荷包十二月追勦齊王氏姚之富李全王廷詔張漢潮等股至甯羌州之羅村壩賽沖阿以吉林馬兵衝入賊隊往來擊射殲斃甚夥三年正月破襄陽白號首逆高均德於洋縣之金水鋪旋復躡賊至安子溝賊乘夜折回偷撲營卡賽沖阿與總兵達音泰帶兵從卡內躍出併力下壓殺賊千餘二月高逆與齊王氏姚之富合擾安康界官兵進至判官嶺賊於溝內以四五百人誘敵復於林內豫伏數千人併力抗拒賽沖阿

率先衝壓敗之擒賊目馮大甲朱錫並射斃紅衣賊目二名三月  
齊王氏姚之富東竄山陽之石河鋪明亮德楞泰由大路進剿賽  
冲阿馳至壩店截擊遂與明亮德楞泰等三面夾攻至鄖西之三  
岔河擒賊目王如美朱正聲等齊王氏姚之富均投崖斃餘匪擒  
斬淨盡捷 聞 賞金鑲松石盒等物四月迎剿高均德股匪於  
華州之高塘五月敗之於洋縣之茅坪又敗之於關西溝六月賊  
遁入川境時阮正通龍紹周龔建徐萬富唐大信等股屯踞南江  
之長池壩高逆與合賽冲阿隨德楞泰沿途追剿各賊俱奔至渠  
縣之大神山又與通江藍號首逆冉文儔合七月攻克大神山賊  
巢賊眾竄至營山縣箕山據各險隘與巴州白號首逆羅其清互

爲聲援九月隨德楞泰分路進攻奪賊卡七賊寨六各股匪均潰  
直攻箕山賊巢克之羅其清退踞大鵬山十月攻克大鵬山賊復  
退踞青觀山十二月再克青觀山賊眾勦殺無遺擒羅其清及其  
子永福弟其秀其書冉文儁於攻破箕山時遁通江之麻壩寨移  
師勦之賊以除夕玩不設備賽冲阿隨德楞泰連夜進攻擒文儁  
及苟文玉等四年四月敗徐添德股匪於旗桿山六月敗張添倫  
股匪於修溪壩七月偵知線號龔文玉股匪屯踞夔州交界之八  
石坪與德楞泰分路進攻立破賊寨追至楚省竹谿之大禾田擒  
文玉及其家屬十月擊高家營股匪於大市川陣斃偽元帥曹明  
魁擒首逆高均德及其叔高成傑偽元帥王臨高偽先鋒閻慎卿



閻慎雄秦學順等又於大安邦截剿張士虎股匪擒傳教首逆劉  
學仁並殲士虎十一月殲白號賊首張金魁於空水河擒僞總兵  
符曰明僞先鋒王佐魁及耿向榮等於野人村十二月追剿苟文  
明鮮大川股匪於貓兒梁馬家營等處五年正月白號高家營青  
號戴家營各股由陝西竄入甘境隨德楞泰馳赴秦州會剿時藍  
號首逆冉添元合黃號徐萬富青號汪瀛線號陳得俸白號張子  
聰雷世旺度向瑤等乘間由定遠搶渡嘉陵江分擾南部鹽亭西  
充各縣境復隨德楞泰回川剿之二月抵江油之新店賊分四路  
馬步各數千迎敵我軍亦分路並進乘勝衝入賊巢賽沖阿及副  
都統溫春深入被圍相持二時德楞泰往援內外夾攻圍始解生

擒陳得俸箭斃冉添恆冉添元負創逸已而添元及僞總兵鮮其  
順俱就擒疊奉 恩旨敘功三月大破賊於李家坪石門寨等處  
俘斬僞總兵李斌僞先鋒董廷華等四月賊竄渡潼河犯蓬溪縣  
圍成谷太和仁和仁義等民寨借溫春往援連戰殲斃僞元帥雷  
世旺擒僞總兵吳學周等四寨圍解又分兵疊敗賊於中江縣境  
潼河兩岸肅清六月破冉添泗王士虎於江南之長池壩擒賊日  
鮮中青旗手周才擒探馬頭趙大成甘品玉等七月破鮮大川苟  
文明於岳池之新場壩僞總兵吳羅國僞先鋒鮮文炳擒賊日苟  
文禮劉照崇旗手張文元苟文經王綬等八月擢固原提督 諭  
曰此時川省各股賊匪勢已窮蹙軍威大振著德楞泰卽令賽沖

阿速赴西鄉會同綸布春專辦高二馬五戴家營各股賊匪尋德  
楞泰奏稱臣一路官兵惟吉林索倫馬隊最爲得力吉林兵向交  
賽沖阿管帶已越三年該提督深得兵心人皆用命且東三省人  
之性情最爲忠直一經悅服終始不移昨聞賽沖阿授爲提督吉  
林兵無不同聲歡舞及聞其須赴西鄉卽紛紛至臣處環跪祈留  
實難驟離但賽沖阿係固原提督不便久畱川省一俟川省肅清  
卽當權其緩急臣德楞泰或與賽沖阿同去或先令其赴陝上  
從之九月白號賊趙麻花與老林賊王珊合夥向陝境奔竄隨德  
楞泰由江口截勦至雲陽殲趙麻花於寒池壩殲王珊於濫泥溝  
餘匪淨盡十一月偵白號楊開第藍號李炳黃號齊國謨等賊向

巴州南亞場一帶東竄馳赴觀音河截之擒李炳之子李朝坤僞  
總兵王得江陳文及楊開第之師余國明僞副元帥馮中謨尋隨  
德楞泰赴陝勦辦漢江南岸之賊德楞泰奏固原提督賽沖阿向  
隨臣一路帶兵勦賊刻下已入陝境查固原提督印信見經慶成  
署理此時慶成若將印信交出必致呼應不靈賽沖阿平日極爲  
眾心悅服打仗甚屬奮勉一易生手恐致兩無裨益請仍令隨同  
前往勦辦俾得易於集事 上如所請六年正月追勦高二於山  
陽之乾溝擒傳教賊日龔如一殲僞元帥閻慎珍賊奔竄追至鎮  
安之野豬坪高二就戮擒先鋒王儒等疊奉 旨交部議敘三月  
敗唐明萬李顯必於和岡溪追抵黃花廟賊夜撲副將李應貴遊



擊馬元營賽沖阿帶兵往援賊敗潰四月白號徐添德合藍號陳朝觀白號曾芝秀黃號樊人傑等股西竄屯踞白河縣黃石板德楞泰與賽沖阿分路進剿擒僞元帥龐士應及僞總兵古文魁蒲子榮陳添貴等首逆陳朝觀逸去尋亦就縛五月偕溫春兵至甯陝之兩河口獲徐添德樊人傑家屬添德竄紫陽之仁河新灘賽沖阿等自後蹙之添德溺斃餘黨俘馘無算上以賽沖阿奮力追剿窮賊所向實屬可嘉賞玉鞞大小荷包並下部優敘六月授西安將軍七月偕德楞泰截剿黃號賊首龍紹周於湖北之竹谿等處屢殲賊匪龍逆挈其黨折竄蜀之開萬又走楚之興房賽沖阿等帶馬隊窮追先俘其妻子復殲其兄弟紹華紹海並其大



小頭目龍逆勢蹙遂由楚入陝與蕭四餘匪合竄十月賽沖阿偕  
溫春等追至平利之岳家坪乘雨雪迷漫縱兵衝蹋陣斃龍逆全  
股賊匪殲盡蕭四餘匪一併掃除捷入 上嘉賽沖阿功績 賞  
騎都尉世職並海龍馬褂以示獎勵十一月截擊劉朝選股匪於  
東鄉之土黃壩獲其家屬十二月敗之於奉節大甯交界之桃木  
灣乾溝葛山一帶七年正月又敗之於潘字槽獲度向瑤之子度  
文正姪選正朝選與其黨十餘人逸去 諭曰賽沖阿雖未能將  
首逆生擒而全股賊匪業已剿洗無遺所辦尙好加恩交部議敘  
二月敗白號宋國品於梁山縣之柏林槽又敗青白號零匪於東  
鄉之袁家壩擒賊首席尙文時總督勒保分派將弁於大竹鄰水

一帶追勦陳自得股匪賽沖阿兵抄出賊前夾擊大破之得 旨  
嘉獎 賞玉鞞荷包尋調甯夏將軍三月偕德楞泰赴楚勦辦黃  
號樊人傑藍號蒲添寶等股匪四月敗樊逆於雞公山梁及譚家  
廟等處又攻克蒲逆於大埡口六月樊逆敗竄平口河腦賽沖阿  
由黃茅埡自上壓下樊逆投河死殲其弟人禮子樊龍樊虎八月  
蒲逆竄入老山內瓦屋溝潛匿與德楞泰分兵搜捕蒲逆墜崖斃  
盡殲餘匪九月經略額勒登保以安平一帶營卡緊要調賽沖阿  
來陝駐紮太平河防勦川楚邊境十二月大功告成 諭曰賽沖  
阿自隨征以來在諸將中勇略尤著節次殲擒首夥各逆爲數較  
多著賞加輕車都尉世職九年正月調西安將軍時零匪苟朝九

等竄匿南山德楞泰督兵搜捕賽沖阿請馳往幫辦 諭曰苟朝九之外惟閻俊烈所剿之賊人數稍多該副將部下兵丁恐形單弱德楞泰聲威素壯自無須賽沖阿前往著卽赴閻俊烈一路幫同剿捕旋因苟朝九與閻俊烈所剿之賊合賽沖阿亦卽馳赴德楞泰軍營 命嗣後有會奏事件賽沖阿列名在德楞泰之後四月以雨阻滯賊匪竄入老山官兵不能前進 諭曰官兵不能淌渡何以賊匪又能冒雨狂奔似此日復一日老師糜餉何所底止著傳旨申飭五月奏報進剿情形 諭曰連日分兵探剿不過殺賊一名生擒被擄人民十名賊匪除二百三四十人外又新擄一二百人似此裹脅日增何時始能辦竣此而不加黜罰何以肅軍

紀而勵戎行賽沖阿係西安將軍早經派令在德楞泰軍營幫辦  
勦賊且係聯銜奏事之員非專聽調遣鎮將可比其獲咎亦重賽  
沖阿前賞輕車都尉世職著降爲騎都尉並拔去花翎以示薄懲  
八月奏殲斃苟逆等餘匪潰散 賞還花翎並輕車都尉世職九  
月奏報餘氛靖蕩三省全功告蒞下部議敘十年十月調廣州將  
軍十一年正月洋盜蔡牽竄入臺灣句結嘉義鳳山兩路匪徒南  
北滋擾 命賽沖阿爲欽差大臣馳往督辦提督李長庚以下均  
受節制二月行抵廈門奏報蔡逆經官兵勦敗逃出鹿耳門李長  
庚見帶領兵船追捕 諭曰賽沖阿不諳水師調撥衝涉皆非所  
長不可希圖立功親自出洋督勦惟當於陸路一帶將南北句結



餘匪悉數殲擒絕其黨與至蔡逆逃往南路鳳山一帶或又思勾結岸匪乘閒滋擾著賽沖阿隨時留意嚴密防範三月行抵臺灣奏鳳山縣城經愛新阿收復嘉義縣鹽水港一帶之賊經許文謨痛加勦洗此時蔡逆北竄餘匪奔逃南北兩路並無成股之賊所有前調之兩粵及福州駐防兵已移咨各督撫將軍飛行停止又奏將蔡安國所帶水師兵四五百人令其隨李長庚聽候調遣並將帶到官兵派撥鳳山大穆降分防及知會許文謨如果須添兵力再行隨時撥往 上嘉其明白曉事所辦俱是尋調福州將軍諭日前因廣東地方緊要曾降旨將各該省陸路鎮協各營均受廣州將軍賽沖阿節制閩省見有勦捕事宜所有陸路鎮協各營



應如何交該將軍統轄之處著兵部議奏尋議上得旨除督撫  
提三標各有專轄外其陸路各營協均歸將軍統轄所有臺灣一  
鎮遠隔重洋自本年爲始令將軍總督巡撫及水師陸路兩提督  
輪往查閱營伍事竣奏聞七月蔡逆竄入鹿耳門洋面遊奕賽沖  
阿分飭鎮將布置堵剿四面合圍攻擊獲其船十沈其船十一擒  
賊目林略傅琛夥匪二百餘名擊斃淹斃賊匪共一千六七百名  
獲旗幟器械無算並擊翻蔡逆坐船奏入上以賽沖阿雖未出  
洋督勦一切調度得宜運籌制勝實堪嘉獎下部優敘賞翎管  
板指荷包十二年二月奏請移建鳳山縣城於舊縣興隆里從  
之四月奏臺灣水陸肅清畱防兵丁三千餘名分作三起內渡頭

起卽配船內渡二三起仍俟四五月間洋面實在安靜再統帶內  
渡 諭曰蔡逆竄入粵洋李長庚追蹤勦捕尙未就擒而朱潰一  
犯勢頗鴟張竄到粵屬廣澳洋面游奕去閩粵交界之南澳不遠  
恐其乘機竄閩窺伺臺灣著賽沖阿酌量情形如頭起征兵實已  
配船內渡自不必復行截回其二三起征兵卽應畱於臺郡分布  
防守該將軍尤不可遽行內渡須探明蔡牽就擒朱潰遠竄臺灣  
可以放心再行酌量內渡務宜妥協經理勿負委任九月奏報官  
兵勦敗朱潰於雞籠洋面得 旨嘉獎十三年正月總督阿林保  
奏蔡朱二逆均已窮蹙臺灣地方早經清謐可無須將軍大員在  
彼督辦 命賽沖阿回將軍本任三月奏近年官兵出洋捕盜每

因船身低小難於仰攻應酌量變通請將應行造補梭船十七號  
裁汰改造二丈三四尺梁頭大船八隻其應小修之善字號船屢  
經駕駛損動過多請照大修例辦理 命如所請六月福建提督  
張見陞勦捕朱潰遷延貽誤 上褫見陞職 命賽沖阿會同巡  
撫張師誠審訊論擬如律九月奏稱福州滿洲營水師旗營修械  
需費並操演賞項不敷酌議籌款生息幼丁隨營操演酌量按月  
給銀 諭曰福州駐防八旗及水師營額設軍械旣因貯存日久  
未能整齊如式准其於藩庫存貯旗營馬價內動撥銀二萬兩發  
交鹽商生息所有應行修理改造器械需用銀兩卽於此項內動  
支餘銀仍著歸還馬價原款其操賞一項亦應於息銀籌撥還額

至官兵出口買馬及尋常差使例借公項不敷盤費自應於生息項下酌量動用惟所稱幼丁隨眾操演每名每月酌給銀三錢之處殊屬取巧市惠幼丁隨眾操演預備將來編隸營伍卽技藝嫻熟亦不過量加獎賞若技藝生疎並不必加之懲責原以該幼丁係屬閒散與入伍食糧者不同今若每名每月槩予銀三錢是又爲幼丁增添錢糧恐滋冒濫此一節若不准行十四年三月調西安將軍十二月調吉林將軍十五年以局員薩音保等淨收十四年分淺餘銀兩未能查明奏參又私裁卡倫亦未能及早查出偕副都統玉衡自請交部嚴議部議降三級調用上加恩改爲降四級畱任十六年年班入 覲奏途次見逃荒民人詢係奉天所



屬岫巖復州等處款收等戶因札致吉林副都統松霖將災民暫  
且安撫請於雜項下動支銀兩先行責賑兩月適松霖奏報近有  
奉天流徙饑民潛越入境見飭各員妥爲驅逐 諭曰本年奉省  
復州等處歉收饑民流徙前賽沖阿曾奏明札致松霖於該處責  
賑妥爲安撫今松霖以流民例禁出邊飭將饑民槩行驅逐各災  
黎已離故土今復遭驅逐嚴冬互寒凍餒無依豈竟聽其輾轉溝  
壑莫爲軫恤所奏錯謬矣著松霖將各饑民照賽沖阿所奏暫爲  
安頓督同地方官查明戶口分設粥廠妥爲照料十七年正月  
賞紫禁城騎馬三月三姓副都統果勒明阿奏請三姓濩場加增  
濩餘銀兩所賞船隻官爲修理 上命賽沖阿議奏尋奏三姓濩

斤向皆送至吉林由將軍彙總辦理並無另有濫餘費用卽如官船係業經賞給該官兵之物每年黏補自不應動用官項 命照所議辦理四月 諭曰八旗生齒日繁京城各佐領下戶口日增因思東三省原係國家根本之地而吉林土膏沃衍地廣人稀聞近來柳邊外採濩山場日漸移遠其間空曠之地不下千有餘里著賽沖阿松霖查明吉林地方自柳邊外至採濩山場其間道里共有若干可將濩場界址移若干里悉數開墾自此之外所有閒曠之地計可分贍旗人若干戶一併詳細妥議具奏十一月覆奏勘得拉林東北有閒荒一處可墾五千餘晌又有東北夾信子溝一處可墾二萬餘晌該兩處距阿勒楚喀城四五十里不等恐新

駐旗人該副都統難以約束且近年吉林各處收成不豐請俟三  
五年後從容辦理又奏三道卡薩里閒荒地畝請撥補吉林官莊  
壯丁除撥給外其餘閒荒不許旗民侵占每年秋收後令該管官  
親往查勘以杜私墾 諭曰今既勘明拉林附近有可墾地二萬  
五千餘晌而三道卡薩里地方仍有閒荒可墾是該省未經墾種  
曠土甚多與其每年派人查管何如一併籌畫至拉林荒地離城  
雖有四五十里移駐旗人耕作與按期演習騎射者不同亦不必  
專在近郊若謂該處近年收成不豐此時原不能即將旗人移駐  
其一切墾荒計畝章程則須預爲籌畫不必延至三五年後推諉  
時日著該將軍卽檢查乾隆年間移駐舊案先期試墾應辦各事

宜先行籌議十八年四月 以都將軍九月教匪李文成據滑縣  
滋事十一月官軍敗賊於司寨李文成伏誅大兵旋復滑縣盡殲  
賊眾十九年正月 諭曰此次調赴軍營之吉林官兵將司寨地  
方賊匪殲除及至滑縣攻城殺賊實屬奮勇可嘉皆由該將軍副  
都統平日訓練有方所致賽冲阿雖經調赴成都但離吉林未久  
著一並交部議敘是月陝西南山木廂匪徒經官兵勦敗竄至洋  
縣滋擾賽冲阿以洋縣與川省通江接界檄調官兵二千名赴陝  
省會勦並續派兵五百名交總兵桂涵分撥要隘防堵奏入 諭  
曰賽冲阿既入陝境無論何股賊匪探知相距不遠卽迅速前往  
捕滅切勿得一勝仗任聽餘匪竄匿又滋裹脅尋奏稱行抵木竹



壩賊匪由老漁壩竄至督兵進剿擒青號僞元帥楊榮僞先鋒孫  
應才李定興及大小頭目十五名殲獲賊匪五百名又於太陽灘  
剿殺賊匪四十餘名二月在漢江北岸擒紅號首逆羅懷又奏報  
剿除青藍紅綠四號股匪陣斃首逆苗小一 上以其保障東南  
加封二等男 賞戴雙眼花翎三月奏報南山老林內外漢江南  
北兩岸全行肅清四月涼山生番出巢焚掠 命馳赴督辦五月  
奏稱官兵殲斃爲首兇夷畢格等夷匪旋平得 旨嘉獎二十一  
年正月成都兵丁孫占鼇等因挾私忿糾眾逞兇乘夜赴府縣衙  
署縱火賽冲阿聞知持以鎮定分派兵役看守倉庫監獄軍裝火  
藥次日城門照常啟閉市廛安堵先後將首夥十六犯全數拏獲

賽沖阿自請嚴議 上加恩寬免三月廓爾喀與披楞交兵稟請  
救援駐藏大臣奏 聞 命賽沖阿爲欽差大臣帶兵赴藏 諭  
曰命汝帶兵至藏總爲嚴防邊界斷勿協助廓爾喀若披楞擾及  
藏地邊界必應痛勦驅逐切勿貪功窮追若廓爾喀王子情急本  
身來投亦可收畱妥爲安插嚴堵披楞勿令闖入若兩處講和罷  
兵汝卽回成都也並 諭至藏時以奉旨詢問達賴喇嘛呼畢勒  
罕爲名切勿宣露帶兵衛邊之意四月奏稱廓爾喀披楞交兵瀆  
稟先行持檄詰責隨帶兵前越邊境脅以兵威 諭曰所奏實屬  
妄誕紕繆之至此次賽沖阿帶兵赴藏原爲嚴防邊界並令該將  
軍到藏以奉旨詢問達賴喇嘛呼畢勒罕爲名不可稍露風聲乃

賽沖阿竟不欽遵辦理輒首先出名將讓路阻貢之詞分馳二檄請責廓爾喀披楞其詰責廓爾喀之詞已屬糊塗至詰責披楞其謬妄更出情理之外如披楞接到檄諭該國王以讓路阻貢之言係廓爾喀捏稟懇請天朝發兵其將何以應之若恃其險遠竟承認伊向廓爾喀曾有是言又豈能因此一言卽大興師旅窮兵黷武乎至廓爾喀屢次投稟請兵請賞今接到檄文卽回稟以前次屢稟駐藏大臣未蒙轉奏今聞大皇帝特差將軍帶兵前來感恩歡喜其讓路阻貢之言實係披楞所說懇請天朝發兵萬里遠征國家何爲出此若如賽沖阿所言我兵兩路進擣陽布檄飭披楞攻其南面則廓爾喀臣順多年不恤其難轉率同外夷夾攻其地

堂堂天朝大體安在賽沖阿此舉首鼠兩端進退無據看來伊因朕派令赴藏妄起貪功之念欲構成邊釁以邀爵賞而置國家大局於不顧是誠何心太不度德量力矣況如此重大軍情不待奏聞先行馳檄專擅之咎亦無可辭賽沖阿著傳旨嚴行申飭先拔去雙眼花翎降爲二品頂帶九月奏稱廓爾喀王專遣噶箕恭進表貢披楞部長頭人遵檄稟覆見在兩國講和邊界清謐遵旨撤兵回川 上加恩賞還雙眼花翎頭品頂帶二十二年六月授正白旗漢軍都統 命在御前大臣上學習行走七月授鑲黃旗領侍衛內大臣二十三年八月頭等待衛扎蘭保呈控琿春協領扎呼岱私出小票向入海民人索贓於密扎妥起地方招引民人



蓋房墾地又於頭道溝等處令民人設園種蒔並折磨兵丁等款命賽沖阿馳往審訊尋訊明扎蘭保因勒索不遂砌款控告其所控扎呼岱招引民人蓋房墾地設園種蒔等款屬虛惟因公科斂役使兵丁訊實各按律問擬有差九月授盛京將軍十一月奏請盛京添設總管及增給佐領圖記 諭曰盛京宮殿一應事宜向係將軍兼管內務府大臣總司其事自國初以來相沿已久賽沖阿率請照熱河之例添設總管一員熱河係屬園亭與盛京宮殿規制不同該將軍此奏明係意存推諉所請俱不准行十二月奏請添設圍場官兵下部議駁 諭曰盛京圍場與木蘭歲歲臨幸者不同賽沖阿前奏未免過事鋪張其所請專設協領及關防處

官員兵丁等款著照部議不准添設二十四年九月授理藩院尙書兼鑲黃旗領侍衛內大臣正紅旗滿洲都統 御前大臣十月命管理雍和宮事務二十五年七月 賞用紫韁八月 賞加太子少保銜道光元年管理咸安宮蒙古學唐古忒學托忒學二月授西安將軍仍兼 御前大臣領侍衛內大臣三年三月奏稱西安所管營伍額存軍器因年久動用多有遺失損壞請倣照吉林槍式製造長矛鳥槍五百桿及撒袋弓箭等項俾軍器一律堅利齊整 上是之八月 萬壽聖節列十五老臣中繪圖於萬壽山之玉瀾堂 御製詩有屢膺 廟略成偉績宣威重鎮知鷹揚之句四年六月 詔來京供職閏七月授鑲藍旗蒙古都統八月授

內大臣十二月授閱兵大臣五年五月授總譜達七月授鑲黃旗  
領侍衛內大臣十二月以年老 上加恩賞乘轎六年正月管理  
健銳營事務尋 諭曰賽沖阿年逾七旬毋庸在御前大臣領侍  
衛內大臣上行走著專管旗營事務並賞給內大臣二月署鑲紅  
旗滿洲都統九月署正黃旗蒙古都統七年調正紅旗滿洲都統  
八年三月調正黃旗蒙古都統六月因病奏請開缺得 旨仍畱  
內大臣總譜達是月卒 命大阿哥前往賜奠 贈太子太師  
子謚襄勤子額圖琿原任三等待衛孫特克慎襲二等男爵緣事  
革薩克慎前任戶部員外郎曾孫清福襲二等男爵官四等待衛

右 國史館本傳





宗室晉昌

宗室晉昌正藍旗人初授三等侍衛輔國將軍乾隆五十三年襲  
鎮國公爵授散秩大臣五十九年擢正紅旗蒙古副都統嘉慶元  
年兼鑲白旗護軍統領二年正月調鑲藍旗滿洲副都統二月調  
鑲白旗滿洲副都統三月調鑲紅旗滿洲副都統兼鑲黃旗護軍  
統領三年授宗人府右宗人四年正月授內大臣三月轉左宗人  
五年三月授盛京將軍四月奉天府尹恩明赴任時失察家人烏  
春及太監馬德慶沿途需索 命偕兵部尚書傅森鞠實論如律  
旋偕傅森奏定牛莊羣塘界址以免牽混請將從前任意將羣塘  
牽混鹽廠之司庫徐瑾查辦草率之佐領恆福延福等降革有差

六年八月直隸被水成災 諭晉昌查看奉天糧價情形可以採  
買若干運往直隸酌量具奏適晉昌於未奉 旨時聞直隸被災  
卽奏奉天糧石充裕請採買接濟 上嘉之十二月奏稱撫卹外  
國遭風難夷並照嘉慶元年舊案派員護送來京 諭曰所辦殊  
未妥協此等不識國名夷人在洋遭風漂至朝鮮地方經該國由  
鳳凰城移送瀋陽晉昌面加詢問優加賞卹卽應令其仍附原船  
任其自回本國何必拘泥元年舊案護送來京朕卽位初元外藩  
朝覲者多是以飭令吉林將軍將鄂通國難民送京以便查辦本  
年例應朝貢者惟暹羅一國此次遭風夷人既詢係不識國名卽  
護送來京亦屬無益著晉昌賞給盤費仍交朝鮮國令附原船送

至本國毋致稽留七年以巡視盛京事務業已屆期列上五部侍郎銜名奏請 簡派 諭曰吉林黑龍江兩處非盛京所屬尚可令該侍郎等前往巡視至盛京係本管地方亦派令一體查察究於政體未協所有此次巡視盛京事務著派大理寺卿窩卿額去嗣後除吉林黑龍江屆五年期滿仍將該侍郎等奏派外其盛京一省屆期著該將軍奏請候朕於在京之滿漢三四品京堂內簡派八年八月因盛京高麗溝地方有匪徒偷斫樹木 命副都統策拔克往查並 命將所奉諭旨交晉昌閱看策拔克尋奏晉昌跪讀之下不勝惶悚駭異 諭曰盛京爲陪都重地既有無賴匪徒在高麗溝一帶聚集搭蓋窩鋪私斫樹木自應嚴飭各卡倫留

心查禁使奸民知所斂戢晉昌在彼有年且係盛京將軍稽察地方及各處卡倫是其專責何以平日漫無覺察一任奸民等在彼聚眾肆竊今接奉前旨僅稱惶悚駭異可見伊等於高麗溝地方偷斫木植一案竟全未聞知直待朕特降明諭始知有此事見據德瑛奏除高麗溝之外尙有韭菜園三道浪頭兩處向曾藏匿奸民此等藏奸處所晉昌均未查及以致匪徒日聚日多太覺不成事體晉昌著先傳旨申飭俟此案查明再將晉昌交議是月策拔克奏於遼陽州搜獲私伐黃松木植二千四百餘件又於興京城廠邊內查出木植甚多 諭曰見在策拔克等尙未到高麗溝一帶而遼陽興京等處查獲私斫木植已有如許之多可見此等藏



奸處所不一而足從前琳甯在將軍任內曾查出高麗溝地方有  
偷斫木植之事未將該管官員奏參已屬過於寬縱迨晉昌到任  
後亦曾分路查拏但總未嚴參究辦更覺疲軟無能以致該管各  
員日漸怠玩而奸匪等毫無畏懼晉昌係盛京將軍實難辭咎著  
交部嚴議晉昌尋派協領恆福等往查高麗溝奸民二千餘賄官  
兵得信焚窩鋪而逃捕獲十餘人事 聞祇晉昌職 諭曰晉昌  
前因其尙堪任使是以擢任將軍今到任以來於所管卡內外疊  
有偷斫木植之案其平日毫無聞見竟同木偶及經朕降旨查辦  
又復聽任屬下官員愚弄甚至官兵有營私作弊等事晉昌如此  
疲玩無能實屬孤恩溺職難勝將軍之任見已降旨將伊革職卽

著來京候旨九月奪輔國公爵以其弟晉隆承襲 賞晉昌四品  
銜在宗人府主事上行走十年 賞頭等待衛爲烏什辦事大臣  
十一年授喀什噶爾參贊大臣十二年三月授鑲黃旗漢軍副都  
統十月授烏里雅蘇臺將軍十四年三月調伊犁將軍 上以伊  
犁將軍事繁任重晉昌初肩鉅任恐於撫治機宜未能洞悉 諭  
曰伊犁地居絕域自古未入版圖我 皇考高宗純皇帝 天錫  
聖神聰明睿知成 兩朝未竟之志開二萬里之新疆北路特置  
將軍內撫各城外綏諸部兼之戍卒遣犯紛集錯處責任重大視  
內地督撫倍之蓋撫馭外藩之要道總不出乎畏威懷德然必先  
使之有可畏之威後方有可懷之德皆以實心行實政也我 皇

考五年之閒犁庭掃穴大武用揚 神威丕著各部落誠心歸命  
繼施 深仁厚澤永獲生成至今四十餘年盈甯安聚桴鼓不驚  
皆懷畏 神威久沐 深仁之明效大驗也朕承 慈眷撫治天  
下幸際熙和之時彌殷盛滿之懼曷敢稍圖安逸惟勉敬勤以求  
治耳卿派衍天潢才鍾宗族前有微過非不可赦之愆尤今寄于  
城扞大有爲之才德寬嚴並用相濟剛柔刑賞必公無過不及訓  
練營伍勿憚勤勞綏撫羣藩勿存偏袒投官先拔功勳聽訟務宜  
詳慎待同寅不卑不亢御屬吏無隱無私除莠安良綏邊和眾爲  
國家之屏翰樹奕葉之勳名雖君門有萬里之遙然瞻宇覺帝京  
之近勿孤訓辭欽哉毋忽九月又 諭曰晉昌本係八分公會賞

戴雙眼花翎前因獲咎革去公爵但見任伊犁將軍鎮撫邊陲職分較大著加恩賞戴雙眼花翎十六年四月授領侍衛內大臣八月察哈爾都統興肇奏參伊犁於進貢馬五匹備用馬四匹外多帶一百八十四匹沿途多索支應 命軍機大臣會同刑部提訊進馬之總管佐領等屬實晉昌以辦理不善下部嚴議尋議革職

上加恩改爲畱任十七年疏稱酌定屯田事宜從前八旗公租之田若仍令其通力合作伊等視公產不如私產勤惰不齊不足以專責成請將此項田一萬餘畝分給八旗俾各專心耕種如有人力不敷准其佃人耕種計畝收租下軍機大臣會同協辦大學士吏部尙書松筠議覆尋議分田各種如所請行惟佃人耕種一節



日久恐滋流弊應責令八旗閒散餘丁自行耕種既敷養贍又免遊惰松筠復奏稱前在伊犁將軍任內曾於伊犁河北岸近地築堡造屋移駐閒散壯丁按堡授田教之樹畜並令三時務農冬時操演所辦已將次第舉行費用亦有款可支無須另給 詔晉昌遵照所定章程認真妥辦以收實效十八年六月奏稱北路卡倫外有鄂羅斯向哈薩克台吉索討安集延人口派協領哈芬布前往查辦已經完結各歸部落 諭曰外夷因交易起釁自相理論係常有之事既在卡倫以外卽與中國無涉此次鄂羅斯向哈薩克台吉罕巴爾索討安集延人口晉昌得信惟當嚴飭卡倫官員加意巡查勿使別滋事端方爲鎮撫邊疆之道乃晉昌輒派協領

哈芬布前往查辦哈芬布至達蘇卡倫復因罕巴爾求懇官爲管理卽出卡倫數十里之地安設帳房摘傳鄂羅斯安集延頭目數人面爲開導令兩造公議償還之項實屬多事幸而鄂羅斯恭順彼此將財物償還安靜歸部若使剖斷之時稍有抗違情形又將如何辦理豈非自生邊釁晉昌身任將軍遇事張皇著交部議處尋議降一級調用因本有革職畱任之案請革任 上以晉昌才識拘隘不勝伊犁將軍之任革去領侍衛內大臣伊犁將軍令署理正白旗漢軍都統九月授烏魯木齊都統十九年二月復授盛京將軍八月 命偕副都統文幹履勘大凌河牧廠試墾地畝尋覆奏牧廠地在邊外距錦州廣甯義州皆二四百里旗人無力者

不能開墾有舊業者又不肯舍舊圖新見在試墾者多係內地民人包攬分種於旗人生計無益徒爲奸民牟利之藪請卽裁撤上是之十一月奏坐卡章京佐領烏爾圖私帶賊犯黃帽有出邊並商同雲騎尉色布正額捏稟防禦海凝阿患病迷失不知去向請將烏爾圖色布正額革審 諭曰黃帽有偷斫木植烏爾圖既係知情其所報海凝阿因病外出不知下落安知非卡員等夥同作弊海凝阿獨不染指致遭謀害與從前王仲漢謀死李毓昌情事相類該將軍務查海凝阿實在下落勿任稍有枉縱十二月奏海凝阿於烏爾圖私帶賊犯曾欲稟揭烏爾圖有欲行謀害之語惟烏爾圖供詞猶復狡展 上斥其寬縱二十年三月訊實烏爾

圖等挾嫌舞弊通同賊犯樊十謀害海凝阿棄屍捏稟問擬如律  
諭曰此案與王伸漢謀害李毓昌情節相似果不出朕所料可見  
聽訟必須細心設竟如晉昌初奏顛預率結使正兇漏網奇冤莫  
雪成何政體五月奏請於移居宗室內遴選族長族副學長以資  
約束 從之十一月以宗室奕讓酗酒滋事請移往吉林居住  
上責其有意推諉下部議處尋議降三級調用 上加恩改爲畱  
任二十二年二月調伊犁將軍七月晉隆緣事革輔國公爵仍  
命晉昌承襲二十五年四月以晉昌母老 召回京復授領侍衛  
內大臣五月 命在御前大臣上學習行走八月 賞紫禁城騎  
馬十月授鑲藍旗滿洲都統十二月授理藩院尙書充崇文門監



督道光元年七月調兵部尙書八月實授 御前大臣二年授盛  
京將軍三年科爾沁蒙古私招開墾晉昌查明卓力克圖王旗招  
畱民人二百五十五戶共墾地三千一百八十四畝鋪店酒局十  
六座賓圖王旗招畱民人一百三戶耕種熟地一千五百四十六  
畝鋪店酒局十二座均經竈立地界封堆所有房地請歸入原查  
民數內責令昌圖通判稽查管理毋許滋事仍於每年春融派員  
往查昌圖入社之便一體稽查 從之六年科爾沁蒙古復招民  
開墾地畝晉昌查出卓力克圖王賓圖王二旗界內新招流民五  
百七十二戶續查出卓力克圖王旗界內新招流民一百九十三  
戶奏請照例驅逐 諭曰本應照例驅逐姑念流民多係備趁謀

生此次免其究辦著該將軍等出示曉諭如再查有一戶出口卽行驅逐嚴辦七年調綏遠城將軍八年正月 上以晉昌前任盛京將軍任內失察圍場偷斃鹿窖及派員查出又未獲犯究辦因循廢弛不勝將軍之任著回京另賞差使八月卒 諭曰晉昌已襲奉恩輔國公伊應得公爵卹典著該衙門照例辦理任內一切處分悉予寬免子祥林襲不入八分鎮國公二等侍衛因晉昌任崇文門監督時有應賠銀兩扣俸尙未交完呈請於公俸內按年減半接扣經兵部奏入 上以晉昌歷任各處辦事因循不知振作命按年全行坐扣孫承熙襲不入八分輔國公

石 國史館本傳

國朝耆獻類徵初編卷三百十六目錄

將帥五十六

蕭福祿

宗室果齊斯歡

宗室伊沖阿

蘇法那

武登額

春升保

烏爾卿額

那林泰

傅廷標

張聯奎

朱承受

孫應奉

李錦麟

何占鼇

郭文魁

國朝文獻通考卷三百二十一



國朝耆獻類徵初編卷三百十六

通奉大夫前署江西巡撫江西布政使司布政使湘陰李桓輯  
將帥五十六

蕭福祿

蕭福祿甘肅河州人由行伍隨征金川拔補循化營千總乾隆四  
十六年隨征蘭州逆回殺賊受傷 賞戴藍翎四十九年隨征鹽  
茶廳底店逆回以功升松山營守備五十六年擢金塔營都司嘉  
慶元年三月預保遊擊引 見 賞換花翎時湖北教匪聶傑人  
等糾眾倡亂蔓延川陝六月陝甘總督宜縣檄福祿至商雒一帶  
隨營進剿十一月偕都司巴燕等乘雪霧攻入黃柏棚賊卡斬獲

甚眾十二月補延綬鎮標中營遊擊二年五月檄往甘肅催調撒  
拉爾回兵赴廣州將軍明亮營九月明亮由花果園追賊至草甸  
福祿率撒拉爾回兵設伏王家場山後與侍衛公惠倫等分路夾  
擊賊敗竄陳家山復偕都司馬良棟鼓勇先登自卯至未力戰不  
退大敗賊眾 賞振勇巴圖魯名號十二月賊由唐家壩至羅村  
壩將偕陝西甯羌州城福祿偕遊擊蒲尙佐等擊敗之追剿三十  
餘里三年八月張漢潮賊眾折入南江至梅湖福祿偕典史鍾尙  
綱等自上游潛渡夜斫賊營殲擒甚眾四年七月擢沙州營參將  
尋調陝西撫標城守營參將十二月賊越秦嶺竄入田峪干峪官  
兵分路截擊福祿隨欽差大臣那彥成督率策應鼓勵兵勇奮力

截殺復偕總兵凝德截其西竄之路五年正月偕侍衛江鼎等隨  
那彥成敗拔於隴山鎮三月高二馬五等賊由黑色坪拗子山至  
甘肅文縣渡河攻狼卡寨福祿偕總管親巴圖等擊敗之五月升  
甘肅莊浪協副將十一月賊復由大林坡竄入紙坊壩總督長齡  
令福祿冒雪馳往遇騎賊敗之十二月賊由廟壩向梅子壩諸處  
窺伺下隘福祿偕都司張聯魁出卡迎擊六年正月賊攻甯羌州  
之東南卡隘福祿偕總兵楊奎猷截擊先後敗賊擒首逆李裁縫  
二月賊由馬道入武關西溝長齡令於鐵鑪川邀擊福祿一夜疾  
馳百六十里伏兵林內賊至突出掩殺賊退竄登山巔負嶮力拒  
福祿激勵將士一鼓直登大破之殲擒無算得 旨嘉獎下部議

敘賊復集餘黨將由甘肅至四川龍安官兵偏之竄入胡家壩老  
林福祿率遊擊宋越等入林箐躡追不予以暇至唐家壩敗之擒  
賊首馬應祥僞元帥胡滄海三月長齡奏言陝西汧陽有悄悄會  
奸民武振關等糾眾謀逆知縣祝大澄擒獲振關賊黨仍踞武家  
半山福祿疾馳往勦陣擒首逆車舉鼎趙興宗等賊眾殄滅上  
嘉其殲擒迅速 賞總兵銜仍下部優敘時賊首冉學勝一股屯  
聚瓦房壩長齡分兵進攻福祿在前直搗賊營斬賊目四人賊眾  
大敗由兩當向秦州西竄復偕總兵楊奎猷敗之於王家河四月  
擢涼州鎮總兵會經略大臣額勒登保追賊至隴州福祿楊奎猷  
等隨長齡亦至夾擊賊於草白峪又敗之五月 命長齡回任所



統兵勇交福祿接管勦高見奇尋 諭額勒登保曰朕聞蕭福祿  
打仗尙爲奮勇惟過於鹵莽不能獨當一面前勦汧陽匪徒誅戮  
過多漫無區別見在高二餘匪若交其帶兵追勦仍恐鹵莽從事  
於教匪難民不能分別誅及無辜卽另派妥幹鎮將前往更換復  
命陝西巡撫陸有仁確訪福祿勦滅悄悄會逆匪之事據實入奏  
有仁尋以福祿所勦頗有避難被協良民倉卒駢誅覆奏 諭曰  
蕭福祿辦理粗率又復貪功波及無辜駢首就戮草菅民命豈可  
加之甄敘除不准加級外著降爲參將交額勒登保軍營差遣以  
觀後效七月福祿由廣元督兵入川八月隨四川總督勒保勦賊  
於廬家灣大敗之擒首逆冉學勝斬獲甚眾 賞副將銜九月額

勒登保檄福祿協勦高姚等賊時賊至通江由菩提天平河東西  
分竄福祿偕參將張瑗追東竄賊至黑峒溝擒首逆辛斗盡殲其  
眾十月李彬一股入廣元界將出百丈關渡河趨陝福祿偕總兵  
楊遇春等先趨百丈關賊已由柳溪竄登贊家梁復與副將陳尙  
德等馳往夾擊賊眾潰敗向恩陽河奔竄十一月追及之於劉家  
壩偕提督楊遇春副都統銜全德等兩路進擊賊勢大潰竄趙堂  
壩復偕副都統格布舍等追擊敗之於余家山餘黨數百南竄乘  
夜追勦賊避匿蒙家寨山後林箐中縱火攻之斬獲皆盡擒首逆  
再添璜得 旨嘉獎下部議敘十二月額勒登保以通南一帶尙  
有李彬張魏各匪餘黨令與護軍統領扎克塔爾等分路勦捕福

祿偕副將張瑗等於固軍壩乘夜冒雪搜剿擒賊目苟文富僞先鋒林其瞻七年正月偕參將朱槐等敗賊於椿樹坪擒僞先鋒羅清任二月偕總兵田朝棟追張魏餘匪至東鄉界屢敗之補中衛協副將三月苟文明賊眾由水磨溝遁入狹溝福祿偕扎克塔爾等擊之殲擒甚眾復偕張瑗於雙廟子設伏適賊由泥峪竄出擊敗之追奔三十餘里八年四月偕楊遇春追賊於平安寨屢有斬獲六月復同敗賊於天窩蕩獲苟文明妻子七月三省餘匪肅清福祿率甯夏西甯官兵凱撤歸營九年調陝西靜甯協副將十年授巴里坤鎮總兵旋丁生母憂十二年西甯口外黑番劫掠蒙古命甯夏將軍興奎西甯辦事大臣貢楚克扎布督兵剿捕四月興



奎等以福祿告懇隨營效力入奏 上允所請六月偕甘州提督  
百祥等剿賊於什噶干敗之追至章纏溝腦又敗之擒賊目策楞  
扎什賊竄入甘壩欲阻糧運福祿等率兵夜圍之斃賊目南拉本  
賊竄避追擊數十里擒番目尖木贊之姪才楞七月連敗賊於中  
衮牧羊丫口復出茶當溝口追之屢戰皆捷至卡哈圖河賊乘馬  
而渡福祿等於河干施大礮擊之先令馬隊於上游渡河與步隊  
夾攻賊大潰八月進擊賊於什尖里幹斬賊目窩常旦木正直抵  
沙卜浪斃賊數十刈其麥以絕賊糧乘勝攻入虹露弄賊巢賊窮  
蹙竄匿殲擒不可勝計奏入 命興奎等於竣事後覈其勞績保  
奏九月興奎奏貢楚克扎布令福祿偕百祥等掩捕番目尖木贊



人馬蹋冰夜渡有聲致尖木贊知覺逃逸 諭曰尖木贊並無叛  
逆情事貢楚克扎布輕聽人言不察虛實並因其不肯進營領賞  
益疑其反覆無常率欲乘夜往擒已爲錯誤而又怠惰不出僅委  
之百祥等任令踈縱尤屬無能著發往烏魯木齊效力贖罪百祥  
蕭福祿游棟雲七十此次帶兵勦辦賊番俱尙出力曾有旨交興  
奎等覈其勞績請旨施恩但伊四人於貢楚克扎布欲擊尖木贊  
之時雖經勸阻既派令往捕卽當密往拏獲何以被其知覺潛逃  
又不帶兵緊追實有應得之咎均毋庸再行保奏亦毋庸議處十  
三年福祿服闋補直隸宣化鎮總兵十五年二月直隸提督辭大  
烈與所轄守備盧明善結姻福祿違例作媒 命以副將降補五

月補江西南昌城守協副將十二月授湖北宜昌鎮總兵二十一年丁父憂二十三年服闋授江南狼山鎮總兵道光三年以督率所屬擒洋盜首夥百餘人得旨嘉獎下部議敘四年擢浙江提督七年總督孫爾準劾福祿閱兵所屬營員派捐辦差先是福祿巡閱温州營中營遊擊錢芳耀以供帳諸費令營員捐銀以應復以餘銀代總兵楊繼勳致餽福祿未受事爲已革千總魏大鵬及其父登庸所發上命署巡撫劉彬士秉公察訊八年三月訊明福祿實未受餽諭曰蕭福祿於總兵餽送並未收受惟各營湊銀辦差失於覺察迨魏大鵬之父魏登庸告發又不據實奏明實有應得之咎念其曾經出師著績年已就衰著以原品休致仍在

籍支食半俸八月卒 諭曰蕭福祿自乾隆年間出師金川著有  
戰績嘉慶年間洊升總兵朕御極後擢授浙江提督嗣因年老休  
致賞給半俸以養餘年茲聞溘逝殊堪惋惜所有任內一切處分  
加恩悉予開復應得卹典該衙門察例具奏尋 賜祭葬 予諡  
襄恪子銘伏羌汎干總鐸河州城守營外委鏞二品廕生戶部主  
事

右 國史館本傳

四庫全書

--	--	--	--	--	--	--	--	--	--



宗室果齊斯歡

宗室果齊斯歡鑲藍旗人嘉慶五年由閒散挑十五善射七年進士改庶吉士十年四月散館授檢討五月升右春坊右中允充日講起居注官六月轉左中允遷翰林院侍講十一月轉侍讀十二年五月遷右庶子十一月升侍講學士命在上書房行走十五年以澄懷園門外積雨水深趨直曠誤降補左庶子罰俸一年十六年復授侍講學士十七年大考二等轉侍讀學士十八年二月擢內閣學士兼禮部侍郎銜三月兼鑲黃旗漢軍副都統八月充順天鄉試副考官九月授兵部右侍郎調鑲黃旗滿洲副都統十九年正月轉左侍郎二月調戶部左侍郎兼國子監事務十月署

翰林院學士二十二年二月署吏部左侍郎三月 上駐蹕南苑  
召見果齊斯歡未到亦未入直上書房降內閣學士七月授工部  
左侍郎二十三年 諭曰昨日召見果齊斯歡詢問四阿哥功課  
據奏甫學屬對詩文俱未能作朕前在藩邸時十一歲卽能屬對  
十二歲卽能賦詩壬辰年十三歲時 皇考高宗純皇帝命面和  
聖製五言律七言律詩味餘書室詩集中卽載有朕十三歲詩章  
四阿哥質性聰敏儘可讀書本年已十四歲詩文尙俱未學皆由  
果齊斯歡學問平常不能循循善誘而又因循疲玩以致耽誤果  
齊斯歡負恩已極著革去一應差使俾上書房師傅共知儆戒尋  
賞副都統銜爲巴里坤領隊大臣二十四年授鑲黃旗漢軍副都

統二十五年八月 召來京道光元年四月管理健銳營事務五月署兵部左侍郎 命仍兼十五善射 賞戴花翎調鑲白旗滿洲副都統署吏部右侍郎七月授工部右侍郎兼管錢法堂事務十月轉左侍郎二年正月調兵部左侍郎三月因失察工部司員承辦 壇 廟工程朦混銷算部議降三級調用 上加恩改爲 畱任閏三月調戶部左侍郎兼管國子監事務六月署左都御史十二月授秦甯鎮總兵兼總管內務府大臣四年五月直隸總督蔣攸銛奏易州每歲截收漕米四萬餘石供支 西陵員弁兵役俸餉請照 東陵兵米章程令弁兵自赴州倉支領 命果齊斯歡妥議具奏尋奏稱鎮標左右兩營弁兵均係分汛駐守其汛撥

地方距易州數十里至百餘里不等若令其紛紛離汎赴州關領轉致曠誤巡防請循照舊章由易州運送到營就近支放 上是之六月擢廣州將軍六年調福州將軍八年正月調綏遠城將軍四月調黑龍江將軍九月卒 諭曰黑龍江將軍果齊斯歡由宗室翰林嘉慶年間洊升卿貳經朕擢授將軍本年由綏遠城調任黑龍江宣力有年克稱厥職茲聞在途溘逝殊堪軫惜著加恩賞銀三百兩由廣儲司給發到京之日准其入城治喪所有任內處分悉予開復應得卹典該部察例具奏尋 賜祭葬 予謚文僖子素博通額工部員外郎素克精額二等侍衛

右 國史館本傳



宗室伊沖阿

宗室伊沖阿正藍旗人乾隆四十七年由七品筆帖式補宗人府主事五十二年升副理事官五十四年補理事官五十八年授浙江道監察御史嘉慶元年轉戶科給事中二年調吏科給事中五年擢烏什辦事大臣九年 召來京授鑲藍旗蒙古副都統十一年調正黃旗滿洲副都統十二年擢盛京兵部侍郎兼盛京副都統十三年六月奏參冷口旗營防禦錫霖布拆毀邊牆城甃修葺房屋解送刑部審訊 諭曰此案人證均在各處邊牆坍塌亦須親往踴勘一切詳細情節刑部何由而知關外案件俱欲解交刑部辦理該處又安用各該管大臣爲耶伊沖阿著親赴邊牆查訊

得實定擬具奏其自請議處俟定案時一併覈辦七月又奏喜峯口雨水漲發官兵營房坍塌臣見在冷口訊案完竣擬親查勘諭曰營房被水浸塌自有該處本管大員查辦伊冲阿非欽差可比冷口查案既竣自應速回本任何庸伊赴喜峯口會勘耶著傳旨申飭十三年九月奏邊外流民出口緣時值水災無業之民因吉林長春廳及奉天新設之昌圖廳等處蒙古地土開墾傭工較易請自嘉慶十四年爲始交該廳查照原奏人戶地畝數目如於原額外增添一戶或原戶在原定蒙古地數外多墾一畝責懲示儆地方官容隱不報查出參處至出口人民令由原籍起關照到關驗明畱照放行仍在原籍起隨身護票至所往地方繳官備查

黨到邊門無照槩不放出下戶部議覆得 旨如所議行十五年  
二月因前在烏什辦事大臣任內失察所屬糧員虧短倉糧下部  
議降二級調用 上加恩改爲降三級畱任八月又以失察盛京  
地方私種秧蔴並局員知情得賄各弊交部嚴議尋議革職九月  
賞還四品頂帶以宗人府七品筆帖式用十月 賞三等待衛授  
烏什辦事大臣十六年升頭等待衛爲塔爾巴哈臺參贊大臣十  
八年授烏魯木齊都統十九年以病 召回京八月授都察院左  
都御史十月西城正指揮王慶長因婢女詭稱署內有賊慶長不  
察虛實妄報賊匪持刀劫盜等情伊冲阿並未傳訊明確率行入  
奏經刑部鞠實奏 開礮慶長職改授伊冲阿烏理雅蘇臺將軍

仍降一級畱任二十一年授鑲黃旗蒙古都統二十二年四月遷  
理藩院尙書兼都統事六月調工部尙書七月轉兵部尙書兼正  
黃旗漢軍都統十一月授熱河都統二十三年九月訪緝煙筒山  
聚匪盜竄鉛砂爭峒械鬪奏請懲禁 諭曰伊沖阿所辦甚是朕  
每年駐蹕熱河煙筒山在承德府境內豈容匪徒聚集著該都統  
責成地方官永遠查禁尋調正白旗漢軍都統十月補察哈爾都  
統十一月仍調熱河都統二十四年以目疾乞休 允之道光九  
年卒子恩倫三等待衛錫麟宗人府副理事官

右 國史館本傳



蘇法那

蘇法那佟佳氏滿洲正白旗人乾隆四十九年由拜唐阿投藍翎侍衛五十一年升三等侍衛五十九年升副護軍參領嘉慶五年閏四月揀發湖北以遊擊用時楚省教匪煽亂命赴軍營差遣十月襄陽白賊首高二馬五擾竹山之保豐蘇法那隨湖北巡撫倭什布勒之於益水賊潰乘勝追躡至獅子溝奮勇衝殺殲賊四百擒賊二百奪獲槍礮旗幟無算十二月達州青號首逆徐添德竄入楚境由竹谿東南繞至竹山蘇法那隨副將吉林泰敗之於洋灘戮僞先鋒俞文志生擒賊匪程有才等七十餘人尋偵知徐逆屯聚隆須垭我兵由高塘河進勦蘇法那搶上山梁乘勢下

國朝通志卷之三十三  
歷賊敗後仍由後路衝突蘇法那等復迎擊之殺賊百餘六年正月剿賊於陳家河賊恃險抗拒我兵奮勇仰攻斃賊四百餘生擒匪黨六十又躡賊於火燒坪又截分竄房縣之賊並有斬獲二月敗賊於馬鹿寨又敗之於竹山時巴州白號首逆苟文明通江藍號賊匪李彬從陝境竄至竹谿直趨竹山之官渡我兵由吉陽關會剿大敗其眾徐逆屯聚門神坡官兵由北星河抄出賊前迎頭截剿擒賊目劉大貴殺賊百餘蘇法那均在事有功三月賊屯茅倫山蘇法那往剿賊擲石抗拒卽率兵勇分路仰攻搶上山頂殲賊三百是月補撫標右營遊擊五月撤兵歸伍十四年升撫標中軍參將二十三年升湖南永順協副將著綏靖鎮總兵道光元年

擢雲南開化鎮總兵四年失察營員舞弊下部察議五年正月  
召來京七月得旨蘇法那年逾七十精力已衰著以原品休致  
九年卒

右 國史館本傳





武登額

武登額瓜爾佳氏吉林滿洲正藍旗人乾隆三十四年由前鋒校隨征緬甸疊有戰功下部議敘三十八年金川不靖隨副都統福珠里馳往協勦進兵資哩賊眾築卡拒守我兵奮勇攻殺賊大潰斃賊無算三十九年六月攻勦色溯普山梁克木城石礮十一復克喇穆喇穆殲賊甚夥論功下部優敘十月隨參贊大臣海蘭察由琅谷南攻克礮卡四座殺賊二百餘進勦凱立葉大敗之十二月賊竄穆谷大兵分投截擊殄賊甚夥四十年偵勦宜喜克之又敗賊於得耳谷四十一年攻克榮噶爾博山梁下部議敘金川平凱撤回旗四十三年補驍騎校四十六年升防禦四十九年擢佐

領五十六年升協領五十九年因辦理吉林邊務不善降一級調用嘉慶二年七月川陝楚教匪煽亂隨副都統賽冲阿赴川協剿十月襄陽藍號首逆張漢潮等擾平利之會家壩大兵兩路抄殺大敗之冒雪追至竹葉關殲擒無算賊竄黑虎廟我師分伏峽口殺賊千餘箭斃賊目張世虎十二月追剿襄陽黃號首逆齊王氏姚之富於甯羌州羅村壩奮力衝擊大敗其眾三年正月襄陽白號首逆高均德竄洋縣龐家溝大軍乘勝追剿殲賊二百餘賊乘夜折回安子溝犯大營我兵有備擊卻之三月齊王氏等竄鄖西我兵馳至高壩店截擊賊敗竄大兵三面兜剿追偪至三岔河擒獲甚夥齊姚二逆陸崖死搜勒洋縣茅坪關西溝俱有斬獲捷入

下部議敘六月餘匪竄川境與通江藍號首逆冉文儔合據渠縣  
大神山七月分兵攻勦克之九月進克箕山燬賊巢斃賊無數四  
年正月追勦張漢潮股匪於楚境蓮花石油房溝等處斬賊百餘  
尋隨經略大臣額勒登保赴陝勦辦四月以戰功屢著復遷協領  
五年三月遇賊於甘省岷州林江鋪武登額由左邊如意山抄出  
箭矛並發斃賊百餘十一月敗賊於川境達州之劉家壩六年回  
旗二十一年授熊岳副都統道光二年以年老休致 賞食全俸  
九年卒年八十四子圖明阿二品廕生

右 國史館本傳





## 春升保

春升保努葉勒氏吉林滿洲鑲黃旗人嘉慶二年九月由領催隨副都統賽冲阿赴陝勦辦教匪十月賊由黃官嶺向漢江南岸偷渡我兵馳擊之殲賊千餘賊潰走我兵隨勦隨進斬獲無算將軍明亮上其功 賞戴藍翎三年五月高均德股匪由鐵鎖關竄入川境春升保隨賽冲阿躡蹤追勦疊有斬獲六月賊奔至渠縣之大神山與通江藍號首逆冉文儔合七月大兵三面進攻克之八月達州青號首逆徐添德巴州白號首逆羅其清旬結襄陽黃號首逆樊人傑擾營山縣之插旗山鳳凰寺等處九月擊破之生擒張貴等二百餘人殲賊千餘十月賊竄箕山我師分路進攻賊潰

又敗之於廖家礮斃賊六百擒賊目郭彥榜等三十餘人四年升  
驍騎校五年三月敗賊於江油之新店子閏四月擊賊於達州之  
土主河俘誠甚眾六年六月追剿襄陽白號股匪高二於陝西山  
陽縣之乾溝賽冲阿射中賊肩賊眾持矛直撲我兵乘勝截擊執  
賊目龔如一僞元帥閻慎珍餘匪殲擒無算春升保受矛傷捷入  
得 春升保著升補防禦賞換花翎十一年升佐領十五年升  
協領十六年兼公中佐領二十三年擢齊齊哈爾副都統道光元  
年三月劾奏墨爾根佐領台清阿於領運接濟口糧聽囑代賣釀  
成命案請奪職論如律二年八月奏言齊齊哈爾被水衝淹所收  
糧石無多請將嘉慶二十五年被災借給接濟銀兩暫行緩俟道

光三年秋收後再行起扣以紆丁力如所請行先是黑龍江將軍奕顯等奏請於齊齊哈爾八旗甲兵內挑取四百五十名撥歸火器營管轄上命春升保詳查覈奏十二月疏言齊齊哈爾八旗額設甲兵二千一百七十名所有春秋操演放鳥槍向由八旗挑撥操練事畢仍歸各旗當差若遽歸火器營管轄遇有別項差務不免顧此失彼惟有遵照成規認真訓練於騎射外閒習鳥槍以資簡閱上是之八年以已革黑龍江將軍祿成派兵不公及將私馬交站餽養變價一案春升保近在同城扶同遷就未能據實奏參下部嚴議降三級調用九年卒于台費音圖佐領

右 國史館本傳

國朝名臣奏議

卷三十一

七



烏爾卿額

烏爾卿額瓜爾佳氏滿洲鑲藍旗人乾隆六十年由前鋒校歷升  
委署參領二月湖南苗匪滋事隨征赴鎮筸軍營以都司補用五  
月苗匪焚掠高村烏爾卿額馳往與都司董凝川前後夾攻殲賊  
甚眾 命以應升之缺升用六月進勦濫泥苗匪克之駐守巖門  
卡賊蟻聚楊柳坪山梁官兵奮勇仰攻烏爾卿額率眾夾擊斃賊  
無數賊潰竄十月擢湖北宜昌鎮中營遊擊嘉慶元年正月三省  
教匪滋事二月調赴湖北當陽軍營七月隨湖廣總督畢沅勦洗  
當陽教匪脣受槍傷奮勇登城擒首逆陳德本及賊目多名捷  
聞 賞奇微伯巴圖魯名號八月升德安營參將二年正月賊首

姚之富劉起榮等在宋河洪山一帶爲官兵勦散分股向東北潛遁烏爾卿額等率鄉勇兜勦二月繞唐家店截賊竄路殲三百餘人十月勦白巖山賊匪抵西山坪賊眾數千乘昏夜霧雨分撲營卡烏爾卿額等帶領兵勇合力截殺斃賊三四百人尋調防四川巫山卡隘四年兩廣總督倭什布撤回楚省防堵五年二月大兵勦賊首焚人傑羅其清賊竄竹山蔣口三座庵等處烏爾卿額等乘夜冒雪從馬棚進勦追至沙嶺斃賊數百名夜大霧駐軍歇馬河賊折回偷撲我兵左右兩路突出烏爾卿額隨倭什布從中橫擊斃賊七百餘名賊併力欲北竄烏爾卿額等由罐子埡荷花店兜截擒斬百餘人賊折竄南漳縣城三月倭什布追賊至土地嶺

烏爾卿額與副將樊雄楚分兩翼抄擊殲四十餘人四月賊竄興山水月寺老林四散潛伏烏爾卿額偕總兵孫清元等三路搜捕斬獲四百餘人尋賊首徐添德徐三等股擾均房穀城邊界我兵從鳳凰寨兼程抵趙家山賊大股從石花街衝出烏爾卿額偕樊雄楚分南北路合兵奮擊殲擒六百餘名餘匪竄馬良坪重陽坪等處閏四月復追及螃蟹溪賊馬步千餘伏林箐突出抄截烏爾卿額等直前迎擊衝賊爲兩股先後斃賊五百餘名追至馬鞍山斑竹園一帶斃三百餘名生擒四十餘名九月賊首徐萬富由房縣竄遠安之清溪鋪官兵由紫山坪迎勦賊在四山溝內搶掠烏爾卿額率吉林馬隊突出衝殺殲擒二百餘人賊合藍黃白三號

爲一趨當陽之清溪河等處大兵追至觀音寺直撲山梁烏爾卿額等從山溝旁擊擒僞先鋒張啟武十月高家營股匪自陝省平利竄聚竹谿河官兵由草場壩衝擊烏爾卿額隨倭什布馳至接應殲斃多名賊竄回陝十二月徐添德等擾竹谿之東南蘿蔔灣等處我兵由洋灘躡溝繞擊賊退走烏爾卿額帶馬步兵追之斃賊數十名又進擊之於隆須堽賊分股遁六年三月徐逆合賊首苟文明等及青號白號各股屯聚茅倫山烏爾卿額偕孫清元等六路仰攻賊恃險抗拒我兵一鼓而上立殲數百人追擒百餘人六月敗賊於彎腰樹擒僞先鋒王正富十月青號王四股匪竄興山馬家河攻撲民寨烏爾卿額與遊擊毛秉剛分兵繼進至石虎



頭合擊之斬獲百餘名十一月升施南協副將十二月追剿王會  
等股匪至天保寨賊奔出漢川嶺與總管托爾托保夾擊斃賊六  
十餘名賊大隊屯斑竹園總兵吉林泰等直前剿擊烏爾卿額等  
由連湖坪洪坪截擊戮偽先鋒朱隴七年正月王會等匪竄歸州  
走馬嶺等處烏爾卿額偕孫清元等四路剿截遣鄉勇首領甘魁  
入賊營誘偽先鋒張添壽旗首楊士魁擒之斬馘四百餘人六月  
賊首蒲添寶竄聚興房交界之鮑家山據險堅守參贊德楞泰督  
大兵圍攻檄烏爾卿額扼馬家溝仙家坪以堵爲剿尋搜白玉峒  
零匪殲二十餘名仍帶步兵千餘赴獅子背堵剿並抽兵六百名  
交都司馬相等由寨灣擊卡進逼賊窟甚乘霧突營遁烏爾卿額

同參將王占鼇直赴鮑家山扼駐大小要路設卡嚴堵十一年赴  
施南協副將任十二年十一月授福建汀州鎮總兵十二月因施  
南副將任內失察所屬交代不清並派累各款奉 旨革職尋以  
屬員那款限內全完 命開復原官十四年調山西太原鎮總兵  
十八年四月擢江南提督九月直隸山東教匪同時滋事 上以  
江省北界與豫東二省接壤 命烏爾卿額馳赴徐州邊界駐守  
十月帶兵一千名赴碭山南岸之楊家集堵禦賊旋平十九年二  
月 賞副都統銜克喀什噶爾幫辦大臣閏二月調喀拉沙爾辦  
事大臣二十年調英吉沙爾領隊大臣二十三年 召回京二十  
四年六月授頭等侍衛八月授鑲藍旗漢軍副都統十二月署鑲

黃旗護軍統領二十三年授西安右翼副都統道光五年調涼州副都統七年以年力就衰命原品休致賞食全俸九年卒子嵩山江南常州營遊擊善慶護軍藍翎長

右 國史館本傳

圖書集成  
彙編  
刑法典  
卷一百一十八

三



那林泰

那林泰□□□□□□□□□□乾隆二十二年由護軍揀充哈  
哈珠色四十一年回護軍營四十二年授黏杆處藍翎侍衛五十  
二年升三等侍衛五十三年擢副護軍參領五十六年揀發雲貴  
以遊擊候補五十九年署普安營遊擊六十年大學士公福康安  
督勦銅仁苗匪令那林泰偕侍衛富蘭由志諾埡口進兵爲侍衛  
綸布春等策應破賊於蘭草坪遂解永綏之圍以軍功超等入奏  
賞戴花翎旋補荔波營遊擊嘉慶元年升廣西鬱林營參將調貴  
州長寨營參將二年正月南籠狎苗滋擾上命總督勒保統兵  
勦撫三月攻克關嶺要隘令那林泰隨副將鄧英雄率兵先行一

路攻奪賊卡剿散安籠堡賊眾直抵永甯州城四月攻克望城坡  
偕參將趙得功等分兵兩翼進攻碧峯山焚賊寨七殺賊數百復  
隨副將興保伏兵一鼓登山連毀賊卡斬獲甚眾五月進兵水煙  
坪偕遊擊達凌阿等隨總督勒保爲前隊進焚八角峒斃賊千餘  
攻克阿捧及魯溝賊巢進兵卡子河偕達凌阿等隨總兵張玉龍  
爲後應奮勇直前盡燬賊卡乘勢攻克普坪七月進剿安有大寨  
率守備黃玉照等隨總督勒保在安有對山迎敵連毀賊柵乘勝  
追剿遂焚安有大寨奏入得 旨交部議敘九月獲賊渠王囊仙  
韋七絡鬚令那林泰檻送入都先經總統勒保以軍功保題署雲  
南楚雄協副將至是引 見得 旨升授五年剿禦黑賊匪出力

下部議敘六年調維西協副將七年正月維西獯獯夷匪恆乍綱  
糾眾煽亂那林泰率兵迎擊累有斬獲二月攻克喇普灣賊寨賊  
據樹苗後山那林泰率參將成文等分兵兩路一向山仰攻一向  
箐底下擊盡殲之九月署臨元鎮總兵八年二月勦散春多洛等  
處賊眾由橋頭進兵至長腳寨西山梁分三隊仰攻擊殺賊匪無  
算焚長腳寨進至野麻箐對面山梁有賊藏匿率兵搜捕賊逃竄  
追及羅美洛督弁兵練勇繞登山梁自上壓下賊眾潰散遂由石  
鼓橋頭一路向北追勦直抵維西九月擒其渠得 旨交部議敘  
十年正月擢普洱鎮總兵九月稟報前任總兵書成以優人濫食  
兵糧徇私拔補外委不加考驗經總督伯麟入奏 諭曰那林泰

國朝通志卷之三十一  
三  
於到任後卽能詳細查驗據實稟報尙屬認真加恩交部議敘十  
一年迤南江外猱匪竄入威遠廳邊界劫掠那林泰率兵堵剿賊  
遁十三年俸滿入都擢鑲紅旗蒙古副都統旋調貴州鎮總兵十  
七年因病奏請來京調理 允之十八年補鑲藍旗蒙古副都統  
二十年以舊疾復發懇請休致 上允所請 恩給半俸以資調  
養道光九年卒子索勒德圖三等侍衛

右 國史館本傳



傅廷標

傅廷標福建晉江人乾隆四十八年 聖駕南巡浙江廷標以提標陸兵行伍挑往西湖試技 賞銀牌緞匹尋歷升中營外委把總五十年臺灣逆匪林爽文滋事廷標以隨剿有功升城守營千總尋遷漳州城守營守備嘉慶三年以龍溪縣起解地丁銀被劫褫職四年捐復守備時川楚教匪滋事署四川總督魁倫前往剿賊奏帶廷標隨往軍營 允之五年以軍營出力補平越營守備六年三月升山西天成營都司時青藍兩號賊匪竄擾仁和永興二寨欽差大臣勒保檄廷標帶兵由左首山溝兜剿遇賊於華尖溝敗之餘匪渡河奔竄追至衝天槽斃藍號賊首鮮倭先苟文通並

擒青號賊首何子魁及其黨百餘名勒保以 聞八月得 旨以  
應升之缺升用七年三月隨總兵張績等勦夔州張長青陳自得  
股匪由鹿坪壩進攻至雙龍橋依山結營分兵抄截敗賊於王家  
坪擒匪首陳學武等復移兵爛泥壩將開縣之銀廠坪股匪四面  
兜殺俘僞先鋒廖登仁陳文禮又由開縣楊家營進攻雲陽一帶  
賊匪擒斬甚多餘賊回竄由萬縣之張家壩折至白陽寺鐵鍊橋  
廷標連夜追勦擒僞千總羅三八月楚匪青號熊翠等分竄馬黃  
口廷標由惠家塘席家溝抄擊擒僞先鋒李道仁復於鐵廠灣設  
伏以待獲賊目王連城等九月於巴巫交界勦楚匪黃號餘黨擒  
僞元帥蔣登榮僞先鋒龐之朝十月以先後積功升四川黎雅營

遊擊十三年復以勦辦猺夷有功擢廣西鬱林營參將二十一年  
升鎮安協副將二十三年兩廣總督阮元以廷標明白諳練資深  
勞多奏保堪勝陸路總兵二十五年擢廣東韶南連鎮總兵道光  
三年丁母憂八年服闋授高州鎮總兵 召見以年力就衰原品  
休致九年卒子爲霖廕生候選通判鴻磐從九品

右 國史館本傳





張聯奎

張聯奎甘肅安化人乾隆六十年武進士授三等侍衛嘉慶二年  
丁祖母承重憂告假回籍三年三省教匪不靖聯奎隨陝甘總督  
宜繇出師紫陽一帶屢有戰績四年復隨陝甘總督松筠敗賊首  
樊人傑等於雙寶寨五年三月補甘肅南川營都司七月略陽屬  
之金池院等處賊黨屯集聯奎偕參將廣音額等連戰於木瓜橋  
互有殺傷聯奎收餘兵至沔縣防堵 上疑其有退避情事 命  
經略大臣額勒登保詢明具奏尋查明以兵少不克分援尙非臨  
陣畏葸奏入得免議十一月賊匪屯踞南鄭縣屬之大石埡山梁  
聯奎率兵圍截疊有斬獲十二月餘賊遁入老林並在川境南江

邊界之羅棋山屯聚聯奎偕副將蕭福祿分道緊躡至龍池子地方擊斃執旗賊目一人殲賊黨四五十人餘奔匿山中聯奎復從山後進兵與參將韓自昌遊擊馬忠等三路夾擊賊窮蹙由筆架山向賈家溝分竄我師俘馘甚眾六年正月偵知賊匪將竄入南山聯奎偕遊擊馬忠都司米章截勦於梅子壩白巖河巫山埡賊竄復有股匪魏棒棒等由桃園寺至鐵鑪壩焚掠大兵乘雪追至巖方坪賊踞山梁聯奎冒矢石先登賊匪悉就殲擒捷入 諭曰張聯奎奮勇可嘉如未得花翎卽賞戴花翎並以應升之缺升用尋擢固原提標左營遊擊二月竄匪由武關西溝奔東南胡家壩山徑險窄馬不能前聯奎領步卒追勦殲其渠三月汧陽新起賊匪屯

武家半山聯奎由山後進擊生擒賊首敘功得蒙 恩賞加一等  
升擢嗣聞賊匪冉學勝由大壩竄入棧道西之陳倉溝屯聚瓦房  
壩地方與都司藺福遊擊宋鉞分擣賊巢賊大潰冉逆奔兩當縣  
屬楊家店趨秦州馬跑泉我兵敗之於王家河四月冉逆由三陽  
洲復竄至隴州屬之草白峪聯奎偕蕭福祿等搶上山梁克之十  
月股匪張添倫西奔廣元之兩會寺溫水壩等處聯奎偕參將吳  
亨衍由東北進勦破其巢殲二百餘人八年九月零匪竄至黃瓜  
溪漁溪河我師冒雨進攻敗之於大茨溝十一月擢甯陝營參將  
十一年調循化營參將十二年五月失察甯陝營新兵滋事降一  
級畱任六月賊番侵擾大通邊界至三紫灘聯奎擊走之復由什

噶干進攻賊番屯山上聯奎與遊擊楊廷玉等分擊之賊竄七月  
敗賊於中袞復敗於牧羊丫口八月由噶楞雅哈進攻沙卜浪賊  
巢戰於什尖里幹斬賊渠窩常旦木正又敗之於汪科合山進至  
沙卜浪溝林中偕副將博勒忠阿焚其巢斃賊數十敘功 命以  
應升之缺儘先升用仍交部議敘十三年擢洮泯協副將十九年  
三月調金塔協副將十二月丁母憂二十二年服闋二十三年授  
福建延平城守營副將二十四年遷山東兗州鎮總兵道光元年  
調登州鎮總兵二年丁繼祖母承重憂先以規避丁憂冒昧入奏  
部議褫職得 旨張聯奎著照部議革職俟服闋後交兵部帶領  
引見五年服闋引 見以三等侍衛用尋請假回籍九年卒



右 國史館本傳

國史館本傳 卷五十六 三

卷之三十一  
三十一

朱承受

朱承受甘肅固原人由武舉入營效力嘉慶元年川楚陝教匪不靖陝甘總督宜縣帶兵擊賊於將軍山承受在事有功命以千把總酌補旋補提標後營千總三年升陝西延綏鎮甄井堡守備六年以軍營節次出力升安邊堡都司七年十二月三省大功戡定聞有零星餘匪潛竄老林八年四月承受隨副將吳廷剛搜捕追賊於太平河雄黃池諸處疊有斬獲賞戴花翎六月隨總兵楊芳等由甯陝分兵督剿尋敗賊於太白山梁九年四月復於熟油溪老林諸處分道追剿搜除殆盡九月參贊德楞額奏餘氛掃蕩三省底平上命將出力員弁分別保奏德楞額奏上其功諭

曰都司朱承受打仗殺賊素爲勇往應加升擢著以遊擊升用十年補甘肅涼州鎮大靖營遊擊十五年升四川提標中軍參將十八年調成都城守營參將時陝西岐山縣三才峽木廂匪徒因饑煽亂分青紅藍白黃綠各號四出侵掠官兵分路剿捕十九年正月隨成都將軍賽沖阿由川赴陝連敗賊於西鄉縣竹木壩諸處藍號賊眾千餘渡漢江而南擾至渭門童家溝一帶我兵冒雪馳抵暖子溝賊方會食猝與官兵遇卽據山梁抗拒賽沖阿令遊擊余步雲攻其右使承受借參將蘇勒當阿等攻其左而自率兵繞出賊後夾攻之賊旣失險紛紛敗竄擒殺數百人擒僞先鋒蘇容盧鳳等獲器械牲畜無算尋渡江進剿紅綠各號股匪追及於洋



縣之店子河各匪併爲一路阻水自恃合力抗拒承受等語淺渡水鼓勇爭先殲斃甚眾餘匪逃竄又敗諸寨家嶺生擒紅號首逆羅懷僞先鋒劉添華等殺獲千餘人二月賽冲阿奏漢江南北匪徒次第掃除承受以奮勉出力 賞驍勇巴圖魯名號二十年五月瞻對番酋洛布七力等構釁滋擾承受隨成都將軍賽冲阿四川總督常明等前往協剿殲獲甚眾事載凱撤回川六月升懋功協副將二十一年調綏定協副將道光五年擢雲南臨元鎮總兵六月以患病開缺回籍調理九年卒子起鵠陝西固原提標把總起鴻固原提標後營千總

右 國史館本傳

國朝詩林卷之六

七

--	--	--	--	--	--	--	--	--	--



孫應奉

孫應奉湖南永順人乾隆五十八年由行伍補永順協外委六十年苗匪滋事隨提督劉君輔攻克花園隆圍董膈等處升永綏左營把總又隨攻燒米諾紀容各弄吳家等寨擢行營千總嘉慶元年湖北來鳳縣教匪起劉君輔檄帶隆圍鄉勇一百三十名馳赴龍山縣守護官兵進攻旗鼓寨應奉先登拔小木城經總督福甯將軍觀成奏入 諭曰旗鼓寨賊匪經官兵剿散又築小木城希圖拒守福甯等督率弁兵斫開木城一擁直入焚燬賊巢擊獲賊首所辦實屬可嘉把總孫應奉斫開木城奮勇先登尤爲出力著超升守備賞戴花翎並賞給銀一百五十兩事竣後著送部引見

十月赴湖北宣恩東鄉勦辦教匪旋隨碣石鎮總兵慶溥進勦譚家村燬賊寨十一月偵知賊首林之華覃加耀屯黃柏山四方臺等處隨慶溥乘夜冒雪從左峯灣搶上山梁殲賊無算賊卡內窩棚草房悉縱火焚之交部議敘十二月隨慶溥奪筆架坡賊卡又攻撲將軍巖賊卡二年補鎮筓鎮標左營守備九月隨福甯慶溥由羊苓橋進攻馬湖營山同守備李光晟先登與額勒登保合擊敗賊追至孟家埡賊聚隘口抗拒官兵奮攻克之應奉右骹受槍傷十一月以功遷襄陽鎮標前營都司四年隨湖廣總督倭什布躡賊至竹谿關埡地方殲斃八九百名擒吳三美等二十九名交部議敘旋倭什布飭同參將董甯川等抄赴竹山潘口地方設伏



斃賊百餘又在關垵與賊相持兩日夜賊分伏兩山林內應奉偕  
總兵路超吉抄出其北斃賊三四十名擒胡漢卿等九名五年偕  
都司周言昇守備王占鼇等擊賊於沙嶺賊竄關子垵格子田官  
兵追殺十餘里殲三百餘擒馮右林等二十二名七月遷漢陽營  
遊擊八月偕總兵孫清元德昌等擊賊於蔡家灣尋於房縣上龕  
首先衝入賊隊右胯受傷奪賊矛復戰經明亮保奏十一月升江  
西吉安營參將六年九月隨湖北巡撫全保圍賊於甌峪河生擒  
陳國章李旺吳嘉周等十月隨全保馳赴長峪河設伏山後伺賊  
出擊之賊奔山巔官兵撲剿賊翻落山溝乘勢下壓先後斬獲二  
百餘人生擒僞元帥張起倫等奏入 賞綠玉扳指大小荷包十

一月戴家營賊匪分三路牽綴官兵應奉隨全保搜剿斃四十餘人又由扁擔溝向南緊躡殺賊四五十名尋擢廣西潯州協副將十二月餘匪遁入老林全保暨提督長齡等派應奉搜剿七年正月復由麻灣馬家坪截之賊在摩天嶺鋸廠掠食官兵由後山衝下斃一百餘名生擒僞元帥周本善及賊三十八名二月賊攻松柏寨我兵擊之圍解賊竄南面大山據馬鬣嶺山腰我兵用礮轟擊賊退據廷旺壁陡崖應奉等馳上斃賊二百餘生擒僞先鋒鄧文華大旗手徐貴黃修齊等三十七名交部議敘三月各股零匪竄竹谿滋擾吳熊光全保令應奉搜捕旋調同副將蔣觀濤帶兵勇一千五百名探蹤截剿上以賊數既多恐應奉所帶兵力未

免稍單惟令其併力堵禦勿令賊匪深入四月赴興歸一帶剿辦  
上又調偕總兵李天林搜剿二竹零匪並堵燕麥嶺北竄之賊六  
月復進興歸疏通運道八月追藍白各號零匪至萬寺前大石崖  
賊梟水渡河官兵蹙之斃百餘人又敗藍號白號餘黨於黃家場  
殺斃數十名生擒二十三名賊冒四川鄉勇至巴東二塘埡圍撲  
官兵李天林與戰傷應奉赴援賊走追擊敗之 諭曰前因該督  
奏稱巴東二塘埡地方突有川匪乘機作亂日來正深慮念今閱  
本日所奏情形竟係川東剿散零匪詭稱鄉勇辦理尙易此次孫  
應奉等所帶兵力無多尙能擒斬百餘人可見該匪等無他伎倆  
尙爲易辦德楞泰等大兵到彼自可迅就掃除尋以賊窺楚境應

奉率師追勦賊折竄將入川馳往九湖防堵九年川陝楚零匪淨盡吳熊光奏撤兩廣官兵令應奉統帶回營十一月升廣東潮州鎮總兵十六年因私役兵丁經總督百齡奏參旋又冒領公費貼修衙署復賄囑守備李榮華供認誣告經湖南巡撫景安訊明革職發往伊犁充當苦差二十四年 諭曰朕本年六旬萬壽普錫恩綸行慶肆宥所有從前緣事遣戍各大員特命軍機大臣查明案由開單具奏朕詳加披覽各員獲罪之由先行分別公私卽私罪內亦有輕重之別如孫應奉支取浮冒公費銀兩因貼修衙署其咎俱尙可原且前在軍營均有微勞著加恩釋回閉門思過不准求討差使亦不准託人代奏道光九年卒



右 國史館本傳

廣東省立圖書館藏  
三三三三三

三三三

李錦麟

李錦麟貴州鎮遠人乾隆六十年由行伍隨征黔楚逆苗連戰烏草河鴨保寨等處以功拔補石阡營把總嘉慶元年隨攻廖貢坡馬鞍山等苗寨克之 賞戴藍翎三年調赴四川軍營隨勦教匪擢台拱營千總四年正月遷守備六月隨總兵朱射斗攻賊於毛坪槍斃首逆包正洪錦麟力戰受石傷 賞換花翎十月升四川巫山營都司五年擢督標右營遊擊六年正月大甯縣金竹坪有藍號白號賊匪屯聚官兵進勦賊遁錦麟偕副將田朝貴等追至白馬廟擒殺百餘賊退踞大灣平頭崖我兵進擊殲擒九十餘名賊夜遁大蓋山頂復追擊敗之得 旨嘉獎遷雲南提標中軍參

將三月官兵敗魏棒棒等於九嶺子錦麟復邀諸桂門關之大石  
亞殲擒八百餘人四月股匪湯思蛟屯馬家營於附近之靈官廟  
山梁設木卡固守錦麟乘夜雨仰攻毀其卡擒數十人賊踞山下  
礮石我兵不能進錦麟由山右繞登官兵擁上應之斃賊數百五  
月賊渠竄入大甯縣之萬古寺核桃壩等處與黃號辛聰藍號王  
士萬等合知乾龍峒存有軍米思劫取圍之錦麟往救殺百餘人  
賊遂由徐家壩竄入楚省竹山縣之柳林店錦麟帶兵緊躡沿途  
斃賊二百餘人追至三岔河值溪水方漲賊渡河溺斃千餘人未  
及渡者我兵斃之斃三百餘名擒四百餘名六月青藍兩號餘黨  
由土黃壩竄過前河撲仁和永興兩寨錦麟追至華尖壩扼渡口



急擊之賊倉卒由水深處渡藍號賊日苟文通等俱淹斃得渡者  
僅百餘人錦麟盡殲之斃藍號賊首鮮倬先擒青號賊首何子魁  
及其黨八百餘人尋有陝省餘匪由巴南一帶竄入石叟山錦麟  
由馮家院陡梯以兩路進攻殲擒一千六百餘名擒賊首徐添德  
之弟添壽王登廷之弟登高及僞元帥總兵探馬頭等七月官兵  
由石叟山移駐陳谷礮有高家營賊匪屯踞高山寨官兵由西酉  
溪截勦錦麟於土地坡擊之殲斃七八十名賊奔童家山梁錦麟  
先登受矛傷墮馬外委向思璜等翼之以出奏入 諭曰此次李  
錦麟先行搶上童家山梁在前衝殺被賊矛戳傷右肋仍復向前  
擊殺實爲奮勇著卽以副將升用八月總督勒保奏錦麟累次出

力請加鼓勵 賞額勒錦巴圖魯名號十月補貴州清江協副將  
時湯思蛟等匪由太平舊縣壩竄至入臺山下之後槽子溝錦麟  
乘夜翻山下壓斃擒四百餘名十二月新甯縣之楊河溝有零匪  
潛匿錦麟捕之殺三十餘名擒十六名七年賊目楊掌櫃等四百  
餘人由墊江竄至古路坪錦麟夜襲之擒首逆張長庚之弟長德  
僞總兵何祖明楊掌櫃之妻李氏及賊眾二百餘名楊掌櫃竄入  
達州之木頭市錦麟追斃之餘匪悉平九年調雲南曲靖協副將  
十四年升署普洱鎮總兵十五年調署臨元鎮總兵十六年補廣  
西右江鎮總兵二十二年調雲南騰越鎮總兵道光元年三月擢  
提督十月調廣西提督九年卒子森二品廕生順天府糧馬通判

杰雲南雲龍州知州

右 國史館本傳

國史館藏書：正史類編卷一百一十五

四十一

國朝詩林卷之三十一

三十一



何占鼈

何占鼈四川成都人乾隆五十七年由行伍隨征廓爾喀以功拔  
額外外委五十九年補夔州協右營外委六十年黔楚逆苗不靖  
占鼈隨四川總督和琳等進剿攻晏隴礮木諸山峒殺賊有功升  
重慶鎮右營把總 宵戴藍翎旋進剿土空蘭草坪滾牛坡諸處  
隨大軍解永綏圍功皆最升永甯營千總嘉慶元年四月大兵攻  
克結石岡六月破廖家衝連奪尖雲山諸險乘勝復乾州占鼈均  
功列超等十二月苗疆平凱撤回營二年四月調赴湖北軍營隨  
征教匪六月升綏甯營守備連戰白魚寨磨刀溪諸處屢有斬獲  
十二月賊據朱里寨占鼈率兵擊破追至娘娘寨獲數十人三年

大軍克終報寨擒賊首覃加耀占鼇在事有功時川省逆匪徐添德等相繼煽動攻陷東鄉占鼇升夔州協左營都司尋隨參贊大臣德楞泰勦賊果戰皆捷六年正月高二股匪自陝西山陽縣西竄德楞泰令占鼇等督銳兵八百抄出賊前破之於野豬坪箭斃逆首高二 命交部議敘五月隨勦徐添德等股匪敗諸深溪河殺獲無算 賞換花翎十月升廣東廉州營遊擊七年正月參贊德楞泰令駐大甯統防川陝楚邊隘九月復調赴大營隨征十二月調陝西漢鳳營遊擊八年破賊於老鴉寨殲擒數百人得 旨獎賚九年四月調西鄉營遊擊六月擢甯陝華陽營參將十一年七月甯陝營新兵叛竄擾華陽營占鼇禦之被傷 上降旨垂詢

八月追剿叛匪於畱鳳一帶十月事竣回營十二年二月改定營制裁華陽營參將五月追論新兵滋事議處失察各員占鼇以被傷命加恩降一級畱任尋署陽平關參將十七年補甘肅花馬池參將十八年八月升中衛協副將九月河南滑縣教匪滋事隨陝甘總督那彥成進剿十月抵衛輝軍營時賊陷滑縣爲窟穴餘匪屯道口相犄角大軍至新鎮值賊出掠固原提督楊遇春率占鼇等扼其歸路擒殺千餘人拔出難民千餘獲器械無算偵知賊將西渡運河復隨楊遇春自河東截剿與賊遇敗之殺九百餘人賊復歸道口遂斷浮橋扼賊西竄路進攻道口破其巢殺獲甚眾餘匪四散逃匿占鼇率眾追捕賊數百人殊死鬪欲奪路入滑縣

賊之分屯桃園者以眾三千餘來援滑縣城內賊數千亦出城抗拒占鼇等奮勇迎勦殺賊四千餘人餘匪皆遁歸城內於是賊之屯踞城外者殲獲略盡十一月諸軍合圍滑縣城豫掘地道數處置礮其中十二月隨楊遇春督兵乘城地雷發城陷二十餘丈占鼇鼓勇先登手刃賊數十人獲賊目馮相林賊首牛亮臣等皆就縛滑縣平會陝西匪徒吳抓抓等因饑倡亂擾岐山寶雞境那彥成令回陝勦捕十九年正月破賊於鳳縣斬偽先鋒雷先廷復敗其眾於瓦房壩賊目龔貴分竄老林占鼇隨楊遇春追勦二月連戰敗賊追至太安溝擒龔貴及其妻龍氏得 旨嘉獎 賞捷勇巴圖魯名號二十年遷江南徐州鎮總兵旋調陝西漢中鎮總兵



道光二年擢湖北提督五年調直隸提督六年調署固原提督八年補甘肅提督九年卒 諭曰甘肅提督何占鼇久歷戎行著有勞績方資委任茲因積勞成疾遽爾奄逝實堪軫惜著加恩追贈太子少保銜由甘肅藩庫賞銀五百兩經理喪事任內一切處分悉予開復應得卹典該衙門察例具奏尋 賜祭葬 予謚勤襄

右 國史館本傳

皇朝通志卷之三十一

三十一

郭文魁

郭文魁四川西昌人乾隆五十六年廓爾喀賊匪擾後藏由行伍隨將軍福康安往剿以功擢建昌鎮標中營額外外委歷升把總嘉慶元年遷甯越營千總二年隨四川總督宜縣征剿教匪擢普安營守備四年升綏甯協標中軍都司五年藍號教匪樊人傑苟文明等竄至梁山境內隨參贊大臣德楞泰分剿賊竄鄰水墊江長壽界我兵於東北各隘口分路堵剿旋探知苟文明等欲由定遠石板沱搶舟過江我兵追躡賊後又分兵抄出賊前斬獲甚眾賊竄我兵一日窮追一百七十餘里前後殺斃二千餘名生擒一千餘名文魁在事出力 賞戴花翎六年擢提標右營遊擊八年

遷會川營參將時陝西南山餘匪據老鴉寨德楞泰帶兵由烏雲嶺分三路冒雨進攻文魁偕總兵蒲尙佐等由高坪大坪抄截追賊於當陽河斃賊二百餘名渡河至安石隴屢有殲擒九年升綏甯協副將十年隨經略大臣額勒登保剿除零匪於乾溝巖文魁等由青坪南天門取道南溪場剿捕西南一路十一年署重慶鎮總共十二年丁母憂十四年服闋十五年補浙江嚴州協副將十八年遷處州鎮總兵奉 旨著來京陛見適河南滑縣教匪李文成等滋事 上命文魁馳赴河南軍營交河南巡撫差遣是年軍務告竣回處州任道光九年卒子承志二品廕生

右 國史館本傳



國朝耆獻類徵初編卷三百十七目錄

將帥五十七

楊明魁

德英阿

扎克桑阿

陰功保

觀喜

德海

哈哈岱

穆蘭岱

博克順

安楚拉

佛隆武

達凌阿

巴杭阿

宜絲阿

劉起龍

辭國相

曾受

李東宣

多隆武

洪鼇

國朝經籍志卷之三十四

一

國朝耆獻類徵初編卷三百十七

通奉大夫前署江西巡撫江西布政使司布政使湘陰李桓輯

將帥五十七

楊明魁

楊明魁四川西昌人祖籍成都乾隆五十七年以行伍出師廓爾喀嘉慶元年湖北教匪聶傑人等糾眾滋擾枝江宜都一帶明魁隨征出力二年賊首徐添德屯聚匪黨分據東鄉縣屬之金峩寺清溪場互相首尾恃險抗拒明魁隨川北鎮總兵朱射斗分路進攻殲擒無算四年搜剿股匪高二馬五等取道平頭坡追躡中坪地方盡力圍截賊潰我兵復由烏龍溪四面掩擊疊有斬獲明魁

受矛傷五年賊竄蓬溪縣之高院場明魁并力進攻擒賊四復受  
槍傷六年正月偵知賊匪高二自洵陽大棧溪竄山陽我兵兩路  
兜剿截其東竄之路敗之於乾溝明魁在事有功拔雲南昭通營  
額外外委五月明魁復由三河口水田坪至紫陽縣隨剿股匪徐  
添德奮勇夾擊賊披靡克之補四川川北營外委七年三月線字  
號餘匪竄雲奉交界據鳳凰山大兵擊之悉數殲獲明魁以功擢  
建昌中營把總六月賊首曾芝秀樊人傑由竹山湖溪一路竄過  
犒洛河我師尾追之乘勝剿殺殲其眾賊首窮迫墜河死餘匪四  
五百人盡斃於水捷入敘功 賞戴藍翎八年青號股匪劉渣鬍  
子踞竹山之漆樹梁明魁同官兵進攻擒獲渠魁連提標中營千



總九年調越巂營千總十年檄飭回營任事十七年署靖遠營守備十九年雷波清溪夷匪出掠明魁率兵進剿焚燬夷堡擒其渠賊大潰俘馘甚眾凱旋 賞換花翎以守備儘先升用二十年正月出師瞻對攻克喇嘛寺等處有功七月擢提標左營守備九月署甯遠營都司二十一年升潼縣營都司二十二年五月川境夷匪滋事明魁率兵直搗夷巢經四川總督常明保奏得 旨以應升之缺升用十一月署督標右營遊擊二十三年署靖遠營遊擊道光元年升建昌鎮標左營遊擊滇省勞步不靖檄往雲川交界之大坪子一路防堵尋經四川總督蔣攸銛以明魁打仗奮勇熟悉夷情奏請升署會川營參將 允之二年四月署漳臘營參將

國朝三才傳卷之三十一  
七月果洛克賊番滋擾隨提督桂涵馳赴唐凹達凹唐玉三寨身  
率練卒取道攻勦焚燒寨落生擒首逆曲俊父子懲治如律 命  
下部優敘三年署四川綏甯協副將尋升直隸三屯協副將五年  
調開州協副將六年二月署正定鎮總兵四月直隸總督那彥成  
保奏堪勝總兵送部引 見旋擢河南河北鎮總兵八年奉 命  
祭告中嶽九年卒

右 國史館本傳

德英阿

德英阿赫萊氏滿洲鑲藍旗人黑龍江駐防乾隆五十八年由委署筆帖式襲世管佐領嘉慶元年湖北教匪滋事德英阿赴軍營協剿二年隨署廣州將軍明亮敗賊於草甸敘功 賞戴花翎五年隨參贊大臣德楞泰追川省賊匪張子聰等於嘉陵江破其眾斬賊首雷世旺及賊目多人 賞巴圖魯名號六年五月升協領十一月復隨德楞泰擊賊於蒼溪賊眾屯大元場我兵分路進剿德英阿等由陳家壩等處合擊敗諸木橋子七年五月德楞泰移師楚省剿蒲天寶股匪於水溝德英阿扼其東與大軍夾剿殺千餘人得 旨嘉獎六月追賊至興山賊眾屯桂林坪據民寨爲固

德英阿以山路險仄率眾棄馬步行入壘戰踰時擒斬數百人破其巢獲器械牲畜無算七月蒲天寶屯聚鮑家山德英阿偕副都統色爾滾總兵蒲尙佐等伐木通道攻克賊巢擒斬甚眾獲蒲逆家屬 命俟辦竣保奏優加恩獎十月復隨德楞泰敗戴四崔胡等股餘匪於朱家溝旋擊青黃兩號餘匪於雙池敗之十一月由歸州西剿巴東巫山餘匪圍賊眾於黃泡池擒首逆陳侍學及僞先鋒等盡剿殲其眾得 旨嘉賚八年三省大功告竣補行引見 命軍機處記名十五年六月授阿勒楚喀副都統八月調吉林副都統旋調甯古塔副都統十八年九月河南教匪李文成倡亂陷滑縣直隸長垣東明山東曹單諸縣逆黨相繼蠢動 命德



英阿偕副都統色爾滾率吉林馬隊兵一千馳赴軍營協剿十一月長垣一帶賊匪竄入河南封邱諸縣有西入太行之勢欽差大臣直隸總督那彥成令帶兵堵截會逆首李文成自滑城潛竄輝縣德英阿偕總兵楊芳等由淇縣迎勦偵知賊黨屯聚司寨因設伏於白土岡遣兵誘之賊出三千餘人來迎轉戰入伏中官兵三面蹙之殺賊六百餘眾奔潰退據山梁死拒我軍奮勇仰攻復擊殺無算得脫者僅百餘人遂乘勝抵司寨四面圍攻得旨獎賚並下部議敘時賊匪潛伏寨內不出德英阿等督勵兵勇自寨後毀牆直入短兵相接賊眾猶抵死抗拒乃四面舉火且焚且攻李文成與其黨匿於高樓德英阿率眾先登槍斃賊目劉國明李文

成自焚死餘黨盡殲捷入 賞加都統銜先換一品頂帶並給雲  
騎尉世職十九年擢甯夏將軍二十二年六月調成都將軍十月  
署四川總督十一月回任道光元年正月授烏魯木齊都統以滇  
省永北應夷匪滋擾 命暫留川省借總督蔣攸銛等經理防堵  
事宜六月夷匪平德英阿赴都統任十一月以給事中張鑒奏節  
新疆冗費請於兵丁月糧改支本色 命德英阿偕伊犁將軍慶  
祥悉心籌畫妥議二年四月德英阿等覆奏新疆南北兩路各營  
兵糧除將屯糧支放外餘皆支給折色俾資日用若槩支本色則  
謀生恐形拮据且經費所節無多而於邊防甚有關繫請仍其舊  
上允之十二月調綏遠城將軍四年復授成都將軍五年調烏里

雅蘇臺將軍六年七月以逆裔張格爾入卡滋事大兵進討 命  
爲伊犁參贊大臣七年授伊犁將軍八年七月奏言新疆南路茶  
葉大黃經欽差大臣那彥成奏定章程嚴禁北路伊犁塔爾巴哈  
臺與哈薩克布魯特諸部落及南路各城毗連若不一律嚴禁恐  
難免偷漏請就北路情形酌中籌議嚴定章程禁安集延交通之  
弊並籌內地兵民所食茶葉分別應禁應准與大黃一律稽查並  
請安設官商配引給票務使奸商不能夾帶安集延不能偷販疏  
入 上嘉其所議詳細周妥十月奏請籌款增給伊犁各員養廉  
九年二月奏陳嚴禁各城需索苛派諸弊均得 旨如所請行三  
月兼正白旗蒙古都統五月卒 諭曰伊犁將軍德英阿由世襲

佐領游升將軍歷任各處均能認真辦事屢經四川湖北陝西河南等處軍營打仗受傷著有勞績見在伊犁整飭營伍控制回夷均臻妥協正資倚任前據奏患病卽賞假令其安心調理今遽聞溘逝殊堪軫惜德英阿著加恩晉贈太子太保銜賞銀二千兩照將軍例賜卹著鄂容安派委員弁護送入關妥爲照料沿途經過地方一體遵例支應伊姪伊昌見在黑龍江防禦著特依順保卽飭令前往迎護俟到京之日准其入城治喪所有任內一切處分悉予開復應得卹典該衙門察例具奏十二月觀回 特命慶郡王縣懋前往賜奠 賜祭葬 子諡剛果德英阿無子姪伊昌襲雲騎尉兼世管佐領



右 國史館本傳

國朝書狀真敬切編

卷三十三 將帥五十七

八

SECRET

74

170 - 608

扎克桑阿

扎克桑阿格吉勒氏滿洲正紅旗人伊犁駐防嘉慶六年由委前鋒校補驍騎校十年升防禦十三年升佐領十六年阿克蘇山水漲發衝毀城垣倉庫參贊大臣鐵保令扎克桑阿等監修事歲以督催妥速下部議敘十九年正月升協領八月赴京引見得

旨交軍機處記名二十四年賞頭等侍衛充塔爾巴哈臺領隊大臣道光三年賞副都統銜並花翎四年七月塔爾巴哈臺參贊大臣哈齊香阿劾扎克桑阿於哈薩克占袋里等潛入科布多地方搶奪牲畜毆辱官長派令前往查辦推諉遷延犯無弋獲請旨懲處上責其怠玩命仍畱會瑪伊拉虎地方迅速協緝十

二月扎克桑阿列款揭告哈齊香阿 命伊犁將軍慶祥往訊所  
控多誣惟給與官兵翎頂及差派官兵接眷屬實降哈齊香阿爲  
二等侍衛扎克桑阿亦以緝捕賊犯怠玩從事復以細故稟揭參  
贊大臣挾嫌妄告 命先行開缺回伊犁駐防聽候部議尋議降  
三級調用補防禦六年六月回部逆裔張格爾糾結安集延布魯  
特回眾入卡滋事陷西四城揚威將軍大學士長齡督師進討奏  
請以扎克桑阿升補協領帶赴阿克蘇軍營差遣尋補伊犁滿洲  
營協領十一月長齡劾烏什辦事大臣慶廉不諳吏情請調庫爾  
喀喇烏蘇領隊大臣多貴往署並派扎克桑阿幫辦 允之七年  
四月官軍大破賊眾於沙布都爾莊移師進剿首逆張格爾合醜



類十餘萬人屯聚阿瓦巴特回莊負隅抗拒長齡率將領分勦大  
破其眾擒斬三萬餘人扎克桑阿以接戰奮勇 賞副都統銜尋  
大兵克復喀什噶爾張逆潛竄出卡匿於木吉地方參贊大臣楊  
遇春率兵追捕扎克桑阿帶兵追至阿賴山遇竄賊數十人斬獲  
殆盡七月授葉爾羌幫辦大臣尋以克復四城凱撤論功下部優  
敘八年偕辦事大臣恆敬奏言葉爾羌舊城迤西罕那里克地方  
勘定界址請移築城垣建蓋兵房以嚴防守 諭俟直隸總督那  
彥成到彼相度形勢定議具奏候旨辦理九年正月因病請開缺  
回旗調理 許之六月卒子錫拉善伊犁印房章京額外員外郎  
加知府銜巴哈善滿洲協領加副都統銜

右 國史館本傳

陰功保

陰功保張佳氏滿洲鑲紅旗人嘉慶元年由火器營烏槍藍翎長隨都統巴克坦布會剿楚省教匪進兵襄陽之草店繞截橫衝賊大潰嗣因賊竄豫省邊界火器營兵自東南兜剿扼其去路賊由巒張家集北竄我軍前後夾擊殲斃甚眾二年正月賊屯容合店山岡陰功保隨前鋒參領鍾福從東南山岡攻撲賊眾不支棄寨竄旋於武勝關防堵三月回京十七年補護軍校十八年九月河南教匪煽亂陷滑城陰功保隨護軍統領慶祥馳往軍營協剿十月賊眾屯據道口迭出焚掠大軍分路夾擊斃賊千擒百餘人賊敗回道口負嶠拒守與滑縣匪徒互相勾應官兵三面進攻奮力

街殺復用大礮轟擊燬賊巢斃賊甚眾奪獲馬匹器械無算十二月圍攻滑城豫於西南角掘地道置地雷乘機轟擊城裂陰功保隨慶祥冒突煙火奮勇殺入大軍後先策應執賊渠徐安國牛亮臣餘匪盡殲論克復滑城功得 旨交部優敘十九年凱撤回營二十三年補空花翎二十四年升委護軍參領道光元年升副護軍參領三年升護軍參領七年擢正黃旗漢軍副都統九年六月授英吉沙爾領隊大臣旋調喀喇沙爾辦事大臣八月卒子百祥百朋均烏槍護軍校

右 國史館本傳



觀喜

觀喜瓜爾佳氏滿洲鑲紅旗人西安駐防乾隆四十九年甘肅逆回張文慶等踞通渭縣石峯堡以叛大兵進討觀喜由前鋒隨西安將軍公傅玉剿賊有功嘉慶元年又隨西安將軍恆瑞征湖北教匪先後殺賊六十名生擒十二名二年四月補驍騎校九月升防禦十一月升佐領十二月於四川之營山縣攻賊中矛傷五年二月经略大臣額勒登保將連次出力各將領奏請 施恩觀喜賞戴花翎九月攻賊於西鄉縣之土地嶺復中矛傷十月遷協領七年陝西賊匪分竄咸甯縣之大峪口尋竄孝義藍田等處觀喜帶兵往來堵截十六年擢山西殺虎協副將二十四年調四川維

西協副將二十五年遷直隸天津鎮總兵道光元年調福建臺灣  
鎮總兵二年洋盜林烏興等三十七人在洋行劫拒傷官兵觀喜  
遣遊擊黃清泰等率兵殲獲三年嘉義縣拏獲拒捕賊犯黃心例  
應斬監候觀喜以地處海外未便稽誅請卽行正法得旨申飭  
四年以疾解任五年病痊授直隸正定鎮總兵六年正月授杭州  
將軍二月調荊州將軍六月奏荊州逍遙湖隄身衝決山水與江  
水接連勢如建瓴直灌隄內民田被淹上以地方驟被水災原  
應由驛馳奏但擅發五百里急遞致駭聽聞飭之八年入覲  
賜紫禁城騎馬九年六月因傷病舉發奏請回旗調理許之九  
月卒賜祭葬子諡果毅子色布徵阿江甯副都統

右 國史館本傳

荊州將軍觀公喜本名觀音喜後改今名字吉蘭陝西駐防鑲白旗人嘗從征大小金川及白蓮教匪歷功道光二年代音公登額鎮臺灣余方被議罷公以臺人愛余引爲兄弟交數從問事余竭誠告之上元葉公以臺灣道再遷爲閩撫建言臺灣戍兵驕悍費繁無用請由臺地召募 上命與總督議之閩督慶公未議罷去葉公兼督篆檄公議改公以問余余言其不可且爲說以上公善之寢其事未幾葉公罷去趙文恪來督閩浙軍遂定議仍如舊制四年春公以疾歸陝五年起鎮真定入 覲 上猶問臺灣戍兵事公面對制不可改且陳召募之害甚悉 上嘉納以公知兵擢

爲杭州將軍七年移荊州九年正月入 覲數 召見寵待有加  
賜紫禁城騎馬四月回鎮尋病乞歸九月卒公歷戎行久所至訓  
練士卒甚勤勵而各營驕惰成習皆憚公之嚴也公每語人曰某  
武人守職惟知操兵養馬而已不知其他又以臺灣戍兵事得自  
余言逢人輒稱述之其讓善如此數以書問余所急在臺日嘗助  
余以千金代償官負有古人之風焉

右識小錄姚瑩撰



德海

德海富察氏吉林阿勒楚喀滿洲鑲黃旗人嘉慶四年由馬甲派赴四川軍營五年隨經略大臣額勒登保撲滅張漢潮賊匪賞戴藍翎十六年授防禦十八年九月滑縣教匪牛亮臣李文成滋事分擾山東河南之交十一月德海隨總兵楊芳勦李文成於輝縣之司寨殲斃賊目劉國明等李逆自焚死敘功賞毅勇巴圖魯名號十二月大兵圍滑縣穿地道置地雷轟城德海隨攻西南城角克之旋調赴陝西十九年二月隨勦劉二股匪事竣擢額外佐領二十年升協領道光四年正月補雙城堡協領因三姓協領任內私添兵丁鹽菜銀兩一案革職畱任十一月投阿勒楚喀副

都統五年調黑龍江副都統六年大兵進剿逆回張格爾 上命  
德海管帶黑龍江官兵馳赴軍營七年二月隨參贊武隆阿統領  
滿兵一千三百餘名作爲前敵由樹窩子一路兜截抄擊三月師  
距洋阿爾巴特莊十餘里地平曠西南有沙岡一道橫亘六七里  
賊匪憑高排列約二萬餘人大兵分三路進德海隨武隆阿攻其  
右賊據岡下壓我兵一鼓作氣大敗之賊退保沙岡我軍槍箭所  
至賊勢披靡追殲萬餘擒三千有奇奪獲器械馬匹無算進至排  
子巴特賊於沙布都爾莊外臨渠排列眾十餘萬德海冒險越渠  
短兵接戰殺賊甚眾進偏渾水河賊梟渡逃竄追殺三十餘里殲  
戮無算乘勝抵喀什噶爾德海分領馬步各隊攻克漢城據其北

面并力圍攻復其城得 旨從優議敘十年二月以病請回旗四  
月行抵莫爾根城卒子富森官協領

右 國史館本傳

國朝通志卷之三十一

三



哈哈岱

哈哈岱瓜爾佳氏滿洲鑲紅旗人青州駐防乾隆四十九年由領催升驍騎校五十六年升防禦六十年升佐領嘉慶八年升協領十八年九月山東曹州賊匪滋事屯聚扈家集巡撫同興偵知賊欲赴河南滑縣與逆首李文成竄合飭哈哈岱率青州駐防滿洲兵馳赴兜勦哈哈岱偕運司劉清參將馬建紀由定陶攻扈家集之東都司周添璋由曹縣攻其南副將凝德遊擊五達色攻其北同時並發哈哈岱率兵先至賊聚眾迎拒哈哈岱督官兵先用排槍擊之繼擲以火毬乘風延燒焚其巢賊潰奔官兵四面合圍殲斃千餘人生擒百餘人奏入得 旨嘉獎並 諭曰哈哈岱等如

再行保奏候朕加恩十月賊復聚安陸  
集哈哈岱偕參將馬建紀等兩路夾擊賊敗奔官兵追剿二十餘  
里斃四百餘人獲器械牲畜無算生擒賊目曹光輝射斃偽元帥  
袁興邦偽大將軍周姓捷入 賞戴花翎仍下部議敘 諭曰東  
省賊匪經官兵連次痛剿之後境內已經廓清惟零星餘匪難免  
伏匿且直豫邊界正當官兵追剿之時猶恐竄入東境所有東省  
與直豫接壤之處俱責成同與率領哈哈岱等隨時策應二十四  
年遷江甯副都統道光二年因病奏請休致 允之以曾經出師  
打仗著有勞績加恩賞給全俸十年卒子倭興阿文舉人官佐領

右 國史館本傳

穆蘭岱

穆蘭岱顏扎氏滿洲正藍旗人西安駐防嘉慶五年由驍騎校升防禦十二年遷佐領十八年九月河南教匪李文成滋事上命陝甘總督那彥成統兵征剿十二月大兵克復滑城以穆蘭岱奮勇殺賊賞勁勇巴圖魯名號二十三年擢涼州副都統道光二年三月授西甯鎮總兵閏三月西甯口外野番滋擾穆蘭岱率副將李士林等帶兵疾馳至克克烏蘇偵探東西溝內藏匿番賊分兵兩路冒雪前進乘其不備直抵賊巢斬獲甚眾五月隨陝甘總督長齡搜捕餘賊盡數殲除以蔽功迅速下部議敘七月補鑲黃旗漢軍副都統授西甯辦事大臣五年疏劾包攬頂替貽誤年班

之扎薩克有 旨瑪吉格策楞旺扎爾多爾濟車布騰俱交理藩  
院議處七年四月丁母憂 命暫留西甯督辦野番搶劫蒙古案  
事竣補行穿孝百日後仍回西甯署理辦事大臣事務八年八月  
西甯管轄之玉樹百戶原牧地方被果洛克賊番搶掠玉樹番族  
番人十餘戶逃奔青海穆蘭岱疏請暫令住牧 上允之九月奏  
請與西甯鎮一體校閱營伍 諭曰西甯辦事大臣向遇軍政之  
年會同該督出考舉劾並不閱看官弁騎射平時亦不督同操演  
茲穆蘭岱因接奉前此訓飭新疆各城大臣勤加操練諭旨請督  
同西甯鎮一體閱伍尙爲覈實起見著照所請准其督同該鎮隨  
時勤加訓練每遇軍政之年閱看副將以下官弁騎射再行出考



以符名實十年卒子巴達攬二品廕生官防禦巴彥善文學人陝西候補按察使經歷

右 國史館本傳

國朝詩林卷之三十一  
下

--	--	--	--	--	--	--	--	--	--

博克順

博克順鈕祜祿氏滿洲鑲黃旗人內大臣一等子額亦都裔孫兵部尙書降補員外郎福慶子額亦都福慶自有傳嘉慶元年博克順由監生授鑾儀衛整儀尉四年升治儀正七年升雲麾使十六年遷冠軍使二十二年軍政卓異列一等 上以博克順步箭平常改爲二等二十三年擢頭等待衛在乾清門行走二十四年九月授奉宸苑卿十月文穎館不戒於火博克順以撲救出力下部議敘二十五年授鑲紅旗蒙古副都統道光元年三月充右翼監督七月內閣侍讀學士福彰阿奏請將贖回旗租地畝售賣生息廣增八旗兵額 命八旗都統副都統會議博克順偕鑲黃旗滿

洲都統英和等奏言售賣贖回旗地顯違立法本意且發商生息難免拖欠至廣增八旗兵額九千八百餘名析計之則每佐領下所添無幾未見有濟惟查戶部冊存旗民官荒地等八萬餘頃請旨飭交直隸總督派員查明可墾者卽行升科難墾者召佃試種其實在水衝沙壓者設法改爲蘆洲牧廠如果辦有成效歲入約計可得銀三四十萬兩卽請 恩賞八旗別籌調濟之法庶可經久無弊疏入如所議行十月遵 旨清查八旗抱養民人之子偕都統哈迪爾等查出本旗民人冒入旗籍者三百餘名內閒散兵丁一百七十八名請卽銷檔改人民籍其見食錢糧者請照乾隆二十一年之例另冊註明及身而止奏入 從之先是喀什噶爾



參贊大臣武隆阿幫辦大臣秀堃疏請各省綠營馬兵以一半作  
爲旗缺令駐防子弟挑補其所出之缺令本處駐防閒散挑補二  
成調取在京旗人往補八成有 旨命八旗都統副都統會議具  
奏十一月博克順偕都統英和等奏言各省綠營與駐防相距寫  
遠不但遠行不便且以百數十年參養之旗人無故以馬甲改挑  
馬兵不復回旗在京旗人復令陸續換防不復回京至綠營兵丁  
倚餉爲生一旦遽撤其半亦難使之帖服事涉紛更應毋庸議  
上是之二年正月授鑾儀衛鑾儀使十一月 南郊大祀 上以  
齋宿初次乘輦翊衛整齊行走平穩 賞加一級九年二月署鑾  
白旗護軍統領四月扈 蹕盛京九月 諭曰額亦都爲我朝開

國功臣本日朕蒸謁 福陵後前往賜酌緬維先代勳勞允宜賞  
延後嗣鑲紅旗蒙古副都統鑾儀使博克順當差有年且此次東  
巡每日豫備 皇太后安輿俱臻妥協著加恩賞戴花翎並賞穿  
黃馬褂十二月復充右翼監督十年卒子勳成頭等侍衛

右 國史館本傳

## 安楚拉

安楚拉庫雅拉彥扎氏吉林滿洲正黃旗人嘉慶二年川陝楚教匪不靖安楚拉由前鋒隨副都統賽沖阿赴川勦辦四年三月雲陽月藍號賊首蕭占國張長庚等由閬中折擾營山我師由黃土牆迎擊斃賊四百餘賊潰竄據譚家衝安楚拉奮勇奪隘短兵相接斬蕭張二逆於陣殲賊八百生擒賊目王家光等八百六十七人捷聞下部議敘時東鄉白號首逆冷添祿屯據悅來場大兵乘勝由閒道冒雨進勦追至廣安州之城頭堰斃之餘匪俘馘甚眾安楚拉在事有功賞戴藍翎四月隨參贊大臣額勒登保追勦東鄉白號股匪張子聰於雲陽縣之蒲家山克之張逆敗走復

糾同賊目蕭焜句結襄陽黃號賊首樊人傑太平黃號賊首龔建  
奉節線號賊首卜三聘龔文玉等分投竄合我兵連敗之於塞水  
壩楊家山譚家壩等處屢有斬獲安楚拉受石傷十年補驍騎校  
十四年升防禦十五年升佐領十八年九月直隸長垣教匪滋擾  
延及山東河南賊渠李文成陷滑縣安楚拉隨副都統色爾滾往  
剿十一月大軍圍滑縣文成竄踞輝縣之司寨我兵前後兜圍李  
逆窮蹙舉火自焚死餘黨悉就殲擒敘功 賞換花翎二十一年  
授協領道光六年逆回張格爾入卡滋事安楚拉隨揚威將軍長  
齡往討賊眾十餘萬蜂擁屯阿瓦巴特回莊依岡背河嚴陣以待  
我師張兩翼進左右仰攻賊潰官兵復馳過沙岡追斬三萬擒二



千誅賊目阿瓦子邁瑪底那爾巴特阿渾奪獲馬匹器械無算捷  
入 賞加副都統銜八年三月授甯夏副都統四月因病乞休致  
諭曰安楚拉屢次軍營奮勉得受傷痕今在軍營染受潮溼舊病  
復發醫藥罔效著加恩准其以原品休致應如何賞俸之處著交  
兵部辦理尋議上得 旨安楚拉曾經出兵打仗殺賊捉生受傷  
加恩賞給全俸以養餘年十年卒

右 國史館本傳

國朝詩集卷之二十七  
三

佛隆武

佛隆武敖佳氏滿洲鑲白旗人伊犁駐防由前鋒校於嘉慶二年補驍騎校三年遷防禦六年升佐領十七年升協領道光四年命以副都統銜充塔爾巴哈臺領隊大臣並賞戴花翎六年七月以塔爾巴哈臺盜馬人犯在禁潛逃佐領蘇倫泰查拏未獲誤將王子伯克箭傷拏解借參贊大臣彥德奏請褫蘇倫泰職從之時回部逆裔張格爾糾眾入卡滋擾土爾扈特親王恩柯濟爾噶爾兩次籲請帶兵前往軍營效力佛隆武借彥德以聞上以該親王誠悃可嘉惟游牧在塔爾巴哈臺地方距回疆甚遠無須帶兵前往佛隆武等遵旨嘉獎並傳諭止之十月揚威將

國朝通志卷三十一  
軍長齡咨令塔爾巴哈臺挑選馬匹撥送伊犁轉解軍營應用佛  
隆武等派令游牧領隊大臣巴雅爾選馬五千匹委員陸續解往  
並具奏以 聞七年四月恩柯濟爾噶爾復因回疆未靖呈進馬  
五百匹備用 上亦以誠惻嘉之尋經長齡咨稱軍營無需馬匹  
佛隆武等卽傳 諭嘉獎並令其停止呈進八月因病陳請休致  
允之十年卒子扎克黨阿官筆帖式

右 國史館本傳



達凌阿

達凌阿佟佳氏滿洲鑲黃旗人嘉慶元年由健銳營前鋒隨總統  
永保赴湖北軍營勦捕教匪累戰有功尋隨四川總督勒保勦賊  
於東鄉疊有斬獲授藍翎侍衛六年隨經略額勒登保追賊入陝  
擒賊目王士虎王士勤等升三等待衛七年川匪苟文明由川越  
陝出沒老林中達凌阿偕陝西提督楊遇春副都統格布舍等截  
擊冒雨進攻矛斃苟逆升二等待衛八年授陝西撫標右營遊擊  
十二年升陽平關參將十五年調撫標中軍參將十八年八月升  
靜甯協副將九月署西安鎮總兵十月陝西岐山縣三才峽木廂  
匪徒楊二萬五等因饑煽亂竄入寶雞盤屋等處聚眾肆掠巡撫

朱勳檄達凌阿進剿擒斬甚眾會別股匪徒林老么等滋擾鄆縣  
達凌阿破之於炭場餘匪潰竄十九年正月賊目楊二爲官兵擊  
敗率眾投誠請入賊中招降爲其黨尤九等所殺達凌阿統兵往  
剿敗之於黑水峪賊眾南竄復追敗之於傅家河先後殺數百人  
餘眾竄蓋屋山內達凌阿策賊眾逃竄必由寬溝豫設伏以待賊  
至伏起擒首逆萬五盡殲餘黨捷入 賞加總兵銜二十五年正  
月擢巴里坤總兵四月調陝西陝安鎮總兵道光二年升烏魯木  
齊提督六年五月回部逆裔張格爾糾合安集延布魯特等入卡  
滋事喀什噶爾被圍大學士揚威將軍長齡令達凌阿統兵四千  
往援會喀什噶爾英吉沙爾葉爾羌和闐四城相繼爲賊攻陷

上命達凌阿至阿克蘇駐守途經庫車因賊眾逼近城下請留兵防堵許之八月抵阿克蘇疏陳西四城既陷惟保護阿克蘇烏什庫車三城及阿克蘇迤東臺站爲最要上深是之時逆匪遺其黨由巴爾楚克一帶潛入阿克蘇南路屯聚渾巴什軍臺經辦事大臣長清擊退餘眾猶盤踞渾巴什河南岸達凌阿軍至沿河駐守賊復自喀什噶爾糾眾數千躡淺渡河攻烏什所屬察哈拉克臺四出焚掠達凌阿率兵勇迎勦至阿拉爾回莊鏖戰逾時殲賊三百餘人餘匪敗退迨至沙坡樹窩會賊日和卓庫爾班素皮率別股由托什罕過河攻圍協領都倫布營分斷援路距城僅二十里達凌阿回兵赴援與各路官兵夾擊復大敗其眾斬庫爾班

素皮賊黨遠竄河北肅清捷入 上嘉其督率有方 命交部從  
優議敘七年正月揚威將軍長齡整旅進討偵知逆裔潛踞喀城  
統兵由樹窩子開道直入令參贊武隆阿等居前自率達凌阿等  
爲後應連破賊於洋阿爾巴特等處進拔喀什噶爾張逆遁卡外  
官兵收復四城長齡以葉爾羌地廣人眾數倍他城不可無重兵  
彈壓令達凌阿帶兵移駐四月 命署理葉爾羌辦事大臣七月  
大兵凱撤 諭曰逆裔張格爾入卡滋事攻陷城池戕害官弁阿  
克蘇伊勒都軍臺官兵被賊殺害賊眾在渾巴什河南岸屯聚偪  
近烏什存城官兵不滿三百時揚威將軍長齡距大營尙遠賊氛  
甚熾勢若燎原儻守禦無方致有失事則東四城俱危如朝露達



凌阿一聞征調卽帶勁兵往援與長清盡力防禦渾巴什河南岸及烏什察哈拉克臺之戰殺賊無算並將賊首庫爾班素皮等殲斃已爲殄賊之先聲是長齡等未到之先非達凌阿不能痛禡賊魄保障東西城俾大兵進取有資厥功甚偉見當大功告竣允宜特沛恩施用酬懋績達凌阿著賞給雲騎尉世職以示朕論功行賞之至意九月回烏魯木齊提督任十月途次阿克蘇因偵知張逆在阿坦台汰劣克愛曼處藏匿 命移兵烏什以備夾擊八年正月大兵生擒張格爾於喀爾鐵蓋山西陞蕩平繪功臣像於紫光閣二月回提督任十一月 命以提督銜爲塔爾巴哈臺參贊大臣九月授西安將軍十年卒 諭曰西安將軍達凌阿由侍衛

屢次出兵游擢提督前此回疆軍興曾以勦賊著績賞給雲騎尉  
世職並繪像紫光閣上年由塔爾巴哈臺參贊簡授西安將軍方  
資倚任茲聞溘逝深堪軫惜著照將軍例賜卹並加恩由陝西藩  
庫賞銀三百兩經理喪事到京之日准其入城治喪任內所有處  
分悉予開復應得卹典該衙門察例具奏尋 賜祭葬 予諡武  
莊子慶安襲雲騎尉世職官三等侍衛

右 國史館本傳

巴杭阿

巴杭阿富察氏滿洲鑲紅旗人西安駐防乾隆四十六年由馬甲  
隨將軍伯伍彌泰協勦甘肅撒拉爾逆回連戰龍尾山諸處四十  
九年甘肅逆回田五等復據石峯堡叛大兵進討巴杭阿隨征俱  
有功嘉慶元年二月湖北教匪滋事西安將軍恆瑞奉命率兵  
三千偕湖廣總督畢沅巡撫惠齡等會勦巴杭阿隸焉連戰竹山  
諸處殺賊數十人受石傷得賞賚十一月以殺賊奮勇賞戴  
藍翎十二月勦賊於襄陽吳家集受矛傷復得恩賚二年四月  
擊賊於山陽十里鋪奮勇先登矛傷額功列超等六月補驍騎校  
十月遷防禦五年升佐領九年二月三省教匪平餘黨閒於老林

伏匿巴杭阿隨將軍賽沖阿逐處搜捕八月以殲滅餘匪功經欽  
差大臣德楞額奏入 賞換花翎甯陝營新兵滋事首逆蒲大芳  
在盤屋郿縣一帶沿山奔竄有由寶雞益門鎮西竄甘境之勢官  
兵分三路截剿巴杭阿偕副都統蘇勒芳阿等率馬隊官兵由梅  
凹順溝馳抵良玉遇賊三千餘迎戰官兵奮勇衝擊斃賊數千人  
首逆蒲大芳受傷墮馬生擒僞先鋒彭貴等餘匪敗竄巴杭阿亦  
受矛傷得與 獎賚十二年復敗賊於瓦石坪餘匪旋平十八年  
陝西岐山縣三才峽木廂匪徒因饑煽亂巴杭阿隨總督長齡等  
進剿十九年大軍生擒首逆龔貴盡殲餘匪巴杭阿在事有功  
命以協領升用先換頂帶九月補協領道光二年授廣州副都統



十年卒子富祥防禦

右 國史館本傳

四庫全書

四

宜縣阿

宜縣阿鈕祜祿氏滿洲鑲紅旗人荊州駐防乾隆六十年五月湖南苗匪吳半生等糾眾煽亂宜縣阿由前鋒隨荊州將軍興肇往剿七月賊眾擾辰谿之巖門我軍迎擊痛殲之復赴援楊柳坪賊據險抗拒大兵兩面仰攻斃賊無算十月連克馬腦等十餘寨吳逆從鴨保竄高多寨恃眾負隅乃分兵四面攻擊大敗其眾執賊渠吳半生十一月改攻龍角峒奪卡二十十二月擊賊於高斗山克之嘉慶元年正月進攻禽頭坡吉吉寨疊有斬獲二月克火里坪燬賊巢乘勝直撲高吉坨殲戮甚眾八月師抵麻里灣奪賊卡十餘座又敗賊於平隴十一月由我石巖貴魚坡一路搜剿俘賊

自朝者... 卷三百一  
三  
殆盡二年二月川陝楚教匪滋事復隨興肇赴楚協剿三月遇賊  
於裕州之古石灘設伏山坳伺賊至飛礮擊之殲斃無算五月敗  
賊於嘗溝七月進克白楊坪八月取道楓樹埡奮力截擊斃賊八  
百生擒賊匪多名三年二月賊屯石板埡據山抗拒率眾仰攻擒  
斬無算三月賊黨李全撲蓋屋城馳往解其圍斃賊千餘七月進  
剿孟石嶺顧金壩擒斬賊匪二千九月賊目張漢潮由太平竄至  
石泉官軍迎擊大敗之十一月賊竄兩關倍道抄擊俘斬五百餘  
名四年正月敗賊於茅子溝三月追賊於馬家坪又擊賊於紅門  
寺疊有殲擒尋升驍騎校七月進擊金竹溝斃賊百餘八月師次  
雪水河斬賊千餘十月官軍剿賊於張家坪陣斬賊首張漢潮宜



繇阿在事出力五年回楚防堵六年升防禦九年升佐領十三年  
升協領道光四年授成都副都統五年九月偕將軍德英阿奏滿  
營孤寡人等酌給養贍請將馬價銀兩及鹽茶耗羨款內湊撥銀  
二萬兩發商一分生息每年得息銀二千四百兩每名口每月給  
銀一兩得旨允行十年卒子穆騰額官驍騎校勒豐額文舉人  
光祿寺署正

右 國史館本傳



劉起龍

劉起龍廣東新安人由行伍出洋緝捕累功拔香山協右營千總嘉慶十五年洋盜烏石二東海霸及烏石大曹亞晚等連踪肆掠起龍隨副將洪鼈都司胡佐朝等分督戰艦追賊於硃洲洋面奮勇進攻自申至戌沈獲各十餘艘擒張亞安等百餘名復追至儋州新英外洋圍攻首逆烏石二擒之並礮位火藥器械無算俘賊目符九家黃亞晚楊片客鄭耀章等洋面肅清十七年升東山營守備二十年遷硃洲外海水師營都司二十一年遷南澳鎮右營遊擊二十四年升崖州營外海水師參將道光元年遷澄海協副將三年升福建南澳鎮總兵六年擢水師提督 諭曰海疆重任

國朝書局影印本  
卷三十一  
三十一  
操防緝捕不可稍有率忽七年奏全臺形勢彰化居南北之中自彰化以南設有總兵一員副將參遊以下共二十三員彰化以北至艋舺計程幾及五百里僅有守備一員駐劄竹塹隸北路協副將管轄幅員既廣巡緝難周必須調撥員弁遞行移駐方足以資控制請將鎮標右營遊擊調駐竹塹改爲北路右營遊擊其竹塹原設之千總把總外委兵丁俱循其舊竹塹守備一員移駐淡水彰化交界之大甲另於鎮標右營千總把總外委調撥各一員步戰兵二百名駐防大甲歸於該守備管轄所有鎮標右營遊擊事務俱歸鎮標右營兼管又請於鎮標左營調撥把總一員步戰兵二十名移駐銅鑼灣撥外委一員步戰兵四十名移駐斗橫坪歸



北路右營遊擊管轄以資防守下部議行十年卒 諭曰福建水師提督劉起龍自行伍投效水師歷次出洋緝捕由千總擢至提督督率有方茲聞盜逝殊堪軫惜著加恩照提督例賜卹所有任內處分悉予開復應得卹典該衙門察例具奏尋 賜祭葬予重亮廣東大鵬協左哨頭司把總

右 國史館本傳

西曆一千九百零二年三月一日

三

薛國相

薛國相甘肅洮州人乾隆四十九年由行伍隨征石峯堡逆回游升把總嘉慶元年三月檄赴陝西商州軍營隨剿教匪五月大兵攻孤山寨國相在事有功六月調剿楚匪於楊柳驛棗陽縣土門衝等處追擊首逆齊王氏姚之富等屢有殺獲二年正月大軍敗賊於杏兒山等處殲斃四千餘人國相奮勇出力總統惠齡奏入命以應升之缺卽用七月官兵三路截擊李全徐添德等股匪自西牛壩追至江口國相殺賊尤力升直隸張家口千總三年正月追賊入川五月擊逆首王三槐於孫家梁石傷左眉骨追入南部縣界擒賊目二名八月隨將軍德楞泰攻賊首羅其清於大鵬寨

擒賊百餘名而受矛傷十二月羅半年股匪由徽縣走階州國相  
追擊之斬獲無數四年正月復追賊於鳳縣菜子嶺生擒二百餘  
名十月升西甯鎮標右營守備十二月各股匪自秦嶺老林竄聚  
嶓峪內兩廓地方山勢陡峻直下無路國相偕鄉勇首萬彪率兵  
勇從山勢乘夜縋下賊不虞我兵猝至驚潰殲斃百餘名獲賊目  
周正忠汪永福及餘賊六十餘名五年正月擢四川松潘鎮標右  
營都司十月升甘肅涼州鎮鎮羌營遊擊六年四月賊首冉學勝  
由隴州竄寶雞經略額勒登保統大兵趨益門鎮截擊令國相同  
副都統祥保馳赴鳳翔保衛平原五月伍懷志股匪自棧西折入  
棧東圖入南山國相等擊走之時零匪屯聚南山者專恃老林潛

匿國相於各峪口密布兵勇分路入林搜捕於高橋擒斬三十餘名於盩厔之光頭山黑圪塔等處搜獲偽總兵陳玉爾夏爾文探馬邱道洪餘匪悉就擒戮山內肅清 上嘉之 命交部議敘十一月赴紫陽澆溪河一帶防堵川界八年調往甯羌之關口壩一帶防堵陝界九年賊平赴鎮羌營遊擊任十一年隨剿陝西甯陝營叛匪事定回營十二年七月出師西甯口外剿捕賊番槍斃番目二名餘眾悉歸款九月凱旋十六年遷陝西固原提標中營參將二十年遷靖遠協副將道光元年擢直隸正定鎮總兵五年以傷發奏請回籍調理 賞食全俸十年卒子成龍直隸東明營都司孫廷璧從二品廕生以通判用



國史館本傳

右 國史館本傳

三二

曾受

曾受四川成都人由行伍調征廓爾喀拔補提標中營額外外委  
乾隆六十年隨總兵袁國璜征湖南苗匪屢有殺獲嘉慶元年三  
省教匪滋事二月調赴湖北軍營隨總督孫士毅進剿四月偕守  
備阿克東阿等擊賊於體河擒斬甚眾七月補松潘鎮標中營外  
委十月隨總兵何元卿攻賊於四川達州之茅坪奪獲大礮升川  
北鎮標右營把總二年六月隨廣州將軍明亮收復東鄉攻克張  
家觀等處賊寨 賞戴藍翎七月追賊入楚自楚入陝三年五月  
由陝西黃埔驛復追高均德股匪入川克龍鳳坪火神山箕山賊  
巢七月升維州協標左營千總九月進攻大鵬山寨殺賊受傷旋

隨尙書惠齡等勦賊於巴州濛子灘獲首逆羅其清並弟其書子  
涿福 賞換花翎四年隨攻麻巴塞八石坪大禾田大市川賊匪  
屢有擒斬五年三月隨參贊德楞泰擒賊首冉添元於馬蹏岡並  
僞總兵蕭其順升提標前營守備八月擢龍安營都司十二月隨  
德楞泰追勦高二馬五六年正月賊竄至山陽縣東北五里乾溝  
受僞副都統銜阿穆勒塔等敗之擒賊日龔如一斬僞元帥闊慎  
珍九月黃號逆首龍紹周竄竹谿縣上鵝坪受隨西安將軍賽沖  
阿目雪掩擊賊敗走十月隨總兵蒲尙佐攻竹谿紅茶園賊巢擒  
田國柱等數十人斬僞元帥葛騰勝盡殲餘賊升甘肅鎮番營遊  
擊七年二月賊擾大竹縣九盤寺受隨寶冲阿迎擊於蕭家場追

殺殆盡會青號陳自得股匪由巫山奉節竄至復隨四川總督勒保邀擊於蒲包山賊遁追二百餘里擒僞總兵羅世先三月隨副都統溫春由鐵鑪溝繞擊白號賊張簡於柏木園魚猷溝獲僞千總戴光月餘賊數十八月偕副將鄭啟貴參將張洪等追剿蒲添寶股匪與總兵喜明前後夾擊大敗之十二月偕副將馬元等搜剿李家溪零匪擒斬殆盡八年閏二月劉渣鬍子股匪聚巫山老鴉寨受隨總兵馬瑜等乘夜雨自烏雲頂僻徑抄賊寨後下攻賊驚潰擒僞先鋒熊富等二十二人餘匪棄寨狂竄蹙諸河干會雨後水漲斬溺無算尋搜川楚零匪五月襲賊於保康蝦蟆林內殲之九月獲僞總管李宗義十年凱撤回營十五年擢蘭州城守營

國朝通志卷三十一  
三十一  
參將十八年六月升永昌協副將九月河南滑縣教匪李文成等  
與直隸奸民林清結黨謀進攻陷滑縣十月欽差大臣那彥成檄  
受率固原官兵馳往會剿十一月賊首李文成率眾數千遁輝縣  
司寨受偕楊芳特依順保等設伏誘賊夾擊之擒斬二千餘得  
旨嘉獎下部議敘尋破司寨李文成伏誅進攻滑縣復其城下部  
優敘道光二年授湖北鄖陽鎮總兵八年擢湖南提督十年以病  
乞休尋卒子仕順二品廕生

右 國史館本傳



## 李東宣

李東宣湖北歸州人由行伍考取武生仍隨營效力乾隆五十三年補經制外委五十六年升督標前營把總六十年隨剿黔楚逆苗石柳鄧連克滾牛坡枯樹坪諸處旋攻鴨保寨左右股被傷功列二等嘉慶元年苗匪平川陝楚教匪作亂命領侍衛內大臣額勒登保移勝兵往剿東宣仍隸焉攻黃柏山大荒口大小十餘戰以功升宜昌鎮後營千總二年攻克馬湖營斃賊目張訓隴升襄陽城守營中營守備四年剿賊於開縣東鄉境身受矛傷尋以川匪羅其清屯聚箕山東宣隨額勒登保移師往剿獲其清弟其書及子泳福斃賊目冉文儔分兵剿冷天祿等股匪槍斃首逆張

長庚升貴州清江協都司五年正月擢四川川北營遊擊四月陝  
匪楊開甲由山陽竄雒南經大兵截勦折竄龍駒寨將窺河南東  
宣隨署提督甘肅提督楊遇春率兵三千由西而南扼其去路賊  
方謂攻輝峪川民寨官兵四面蹙之大敗其眾斬開甲子楊康賊  
目楊廣元等及餘賊六百餘額勒登保奏請鼓勵 賞戴花翎五  
月調湖北荆門營遊擊時伍金柱股匪由手攀崖竄至桐木溝分  
踞山梁東宣隨楊遇春督兵抄擊敗之擒殺七百餘人六年二月  
王廷詔高二馬五各股賊匪竄匿川陝邊界老林我軍分路搜捕  
擒廷詔高馬股匪竄入甯河至禪家巖楊遇春令東宣設伏於二  
郎壩山後龍峒溝賊至夾擊之與楊遇春等合力兜截擒高二馬

五餘黨就殲以生擒各首逆功 賞沙噶巴圖魯名號五月冉學  
勝股匪由平利竄入竹谿界屯聚高唐嶺劉家河一帶東宣督兵  
趨河溝斬獲三百餘人賊由楚境折竄北白河東宣取道五尺溝  
抄出楊伯坡設伏迎擊殲擒殆盡六月冉學勝竄至灤河青號徐  
天壽餘匪與之合同奔老林官軍蹙之於藍家山冒暑鏖殺直上  
山巔賊窘甚墜巖而下翻界嶺將謀入川東宣徒步率兵勇倍道  
追勦地險阻不可行將士皆以槍矛接遞猱引而進及黃墩擒斬  
二百餘人復追及四季河敗之十二月王山餘匪竄入固軍壩一  
帶東宣偕副將張瑤等冒雪兜圍擒賊目苟文富杜其瞻等八十  
餘名零匪勦捕無遺七年正月督兵在通巴一路勦辦各股零匪

四月賊踞小王湖於山坡西四散屯劄東宣乘夜潛襲賊營擒斬數十僞先鋒苟文清夥黨由平安寨大茨溝折竄秦嶺東宣先赴平安寨長溝設伏賊至乘夜襲之斬獲無數五月苟文明股匪竄傅家河磨子溝東宣偕副將張瑗等由秋木庵屨道迎擊苟逆旋竄入孝義額勒登保令東宣等領兵追剿而自督大兵夾擊沿途擒殺多名旋以楚省竹谿竹山一帶餘匪肆竄東宣領兵由興安平利二竹剿捕九月敗賊於陝境金河偏頭山賊踰山向平定河遁復追敗之於觀音寨尖山嶺時賊氛略靖而各股零匪竄匿三省邊界東宣等分路嚴搜自八年至九年擒斬凡數百人十年湖廣總督吳熊光以東宣久在軍營搜捕零匪勞績最著請加鼓勵

命以應升之缺升用十二年調鄖陽鎮遊擊二十三年升直隸固  
關營參將道光二年五月升河間協副將七月升大名鎮總兵五  
年以病請開缺回籍調理 允之十年卒

右 國史館本傳



國朝文獻通考卷一百一十四

四

多隆武

多隆武庫雅勒呢瑪奇氏滿洲鑲白旗人乾隆五十四年隨  
木蘭以截虎 賞戴藍翎五十五年遷三等侍衛五十六年廓爾  
喀賊酋擾後藏 命大學士福康安爲將軍征之多隆武隨營效  
用五十七年七月由哈那袞木山取道扎木攻克彌卡八月復自  
雍鳴進兵斃賊甚夥 賞陀莫爾歡巴圖魯名號六十年經略大  
臣額勒登保督師征苗疆多隆武由老虎巖進攻永綏之土空凡  
三晝夜克之復擊賊於蘭草坪升二等侍衛會苗逆踞榔木陀多  
隆武越寨攻之偪黃瓜山連奪毛頭塘等賊卡生擒首逆吳半生  
下部議敘嘉慶元年擊賊於乾州之捧風坳克木城石卡五六十

處遂復乾州擢頭等侍衛五年隨額勒登保剿四川邪匪賊以大兵夾攻將由兩當竄棧道多隆武分兵截擊殲擒無算六年追捕高二馬五於小埡子復剿冉逆於白楊樹溝適高魏零匪自乾溝河竄出多隆武由土木埡進剿迭有斬馘擢直隸山永協副將仍領兵防守七年剿斬士黃股匪於巴老樹八年師旋赴任十一年升天津鎮總兵十二年調山東兗州鎮總兵十六年調安徽壽春鎮總兵十八年七月擢四川提督十月山東曹州教匪起欽差大臣那彥成領兵剿辦以多隆武曾任兗州鎮總兵熟悉東省情形奏請畱營協剿旋於畢家集等處獲賊多名又赴河南滑縣截擊十九年黑河夷匪擾邊 命多隆武迅速回任駐川北防堵勿使

開入川境遂率兵由大谷堆進勦深入漢山擒首逆畢格得 旨  
議敘二十年贈對逆酋洛布七力劫寨多隆武由鑪城攻克藏多  
山進擊河西連戰皆捷交部議敘二十三年以所轄兵丁孫占鼈  
滋事部議降二級調用 上改爲降一級尋調廣東韶連鎮總  
兵二十五年升貴州提督道光元年正月調廣東提督五月授墨  
爾根城副都統六年大兵進討逆回張格爾 命多隆武往吐魯  
番駐紮策應十年四月調黑龍江副都統十二月會同援兵克復  
英吉沙爾喀什噶爾二城安撫夷眾迭蒙 賞賚有差十一年因  
病開缺回旗調治旋卒

右 國史館本傳

圖書集成彙編  
卷一百一十一

三



洪裔

洪裔浙江定海人乾隆四十六年由行伍拔補定海鎮標外委五十五年升左營把總嘉慶元年擒盜首沈畢和王仁等於黑水洋戮之二年遷鎮海營水師千總五年九月調提標右營千總十月升黃巖鎮標左營守備七年署昌石營都司獲洋匪林隔等於海礁洋九年回黃巖守備任獲洋匪印勾等於馬蹟洋十年六月追首逆蔡牽於青龍港獲逆黨彭求等二十餘名十二月又獲陶光法等三十八名於洋旗外洋十一年六月升黃巖鎮標遊擊十二月獲盜王曉等二十餘名於東柏洋擊沈盜船二十二年擊洋匪郭英郭勞等於披山洋獲之燬其船擒斬夥賊六十餘人十三年

正月遷廣東平安營參將八月率舟師勦郭婆帶張保仔等於牛  
角門外洋沈盜船六獲船四斃賊無數十一月升香山協副將十  
四年勦巨盜朱渥於金獅洋金鑲石等處沈船四獲船一時粵洋  
羣寇悉經勦撫中東兩路均無盜蹤惟西路烏石二東海霸等匪  
船百數十艘在高廉雷瓊等府洋面游奕伺劫十五年三月匪黨  
張保仔率眾投誠齋往彈壓四月兩廣總督百齡調派師船分隊  
西下檄率將備及張保仔等分領兵壯駛至廂州洋面賊蟻聚迎  
拒齋等左右轟擊沈盜船十餘獲船十六擒盜首張亞安等百三  
十餘名五月追至儋州新英外洋擊沈及燒燬匪船十餘獲船十  
七擒首逆烏石二並著名賊目烏石大烏石三鄭耀章等夥眾男

婦一千餘名東海霸畏勦乞降盡繳大小匪船及男婦四千餘口  
起獲軍械破位無算奏入 上嘉其奮勇 賞戴花翎並交部議  
敘尋遷高州鎮總兵十月因呈遞 萬壽賀摺差弁遲誤 命交  
部察議罰俸一年十六年調瓊州鎮水師總兵二十二年以年老  
休致道光十一年卒

右 國史館本傳

國朝詩林卷之三十一

三十一

國朝耆獻類徵初編卷三百十八目錄

將帥五十八

郭繼青

童鎮陞

孔廣源

呂天俸

都明

舒凌阿

恆敬

薩秉阿

愛新保

英惠

伍爾袞布

宗室斌靜

馬應國

馬玉麟

蔡鼎

王應鳳

何君佐

黃建功

裘安邦

國朝耆獻類徵初編卷三百十八目錄



皇朝通志卷之六十三

--	--	--	--	--	--	--	--	--	--

國朝耆獻類徵初編卷三百十八

通奉大夫前署江西巡撫江西布政使司布政使湘陰李桓輯  
將帥五十八

郭繼青

郭繼青浙江定海人嘉慶元年由行伍以捕盜功拔鎮標外委三年隨總兵李長庚勦捕洋盜屢有斬獲補中營額外外委五年四月追賊至閩省白犬洋攻倂賊艇賊擲火罐船裂繼青受傷墜水獲救 恩予賞賚俟得官日給與軍功加一級五月拔左營外委六年升把總八年遷中營千總尋調左營千總九月巡緝東涌外洋獲盜蔡狃等五月署中營守備八月隨總統閩浙水師提督李

長庚擊賊於江省之扁礁洋獲船一沈船二十年於廣東甲子外  
洋擊沈盜船二獲匪艇二同安船一閩四月獲盜彭求等於孝順  
洋沈其船十一年洋匪蔡牽擾臺灣繼青隨護金門鎮總兵許松  
年赴臺勦捕攻洲仔尾盜艇獲百六十餘名十二年隨總兵孫大  
剛攻蔡牽於馬齊外洋射執旗賊日落海賊乘風奔東南擊斃甚  
眾下部議敘十四年蔡牽遁入浙洋繼青隨福建提督王得祿浙  
江提督邱良功等合力衝擊燬其船蔡逆同妻子俱溺死 上加  
恩在事諸臣 賞繼青玉鞬一下部議敘十五年三月升瑞安左  
營都司七月復勦賊於魚山外洋獲船一八月追捕匪艇遇風漂  
至調山外洋船壞遇他舟得生復上山搜捕獲賊十七名十六年

六月擢黃巖左營遊擊十一月於大高陳洋面獲盜十四名大鈞  
船一十八年遷福建銅山營參將十九年六月護理海壇鎮總兵  
八月獲盜首周五等於白犬洋二十一年升澎湖外海水師副將  
二十二年擢金門鎮總兵二十三年二月  陞見  命賞假十日  
順途省親四月赴任道光三年以親老奏請終養  允之尋先後  
丁父母艱十一年卒子應三二品廕生

右  國史館本傳

國朝詩集卷之二十一

--	--	--	--	--	--	--	--	--	--



童鎮陞

童鎮陞浙江鄞縣人乾隆四十六年由行伍拔補浙江右營提標外委歷升千總五十九年升瑞安協水師右營守備嘉慶元年正月在披山洋面擊沈盜船一獲犯二十餘名八月隨總兵孫全謀擊艇匪於石浦淡水洋斃賊多名二年升温州鎮標左營外海水師遊擊九年遷江南川沙營水師參將十一年擢京口內河水師副將十二年六月授黃巖鎮總兵鎮陞籍浙江例應迴避經閩浙總督阿林保奏稱對調乏人得旨暫行補授九月洋盜蔡牽由普陀洋面北竄馬蹟鎮陞隨提督李長庚統領兵船追至盡山逆船由外洋南竄十二月勦張阿治股匪於南漁山外洋燬盜船二

獲船一十三年三月鳳尾幫匪眾在台州狗洞門洋面滋擾鎮陞  
率遊擊劉成魁千總胡殿魁等擊沈盜船一獲船一擒林桂等二  
十餘名七月逆匪朱濱與蔡逆先後竄過普陀北洋連幫句結鎮  
陞隨提督何定江率舟師連環攻擊匪船竄出深水外洋十四年  
正月蔡逆由閩洋竄入浙江温台一帶鎮陞以護送琉球難番向  
南行駛未經會同定海鎮合幫探勦經巡撫阮元奏參 諭曰童  
鎮陞統帶兵船在洋緝捕既已風聞蔡逆匪船竄至温台自應迅  
速合勦乃計不出此輒以護送琉球難番南下直至温州會遇閩  
浙舟師方折回北向定洋徒多周折有心避盜著先行革去頂帶  
仍交部嚴加議處尋議革職 上加恩改爲畱任二月蔡逆竄至

定海馬蹟洋鎮陞在積穀外洋擊沈盜船二獲許但等六名溺斃  
無算八月蔡逆復竄浙江旗頭洋面鎮陞首先追及率眾攻剿擒  
王烏等五十一名斬十餘級溺斃甚眾仍緊躡賊船及之於魚山  
外洋賊急竄黑水深洋會提督王得祿等率舟師剿擊鎮陞併力  
圍攻蔡逆受傷落海死捷入 賞還頂帶開復革畱處分十一月  
擢廣東提督先是粵省洋匪張保仔在洋肆擾經官兵剿捕畏罪  
投誠中路東路洋面已靖惟西路尙有烏石二東海霸各股盜匪  
在廉雷瓊一帶洋面往來十五年四月鎮陞統領舟師分三隊往  
剿在放雞洋面擊沈盜船數十擒賊黨朱亞寶等數百名盜船向  
南竄逸復追及儋州洋面擒烏石二及首從各犯數百名東海霸

等率眾乞降兩廣總督百齡奏 聞 諭曰全粵洋面一律蕩平  
允宜特沛殊恩用昭懋賞童鎮陞著賞戴花翎給予雲騎尉世職  
八月百齡奏請添設水師提督總兵並調補各缺 諭曰粵東地  
濱海洋水陸營務綦繁非陸路提督一員所能經理著照所請添  
設水師提督一員駐紮虎門地方所有新設廣東水師提督卽著  
童鎮陞調補二十一年以足疾請開缺回籍調理 允之二十四  
年病痊授江南提督道光元年正月 召來京二月授頭等待衛  
在大門上行走二年請假回籍十一年卒子載瑜浙江定海鎮標  
中營千總孫仁壽襲雲騎尉世職

右 國史館本傳



孔廣源

孔廣源原名光祖直隸正定人嘉慶元年由行伍拔補順德營外委隨提督慶成出師湖北九月總統永保追鍾祥縣教匪於雙溝子賊分竄棗陽及鄧州廣源隨慶成赴呂堰驛兜截賊退保葉家店廣源等入密林擊之賊大敗升宣化鎮右營把總二年理藩院尙書惠齡剿四川賊李全王三槐等於太平縣田家壩廣源隨慶成等率兵迎擊追殺二十餘里副都統銜六十七等偵知賊伏西牛壩抄出迎敵與廣源等合擊賊遁追至楓木嶺賊由白楊廟分撲太平經副都統碩雲保敗之於石關子等處賊竄亭子廟將赴陝慶成率廣源等遇其前尋敗之於官壩塘擢倒馬關營千總三



年將軍恆瑞勦辦四川賊首羅其清冉文儔等賊踞孫家梁擾儀  
隴運道廣源等由磨盤寨連敗之四年六月隨恆瑞勦捕甘肅藍  
號賊由五福河進攻追及於老柏樹斃賊六百餘擒獲二百餘奏  
入 賞戴藍翎十二月遷來水汛守備七年經略額勒登保以廣  
源屢次立功題升貴州凱里營都司九年調平遠協左營都司十  
五年擢古州鎮標中營遊擊二十一年邊俸期滿引 見 賞換  
花翎二十二年升黎平營參將道光元年遷上江協副將八年擢  
鎮遠鎮總兵九年鎮標遊擊石鑑以廣源役兵坐轎各款稟控經  
雲貴總督阮元審明入奏 諭曰孔廣源乘坐兜轎雖係傷發暫  
坐但任聽兵丁受雇應役不爲禁阻實屬違例應行革職姑念其

在川楚陝甘出兵打仗一百三十餘次身受多傷著加恩以原品  
休致十一年卒

右 國史館本傳



呂天俸

呂天俸四川崇慶州人嘉慶二年由行伍拔補重慶鎮標右營把總四年升敘馬營千總五年四月隨經略大臣額勒登保剿辦陝省教匪進兵九間房賊潰追至寡婦橋賊據山抵禦我兵奮勇仰攻密分馬隊襲其後殺賊二百餘擒賊目劉永祥楊永周等天俸以功賞戴藍翎尋偵知賊竄洵陽之大小中溪設伏夾擊殲擒賊匪六百斬襄陽藍號賊目劉允恭劉開玉及僞元帥王洪儒於陣五月隨署甘肅提督楊遇春剿襄陽黃號賊目伍金柱於桐木溝殺賊七百餘六年二月襄陽黃號賊首王廷詔合白號賊目高二馬五向川陝邊界老林逃匿我兵分路搜捕擒廷詔復伏兵於

二郎壩山後龍峒溝擒高二馬五餘黨就殲五月襄陽監號賊目  
冉學勝竄竹谿劉家河大兵倍道跟追殲賊三百尋升陝西延綏  
鎮中營守備六月擊賊於黃墩四季河俱有斬獲十二月進勦固  
軍壩冒雪兜圍殲賊八十七年俘匿匪於月亮坪抵金雞河擣賊  
巢殲偽先鋒郭士善捷 聞 賞換花翎八年殲餘匪於棟耳溝  
陝境廓清額勒登保上其功 命以應升之缺升用先換頂帶九  
年六月搜捕鳳凰寨殲賊十餘擒五十一月俘賊於盤河腦尋  
升甘肅北川營都司十年三月獲土匪於巴山六月調陝西漁渡  
營都司十二年升遊擊十八年九月河南教匪李文成滋事陷滑  
縣城天俸隨固原提督楊遇春會勦十月攻丁欒集直偏賊巢殲



賊目馬魁曹治國十一月大兵攻道口滑城賊眾來援天俸率兵  
徑撲滑城燬南關賊不敢出遂克道口十二月恢復滑城盡殲匪  
黨捷入得 旨以應升之缺升用先換頂帶十九年二月彙敘山  
東戰功 賞健勇巴圖魯名號三月補甯陝營參將道光元年七  
月遷潼關協副將十月署漢中鎮總兵二年正月署陝安鎮總兵  
十一月升漢中鎮總兵六年七月回部逆裔張格爾入卡滋擾陷  
西四城天俸隨參贊大臣楊遇春往討七年二月由阿克蘇進發  
敗賊於洋阿爾巴特進勦沙布都爾莊賊臨渠排列勢張甚天俸  
躡淺抄擊殲擒無算賊復糾黨十餘萬在阿瓦巴特回莊抗拒我  
兵分兩翼兜勦大敗之誅賊目阿瓦子邁瑪底那爾巴特阿渾閏

五月因病回任七月論克復四城功交部議敘八年九月擢烏魯木齊提督十一月因病陳請開缺十一年卒子廷棟江蘇鎮江府經歷

右 國史館本傳

都明

都明伊爾根覺羅氏滿洲鑲白旗人福州駐防乾隆五十二年三月臺灣逆匪林爽文滋事由委署前鋒校隨福州將軍恆瑞往剿五月由鳳山南路進擊斃賊無算六月連克蔦松麻荳莊等處疊有斬獲時賊據諸羅大兵圍攻日久未下都明等馳往援勦奮力夾擊諸羅圍解尋敗賊於興化店乘勝復斗六門十二月克大里杙下部議敘五十三年正月擒林逆於老衢崎二月擒賊日莊大田餘匪悉數就殲臺灣平下部優敘五十四年署驍騎校五十六年補驍騎校嘉慶二年遷防禦五年五月升佐領八月記名以遊擊用八年以失察馬甲景雲毆斃馬甲扎勒杭阿降一級畱任十

五年升協領二十一年擢荊州右翼副都統道光元年 上以八旗抱養民人之子冒入旗籍挑補錢糧久干例禁 命各旗都統副都統嚴密查訪二年二月偕荊州將軍縣齡奏言荊州駐防滿營抱養民人之子冒入旗籍者共官兵四百十員名其見食錢糧之領催甲兵等應請另冊註明及身而止其無餉閒散應銷除旗檔各令歸人民籍有本身出征打仗或其祖父出征著有勞績者其子孫均應改入漢軍旗人如所議行旋因病乞休 命原品休致並以其前在軍營著有勞績 賞食全俸十二年卒

右 國史館本傳

舒凌阿

舒凌阿牛佳氏滿洲正黃旗人嘉慶五年由領催出師著有戰績以驍騎校用七年補官洊升黑龍江總管道光六年領兵協剿喀什噶爾回匪時逆裔張格爾率安集延布魯特賊眾分投肆擾臺站阻隔援兵道梗英吉沙爾葉爾羌和闐先後失守賊眾常聚阿克蘇渾巴什河南伺隙躡渡我兵扼之復分兵兩路夾擊大敗之殲除殆盡賊首奔竄七年二月克復四城四月敗賊於阿瓦巴特奏入 賞戴花翎十二月張逆潛由開齊山路入卡我兵追及於喀爾鐵蓋山擒張格爾檻送京師 上賞加舒凌阿副都統銜圖像紫光閣列四十功臣中 御製贊曰久歷戎行巴蜀秦楚今復



回城豈容竄鼠乘雪擒渠在此一舉同出卡倫厥功惟敘九年授  
圍場總管十年九月 命在乾清門行走十月復 命赴軍營交  
揚威將軍長齡差遣委用十一年二月授喀什噶爾幫辦大臣十  
月長齡奏舒凌阿久歷戎行人亦勇敢惟事理不甚通達請調補  
葉爾羌領隊大臣專管操演滿兵及巡查卡倫事務 從之十二  
年卒

右 國史館本傳

恆敬

恆敬原名恆敏伊爾根覺羅氏滿洲正藍旗人乾隆五十三年由官學生挑補鴻臚寺鳴贊俸滿以同知用嘉慶二年四月揀發雲南十月署大關同知因迴避雲貴總督富綱改掣四川八年勦捕三省餘匪承辦軍需出力補打箭鑪同知尋署廣安州知州擒獲川匪羅忠相等總督勒保奏請鼓勵 賞知府銜九年六月委辦軍營糧務並帶鄉勇搜捕零匪擒殺多名十月署太平廳同知又於火石嶺擊獲土匪九年將軍德楞泰因川省大功告蒞奏請獎勵得 旨以知府遇缺卽補搜捕老林零匪獲偽元帥王世貴十二年補綏定府知府十三年趕山坪等十二支嶺夷闌入內地焚

掠滋事進兵涼山勦辦恆敬在事出力 賞戴藍翎十四年升湖南督糧道十八年升按察使十九年調江南按察使 賞換花翎二十年丁父憂回旗二十一年授太僕寺少卿尋 命署陝西按察使並承襲世管佐領二十三年服闋實授升江甯布政使二十四年兼署江甯織造二十五年 命來京另候簡用道光元年三月奉 旨以三品京堂候補七月授光祿寺卿三年 賞副都統銜充哈密辦事大臣五年補正黃旗漢軍副都統六年喀什噶爾逆回張格爾滋擾七月奏言賊匪已入葉爾羌所屬之十三臺伊勒都地方戕害守兵文報梗阻派兵速赴阿克蘇救援會哈密安設糧臺請兵防範 諭曰哈密爲新疆咽喉要地關外糧餉向由

辦事大臣經理恆敬前在四川軍營曾經辦理糧餉著在哈密辦理一切轉飭派出之道員等及地方官迅速轉運源源接濟毋得短絀遲誤尋奏留涼州鎮兵五百名駐守哈密並請各營官兵不分馬步每兵借銀四兩官弁借俸一年以資添補 允之署伊犁將軍德英阿等等議回疆鼓鑄事宜 上命與恆敬會同籌畫妥議旋議請將阿克蘇喀喇沙爾兩處本年例解伊犁銅斤截留阿克蘇俾資添鑄以免往返解運之繁俟軍務完竣仍照舊章辦理從之九月奏烏魯木齊每月運送糧麪計口授食僅敷一月之需哈密回子郡王銜貝勒伯錫爾懇請親帶回兵二百名前赴軍臺聽候調遣又據顯請湊備回戶牛車一千兩輓運軍糧至吐魯番



交卸 諭恆敬與盧坤鄂山英惠等通盤熟籌會商妥辦至回王  
所備車輛如果得力卽畱供輓運照例支給腳價十月以哈密爲  
新疆南北衝衢額設馬匹僅足供尋常差務見值大兵西下軍書  
絡繹不敷遞送請每臺添設馬匹人夫以資接濟 上如所請復  
諭曰經此次增添之後軍需緊要差使自可迅速應付儻有遲誤  
惟恆敬是問七年二月 上以烏什爲奇兵進發路徑轉運糧餉  
防範後路尤關緊要 命恆敬爲烏什辦事大臣 諭曰烏什地  
方緊要見在駐劄官兵爲數較少恆敬多貴二人在彼控制尤宜  
加意防範儻布魯特等膽敢擅入卡倫肆行搶劫自當嚴緊懲辦  
斷不可喜事貪功帶兵輕出妄殺無辜四月 上以長齡等克復



喀什噶爾張逆乘閒逃匿恐竄入烏什一帶地方飭恆敬等嚴密訪捕勿得坐失機宜先是那彥寶奏擒獲布魯特回匪有附逆之庫圖魯克謀搶烏什上以所奏並無逆跡昭著統計殲斃者有六七百人之多諭恆敬秉公密訪是否所殺均係逆賊抑竟係無辜被戮斃者有六七百不實不盡將來別經發覺或致激成事端惟恆敬是問旋查明庫圖魯克實有附逆情事業已擒獲護解大營得旨嘉獎閏五月奏言烏什軍臺三處額設馬匹向係秋冬間循例牧放見常軍報往來請每日每匹支給倉豆三升以資餵養俟軍務告竣仍照舊牧放從之旋以長齡等奏請赴喀什噶爾幫辦善後事宜七月授葉爾羌辦事大臣凱撤論功下部

國朝通志卷之三十一  
三十一  
優敘八年正月奏言葉爾羌滿城地勢偏仄擬於舊城迤西罕那  
里克地方勘定城基並衙署倉庫兵房一體建造 命俟欽差大  
臣那彥成經過時相度形勢定議尋那彥成奏請如恆敬議行又  
奏查出續墾官荒田地照較輕之阿勒板科則量減升科每歲所  
增糧石足供防兵二千名口食至西北隅躡出荒地一百餘里地  
土肥饒引水尙易可以試墾 諭照所議辦理三月恆敬以隨征  
出力將弁兵丁覈實分別奏請鼓勵 上如所請四月 命來京  
五月恆敬與那彥成等奏言葉爾羌回戶前年被搶被害情形與  
阿克蘇州等請貸口糧以示撫卹 上韙之十月因病奏請開缺  
允之並許其緩程來京九月病痊署正白旗漢軍副都統十年三

月授正白旗漢軍副都統九月授西甯辦事大臣十二年卒

右 國史館本傳



薩秉阿

薩秉阿額蘇里氏滿洲正黃旗人成都駐防乾隆四十七年授筆帖式四十九年甘肅逆回田五等踞石峯堡以叛大兵進討命成都將軍保甯派兵協勦薩秉阿在事有功五十一年授驍騎校五十四年升防禦五十七年廓爾喀賊匪擾後藏上命兩廣總督福康安爲將軍率師進討大兵自濟甯進攻連克熱索橋布魯博爾東拉東覺等處薩秉阿功最得旨嘉獎命升授額外佐領五十八年補正藍旗滿洲佐領六十年正月湖南苗匪石三保等滋事攻陷松桃廳薩秉阿隨四川總督和琳率兵往剿連克廖貢坡馬鞍山諸隘賊眾分踞平隴乾州一帶爲巢穴與我兵隔河



相拒六月和琳分兵三路率師先進賊悉眾相持和琳率薩秉阿等由中路亂流徑渡薩秉阿隨都統額勒登保等首先登岸賊猝退踞尖雲山我兵晝夜悉力進攻連克黃連坡等處城卡數十遂復乾州捷入 賞戴花翎並交部議敘尋補參領嘉慶十二年升莊浪城守尉十五年升杭州副都統旋丁母憂百日服闋赴副都統任十六年署杭州將軍印務二十三年擢杭州將軍道光元年五月疏言杭州滿營兵丁官房年久坍塌者甚多請借支錢糧補修二年四月又請撥款生息資助旗籍舉人會試並分給驍騎校以下官員引 見進京路費均如所請行十二月入 覲 賞紫禁城騎馬尋調福州將軍兼管閩海關稅務三年奏准滿營孤寡

養贍不敷請以關稅存公開款銀兩增給六年調西安將軍七年以六十生辰 賞福壽字等物八年疏言陝西督糧道倉應徵粟米七萬餘石爲供支西安滿營官兵之需見在米價昂貴小民不易輸將而小麥市價較減酌籌通融搭放 上允所請九年調福州將軍十年奏立八旗書院延師訓課並演習清語騎射請於閩海關罰款內動支餘存銀兩爲膏火薪水之資又以駐防營兵生齒日繁物價昂貴向例賞借各銀實不敷用而例不准借之兵丁尤屬拮据請籌備加借銀兩亦於閩海關罰款生息各項銀兩內撥出 從之十二年卒 諭曰福州將軍薩秉阿由駐防筆帖式洵升將軍曾經出兵甘肅陝西四川湖廣等處著有勞績茲聞溘

逝殊堪軫惜著加恩照將軍例賜卹所有任內一切處分悉予開復尋 賜祭葬 予諡果恪子廣慶二品廕生固慶吉林將軍福慶候補中書壽慶候補庫使

右 國史館本傳

## 愛新保

愛新保伊爾根覺羅氏滿洲正紅旗人荊州駐防乾隆四十八年  
考取繙譯筆帖式五十年補筆帖式五十七年補驍騎校六十年  
湖南苗匪滋事隨荊州將軍興肇往辰州會剿殺賊有功下部議  
敘嘉慶二年三月復隨興肇剿辦湖北教匪賊由泌陽裕州北竄  
至古石灘我兵迎擊斃賊多名餘匪潰散復設伏山坳大敗之四  
月升防禦時賊竄火燄溝復由百花溝趨雒南愛新保沿途追剿  
賊奔商州敗之於澇峪口五月殲賊於曹家坪十月賊由雞心嶺  
折回黑虎廟官兵設伏硤口兩面夾攻賊走樹河口追斃賊目張  
世虎等十一月賊窺渡漢江邀擊之斃賊二千餘生擒一百三十

五名十二月復敗賊於唐家壩三年正月賊首張漢潮竄至元壩  
子官兵奮勇追擊殲千餘人二月擊賊於石板埡生擒賊目張倫  
秦三月賊由懷陽敗潰東趨盤屋分擾姚村追敗之遂躡賊由庫  
峪連敗賊於鳳凰嘴水碓溝四月阮正通股匪欲由麻坪河擾漢  
陰愛新保連夜追勦賊棄營遁復冒雨馳赴池河殺賊百餘名生  
擒四十餘名五月張漢潮遁穀城邀擊於章村棚斃五千餘人六  
月擊賊於鐵峪河寶石店生擒賊目吳季模等七月張漢潮竄入  
陝西截擊於蓋石嶺敗之賊復竄入四川又敗之於袁家廟顧金  
壩八月敗賊於清池子山殲賊首李槐詹世爵等復敗於梅子隄  
賊乘夜繞出青石關北走南鄭敗之於關東廟等處九月敗賊於



王黑壩父子關張漢潮竄南江十月誘賊於界嶺殲之十一月擊賊於火石嶺擒賊目朱彩章等殲千餘人十二月進勦南河關獲賊渠張洪仁等餘匪遁陽山老林連敗之於沙子嶺下陽等處四年正月生擒賊目盛世發於劉家莊二月勦賊於進口關餘匪遁入雪山老林追至秦嶺涼沁河敗之五月補佐領八年七月升參領十一年擢廣西潯州協副將十四年署右江鎮總兵十五年調鎮安協副將二十年丁母憂二十三年服闋補廣東惠州協副將道光元年署潮州鎮總兵二年九月擢福建福甯鎮總兵十月調四川川北鎮總兵六年八月入 覲 諭曰愛新保年力就衰著回原駐防以協領坐補七年補正白旗滿洲協領十年以病乞休

諭曰愛新保曾經出兵打仗殺賊捉生著以原品休致給與全俸以養餘年十二年卒子文斌國子監博士文發工部員外郎

右 國史館本傳

英惠

英惠費莫氏滿洲鑲紅旗人父勒保大學士自有傳英惠嘉慶元年廕生由都察院筆帖式捐升員外郎籤分戶部五年補官十二年京察一等十四年調銀庫員外郎十七年任滿仍補戶部員外郎十八年升郎中十九年記名以副都統用二十三年五月授正黃旗漢軍副都統六月擢內閣學士兼禮部侍郎銜七月署禮部右侍郎十月調鑲黃旗滿洲副都統十一月遷兵部右侍郎二十四年二月署左翼監督三月充國史館清文總校四月因監視護軍步射完竣獲命召見誤班革去副都統仍留兵部侍郎任六月授正黃旗蒙古副都統七月以管道懈弛降三等侍衛諭

曰派出管理站道大臣原爲禁約行駝今日道途泥濘朕乘馬行走四十餘里白蘭溝以至東洗河一帶竟有許多車駝由御路行走擁擠一處經朕指示御前乾清門侍衛管理方過彼時始見英惠由屋內走出牽馬道旁站立殊屬懶惰不堪英惠本應卽行革職但伊革職後轉得在家逸居朕又念勒保年邁不忍將伊革職英惠著降爲三等侍衛每日在前引上行走伊若仍敢怠惰經朕看出必重治其罪決不寬貸八月丁父憂十二月襲三等威勤侯尋授頭等侍衛二十五年正月授鑲藍旗漢軍副都統尋署鑲黃旗護軍統領四月授鑲黃旗護軍統領七月署鑲白旗滿洲副都統八月署正白旗護軍統領十月 命管理圓明園事務道光元

年三月署左翼前鋒統領七月授左翼總兵署鑲藍旗護軍統領  
十月調正紅旗漢軍副都統二年閏三月護理步軍統領六月擢  
烏魯木齊都統三年二月以吐魯番領隊大臣紉武布奏請將牙  
木什租銀入官園城地畝給與滿營收租辦理兩歧 諭令英惠  
覆加查覈尋查明覆奏得 旨園城牙木什地畝均係陸續增墾  
之地所有園城地租銀四百三十餘兩自道光三年爲始一併飭  
令同知徵收入於經費項下作正開銷仍撥餘出銀一百四十兩  
給與滿營作爲義學束脩及獎賞兵丁之費按年報部備查以昭  
畫一七月奏營書訐控將備侵扣舞弊訊出前任巴里坤總兵張  
拱辰私調濟木薩廠馬匹解赴東廠並申通前署鎮標遊擊富克



精阿虧缺正額馬匹張拱辰富克精阿禡職遣戍如律四年二月  
奏甘肅奇台縣屬古城地方常平倉額徵糧石不敷支放請於附  
近之濟木薩倉儲內酌撥四萬石以資儲備 從之先是己革總  
兵張拱辰自縊 上命陝甘總督那彥成嚴密訪查有無別故至  
是奏言張拱辰實係愧悔輕生惟廠馬缺額拱辰到任時已據廠  
員報明英惠並未詳覈聲敘其調撥濟木薩廠馬抵補虧短亦未  
與分別一併分賠辦理未能平允得 旨英惠交部議處尋議降  
一級畱任五年三月奏查明吐魯番差營及七克騰木等四軍臺  
民人私闢官荒地畝請飭令該管同知經收每年覈發錢文作爲  
營中公用所有回子租種地畝九段請卽賞給纏頭回子耕種毋

庸徵租其收取租銀擅充公用之該管營弁並請交部議處如所  
議行十月逆回張格爾人卡茲事伊犁將軍慶祥赴喀什噶爾督  
同剿辦有旨伊犁將軍印務著英惠馳往暫行署理六年二月  
回本任七月偕烏魯木齊提督達凌阿奏言據慶祥急遞令派兵  
四千名速往救援當於烏魯木齊吐魯番古城巴里坤各滿洲營  
內挑兵一千五百名派庫爾喀拉烏蘇領隊大臣多貴帶往提鎮  
所屬綠營內挑兵二千五百名達凌阿自行帶往諭曰本日據  
奏達凌阿帶領漢兵二千五百名多貴帶領滿兵一千五百名自  
已陸續星馳前進見常軍行喫緊之時糧餉火藥均關緊要回疆  
各城存貯無多該都統迅卽寬爲籌備設法運解不得稍有貽誤

尋兼署烏魯木齊提督奏官兵進剿所需鹽菜等項須按月供支  
應由烏魯木齊支至喀喇沙爾以下逐城支領並請由甘肅藩庫  
或安肅道庫撥解銀二十萬兩以備調用 從之八月奏言烏魯  
木齊各軍臺額設兵丁馬匹不敷支用請以原設之多寡覈以道  
路之遠近酌爲增加並請將伊犁將軍運到撥補內地馬匹暫畱  
烏魯木齊牧放以備更替又奏吐魯番爲新疆門戶時巴里坤總  
兵多降武帶兵前往駐劄策應擬再派烏魯木齊滿洲營甲兵二  
百名令佐領防禦馳騎校各一名帶領前往協同駐守又奏烏魯  
木齊各屬倉儲內動撥一萬石運交喀喇沙爾存貯再撥四萬石  
酌量運往庫車阿克蘇分貯以備官兵前往逐城支用尋以喀喇

沙爾庫車駝隻不敷轉運請仍由烏魯木齊長運至阿克蘇存貯  
又咨調甘肅等處銀兩省局支發撥運紛繁請畱陝西鹽法道查  
廷華幫同經理均如所請行七年三月奏言托克遜爲烏魯木齊  
運糧要路請以吐魯番領隊大臣賡音岱就近移駐督辦糧臺七  
月請酌裁軍臺添設兵丁馬匹並得 旨允行尋以西陲凱撤論  
功 賞戴花翎仍從優議敘十一月軍政屆期得 旨英惠自回  
部軍興辦理糧餉妥速無誤前已賞戴花翎交部優敘著再加恩  
交部議敘十二月丁母憂 上以英惠見辦軍需著在任穿孝八  
年六月奏軍需報銷烏魯木齊支發銀兩除實用實銷各款分別  
造冊咨部外其由口內派出官兵按城支領銀兩等項如有浮多



卽責成具領將弁及濫應之各臺糧員分賠其各臺截畱及阿克蘇軍需實收起運糧石卽按照戶部覈准例銷運腳格外節省三成銀五十五萬八百七十兩零以一成歸補實用不能實銷各款其餘二成毋庸找發又奏據各廳州縣因公支用各款請於節省銀內劃出一成抵補 上允所請十一月奏准豁免征兵賠繳騎斃馬匹並補製軍械又奏防勦盡節官兵分部議卹下部議行九年二月奏烏魯木齊駝夫承領運糧駝隻如有倒斃請以六分准銷四分著賠又請將科布多烏里雅蘇臺各蒙古王公所進駝隻如數給還俾資生計均 允之十一月 召還京十一年授科布多參贊大臣十二年因病陳請開缺回旗調理尋卒



右 國史館本傳

國史館本傳

本草綱目卷之三十一

三十一

伍爾袞布

伍爾袞布瓜爾佳氏滿洲鑲白旗人青州駐防嘉慶六年由委署  
前鋒校補驍騎校十年升防禦十一年遷佐領十三年上幸木  
蘭舉行秋獮伍爾袞布派往習圍射獲數獸賞戴花翎十八年  
九月直隸長垣教匪不靖延及豫東伍爾袞布隨副都統蘇爾慎  
由曹縣之安陵集進剿賊悉眾迎拒我兵四面兜截殲賊二百餘  
乘勝連克劉家岡郝家集十九年升協領道光七年擢涼州副都  
統九年偕陝甘總督楊遇春奏言涼州莊浪等處駐防滿兵生齒  
日繁養贍漸絀請於司庫及滿營庫存馬價內借項生息增設餘  
兵藉資調劑奏入得旨借款生息歲有定額養贍仍難普徧著

該督等細心酌議此外有無長策行之久遠詳籌具奏再降諭旨  
十年二月覆奏涼州營額設兵缺一千六百名莊浪營額設兵缺  
八百五十名其餘閒散素無別項生計若令其靜待挑缺則額少  
人多實不能徧敷給養此外再四詳籌別無經久善策籲請仍照  
前議疏 聞下兵部議奏尋兵部奏中樞政考載各省駐防閒散  
多寡不一每屆五年或十年一律挑補甲缺立法本極周密今涼  
州莊浪二營議添設兵額 國家經費有常疑難辦理查道光六  
年直隸總督那彥成奏准於附近綠營兵額酌挑駐防閒散二成  
請令涼州莊浪兩營遵照辦理三月因病陳請開缺 允之十一  
年以舊疾未痊呈請休致經青州副都統國祥奏入 上以伍爾

袞布曾經出師打仗殺賊著有勞績 賞食全俸十二年卒子多  
紳官佐領

右 國史館本傳



Vertical text on the right side of the page, possibly a page number or title, oriented vertically.

1111

宗室斌靜

宗室斌靜鑲紅旗人乾隆三十七年由閒散挑補十五善射四十年四月授三等待衛十二月封輔國將軍五十九年兼宗室佐領嘉慶四年遷續辦事前鋒侍衛五年擢前鋒章京六年授鳳凰城守尉七年五月升伯都訥副都統十一月調三姓副都統九年調齊齊哈爾副都統偕黑龍江將軍觀明奏請將齊齊哈爾等處無田無力兵丁舊欠倉糧豁免允之先是齊齊哈爾等處自協領至站丁派墾公田部議定以限制其額外多墾之地願交出者撥給無力旗戶承種願畱自種者責令計畝納糧以充公用斌靜偕觀明遵旨體察情形覆奏疏言該處所墾之地多近沙漠地

勢之高低不等卽歲收之豐歉不齊且四五年後土脈已乏則另  
移他處故無一定額數亦無一定方向若多餘之地拘以納糧限  
制於地方情事不甚相宜請仍令照舊墾種毋庸計畝納糧給以  
限制經大學士軍機大臣等議如所請 允之十年以 萬壽節  
日他哈爾站獲得白雉偕觀明奏進並請宣付史館以昭 聖瑞  
諭曰朕惟以時和年豐民康物阜爲念無事侈言祥瑞也十四年  
升黑龍江將軍十七年六月以謝 賞南苑大閱 御製詩墨刻  
摺繕寫漢字傳 旨申飭八月 上閱黑龍江官兵箭射平常以  
斌靜等平日訓練未能認真復傳 旨申飭十八年二月奏查遣  
犯年逾七十者多名照例請卽釋回並請免解送內地充當徒役

又以改遣內地之犯數千人途行數千里至萬里不等請於例給口糧外捐扣養廉添備各站車輛下部議行四月以宗室普定安祿發遣黑龍江奏請可否遷往盛京 上曰前經降旨於盛京建蓋房屋非爲發遣者起見此奏實屬錯誤先是墨爾根城遣犯滋事斌靜以副都統明德辦理張皇特行奏參並請將派審之協領巴達爾呼革職 上以斌靜所奏與明德咨報不符 命盛京工部侍郎富俊查訊至是訊明遣犯韓自有等雖非謀叛而糾眾謀劫屬實經富俊奏入 諭曰遣犯糾劫滋事自應拏辦明德一聞首告即將各犯拏獲雖未能審訊明晰全委之巴達爾呼等致將案犯拖斃其應得之咎不過議處乃斌靜不會同明德審辦率行

奏參並請將巴達爾呼革職實屬偏執意見不勝將軍之任著來京候旨尋又以向屬員索借銀兩事覺奪職解京審訊屬實命發往伊犁效力贖罪二十二年 賞二等侍衛充葉爾羌辦事大臣二十三年 賞副都統銜克喀什噶爾參贊大臣二十四年十月補正黃旗蒙古副都統十一月奏畱減等廢員賈炳辦公 上以炳係由遣罪減等仍應杖徒之人不能因再畱二年即將其罪寬免傳旨申飭二十五年正月霍罕伯克遣使呈請添設阿克薩哈爾管理買賣事務斌靜以貪利瀆請痛加駁斥並將來使逐回不准再行入境奏入得 旨所辦甚是九月圖舒克塔什卡倫外之布魯特比蘇蘭奇等與逆裔張格爾句結滋事斌靜奏幫辦大



臣色普徵額帶兵追捕斬獲多名並調葉爾羌等處官兵會剿  
上以此事恐斌靜不能辦理命伊犁將軍慶祥馳往剿辦並查訊  
叛逆各情由尋斌靜又奏色普徵額進山按捕擒賊二十餘名並  
前次擊獲之八十餘名已正法梟示 諭曰蘇蘭奇等糾結謀逆  
僅有三百餘名據斌靜等奏剿殺及生擒者已有百餘名何以今  
尚未撲滅淨盡其所獲活賊自應將起釁情由訊問明確乃全行  
正法並無切實口供恐係斌靜等因事激變此時轉妄行殺戮希  
圖滅口慶祥接奉前旨著卽細訪根由如實有激變及妄殺情事  
卽行據實嚴參旋以斌靜屢奏色普徵額入山窮追全係虛詞  
命解任聽候查辦十一月慶祥奏斌靜審辦逆回皆係律應正法

並無妄殺情事惟案關叛逆有應行閉質之人一時槩予駢誅未免草率張格爾等久蓄逆謀尙無激變情事惟據眾伯克呈控斌靜行止不端並屬員與家人倚勢凌辱婪索多贓必應澈底審訊以成信讞得旨褫職逮問交慶祥審辦又諭曰該逆僅三百餘人一經接仗卽已逃竄何以遽敢圖爲不軌恐另有激變情事該將軍因斌靜等已有辦理不善之咎卽存化大爲小之見輒將起釁根由匿不奏聞第斌靜縱容委員家人苦累回眾已有端倪若顛預定案何以伸國法而振邊陲務再詳細研究不可稍有不實不盡道光元年慶祥奏斌靜年老多病精神衰憊其家人張得福串通回務章京綏善廢員賈炳需索妄爲屬實諭曰斌靜以

參贊大臣鎮守邊疆年老昏愎行止乖方於家人廢員等通同婪索毫無覺察實屬孤恩負職著發往黑龍江效力贖罪三年目俱著加恩釋回六年以喀什噶爾歷任參贊辦事大臣種種乖謬命欽差大臣長齡確查尋長齡奏斌靜在任事事妄爲姦淫不法經宗人府會同刑部審明治罪擬斬監候得旨著交宗人府圈禁歸入明年朝審情實七年命從寬永遠圈禁八年以回疆底定大功告成加恩釋放交族長嚴行管束永不敘用十二年故

右 國史館本傳

四庫全書  
漢書卷之九  
卷三十三

三

馬應國

馬應國四川成都人乾隆五十七年廓爾喀夷匪滋事由行伍隨征有功擢馬邊營外委旋攻克熱索橋協布魯等處冒雨陟險奪取礮卡屢戰爭先經將軍福康安保奏 上以奮勇可嘉 賞戴藍翎五十九年升城守營把總旋升夔州營千總六十年隨征黔楚苗匪節次勦賊出力 賞五品頂帶擢建昌鎮會盟營守備嘉慶元年差送大學士福康安樞赴京 命馳驛速赴達州軍營交陝甘總督宜縣等差委二年賊走當陽隨都統德楞泰追之距賊數十里山勢險要先令應國往探賊時已由遠安一帶走獨數塘遇官兵擊敗遂由丁家集竄將北走焚茨河鎮直渡襄陽應國循



賊蹤偵得實走報大軍連夜進賊方焚掠出山奮力攻勦殲戮甚  
多事聞賞換花翎並給敢勇巴圖魯名號九月賊由孫家灣  
石堰花園西竄應國緊抄其前截之十月官兵擊賊於小深河賊  
潰應國復躡賊察所前往十二月官兵擊賊於羅村壩賊將退走  
應國隨將軍明亮並都統德楞泰以兵下壓副都統賽冲阿繼之  
斬賊無算旋偵賊欲從土溪偷渡應國卽先往防守並督率三匯  
口鄉勇沿河堵截遏賊東竄之路賊旣至土溪遇應國不能竄越  
復折回三年三月擢懋功營都司七月賊紮筏圖偷渡渠河德楞  
泰由土溪進至望生坡應國以夜半率兵勇由李福溪林壩渡伏  
於西山後林內官兵抵李福溪賊二千餘人將渡河官兵蹙其後

應國扼其前燬二百餘人賊屯大神山應國以兵勇日夜沿河堵禦賊仍不能竄越十月隨將軍德楞泰敗賊於廖家碛十一月進攻大鵬寨賊乘大雨撲營戰方急復以數千人衝下應國伺寨中賊出以兵從小路上首躍入寨火之煙燄沸騰賊既與官軍戰不勝反走巢盡燬大兵四合殲焉四年經略大臣勒保咨送軍營出力人員應國升甘肅鎮番營遊擊五年三月追賊至黃茅嶺應國隨副都統溫春戰於新店子賊聚馬蹏岡火石埡一帶隨德楞泰由大路進攻沿途斬獲甚眾五月賊自忠州禹蹟灘來規竄北岸應國以兵勇馳至九月場賊走追斬無算六月賊聚汪家坪曹家坪等處應國漏夜進兵繞過山梁直前撲勦賊遁八月至九龍場

賊列陣山梁應國領步隊由山溝上與戰賊敗走升四川成都城  
守營參將十一月賊將竄大甯鹽場應國伏兵百六洞口賊至伏  
發復奔回六年參贊德楞泰奏軍營出力將領員弁應國 賞加  
副將銜七年四月隨德楞泰大敗賊於雞公山梁補四川將軍標  
副將六月賊自灣腰樹將向東北逃竄應國取道抄出賊前分兵  
三路衝其巢斬賊無數九月搜剿零匪至橫擔山老林聞賊將走  
蒲溪河茅古坪經過陝西應國令兵勇假教匪號馳至蒲溪河與  
賊遇徑前來合隊突擊之賊錯愕不知所爲夜遁十一年調廣東  
羅定協副將十三年升福建福甯鎮總兵尋調廣東雷瓊鎮總兵  
十五年兩廣總督百齡以舟師進擊洋匪雷瓊地方有賊潛登岸

應國派兵截勦匪船逸多所殲擒旋獲積匪李朝宗等百餘名十  
六年調高州鎮總兵二十五年擢廣西提督道光元年命來京  
另候簡用二年授山東曹州鎮總兵五年山東接運漕糧幫船一  
律全趨出境上嘉其辦理妥速下部議敘十二年卒子元一品  
廕生

右 國史館本傳





## 馬玉麟

馬玉麟陝西長安人由武舉撫標學習嘉慶元年興安教匪不靖隨總督宜縣巡撫秦承恩出師高廟山古廟嶺等處疊有斬獲嗣復追躡賊蹤遇之於將軍山敗之二年正月餘匪併入洞河五作雲賊巢分設石卡負隅抗拒我師由洞河進勦花梨岡一帶晝夜攻撲連克五卡殲其眾捷聞敘功居最二月賊眾竄入光頭山玉麟奮勇夾擊俘馘甚眾三月偵聞楚匪屯聚盧氏縣之瓦溝竄將竄入陝大兵由洋淇溝撲商南雙樹卡合力殲擒斬級三百四月賊復於商州山陽交界之西牛槽乘機竊發我師直前搜捕賊勢鴟張玉麟冒險衝突奮力鏖戰賊大潰尋補陝西撫標左營千

總九月東路賊匪西竄赤崖一由香鑪溝入安康界一由花園寺入平利界玉麟隨赴賀家埡併力兜截伏兵埡口之左右襲其不備衝入賊壘殲七百餘人生擒十三四年擢舊縣關營守備五年升金鎖關都司九年隨欽差大臣額勒登保入川搜捕老林餘匪全數蕩除調漢中城守營遊擊十八年以南山賊匪龔貴糾眾滋擾上命陝甘總督長齡帥師進討擒其渠玉麟在事有功賞戴花翎十九年升四川漳臘營參將二十三年調提標中軍參將道光元年擢軍標中軍副將六年正月軍政卓異八月遷川北鎮總兵十一月調建昌鎮總兵十一年因病乞休十二年卒

右 國史館本傳

## 蔡鼎

蔡鼎漢軍正白旗人乾隆四十五年由官學生承襲佐領四十九年充印務章京五十三年升副參領尋遷河南城守營參將嘉慶元年教匪滋事檄赴湖北軍營時當陽陷湖廣總督畢沅合兵圍之鼎由西面進躬冒矢石殺賊十一名首先登城槍斃逆匪數十名復當陽奏入 賞戴花翎二年浙川賊匪分東西北三面奔竄鼎隨河南巡撫景安策應東北一路帶馬步兵八百名由內鄉馳赴浙川斃賊無算三年賊匪竄入楚界景安赴襄陽遣鼎防朱陽關賊首張漢潮被剿將竄回唐子山舊巢鼎復帶兵四百自西坪往內鄉一帶堵勒四年設伏於界牌嶺賊至伏起大敗之遂由內

鄉赴東南遏賊東竄南陽襄陽之路五年河南巡撫吳熊先以鼎  
防堵出力奏請優敘六年升荆子關副將七年分防富水關並撥  
所部兵堵禦黃土嶺九年回荆子關任旋署河北鎮總兵十年實  
授十二月安徽宿州匪徒余連等糾眾滋事 上命鼎帶兵速往  
十一年五月奏兵丁操練長矛遇敵甚爲得力請於所屬十營額  
設弓箭馬守兵丁內挑選年力精壯者兼習長矛以備應用 諭  
曰營伍兵器鳥槍弓箭最爲得力但臨陣對敵長矛一項亦宜兼  
習俾資利用卽如八旗原專設虎槍營以資擊刺之用今蔡鼎旣  
陳奏及此事屬可行著交該撫於通省營伍內酌量額兵多少量  
加選擇令其演習長矛以備利器之一但究不可因操練長矛致



弓箭烏槍技藝生疏八月陝西叛賊欲竄豫上命河南巡撫飛飭蔡鼎等速赴豫陝邊境擇要防堵九月帶兵赴西坪鎮及朱陽關官坡等處駐劄堵截旋合兵圍賊克之十一月上諭巡撫馬思裕曰陝省叛賊尙未安置妥協設該犯探知豫省防兵已陸續撤回乘閒向東北奔逸均未可定著卽飭知蔡鼎仍督率畱防之兵在邊境嚴密防範勿稍疏懈十六年擢貴州提督二十五年調烏魯木齊提督道光二年召來京賞給頭等待衛在大門上行走十二年卒子兆慶二等侍衛兼襲佐領卒孫昌言承襲佐領

右 國史館本傳





王應鳳

王應鳳貴州鎮遠人父含章以千總隨征金川陣亡廕應鳳把總兼襲恩騎尉世職入鎮標效力乾隆四十七年補本標中營把總四十九年升千總六十年隨征苗疆解松桃永綏廳等處城圍並攻克大塘黃瓜寨及蘭草坪賊巢升丹江營守備嘉慶元年清溪縣逆匪高義成糾眾不法滋事應鳳勦賊出力得 旨此次勦除清溪教匪自起事以至蕨功該員等帶領兵勇隨同打仗殺賊及查撫難民尙爲奮勉王應鳳著賞戴藍翎二年興義府种苗不靖應鳳隨雲貴總督勒保貴州提督珠隆阿進勦時苗匪數千人踞巴隴至聖廣十三四里三面陡削一面砌石牆設卡堅守官兵各

執藤牌置雲梯絕登絕壁以火彈燬賊巢賊潰棄卡下竄官兵截擊一鼓直上斃賊二千餘人勦除淨盡其附近葫蘆壘菜子河螞蟻箐等寨賊匪皆乞降官兵自安南移勦永甯安南阿黑山苗匪拒關應鳳偕參將趙得功分路抄截擒斬無算焚賊卡十五座賊寨二十七處拔出碧玉洞難民一千二百餘名事竣升大定協左營都司時川陝楚邪匪滋擾應鳳赴四川隨征出力三年升古州鎮標左營遊擊四年入陝由西和一路追勦藍號賊匪敗之於佛人崖黃家坪一帶斬數十人復追勦張漢潮股匪斬獲甚眾五年三月隨經略大臣額勒登保追擊高二馬五兩股賊匪於何家衝大山梁斃賊一千四五百人生擒二百餘人並僞元帥詹世貴五

月敗賊於大小中溪殲擒張漢潮餘黨劉允恭劉開玉王洪儒等  
又勦伍金柱股匪於手板崖追至大小銅錢窖應鳳首先衝出賊  
前連斃二人各路官兵繼之殲首逆龐洪盛擒其子龐有兒及老  
教頭王者子賊目楊六燕等四人共殺賊一千餘名 賞換花翎  
六月官兵追賊於黑虎廟白坡子殲首逆楊開甲又於楊家河老  
虎溝擒首逆陳傑八月又於佛人崖殲僞元帥曾印擒賊目侯長  
富等六年六月擒首逆武懷志於一層巒八月擒僞元帥張奇於  
散子坪應鳳均在事有功升兩廣督標後營參將十月擒首逆高  
見奇於紫陽之黃瓜溪下部議敘十一年三月調廣東撫標中軍  
參將九月升廣西梧州協副將十九年授福建建甯鎮總兵二十

三年署陸路提督二十五年擢江南提督道光十二年卒子大經襲恩騎尉貴州候補都司曾孫承基襲恩騎尉

右 國史館本傳



何君佐

何君佐雲南恩安人以父國柱金川陣亡廕衛千總乾隆四十八年補昭遠鎮中營千總五十年調前營千總五十六年丁母憂六十年隨征黔楚教匪積戰功遷普安鎮標中營守備嘉慶二年二月調赴四川達州軍營隨廣州將軍伯明亮等攻克金嶽寺清溪場諸路賊巢五月擊賊首王三槐於羅江口敗之六月殲賊目孫五擒僞軍師王學禮於子安坪 賞戴藍翎閏六月分兵攻克南天洞鐙蓋窩阮家溝擒陳學禮劉爲正又克打涼山陳家山新結賊巢賊首張名貴方正榮就擒時襄陽教匪張漢潮等竄入蜀之開縣明亮遣君佐帥師禦諸温塘井賊望風遁尋隨松潘鎮總兵

達洪阿馳守雲陽夔州巫山七月移師陝西剿齊王氏股匪三年  
敗賊於黃隴鋪擒賊目王家美朱正聲等戮齊王氏於三岔河君  
佐均在事有功擢廣東和平營都司未幾賊復竄蜀首逆羅其清  
踞達州龍鳳坪君佐馳剿克之四年正月赴通江麻壩寨擊斬首  
逆冉文儔擒其子添壽 賞換花翎六月攻大甯雲陽等寨獲林  
添祥等復於八石坪擒賊目梁萬鎰卜三聘李谷青尋赴楚北房  
縣偵賊蹤十月擒僞軍師符曰明十二月復赴陝剿賊五年正月  
擒賊党士臣等旋以冉添元股匪竄入川東馳剿之二月攻克江  
油之烏龍寨新店子首逆陳得倬等就獲三月於重華堰箐林口  
馬蹏岡諸處殲賊無算擒冉添元下部議敘是月攻克蓬溪獲僞

總兵李斌苟文富首逆雷世旺又於長沙壩殲僞總兵鮮中壽等  
擢雲南提標右營遊擊七年搜勦川陝餘匪遷武定營參將殄滅  
襄陽黃號首逆樊人傑全股賊匪升副將 賞荷囊玉鞞諸珍物  
尋補廣東南雄協副將十年調惠州協副將十四年 上推恩殉  
節諸臣後裔 賞君佐恩騎尉世職時洋匪張保仔等內竄君佐  
率弁兵擊燬賊船先後殲賊四百餘擒僞先鋒陳松滿等賊窮蹙  
投誠下部議敘十五年擢南韶連鎮總兵二十三年升四川提督  
二十五年調貴州提督道光元年調湖北提督七年引疾給假歸  
里八年以年老乞休 旨在籍賞食全俸十二年卒子應選廣西  
象州知州孫慶椿襲恩騎尉世職

日本書紀卷之三十三

三

右 國史館本傳

## 黃建功

黃建功福建羅源人由鄉勇入伍嘉慶十三年拔補浙江温州鎮標中營把總十五年隨總兵李光顯等追賊於圍頭外洋匪船竄石訓保洋面擊斃無算奪匪船礮械甚夥生擒陳據等六十四名十六年擢貴州協左營外海水師千總二十四年升定海鎮標左營守備道光二年浙江巡撫帥承瀛等以浙省南田地方界連甯波台州二府濱接外洋無險可守久經封禁近有無業遊民潛往私煎私墾恐有匪徒匿迹奏請查辦三年境地肅清承瀛等以建功在山半載親歷各寨彈壓巡防始終奮勉上其功下部議敘四年五月在洋捕盜遇颶風舟壞梟水得生事聞賞加一級十



一月超擢中軍遊擊八年升乍浦營參將九年升瑞安協副將十年二月閩浙總督孫爾準奏建功水務幹練素著勞績堪勝水師總兵之任九月授廣東瓊州鎮總兵十二年督兵巡洋在流沙洋面遭風飄至徐聞縣屬青柏洋面舟覆死之事 聞 命照總兵陣亡例議卹給騎都尉世職襲次完時予恩騎尉世襲罔替尋賜賜祭葬子廷炳襲騎都尉

右 國史館本傳

## 裘安邦

裘安邦浙江會稽人嘉慶十年武進士授藍翎侍衛十六年揀發江南以守備委用十七年署徐州中營夏鎮汛守備十八年補青山營守備二十一年升署徐州城守營都司二十三年通州積窩巨盜楊大邦等出洋劫掠兩江總督孫玉庭密遣安邦潛往江場捕之偵獲首從盜犯江朝陽等四十餘名經孫玉庭保奏 命以本省都司升用二十四年補江甯城守左營都司二十五年調青村營都司旋擢海州營參將道光元年巡緝私鹽首犯閩子兩馮志川等先後就獲而通州私梟李克標紀士田等持槍械護梟拒捕勢尤張安邦偕知州孫源潮帥兵役擒之復獲夥犯金有富等

十三名孫玉庭奏請鼓勵 賞戴花翎二年遷河標中軍副將四年署徐州鎮總兵五年署松江鎮總兵時浙江嘉興杭州二幫水手爭駕新船李明秀等於秀水縣地方糾眾互鬪傷斃數十人命沿途訪緝要犯安邦偕浙江江蘇山東三省文武官捕之獲首犯李明秀任兆林等七名置之法夥黨百二十餘名悉就獲 諭曰裘安邦會同查拏浙江滋事水手獲犯多名尙屬出力著加恩賞加二級六年擢壽春鎮總兵七年調徐州鎮總兵十二年卒子枝直隸按察司司獄惠湖北候補府經歷

右 國史館本傳

誥授武顯將軍江南徐州鎮總兵裘公諱安邦字古愚號梅林浙

江會稽人祖父皆不顯以公貴 贈如其官公少食貧與諸兒以力相角請於城隍兆曰上馬金下馬銀難買英雄一片心乃從軍隸温州鎮麾下是時蔡逆聚無賴數千人出沒洋面劫商船官兵進則沒入外洋退則復出剽掠公以匕首插鞞中乘小舟直抵賊艍爲之陳順逆禍福數蔡逆曰以爾材質不能爲 國家出力乃作賊爲滅族計乎且古今有白首賊乎蔡色沮集眾謀投誠眾懼誅弗聽公取賊所劫紅毛國酒二瓶以還一軍見之皆驚公由是知名入武庠嘉慶辛酉浙江中丞阮公元主武闈見公問蔡逆狀勉之曰爾異日 國之干城也中武舉第一壬戌會試後選兵部差官乙丑成進士 欽點藍翎侍衛三年期滿發往江南以營守



備用署徐州中營夏鎮汛守備補青山營守備調江甯城守左營  
守備署徐州城守營都司軍政卓異擢江甯城守左營都司調青  
村營都司升海州營參將 賞戴花翎旋升總河督標中軍副將  
特授安徽壽春鎮總兵調徐州鎮總兵公狀貌魁梧奇偉腰大十  
圍能彎百石弓馳駿馬如飛望之者目爲神人巨盜猾賊鹽梟聞  
風竄匿然公自都守洊至總戎前後二十年計所擒獲猶數百名  
國家承平日久將士頹惰兵革朽鈍公所至必精器械汰老弱曰  
安用此以糜 國帑造擡礮兩兵肩一能打二百弓每合操旌旗  
鎧甲鮮明照耀雲龍山色轟聲與黃河濤聲俱震雷迅電閃蛟鯉  
遁藏故徐州鎮兵勇冠江南公雖武人喜讀陸宣公奏議談吏治



至民生疾苦多泣下初守夏鎮汎歲饑盡出所藏以食餓者沛令  
勸富民賑弗應公一言立應任青山營海州營遇救荒亦然余來  
徐公去夏鎮已久百姓猶謂自裘公去無公道事余謂沛令曰一  
守備使民不忘如此作長吏者能無愧乎余以事至海州宿逆旅  
逆旅人猶說公當年終夜不倦鎮壽春徐州祿入漸豐盡用以給  
餼寡孤獨冬月施棉衣貧不能殮者予棺木公一出皆擁拜馬前  
捩立義學教兩鎮子弟講武之暇與文士雅歌投壺以爲笑樂故  
兩鎮士民莫不畏公之威懷公之德勒石之詞至比晉之羊叔子  
今年四月旱余偕公禱雨公忽不至翌日知公疾越七月初四日  
疾革時湖南逆獍初報捷廣東八排蠢動公生平以效命捐軀自

矢太息曰大丈夫不能戮力疆場報國恩乃如此死乎言訖而卒年五十九

論曰公鎮壽春時使工畫其像歿後余奠拜始得見英姿肖其生時如在千軍萬馬中公素刻苦自奉人所不堪得疾製桐棺布衾遺命薄葬史曰武官不惜死文官不愛錢則天下太平如公者可謂兼之矣

右家傳劉鴻朝撰

國朝書獻類徵初編卷三百十九目錄

將帥五十九

額爾古倫

桂涵

玉麟

劉廷斌

明禪

富永

覺羅八十

富兆

色爾滾

闊凌阿

國勒明阿

蘇布通阿

國朝書獻類徵初編卷三百十九目錄



國朝耆獻類徵初編卷三百十九

通奉大夫前署江西巡撫江西布政使司布政使湘陰李桓輯  
將帥五十九

額爾古倫

額爾古倫伊拉哩氏錫伯營鑲紅旗人伊犁駐防嘉慶四年由領  
催補驍騎校八年游升佐領十六年授副總管十九年補總管道  
光五年出征喀什噶爾六年六月逆裔張格爾糾眾圍城內外梗  
塞額爾古倫帶兵衝出重圍退回阿克蘇奉 旨革職隨營效力  
贖罪八月賊圍葉爾羌各路官兵赴援 上以額爾古倫所帶之  
兵人馬疲乏器械不全難期得力俟大兵到時再令隨同進剿尋



敗賊於渾巴什河殲獲甚眾捷入 諭曰額爾古倫與賊交仗奮  
力向前斃賊一百餘名額爾古倫從喀什噶爾退回前經降旨令  
其效力贖罪此次著長清等存記如更有出力之處再行奏請施  
恩九月賊由托什罕過河圍協領都倫布營額爾古倫偕副將郭  
繼昌親率馬隊衝開賊圍兩面夾擊賊潰殲三百餘名戮賊首和  
卓庫爾班素皮 上以額爾古倫戴罪自贖兩次斃賊多名以防  
禦補用十一月張逆復糾匪黨數千踞柯爾坪回莊阻大兵進剿  
之路額爾古倫帶兵迎擊遇賊匪二百餘名我師分路抄截追至  
大郝紫卡倫殲其眾奏入 諭曰額爾古倫此次剿辦甚爲出力  
以佐領升用七年四月逆匪自沙布都爾莊痛剿後復糾眾十餘

萬在阿瓦特回莊負嵎抗拒大軍分爲兩翼左右兜擊賊復據岡  
迎敵額爾古倫奮勇奪岡分投追殺大敗之 上嘉其奮勇開復  
原官賊於渾河之南岸阻河列陣我兵乘夜躡渡直壓賊壘賊披  
靡參贊大臣楊迥春扼回城要隘額爾古倫偕固原提督楊芳等  
率馬步官兵分圍四面賊眾拚死抵禦我兵奮勇衝入克復喀城  
張逆遁大兵追之時安集延賊目愛瑪爾阿里及喀什噶爾賊目  
玉努斯帶領馬賊並情蘭回眾千餘盤踞和闐額爾古倫以精兵  
往剿抵昆拉滿地方遇賊數千我軍四路夾擊敗之 賞恆勇巴  
圖魯名號八年正月張逆奔喀爾鐵蓋山額爾古倫等領兵追捕  
殲斃餘匪多名賊棄馬登山我兵併力窮追直躡山巔生擒張逆

捷入得 旨賞副都統銜六月 命紫光閣繪像 御製贊曰錫  
伯總管逃出重圍贖罪思奮軍令敢違立功鐵蓋執訊以歸稜稜  
霜氣𦏧𦏧風威八月補喀什噶爾幫辦大臣會禁絕浩罕通商新  
定布噶爾貿易章程 上命認真稽查以杜影射冒混之弊九年  
六月調署英吉沙爾領隊大臣九月以喀什噶爾額設卡倫照顧  
仍恐未周請於喀浪圭圖舒克塔什烏帕拉三卡倫修建兵房各  
派千總一員帶兵百名駐守又請於每卡專派驍騎校一員帶兵  
巡緝設立傳牌輪查各卡奏入 上嘉納之十年二月調伊犁領  
隊大臣八月逆回復行滋擾喀什噶爾英吉沙爾二城被圍經伊  
犁將軍玉麟派隨參贊大臣容安馳往救援嗣因容安遷延失機

治罪如律額爾古倫議覩職 上以額爾古倫係聽容安調遣加  
恩改爲革職畱任旋作甘肅提督胡超帶兵援剿屢戰有功十一  
年調喀什噶爾領隊大臣十二年正月揚威將軍長齡以額爾古  
倫調任喀什城有管理回務訓練兵丁之責非本駐防地方可比奏  
請開復處分 允之十二月卒

右 國史館本傳





桂涵

桂涵四川東鄉人嘉慶元年川省教匪滋事青號賊首徐添德白  
號賊首王三槐等犯東鄉涵以鄉勇應募隨四川總督英善軍營  
效力十一月剿賊於罐子山以連有斬獲給外委頂帶十二月涵  
率義勇剿賊於張家觀普子嶺馬鞍山等處累戰皆捷英善上其  
功賞六品頂帶賊銜涵甚二年正月復犯罐子山焚劫涵所居  
村堡涵擊敗之賊轉掠冉家壩天星橋涵設伏邀其歸路俟賊過  
突起擊之追斬三百餘名給行營千總時徐添德大股駐金我寺  
爲官軍所圍經月無所掠食糧且盡欲由尖山隘口四竄二月涵  
率義勇截剿遇賊於明月壩斬三百餘級賊走據香鑪坪三月四

川總督宜縣檄涵屯守洋列子隘口洋列子距香鑪坪近涵日率  
數十人登高阜覘賊伺賊出營樵汲輒發火槍遙擊賊近率眾  
截殺前後斬馘多名五月賊渡落尾河河水方漲涵以兵蹙之斬  
溺無算復戰於冉家壩譚家觀殲賊千人徐添德之黨幾盡涵親  
族丁里聞涵累捷赴大營投充鄉勇者甚眾內大臣德楞泰將軍  
明亮卽今涵統之名涵字號義勇六月隨官軍擊斬賊首孫士鳳  
於淨土寺殲斃數千名又敗餘賊於天星橋敘功 賞戴藍翎拔  
補黎雅營右哨千總十一月白號賊羅其清藍號賊冉文儁等合  
眾犯營山經官軍擊退賊走譚家嶺三溪口涵偕忠州知州劉清  
及武生冉子明等分三路躡剿擒斬五百餘名羅其清走來定寺

十二月涵等追敗之三年三月隨川北鎮總兵朱射斗剿賊於巴州之插旗山擒斬一百餘名四月羅其清退據鯉魚嘴涵隨官軍追擊賊營於山巔深箐中沿坡設滾木礮石守禦甚備官軍仰攻士卒多傷涵率義勇分由石洞溝猴兒嶺閒道攀援而上直撲賊卡賊驚擾官軍乘之斬三百餘名涵被重傷猶裹創力戰相持至日暮始斂兵退六月王三槐率眾犯東鄉太平遇官軍折而東追及於楊子嶺賊方渡河官軍先自下游躡渡繞出賊前而涵率義勇從後夾擊斬四百餘名十一月勦白號賊冷添祿於雲陽之安樂坪賊糧盡詐降涵偵知之預伏兵於方家壩魚鱗口賊夜至伏發斬賊二百餘東鄉賊匪謝萬青復糾合零匪數百人據開縣之

貓兒寨爲官軍擊走涵隨參將褚大榮胡尙賢星夜追躡及於三  
寶山賊竄匿深林涵等分三路搜捕斬萬青黨眾俱盡捷聞擢  
建昌鎮越嶺營中軍守備十二月勦賊於手把巖涵偕守備薛升  
夜斫賊營手刃守卡賊匪攀柵而入斬八十餘名生擒賊目劉寅  
兒等四年二月勦賊於長壽之雲臺鋪達州之雷音鋪太平之鐵  
礦壩開縣之蘆花嶺等處俱有斬獲三月敗黃號賊龍紹周於太  
平之修溪壩徐添德由川竄陝經略大臣勒保檄副都統德楞泰  
統大隊追躡飭涵率義勇由閒道出賊前夾擊敗賊於通天觀四  
月復擊徐添德於明通井王家壩新開場連敗之五月追賊至陝  
西平利之四季河擒賊目張仕達降僞總兵顧應全又勦賊於巫



山之八十坪降僞總兵張宗泰六月隨朱射斗勦藍號賊包正洪於蘆花嶺斬之四川總督勒保以 聞 賞換花翎七月勦擒賊首龔其位願三聘於八十坪斬四百餘名八月進勦賊首龔建於貓兒寨九月黃號賊樊人傑等自雲陽竄開縣涵隨四川提督七十五追及於火峯寨賊眾據險拒守官軍分道攻克賊首龔建突陣欲走涵擒以獻捷入 命以都司升用徐添德率眾圍夔州府急涵會朱射斗等援之戰於蓮花寺擒斬八百餘名獲賊目李思貴欲解大營正法思貴乞招賊以自贖涵縱之思貴旋同賊渠李其倉劉全德並其黨四百餘人詣經略額勒登保軍門降十月隨額勒登保追藍號賊張漢潮行次楊柳池遇白號賊鮮大川藍號



賊王士虎涵所統兵少賊圍數重廛戰良久突圍出大兵踵至會  
合擊賊斬數百名旋復敗賊於巴州之鷹背場擒斬二千有奇十  
一月剿青號賊王登廷於通江之東君壩偵賊營無備天未曙卽  
率兵薄之賊大亂登廷就擒並獲僞總兵王文奇旋補維州協左  
營都司五年正月敗賊於蓬溪之高院壩三月又敗賊於劍州江  
口擒斬數百名赴水死者甚眾獲羸馬無算尋剿白號賊高二馬  
五於江油之桂溪場敗之賊竄平武四月冉文儔犯象龍寨官兵  
擊破之賊乘夜撲營復爲官軍所敗涵率兵追至懶板凳擒賊日  
符得恆是時賊被官軍搜捕急遁入老林我兵復蹙之賊窘甚閏  
四月將由徑嶺竄逸齊守卡團勇俾讓路以出四川提督勒保令

涵易服僞爲國勇讓路狀賊前隊至麾眾出不意擊之擒斬七十餘名餘皆墮淵死六月朔賊於新甯之關山關擒斬數百名七月敗白號賊楊開甲齊國典於鄰水之七孔溪又敗鮮大川於大竹之姚家巖敘功升靖遠營遊擊八月隨七十五朔黃號賊王國賢於開縣之温塘并擒斬二千餘名十一月東鄉開縣零匪竄至扇子山涵帶兵躡賊追及於梁山太竹連界之賽白兔山梁盡殲之擒僞先鋒符大成六年正月搜逸賊於柏林槽誅戮殆盡又敗賊王士虎苟文明於閬中之碑灣寺二月追至開縣之土龍堰又敗之三月白號賊湯思蛟遣其黨唐大魁馬思貴僞總兵龐姓僞先鋒冉姓等分路滋擾涵擊唐大魁於猴兒巖擒之盡戮其眾四月

勦馬思貴於蕭家山榨井壩等處馬思貴中矛死擒秦士玉等七十一名五月涵隨貴州古州鎮總兵永凝副將田朝貴等勦湯思蛟賊屯馬家營山梁而於靈官廟設卡分守官軍擊破之乘勝薄馬家營賊抵死據險抗拒永凝督眾仰攻相持久涵率步隊自山右陡崖猱攀而上官軍自山前冒矢石競登合擣賊巢賊不能支遂大潰擒斬多名獲刀矛旗幟無算奏入 命下部議敘六月藍號餘黨鮮倖先苟文通青號餘黨何子魁與太平固軍壩殘匪同犯東鄉之仁和永興二寨官軍分三道擊之勒保率大隊由中路副都統阿哈保由左涵隨川北總兵薛大烈由右賊敗走窮追至葉尖壩陣斬鮮倖先擒何子魁苟文通赴水死旋隨阿哈保勦賊

於通江之石叟山擒徐添德之弟添壽子大寬姪大朝王登廷之弟登高及僞元帥王文科僞總兵劉學詔等俘斬千二百餘名上以涵累著戰功命以應升之缺升用八月官軍擒藍號僞元帥冉學勝於通江涵以協剿有功復命下部議敘九月賊東掠官壩官軍敗之涵偕參將羅聲皋等追剿斬一百餘名復隨勒保剿賊於墊江之太平鋪登溪鋪等處擒斬一千八百餘名十月湯思蛟竄達州涵隨阿哈保等追剿於魏家溝擒僞先鋒王登級等十一月剿擒賊首蕭坤於太平之潘家坪斬三百餘名十二月隨薛大烈剿黃號賊於太平之小中河賊遇官軍驚竄涵豫伏兵於各隘俾退師以誘賊賊乘虛逸出悉擊殲之獲首逆葛思寬七年



二月升四川提標中軍參將三月湯思蛟之黨張學武率餘匪竄開縣之王家坪涵隨甘肅肅州鎮總兵張績擊斬之移師爛泥壩偵有徐添德餘黨在銀廠坪急往剿擒僞先鋒廖登仁陳文禮四月徐添德等走鐵鍊橋涵偕張績設伏邀擊俘斬無算餘匪王珊等竄鳳凰山復爲涵擊破七月湖北竄匪由巫山大甯入川涵隨張績截剿於石坪殲擒其半訊知賊將踵至駐師待之八月楚匪果犯馬蟻口復敗之九月剿賊新甯之兩峯埡賊眾竄匿深林四面兜擊賊無遺類移兵襲扇子山盡殲逸賊於金家營又剿賊於開縣之芭蕉溝太平之曹家溝擒斬五百餘名獲僞總兵孫廷相十月龍紹周餘黨由舊縣壩犯東鄉涵率兵截剿夜擊賊營斬一



百餘名時王國賢暨線字號餘匪先後入川合擾雙場民寨涵隨  
官軍分路進擊賊敗走馳抵大竹殲餘匪於烏龍寺十一月期青  
號僞總兵熊卜祿於長壽之宋家溝擒斬七十餘名卜祿死移師  
討白號賊庠秀僞千總楊林等於忠州之高岡堰悉擒之十二月  
偕鄰水縣知縣鍾人傑合剿宋逆餘黨於張家場俘男婦一百餘  
名八年正月敗白號賊於大竹之三墩坡賊目苟文富竄墊江之  
冷家壩爲我兵追獲又搜餘匪於梁山之石板坡大竹之大安槽  
及江北廳之古路坪木耳場月來場等處頻有斬獲三月殲藍青  
號餘匪於萬縣之四十八槽孫家槽等處獲青號賊目王青四月  
白號餘黨宋國品率眾自老山竄擾大竹涵令知縣袁士先預設

伏於大埡口防賊敗竄而自以大軍迎戰於柏楊溝大破賊眾生  
擒國品五月勦賊於巴州之清半寺僞總兵王老少率餘眾降六  
月遷雲南龍陵協副將勦畫角嶺驚嘯巖諸賊擒僞先鋒陳宗冕  
八月調維州協副將時川東諸賊肅清大兵以次凱撤川東諸鎮  
將分守各隘涵駐太平搜勦匿匪未幾蒲包山黑礮山關口坪峩  
城山黑崗溝柯家坪諸處零匪悉平九年正月以次殲開縣桃花  
洞白筍坪諸賊四月陝西固原提督楊遇春敗賊於平利之楊道  
士溝七月賊擾安康之鳳凰寨涵復隨遇春等分三路進擊斬僞  
元帥李如玉周天良僞總管王士奇擒僞元帥羅思蘭符廷伏僞  
總管王宗福紀友亨蕭昌奉等於陣並殲賊黨一百五十餘名十

年十月調署夔州協副將按捕川陝楚沿邊餘匪殲除淨盡十一年綏定叛匪王得先等滋事涵帶本營弁兵急募鄉勇三千人星夜馳往剿捕遇賊於檀木場大破之首逆王得先等俱就擒事

聞 賞健勇巴圖魯名號加總兵銜仍交部議敘十三年署重慶鎮總兵十四年授川北鎮總兵十八年陝西岐山三才峽木廂匪徒萬五等因饑煽亂 上命四川提督多隆武率涵等駐川北截剿以防陝匪南竄十九年正月賊黨吳抓抓等率千餘人趨武關欲自黑河入蜀涵率松潘兵由沔縣迎遏賊退走二月事平道光二年三月擢四川提督七月果洛克賊番劫西藏堪布貢物涵奉命剿辦兵抵唐凹達凹等寨殲戮甚眾擒首逆曲俊父子懲治如

律阿壩各番畏威乞命 上以涵辦理甚合機宜 命交部議敘  
賞玉翎管玉扳指大小荷包以示嘉獎十二年四月甯遠府烏坡  
廠夷人阿都扁巴等句通沙罵土司安玉嘍聚眾作亂涵檄守備  
張富蔡長青帶兵剿捕擒阿都等誅之追至萬回姑夷巢扁巴安  
玉嘍俱自殺十一月越嶲廳屬捫扒支夷滋事四出焚掠涵偕成  
都將軍那彥寶調兵三千人往編查保甲招撫生熟夷一萬五千  
餘戶夷眾感悅縛獻首逆送還所掠漢民 上免其疏防處分尋  
以軍政復 予議敘十三年正月曲曲烏窩石等支野夷與熟夷  
句結漢奸楊文斌馬新明等聚眾數千人焚劫越嶲廳之大樹堡  
等處清溪各屬熟夷競起應賊涵督兵剿捕連破賊於水桶溝香



樹頂楊文斌等俱伏誅移師富林汛賊夜撲大營涵麾眾嚴禦邁疾二月卒於軍 諭曰四川提督桂涵由鄉勇拔補千總洊升提督久歷戎行身經百戰在提督任內整飭營伍訓練有方上年辦理越嶺廳捫扒夷匪諸臻妥協近以清溪夷匪滋事該提督懋著勤勞歿於王事著加恩贈太子太保銜卽照提督賜卹任內處分悉予開復應得卹典察例具奏伊子桂文奎等俟服闋後送部引見候朕施恩尋 賜祭葬 予諡壯勇十五年 諭曰前因原任四川提督桂涵久歷戎行屢著勞績特令伊子桂文奎等俟服闋後來京交部帶領引見昨經吏部將桂文奎等帶領引見朕追念成勞賞延後嗣雲南候補知州桂文奎著加恩以知州歸部儘先



選用文生員桂文籍著賞給副榜營千總桂文錄著以千總用用  
示朕眷注蓋臣有加無已至意子文奎以廕授員外郎改捐知州  
見任雲南昆陽州知州文籍 恩賜副榜就職州判文錄候選營  
千總孫森煌陝西候補未入流有根候選教諭

右 國史館本傳

桂涵者與羅思舉皆東鄉人膽智趨捷不治生產橫行鄉里屢觸  
禁網遂不知所之時或見於人家屋瓦上及幽巖窵洞荒寺敗舍  
閒足嘗裹鐵沙數十斤蓬頭敝禪行千里外開川楚軍興官募義  
勇皆來歸各起鄉兵以拒賊時蹈賊瑕或昏夜獨入賊營往返數  
四賊來報復輒遠颺已復左右擾之往往數十騎走賊萬眾由是

兩路義旅遂爲川東北最。涵初與其父桂天聰率族黨起義屯罐子山。萬賊來攻，涵率壯士數十伏隘，大呼躍出，賊辟易走。又嘗從官戰，潰涵率其伍伏林莽，伺賊過，反擊其後，轉大勝。暮營山上，徧熾草樹爲號。賊知涵兵少，張虛勢，夜半襲之，則空營。忽鼓譟伏，四起，賊不測，反走。歸路已爲木石塞斷，大潰。天明仍不見一卒，其權奇多類此。嘉慶三年三月，從總兵朱射斗攻徐王二賊於金我寺，垂破，擲火觸柵，倒熱硝桶，盡轟驍賊，乘勢出突官兵，且戰且退，至山半，被圍數重。涵率寨勇據山旁二峒，乘賊與官兵戰，出截其尾，襲其巢，賊始潰，退回攻二峒，積柴巖下，熏之。峒中扇以風板，煙燄四散，賊掘山溝灌峒，峒中開竇寫之。又兩山築望樓，賊謀來探者

輒銃斃之賊患寨勇與官兵犄角遂移屯重石子香鑪坪朱射斗躡其後涵及思舉各伏鄉勇伺賊渡溪河突出扼擊之賊自相蹂躪溪爲不流五月官兵追香鑪坪賊而西時達州東鄉太平新甯民被賊焚掠圖報復者聞之爭挾矛矢來追及賊淨土庵德楞秦明亮穆克登阿朱射斗四軍扼其四面賊攻朱射斗營自晨至午營垂破忽鄉勇四山叢擁而出不知其數各標樹葉爲號涵及思舉倡先陷陣呼聲震山谷賊寨火藥忽發煙塵漲天勢土崩尸積數丈斬教首孫士鳳官兵又礮擊潰竄之賊賊縊林中相望樹爲之折明年林木皆爲屍氣蒸死自賊起以來無此大創餘賊二三千北走太平泥沒頂踵無復人形沿途寨民爭擊東西鼠竄蜀賊

莫狷於徐王至是大蹙使非湖北齊王氏姚之富等相繼入川則  
不再戰而殄矣十二月涵捷老鶴背擢越嶲守備四年二月副都  
統德楞泰敗徐添德於長壽之雲臺鋪賊夜劫營不動次日整兵  
酣戰參贊額勒登保賽冲阿引勁騎橫衝之賊大潰追及平井鋪  
賊詭令婦女肆酒食以待追兵前隊至正飢渴就飲食爲伏賊所  
害涵及思舉領鄉勇至敗之又轉戰及開縣之白橋賊伏騎橋左  
右而整眾橋東以待德楞泰望之曰是有伏令涵思舉出其左他  
將出其右自率中隊馳之賊大北九月朱射斗追冉天元於開縣  
穆克登阿由東鄉至合敗賊於涼風埡涵以都司奮追數十里賊  
窮且見追兵少回鬪涵獨與數騎左右衝突圍數十重大軍繼至



賊始走老林非涵趨勇幾不免十一月涵及思舉從穆克登阿追王登廷於通江夜斫賊營時賊以松柏爲號官兵以人和爲號賊營中賊號忽亂自相蹂躪死無數王登廷負傷走南江獲馬五年閏五月涵從阿哈保等追高馬二賊於龍安分營兩山左右涵率鄉勇百人馳之賊辟易官兵不繼進賊回攻兩山軍軍潰入林會暮微雨賊退涵集潰卒從林中突出截之賊疑中伏亦大潰初四年奉 旨招撫脅從罔治而賊探其所至揭去膳黃解散無幾至是桂涵從朱射斗敗王光祖於雲陽降出數千人涵獲賊首李甲縱歸賊營令招其黨果至巴州率數百人出降於參贊給器械列前行於是降者日至明年涵又使李甲分遣其黨歸諭各賊而



沿途民寨屢被賊紿疑爲間諜阻其行卒不得達自後桂涵從薛  
大烈阿哈保等別屬勒保始與羅思舉分路六年正月官兵擊斬  
徐萬富餘賊將奔陝知府劉清率巴州義勇邀之賊疑爲官兵驚  
走適提督七十五率羅思舉等軍至賊轉疑爲鄉勇戰大敗禽斬  
千餘川北賊大蹙五月涵從阿哈保等由界嶺追李顯必於店子  
河大雨溪漲賊入絕地死拒官軍三面偪之殲諸水會大雨五晝  
夜阻漲不能回營殺馬馬盡掘草草盡卒多餓死六月涵從阿哈  
保薛大烈羅思舉從七十五合追鮮苟等賊於東鄉四面攻之賊  
遁鞞尖壩官兵急據淺灘迫賊走深涵溺死千計旋設伏襲破之  
於巴州通江賊夜盜索倫馬及襲隨營商賈爲邏者所覺復敗之

國朝通志卷之三十一  
二四  
七月追賊廣元賊令老弱先行而伏驍賊山中阿哈保薛大烈分兵左右而涵及思舉攻中路乘霧至山口伏賊乘高下壓酣鬪而左右軍繞截其後賊不能進退死戰竟日官兵多受傷而賊之精銳亦盡九月追賊墊江索倫兵矢無虛發賊懼偽降而乘夜走鄰水大竹涵言賊窮且死鬪勝負未可知度賊數日內必過達州請先往伏兵衛家溝蓐食待戰賊果至伏兵突起與大兵夾殲之十一月涵以遊擊隨薛大烈追李彬冉天士等賊於通江至小中河天大雪賊謂官軍必不出酣歌不爲備涵領鄉勇冒雪宵進官軍不得已隨之四鼓抵賊壘賊巡柝者畏寒皆縮伏帳中黎明四面乘之賊望平曠奔軼遇索倫勁騎無一免者七年六月涵以參將

追徐添德至絲羅壩垂獲而左右寨民不辨疑官兵爲賊截其追  
路適總兵田朝貴伏兵於前徐添德誤奔入涵至夾攻獲焉大抵  
賊將至輒以探騎先一騎被殺則他騎皆反報大隊先遁或預備  
以待涵每伏勁卒俟其探騎過則全殲之而突衝其大隊每獲奇  
捷自後轉戰開縣新甯太平大竹東鄉長壽忠州鄰水江北廳斬  
獲二三千皆殘敗之賊無大戰故不具書其戰江北廳也軍方勝  
於秦羅坪夜犒賞酣飲賊突出老林大呼偪壘眾皆失措涵堅壁  
不動比曉逐之斬其渠而還其富河場之捷獲賊數百檻送長壽  
縣方殘破無監獄繫諸鼓樓三更乘守兵睡熟羣破械焚殺涵聞  
夜馳二百里一鼓禽之其在雲陽適經略追苟文明餘黨至太平

大軍尙未至賊營山上燎薪禦寒涵率數十卒夜至使半伏河岸半襲山上賊驚潰爭跳巖下岸兵騰躍斬之如刺飛禽軍中語曰戰莫樂巖前斫八年五月經略參贊會兵三省之交分兵搜捕老林路險餉艱且皆百戰猾賊涵及思舉夜襲賊於太平之望鄉臺賊先有備分隊出我陣後塵戰竟夜月斜眾星亂墜兵與賊俱潰涵思舉收軍犒士約翌日決破賊比曉賊已入陣突鬪聲振山谷兵賊皆力盡乃退九年正月賊復闖入老林官兵鑿山伐木通道山谷蟻絕軍不成隊糧不濟飢軍中語曰戰莫苦穴中鼠九月涵以副將從經略參贊圍餘匪於太平之火燒梁山峻無路涵曰守此相持雖數月如賊何山下小溪通寨後民峒賊圍久必出劫峒



糧宜以步兵繞伏山後大師從之皆棄騎步行竟日始出賊背賊果佯拒山前而驍銳千餘潛劫民峒官兵爲偃月陣繞之殺傷相當諸將以此次不滅賊將更滋蔓皆死戰不退半日竟殲之於是前山拒守者皆膽落不日殄盡川陝肅清十年十二月綏定府復有新兵之變初甯陝叛兵招撫後士驕甚流言無忌有綏定營兵陳得先等中途以借餉圍脅營弁羅思舉策其歸必變密札綏定守備王國雄令遣悍卒因事過太平欲便宜誅之王國雄以己非太平屬置不答及是果爭餉激變國雄及兵備道嚴世鋹知府王世濤皆踰城遁知縣余永甯朝服升堂諭賊使出城受約束而募勇守城桂涵率親兵百人馳至合鄉勇一鼓禽斬之桂涵以川北



鎮總兵至四川提督道光十年卒川楚之役勦內地亂民故多用  
鄉勇自文吏劉清外莫著於羅桂二將詩曰修我戈矛與子同仇  
二將有焉

右記魏源撰

玉麟

玉麟哈達納喇氏滿洲正黃旗人乾隆六十年進士改翰林院庶吉士嘉慶元年散館授編修二年四月充 玉牒館纂修官五月充日講起居注官三年升侍講四年四月充 實錄館纂修官七月升右春坊右庶子十二月升國子監祭酒仍兼 實錄館行走五年正月欽差祭告中嶽南嶽八月擢詹事府詹事六年正月充文淵閣直閣事二月授內閣學士兼禮部侍郎銜 諭曰玉麟前派充 實錄館纂修均屬妥協今升內閣學士官職較大未便令其仍充纂修官著授爲總纂官遇有陳奏事件並著列名在副總裁之後四月授正黃旗蒙古副都統八月 命往上書房行走七

年三月充會試副考官四月管理圓明園八旗包衣三旗官兵事務八月 上幸木蘭玉麟隨扈行圍 賞戴花翎十月調正白旗漢軍副都統八年七月升禮部右侍郎充經筵講官九月充 實錄館副總裁十二月調正白旗滿洲副都統九年六月充教習庶吉士轉左侍郎八月充順天鄉試副考官十年五月復充教習庶吉士閏六月調吏部右侍郎充武英殿總裁十一月轉左侍郎管理國子監事務十一年三月 派閱 實錄正本四月署戶部左侍郎六月兼署鑲白旗滿洲副都統八月充左翼監督十一月兼署正藍旗滿洲副都統稽察會同四譯館十二年三月安徽壽州民張大有因姦謀毒雇工李小八致斃三命讞成經蘇州府知

府周鐸長洲縣知縣趙堂元和縣知縣萬承紀覆審翻供改擬  
上命玉麟會同安徽巡撫初彭齡嚴訊究出謀毒屬實按律治罪  
府縣徇情教供遣戍伊犁奪按察使遇昌職兩江總督鐵保下部  
嚴議又湖北省城官銀匠陳信義及其子士芳侵虧武昌通城棗  
陽穀城光化大冶等縣解省錢糧二萬四千五百餘兩陳信義以  
誤大冶棗陽兩縣兌期自盡事遂覺總督汪志伊巡撫章煦擬陳  
士芳斬候 上以其輕縱五月 命玉麟偕刑部左侍郎韓封往  
鞫將陳士芳卽行正法庫大使石萬泰議褫職總督以下各官分  
別議處有差八月充順天鄉試監臨官劾順天府咨送試卷遲誤  
兼管府尹鄒炳泰府尹宋銘府丞熊枚治中戴修齡等均下部分

別議處又奏士子坐號不敷新葢棚號祇屬權宜之計不蔽風雨且稽查難周相度隙地可添號舍八百有奇奉 旨著工部詳細履勘議增七百二十九間 從之旋 命提督安徽學政十四年調江蘇學政十五年署戶部左侍郎十六年四月 上命玉麟偕刑部右侍郎朱理謙獄河南東河總督李亨特奏參開歸道林樹芳加扣銀兩借貸錢文赴工多帶委員騷擾河廳發賣酒物河南巡撫恩長奏參中牟縣上汛管河縣丞冒冠德稟許賄銀指缺求升各案訊實林樹芳冒冠德均遣戍伊犁郟城縣民常三多控父常廷鏊被人毆傷非自縊內黃縣民安清聘控差役誣良詐贓訊虛均如所擬罪六月授右翼總兵管理右翼宗學西洋堂事務署



倉場侍郎七月以步軍統領衙門緝拏賭犯限滿未獲交部察議命拔去花翎九月以吏部選補錯誤革去吏部左侍郎及兼管國子監事務教習庶吉士十一月補內閣學士兼禮部侍郎銜十二月萬安倉花戶張貴恆等舞弊在逃限內全數緝獲 賞還花翎十七年二月授鑲紅旗護軍統領五月調左翼總兵七月充崇文門副監督十二月授戶部左侍郎充經筵講官十八年九月十五日恭迎 聖駕自髻髻山至白潤先馳還京聞東華門賊匪滋擾經所屬兵拏獲五人時已交未卽督率八旗步營由中正殿夾道迎擊而南斃賊數名生擒天理教匪宋尙忠李二格二名由八百里馳奏尋 諭以步軍統領門禁懈弛褫職十九年 賞給三等

侍衛馳驛前往葉爾羌辦理事件二十二年 賞副都統銜充駐  
藏大臣二十四年補鑲白旗漢軍副都統二十五年十月 命來  
京道光元年八月授左翼總兵尋調鑲白旗滿洲副都統十一月  
命偕戶部左侍郎王鼎赴湖南訊寶慶府已革通判至善控揭衡  
州府通判孫齡虧空倉庫一案坐誣至善遣戍伊犁又 命查河  
南儀工時河南閩鄉民人粟自修京控知縣朱重倫濫派累民得  
旨解交審辦訊實按律定擬又已革守備希朗阿稟揭大名鎮總  
兵德克金布剋扣兵餉訊誣坐如律十二月授兵部左侍郎二年  
正月仍偕王鼎馳赴江西審結已革守備徐富國控星子縣鹽商  
送錢帖移縣未覆上司律以求索得財失實惟捏控規費清單交

百該縣照舊革職承審各員下部議處二月調禮部左侍郎四月復至河南訊陳畱縣知縣趙錦堂辦賑不實褫職戍邊五月調刑部左侍郎六月訊直隸高邑知縣范澍誣控本州挾嫌註考按律遣戍是月授都察院左都御史十一月署禮部尙書兼管太常寺鴻臚寺事務尋授禮部尙書三年二月署吏部尙書四月調兵部尙書八月署步軍統領四年閏七月充崇文門監督盤查戶部三庫十一月賞紫禁城騎馬旋命在軍機大臣上行走十二月管理戶部三庫事務署正黃旗領侍衛內大臣充武英殿總裁經筵講官五年二月上謁東陵命隨扈七月調正藍旗滿洲都統八月充順天鄉試正考官十一月以玉麟年屆六旬賜壽

額六年二月 命管理圓明園八旗內務府包衣三旗事務五月  
充教習庶吉士七月副都統長清甫至阿克蘇辦事大臣任卽能  
撫眾剿賊 上以玉麟保薦得人復 賞還花翎七年七月充上  
書房總師傅授翰林院掌院學士加太子少保銜八年正月重定  
回疆晉加太子太保銜繪像紫光閣 御製贊曰回疆梗槩知之  
頗悉滿洲文臣特參宥密授以夏官申以紀律不炫才能同資匡  
弼九年三月充會試副考官六月授伊犁將軍十年正月以各夷  
納馬多殘廢口老請嗣後另廠牧放續有倒斃每年每百匹報銷  
三分自道光九年始 命如所請行五月奏霍罕將作不靖請暫  
緩南路換防兵大要有三一阿坦台汰劣克屢請投順包藏禍心



巡邊添兵以備禦一伊薩克忠勇能事心思極巧能察該夷蹤跡  
責令乘機就獲一欲彌外患宜撫近夷布呼等愛曼恭順以重賞  
固其心則卡外動靜皆悉有 旨所議三條均屬可採七月奏請  
籌補回疆動用倉存餘糧得 旨前次回疆軍需由伊犁撥運小  
麥四萬九千石零粟米一萬石零係積年存餘備貯之項既經動  
用自應隨時籌補著照所請自本年爲始察看每年秋收後情形  
統限三年陸續買補俟補足六萬石之數再行專摺奏報時嚴禁  
茶葉出卡又奏哈薩克王江霍卓素稱恭順懇將封存買茶 賞  
還 允之八月安集延挾抄逐之嫌句結霍罕進犯卡倫幫辦大  
臣塔斯哈邁伏陷沒玉麟馳奏前以回清反覆無常飛咨喀什噶



爾參贊大臣札隆阿訪查原期有備無患乃汰劣克等詭爲恭順  
札隆阿深信不疑今變生倉猝問欲棄喀什噶爾合兵退守阿克  
蘇請令長清成格籌糧儲哈豐阿帶兵進攻一面調伊犁兵勇四  
千五百名赴南路協剿 上聽其言 命大學士揚威將軍長齡  
督師往剿十月伊犁參贊大臣容安阿克蘇辦事大臣長清等以  
葉爾羌附近各莊有朵蘭回子出沒奏令哈豐阿孝順岱帶兵由  
和闐草地進援玉麟奏喀什噶爾英吉沙爾被圍已及兩月回眾  
猶盼大兵往救可見賊勢尙單易於援剿今宜迅由大路直赴葉  
爾羌則二城之圍自解若迂道和闐計到葉爾羌須一月以後設  
或西二城日久不支賊眾蟻聚東驅恐哈豐阿等一軍未必得力

且阿克蘇見集之兵不下萬人該大臣僅派三千餘人繞路進發轉畱多兵坐糜糧餉實屬非計哈豐阿等如已起程卽另派官兵直抵葉爾羌朵蘭回子不過七八百人兩將官兵齊進不難立就掃除自九月以來札催十數次乃該大等始則以籌備糧運遷延多日後又稱吐爾扈特及民遺皆不足特查阿克蘇至葉爾羌裏糧二十日已足用今烏魯木齊轉運之糧已源源而來前此克復四城民遺甚爲得力而渾巴什河之捷吐爾扈特兵力較多況近日璧昌等破賊數千尙能以少勝眾豈沿臺零匪轉不能就地殲除請旨將長清等嚴行申飭如所請行諭曰前此朕將玉麟簡放伊犁將軍因其在軍機大臣行走有年且諳悉回疆情形

是以畀此重任茲覽所奏深愜朕懷著發去人蔘四兩俾資調攝該將軍當加意保養長爲國家宣力渥受朕恩以副厚望尋奏賊勢初起勢甚猖獗節經探訪漸形渙散見調官兵不止四萬計每月需糧一萬五千餘石運費需銀十萬餘兩請將續調四川陝甘兵數酌量停止並 敕下回疆各城大臣採買糧餉較之戈壁轉輸節省不止倍蓰 上嘉納之初逆夷張格爾之就擒也郡王銜伊薩克誘致之旣膺爵賞爲諸夷所怨九年冬兵民謀劫掠伊薩克事洩喀什噶爾參贊大臣札隆阿奏明誅爲首六人遂下令驅逐流民眾以爲伊薩克之意積忿愈深圍城中有自賊營逃回者述賊言伊薩克爲內應兵民咸謂非殺伊薩克城無以守會回眾

避亂奔入新城兵民殺之札隆阿不能制遂將伊薩克看守以句  
結謀逆列款入奏玉麟奏伊薩克身膺王爵富貴已極若甘爲夷  
驅使豈非得不償失況其子孫在阿克蘇其家業在庫車豈無顧  
慮而蓄異謀今喀什噶爾甫解圍意外又生枝節若不確查致大  
失回眾心是外寇未除而內患復起也 上交玉麟會同長齡審  
訊尋審明札隆阿以約束不嚴懼罪及冀殺伊薩克掩其迹並究  
出委員周彭齡商同捏奏章京金奇賢遂合承審通事阿布都吉  
里教供誣證各情按律分坐 諭曰若非卿二人公忠體國何能  
平反此案使內外夷回懾服可嘉之至十一年二月奏言閩固原  
提督楊芳添兵招佃奏稟稱四川總督鄂山有請將西四城改照



土司之議伏思回疆自入版圖設官駐兵不惟西四城爲東道藩  
籬南入城爲西陲保障卽前後藏及西北沿邊一帶蒙古番子各  
部落皆賴鞏固若西四城不設官兵僅令回人守土誠恐回性無  
恆又最畏布魯特彊橫轉瞬卽爲外夷所有則阿克蘇又將爲極  
邊矣其迤東之庫車喀喇沙爾土魯番哈密等城必至漸不安堵  
以形勢而論督亡則荷塞以地利而論喀什噶爾葉爾羌和闐三  
處爲回疆殷實之區捨沃壤而守瘠土是藉寇兵而齎盜糧也楊  
芳所謂守善於乘實不易之論至論請將喀什噶爾參贊移駐阿  
克蘇殊非善計該處幅員狹隘不足爲重鎮且距喀城二千里有  
鞭長不及之患其所陳招佃通商各條則爲治邊良法請用之



上命偕長齡妥議具奏又將長齡密陳節略十條及內外諸臣奏議 敕交玉麟悉心籌畫尋偕長齡奏霍罕安集延本烏合之眾不必采入窮追我兵有備待其至而痛剿之可寒夷膽諸臣所謂添兵招佃似屬可行但未親歷其境使兵勢聯絡如一亦有不能徑行之處喀城地處極邊外夷由卡至城僅百餘里後路距阿克蘇二千餘里昔張格爾圍喀城援兵不至四城先後失守可爲炯鑒今議善後豈可復蹈前轍致令參贊大員坐困重圍不能制人而爲人制西四城見有滿漢防兵六千餘名即使酌增賊匪倉卒入卡由各城紛紛徵調孤軍遠涉不能迅至設賊匪抄截其後其患豈可勝言長齡前議撤兵退守喀喇沙爾查該城在八城之極

東喀什噶爾在極西相距四千餘里彼此不能相顧若以西七城專付阿奇木管理設回眾力難禦賊勢必轉爲賊有以七十年已隸之版圖一旦棄之有傷國體爲今之計惟有量移統鎮以資控馭酌添兵力以壯聲威參贊總理入城葉爾羌爲扼要適中之地應請移駐於此該處地廣戶繁可以多駐官兵距喀什噶爾六站外夷進卡接見在不遠不近之間足資控制其幫辦大臣仍照例專管本城事務更移駐和闐領隊大臣一員聽參贊調遣喀什噶爾畱換防總兵一員在彼統兵駐守英吉沙爾仍駐領隊大臣一員再請於葉爾羌阿克蘇適中之巴爾楚克一帶添駐總兵一員以爲樹窩子咽喉鎖鑰則六城相距均不過數百里聲勢易於聯

絡和闐僻在一隅祇畱領隊一員足資辦理其滿漢防兵額數西四城見有六千餘名再酌畱伊犁烏魯木齊馬隊二千名陝甘綠營兵四千名共計舊額新增一萬二千名喀什噶爾擬駐綠營兵三千統以總兵作爲前敵賊少不難擊退賊多則稟參贊援剿英吉沙爾擬駐伊犁馬隊五百綠營兵一千爲前後二城中權接應巴爾楚克駐綠營三千和闐止防兵二百餘今擬倍之此外滿兵二千漢兵四千餘名全駐葉爾羌徵調可期得力設有賊匪入卡喀什噶爾英吉沙爾兩城既有馬隊四千餘名足以抵禦更由葉爾羌撥兵接應又有巴爾楚克鎮兵續援樹窩子復有兵守賊不能抄襲後路東四城均可無虞參贊居中制外調度裕如嗣後邊

防安靜新增兵額不妨隨時抽撤此時增兵需餉請於各省綠營兵額暫裁百分之二節省銀兩足備添兵之費俟屯田著有成效足支兵食補還暫裁之數以回疆物產供回疆兵精經費既節疆圍可固再請大黃茶葉等物仍准外夷通商交易以示羈縻庶霍罕安集延等懷德畏威不敢復犯邊境又奏參贊大臣既移駐葉爾羌其印房等處各官應與喀什噶爾葉爾羌並請於葉爾羌添設經牧章京一員專司牧事喀什噶爾葉爾羌裁糧餉章京二缺各改設糧餉同知一員添設巴爾楚克糧餉同知一員又於葉爾羌喀什噶爾英吉沙爾巴爾楚克等處各設巡檢一員同知管商民回子詞訟戶籍屯田巡檢管緝捕監獄稅課



均作爲邊遠差缺由陝甘兩省派往拜城距阿克蘇較遠請添設分防巡檢一員管理拜城賽里木二處商民回子詞訟亦由陝甘派往作爲差缺均從之旋奉 上諭派兵過多增設職官儼於回疆添一省會失居重馭輕之道 命玉麟等悉心酌減尋議減巴爾楚克防兵五百名葉爾羌滿洲兵五百名綠營兵一千五百名同知三員巡檢五員統計舊額新增各大臣官員兵丁書識歲需糧料合併西四城額徵折色糧石通融撥用已足供支毋庸津貼採買又據和闐阿奇木伊斯瑪依爾等呈請歲捐糧一千二百石供添兵口食烏什阿奇木木薩等呈請在寶興屯工地內捐築回城令屯兵歸城操演每歲額交糧石卽由回戶照數交納又西



四城歲徵賦錢六千七百餘串除搭放外每年存贖普爾錢五千餘串見在減定暫畱防兵五千餘名需餉不過十萬兩若將存贖賦錢以二百二十文易銀一兩可充經費銀二萬三千餘兩此項存贖賦錢向係各城儲備充公按年報銷用款不一不皆散在兵眾若將五千餘串全放兵餉則散有常期城市錢源益加充裕不致錢貴銀賤至安鑪鼓鑄祇阿克蘇一城普爾錢文行用止在回疆非內地可比額鑄之錢與歲俱增輾轉流通總不出八城地面斷無短絀之虞 從之又奏開墾屯田見據喀什噶爾大營駐紮處所名喀拉赫依延袤二百餘頃已招五百餘人認種將來逃散回戶歸來卽以見存板產照數撥給嗣後續有承種民人於大河

拐附近荒地酌量分撥葉爾羌境內毛拉巴什賽克三一帶荒地  
俟巴爾楚克接連樹窩子等處築堡設汛後廣爲招種其修渠引  
水牛具籽種按則徵收各事宜須試種一年再由參贊大臣璧昌  
詳議章程具奏得 旨著照所奏辦理八月 皇上五旬萬壽  
推恩近臣玉麟子恆昌二品廕生 命俟及歲時以員外郎卽用  
十二年善後事竣 上命長齡來京玉麟回伊犁將軍本任 諭  
曰該將軍有統轄之責回疆一切事宜儻有貽誤惟玉麟與璧昌  
是問三月因碩德佐領凌善等私借官民倉穀事覺部議照濫保  
例降二級調用 上加恩改爲降四級畱任玉麟奏伊犁烏魯木  
齊均有駐防官兵伊犁根本要地三面臨邊例派換防官兵不下

二千名存營兵力每形單少烏魯木齊換防滿兵道光八年停止  
勞逸不均請將伊犁惠遠城巴彥岱錫伯索倫四營例派塔爾巴  
哈臺換防官二十七員兵九百七十九名原額酌減改由烏嚕木  
齊協派官十員兵四百名以均成役伊犁所屬察哈爾額魯特二  
營例派塔爾巴哈臺換防官四員兵三百十九名該蒙古生計本  
不充裕出差過多有妨官牧查塔爾巴哈臺所屬之巴爾魯克遊  
牧之察哈爾額魯特哈薩克滋生蕃衍其閒散壯丁請令就近當  
差抵充伊犁派往之蒙古官兵差使節省此項換防鹽糧酌添巴  
爾魯克官七員兵六百餘名外省歲有餘贖之數經費既省操防  
亦較得力 詔如所請七月奏陳伊犁出征官兵經由冰嶺崎嶇

虧短馬匹懇 恩體恤 諭曰伊犁滿漢兵丁應賠騎馬五分著  
照八年成案與駝馬一律准銷八分賠二分其民遣壯勇原領馬  
匹均已倒斃應行著賠之處亦著照上屆成案全行豁免九月  
命來京十月疏陳伊犁惠遠城南濱大河土性疏鬆易致塌卸見  
在大溜北趨將近城垣請復歲修以資保障得 旨允行又疏請  
原任伊犁將軍明亮晉昌英德阿照例入祠奉 諭俱著加恩准  
其一體入祠十一月疏陳伊犁土宇寬廣惠遠可種之田約計六  
萬餘畝巴彥岱可種之田約計一萬三千餘畝請將惠遠分析地  
畝租給回民耕種歲收地租抵充兵丁口食節省銀兩添補孤寡  
養贍壯丁差操之用巴彥岱地畝得水較難須開渠灌溉俟招佃



國朝通志卷之九十一  
得租亦照惠遠成案辦理 命如所請行是月 文廟告成疏請  
頒發扁額 諭曰伊犁自入版圖文廟尙未經建立近年旗民習  
戎之外兼知讀書舊設敬業學舍棟宇傾敝據玉麟等鳩工修建  
殿廡門柱規模備具足供祀事並於兩旁增建學舍仍爲敬業學  
訓課之所俾遠徼旗民敬教勸學著照所請頒給聖協時中扁額  
交玉麟等敬謹恭懸用昭寰宇同文之治十二月疏言伊犁派赴  
喀什噶爾應援官兵前於道光十年八月揀畱防所扣至十三年  
春二月有半較之換防班次轉多半年請及時更換以符舊制  
從之十三年三月回京行至陝西長安縣病卒巡撫史譜奏入  
諭曰前任伊犁將軍玉麟以翰林通籍歷事 三朝宣力中外朕



御極後由駐藏大臣召令來京游擢正卿入直樞務前因重定回疆懋著贊襄晉錫宮銜繪像紫光閣用酬勲績嗣以諳悉回疆情形簡畀伊犁重任籌辦善後事宜萬里同心措施悉當見在邊陲安謐特命回京方資倚任本日據史譜由驛馳奏中途偶因感冒遽爾溘逝披覽遺章中心震悼斷不想未能晤面竟成長往揮淚歎息之餘祇有渥沛恩施飾終優賁以示褒榮玉麟著加恩晉贈太保照尙書例賜卹入祀賢良祠伊子候補員外郎恆昌俟服闋後遇有六部員外郎缺出卽行補用歸櫬將次到京朕再派員迎護到京之日准其入城治喪朕至期親臨賜奠所有應得卹典著各衙門察例具奏 聖駕親臨賜奠五月 予諡文恭十月伊犁

將軍特依順保奏請入祠奉 旨允行子恆昌見官戶部員外郎

右 國史館本傳

劉廷斌

劉廷斌四川溫江人由行伍隨征廓爾喀有功拔順慶營外委嘉慶元年出師黔楚陝甘等處屢立戰功二年升城守左營把總隨參贊大臣德楞額前赴川陝接剿教匪進攻重石子香鑪坪殪賊渠孫賜俸於東鄉亂石窰三年復戰於湖北鄖西之三岔河疊有斬獲四年正月殲通江藍號賊首冉文儔於麻壩寨七月追賊瓦房灣香衝一帶奮勇鏖戰受矛傷擒首逆龔其位龔文玉二人尋升黎雅營千總十月陝境西鄉縣上高川地方白號股匪高均德糾眾屯聚率師進攻殲其渠捷入 賞戴藍翎五年升綏靖營守備六年擢梁萬營都司七年三月線號餘匪龔其堯等盤踞雲奉

交界之板溪廠副將達自祥由鳳凰山仰攻廷斌偕遊擊朱勒亨繞二臺坪從旁抄截賊眾恃險抗拒我兵進擊斬級百生擒二十餘人六月勦賊首樊人傑於白河冒雨夾擊進殄其眾 賞換花翎十月復聞中子洋坪有賊屯伏箐林重隔山路崎嶇我兵一由中央埡翻越老林一由溝底抄擊左右仰攻復從豐玉坪鄭家坪取道狗兒灘四面兜截俘馘甚眾十一月偕參將王玉龍遊擊楊森會勦陳侍學於三溪河追至大風口襲其不備克之八年正月升督標左營遊擊閏二月賊屯烏雲頂廷斌偕總兵蒲尙佐副將沈洪由高坪大坪夾擊直上山梁賊潰官兵乘勝追躡敗之於安石壠十一月黑洞溝零匪竄柯家坪廷斌設伏涼風埡副將唐文

淑復於半邊街策應分道搜捕屢有殲擒十二月餘匪竄雞公寨  
擾孟石嶺我師追剿戰於橫山大梁敗之九年正月賊東竄屯小  
青草坪廷斌取道甄坪大坪壩截其要路賊敗遁入老林三月餘  
匪復在馬溪客僧河一帶潛伏廷斌由腰廠蝦蟆石進擊賊憑高  
推滾礮石我兵直上衝撲賊披靡殲賊目五生擒八十三人奪獲  
旗幟刀矛無算八月擢山西北樓營參將十五年調撫標中軍參  
將十六年升廣西潯州協副將二十一年升右江鎮總兵二十五  
年調江南徐州鎮總兵道光三年調浙江衢州鎮總兵六年六月  
調直隸正定鎮總兵九月調福建臺灣鎮總兵七月查辦清莊擒  
巨盜謝基置之法八年獲海洋疊劫盜匪多名按治之十年彰化



縣奸民王溪水煽造謠言糾黨劫掠廷斌擒獲盜首鞫實問擬如  
例奏入得旨嘉獎下部議敘十二年八月查勘澎湖風災請賑  
卹並緩其賦允之九月擢廣東提督適臺灣逆匪張丙聚眾滋  
擾戕害官兵廷斌馳赴嘉義嬰城守禦生擒賊渠殲其黨會提督  
馬濟勝渡臺併力合擊餘賊悉平捷聞賞戴雙眼花翎並下  
部議敘十三年二月以千總許荆山遇賊逃逸未能據實奏參降  
五級甫任六月閩浙總督程祖洛奏以臺灣營務弊在不勤訓練  
下守汛地因劾廷斌諭曰劉廷斌在任多年竟未知城守營右  
軍守備應駐下加冬地方其各營兵房又多倒塌兵丁賃居民房  
竟有離汛貿易倩代當差值病種種不法弊端劉廷斌以專閫大

員沿習因循罔知振作所司何事實屬孤恩溺職著交部嚴加議處尋議褫職得旨上年廣東徭匪滋事已革提督劉榮慶平昔不能整頓營伍致兵丁臨時不能得力卽將劉榮慶革職發往伊犁充當苦差此次劉廷斌平日不勤訓練營務廢弛本應照劉榮慶從重治罪姑念其守城數月尙有微勞著照部議革職免其遣戍是月卒子錦南二品廕生候選通判

右 國史館本傳

國朝文獻通考

卷一百一十五

十一

明禪

明禪達古爾郭伯勒氏滿洲鎮黃旗人駐防黑龍江乾隆五十七年鄂爾喀賊催提後藏明禪以領催隨參贊大臣海蘭察往剿擊賊於博爾東拉山擒斬甚眾敘功 賞戴藍翎嘉慶三年補驍騎校八年升佐領十二年 上幸木蘭舉行秋獮明禪射獲麇鹿賞換花翎十八年十月河南敘匪李文成倡亂陷滑縣明禪隨副都統銜黑龍江總管達斯呼爾岱往剿十二月圍攻滑城時有賊數百潛出北門奔竄官兵奮勇截擊大敗之復於城南設伏地雷轟破城垣大軍四面兜擊俘賊無算遂復滑縣時陝西南山匪徒萬五糾眾滋事明禪復隨達斯呼爾岱移師協剿十九年正月股

匪吳抓抓竄黑河官兵截剿山沔縣殲賊四百餘二月賊竄黃官嶺我兵乘勝兜殺殲吳逆於陣餘匪敗走石家嘴追擊之殲擒殆盡尋凱撤回旗二十年升副總管道光元年升總管六年逆回張格爾不靖明禪隨領隊大臣阿勒罕保往剿七年由阿克蘇進發偵知張逆在洋阿爾巴特回莊糾眾抗拒我師取道樹窩子進攻賊屯聚沙岡勢甚鴟張明禪率勁旅由左抄殺賊眾分投抗拒我兵奮勇搶上沙岡槍箭齊發賊大潰追剿三十餘里斃賊萬生擒二千二百餘人奪獲器械馬匹無算捷入 賞副都統銜八月遷呼蘭河城守尉九年授西安左翼副都統十一年以失察佐領西郎阿容畱僞造軍功印照匪徒王士英下部察議十二年偕將軍



桓格奏言西安滿洲營出征回疆官兵應行賠補無著駝隻請照甘肅採買駝隻價銀之數每隻賠銀二十兩各令該隊官兵照數攤賠分作二年扣交藩庫歸還原款 諭曰此項駝隻因進征官兵行走迅速及凱撤時沿途擁擠未能守候收管致有虧交自應著落賠補若分作二年扣還兵力未免拮据不足以示體恤著加恩分作八年陸續扣交以清原款十三年二月借桓格奏言西安滿洲營兵丁按名月給餉銀並米折銀三兩四錢外尙有草豆折價銀兩按一年統計每月約在一兩六七錢請於每月按名存貯銀三錢計一年各應存銀三兩六錢以便隨時買補額外倒斃馬匹之需俟年終通盤覈算除買補馬匹及購買草豆外所餘銀兩

國朝通志卷之三十一

表

儘數分給各兵以資接濟庶於馬政兵力均有裨益得旨允行

七月卒

右 國史館本傳

富永

富永薩克達氏滿洲鑲藍旗人父哲森保副都統銜頭等侍衛乾隆五十七年隨征廓爾喀中槍傷卒廕騎都尉世職自有傳富永於乾隆三十九年由吉林移駐京營授前鋒五十六年隨征廓爾喀五十七年六月隨將軍福康安由擦木瑪廓爾轄爾甲乘勝攻取濟隴官寨諸要隘摧藍翎侍衛七月山噶多普進攻東覺山梁克之左足中槍傷升三等侍衛十二月承襲騎都尉五十八年諭曰哲森保在軍前奮勉受傷身故朕心頗爲憫惻伊子富永前因軍前受傷由藍翎侍衛升投三等侍衛今念哲森保勞績著加恩授富永爲二等待衛以示軫恤出力滿洲臣僕至意旋因槍傷

復發回吉林調理嘉慶五年傷愈來京復授二等待衛九年授護軍參領十五年七月授前鋒參領八月因在圍場善備鳥槍升頭等待衛 命在乾清門行走十七年因曠誤進班降三等待衛退出乾清門十八年六月復 命在乾清門行走十月遷二等待衛授伊犁領隊大臣十九年以緝盜功 賞副都統銜二十一年還京二十二年授正藍旗漢軍副都統二十四年文穎館不戒於火富永因救火出力下部議敘二十五年十月署正紅旗護軍統領十一月調正白旗蒙古副都統兼管虎槍處道光二年調熊岳副都統四年因護送 仁宗睿皇帝實錄 聖訓前赴盛京尊藏禮成下部議敘七年授鑲黃旗蒙古副都統十二年二月署正藍旗

護軍統領旋以年力就衰原品休致 諭曰休致副都統富永曾  
出廓爾喀兵一次打仗十三次殺賊十九名捉生四名受傷一處  
賞給全俸十三年卒子烏爾棍泰副護軍參領烏什杭阿委護軍  
參領霍隆阿三等侍衛音德布福建福州城守營副將孫常連襲  
騎都尉官二等待衛

右 國史館本傳



國朝詩林卷之二十一

三

覺羅八十

覺羅八十鑲黃旗人乾隆三十七年由閒散承襲雲騎尉世職五十五年授三等侍衛嘉慶四年遷二等侍衛尋補侍衛什長五年揀發山東以參將委用七年補濟南城守營參將八年催輓糧艘回空出力 賞加副將銜十二年護理兗州鎮總兵十三年五月署臨清協副將十二月升文登協副將十六年調臨清協副將十九年七月擢登州鎮總兵九月丁母憂回旗二十年百日服滿賞頭等侍衛在大門上行走道光元年授烏軍雅蘇臺參贊大臣三年六月以烏里雅蘇臺徵收房租銀兩不敷支放借將軍奕顯等奏請將該處柴薪羊隻囚米鎖鑄皮服襖衣肉食等七款歸入

正項開銷奏入 上以庫貯正項銀數及七款歸入正項是否足  
敷支放未經詳細聲敘 命八十等逐款分晰具奏尋復奏庫貯  
正項銀兩每遇不敷支放時由歸綏道衙門請領銀二十萬兩貯  
庫備用原無一定年限其支放官兵鹽菜錢糧等項因有截曠多  
寡不一每年亦無定額計烏里雅蘇臺科布多二處每年約需正  
項銀七萬八千九百兩所有四部院柴薪等七款約需銀一千四  
百餘兩足敷支放疏上 諭曰烏里雅蘇臺各項經費向由房租  
項下動用見在不敷支放又無閒款可撥著准其將四部院柴薪  
等七款歸入正項開銷其製造進貢貂皮木箱及賞給出差官兵  
製裝銀兩著仍在房租項下動用仍飭屬撙節支放無任浮冒十

月偕將軍果勒豐阿奏言烏里雅蘇臺各項商賈及蒙古人等所食口糧向係商民販運茶甄赴古城兌換所販之茶仍請領部標交納官稅相安已六十餘年嗣經陝甘總督那彥成奏定新疆行茶章程禁止茶甄不得侵越售買該處蒙古民人餬口無資均致失所請循舊規許其販運兌換仍請明立限制實力稽查庶於官引民食兩無妨礙 從之八年 召來京九年二月偕將軍彥德奏烏里雅蘇臺情形臚陳四事一動撥駝隻添買米麪以濟兵食一循照舊例設立碾磨一酌畱員弁以敷差委一請撥發通鈔諭旨以符體制得 旨允行九月以科布多辦事司員於貝勒奇默特多爾濟呈報偷竊羸馬等件印文並不按例查訊輒將原文

駁還又參贊額勒錦在土爾扈特烏梁海差次應帶馬匹攜帶茶  
布前往易換藉勢滋擾八十等未能親往查辦致該貝勒瀆控不  
休多生枝節 命下部議處部議降二級調用 上加恩改爲降  
三級畱任十一月回京 賞副都統銜署正藍旗滿洲副都統十  
年閏四月補正藍旗滿洲副都統九月署正藍旗護軍統領十二  
年以年老休致十三年卒

右 國史館本傳



富兆

富兆費莫氏滿洲正藍旗人嘉慶四年由監生捐納筆帖式籤分兵部七年補官十五年京察一等記名以理事同知通判用尋授陝西榆林府神木同知二十一年遷盛京兵部員外郎道光元年調回京授刑部員外郎二年七月遷江南道監察御史十月疏言盛京威遠等處東界鴨綠江與朝鮮接壤恐有奸人越界滋事宜嚴查保甲以肅邊防且近年山場木植漸少流民居者甚眾慮有偷斫樹木等事應令該管章京親往確查給與執照並嚴飭遼陽等處監收木稅官員於報稅時驗明糾察疏入 命盛京將軍晉昌議奏尋覆奏編查保甲及查辦斫木給照見已嚴飭各屬認真

稽查勿使始勤終怠 允之三年六月巡視北城旋因考試八旗  
文童 命充監試御史七月奏劾考試漢軍文童原派認識官陳  
慶祥無故不到請交部議處以爲玩視考試者戒 諭曰向例八  
旗考試入場之日由各旗派出參領領催等當堂認識所以重甄  
拔而除積弊定例綦嚴乃日久視爲具文並不當堂認識以致槍  
冒頂替諸弊叢生茲據奏考試漢軍文童派出認識章京陳慶祥  
無故不到實屬執法著交部議處此次飭諭之後儻復屢訓不悛  
一經奏參必將該員等從重議處十一月訪獲匪犯李大等八名  
冒充官役訛詐商旅奏請交部審辦鞫實均治如律 上以查拏  
其屬認真有 旨嘉獎四年擢刑科給事中五年三月轉戶科掌

印給事中四月巡視西城六年巡視東城七年奏獲偷盜官糧匪  
犯鄭五等多名 上以其巡查奮勉 嘉之八年稽查海運倉九  
年巡視南城十二年九月俸滿截取得 旨交軍機處記名以道  
府用十月授福建督糧道尋 賞副都統銜署正白旗漢軍副都  
統旋補正紅旗蒙古副都統十一月授福建福州副都統十三年  
卒子文蔚奉天府府尹前戶部左侍郎文輝湖北荆宜施道文煜  
四川按察使文梁光祿寺筆帖式

右 國史館本傳

日本書紀卷之四十四

四

色爾滾

色爾滾莫爾丹氏黑龍江正黃旗人乾隆五十年由打牲兵襲佐領五十六年五月 上幸木蘭舉行秋獮校射 賞戴花翎十月隨大學士公福康安進剿廓爾喀屢著戰績五十七年六月以收復濟噶在事有功 賞托默歡武巴圖魯名號八月進攻熱索橋奪取碉卡補額外總管六十年遷副總管嘉慶二年川陝楚三省教匪不靖色爾滾隨參贊大臣德楞泰赴陝剿辦三年正月由大隴溝進發奮力抄截殲賊二百三月追擊襄陽黃號首逆姚之富齊王氏於三岔河殲之餘匪俘馘無算色爾滾受槍傷是月升協領六月追擊襄陽白號首逆高均德移師入川九月巴州白號首



逆羅其清通江監號首逆冉文儔與達州青號首逆徐添德合分踞箕山各險隘互爲聲援色爾滾躡蹤追剿遇於順水寺奪卡四殲賊六百擒賊五十餘十月進攻郭家廟廖家礪等寨色爾滾由馬鞍山冉家澗往來截擊殄賊六百餘生擒賊目郭彥榜等三十人十一月羅其清由青觀山奔竄我師於雙山子一帶抄截敗之於濛子灘執賊渠羅其清並逆屬多人十二月冉文儔走通江之麻壩寨我兵乘夜圍攻擒其渠斬獲甚眾四年二月升總管七月各股賊匪由奉節巫山東竄楚境追敗之於大禾田八月跟剿襄陽白號首逆張添倫高均德襄陽黃號賊目辛聰等股移師入陝十月由山子溪截剿直逼大市川賊憑險抗拒色爾滾偕總管遜

多保温春鼓勇先登殺賊千生擒高均德並賊黨高成傑王臨高  
閻慎卿秦學順等五百餘人色爾滾功居最 上嘉之下部議敘  
五年正月通江藍號股匪冉添元等搶渡嘉陵江我師跟剿復回  
川境二月冉逆在江油之馬蹏岡新店子一路分掠我兵追至黃  
茅嶺分路並進擒賊目陳得俸箭殪賊目冉添恆冉添元負創逸  
色爾滾等復由洛陽橋進攻包家溝併力衝殺殲賊百餘擒冉添  
元於陣捷入下部議敘三月敗賊於石門寨四月改攻新店子色  
爾滾由萬福橋抄截賊潰走風如井我兵奮勇疾追殲賊二百擒  
賊二百七十人閏四月賊犯達州之鐵山關我軍分道兜剿色爾  
滾由右首梁家壩進擊克之賊竄李家橋乘勝復領數騎衝入賊

陣生擒賊目吳文漢等九十八人是月以軍營出力 賞加副都  
統銜五月偵聞東鄉白號股匪劉朝選等由鶴游坪折竄茨竹林  
我兵分伏兩山截其前路敗之越日股匪張子聰度向瑤復由趕  
場壩走禹蹟灘色爾滾躡蹤追剿遇於九亭場殲賊三百餘六月  
通江藍號股匪冉添士屯長池壩色爾滾從沙河子前進擄賊巢  
大敗其眾捷 聞下部議敘七月巴州白號股匪鮮大川苟文明  
等竄石板沱色爾滾取道草街子元口鎮沿江兜截大軍抄出賊  
前策應合力攻撲斃賊千餘斬偽總兵吳耀國偽先鋒鮮文炳執  
賊目苟文禮等五人並夥匪八百餘八月接剿通江藍號股匪於  
九江場擊走之九月東鄉白號股匪湯思蛟等與達州青號股匪

趙麻花合我兵扼之於茅坪倒流水殲賊六千十月趙麻花復合  
老林賊匪王珊由寒池壩竄走我師四面圍截遇於大水田殲斃  
趙麻花王珊並夥賊二百餘十一月以屢有戰功下部議敘六年  
正月隨德楞泰移師入陝會襄陽白號首逆高二自洵陽偷渡漢  
江我兵於乾溝追及之先後俘馘賊首龔如一高二等並餘匪多  
人色爾滾下部議敘二月太平黃號賊首龍紹周自南坪竄走獅  
子壩我兵合力追撲連克之於埔箕寨和岡溪三月敗賊於允子  
坪四月達州青號首逆徐添德白號股匪趙鑑等分屯廟坪一帶  
我兵自紅花埭進攻斃賊五百擒賊四百餘五月徐添德竄西鄉  
色爾滾率勁旅截之於仁河新灘適大雨盛漲徐逆撲水斃七月



龍逆由白河口轉向天池堙有南竄之勢我兵一路抄截連敗之於公子嶺茅古坪石背山八月龍逆遁入川境之大峽色爾滾跟蹤窮追斬獲無算九月賊敗走復與藍白各號股匪合竄湖北竹山竹谿等處我軍追及之於鳳竹槽夜襲賊營殲賊二百餘十月龍逆由上鴉坪竄陝境之盤龍山官兵四路圍攻色爾滾偕侍衛達勒精阿等直搗賊巢奮勇鏖戰俘斬四百餘擒龍紹周十二月巴州白號首逆苟文明竄入四川通江廣元一帶我兵擊之於槽子溝賊勢張甚色爾滾躍馬衝殺賊冒死抗拒色爾滾受矛傷仍奮力追擊賊大潰俘賊三百七十餘捷入得 旨嘉獎七年正月擊賊於高家營二月連克楊家溝王家梁滴水巖三月敗賊於鳳



鳳山大水田尋偵聞股匪樊人傑戴四等延授楚境色爾滾復隨  
德楞泰移師追擊四月樊戴各逆由房縣竄走欲與通江藍號首  
逆蒲添寶合色爾滾閒道星馳三百餘里繞出賊前使不得合五  
月賊由白馬灘西竄色爾滾扼其東路冒雨進攻連克雙鳳溝穆  
家溝魯家埡擒賊千餘得 旨褒獎六月蒲逆嘯聚桂連坪我兵  
併力仰攻殲賊百餘七月蒲逆復踞鮑家山大軍由連三埡進剿  
山徑險仄馬不能進色爾滾偕總兵蒲尙佐參將張應貴身先士  
卒步行擣賊巢殺賊七百蒲逆乘閒逸獲逆屬多名八月追剿蒲  
添寶於瓦屋溝蒲逆窮蹙墜崖死得 旨色爾滾督率兵勇盡力  
窮追奮勇可嘉著在乾清門侍衛上行走仍交部議敘九月襄陽

藍號股匪崔胡戴四達州青號股匪熊翠熊方青屯集竹谿之謝家坪色爾滾由白河口進擊大敗之十月殲戴四於興山之施家溝十二月接剿太平黃號王國賢餘匪於栗子坪賊竄走青龍觀色爾滾追擊之於蘇金坡斃賊三十擒賊五十八年正月連克金竹園望黎垣金鳳嶺二月改攻偏巖子執賊目龔文榜等三十人閏二月擊賊於老鴉寨五月剿賊於房縣之後山坪八月搜捕餘匪於巫山之觀音巖九月以三省肅清下部優敘九年二月授阿勒楚喀副都統十年奏吉林各城俱設前鋒惟阿勒楚喀地方未有請添設前鋒十六名 允之十一年授伊犁領隊大臣十四年正月塔爾巴哈臺安置陝西遣戍降匪蒲大芳等三十餘人聚眾

煽亂伊犁將軍松筠密遣色爾滾帶兵分赴各屯立將叛匪拏獲  
置諸法奏入 諭曰松筠派色爾滾前往可謂得人色爾滾著交  
部議敘十月 召來京調鑲藍旗蒙古副都統十五年二月調伯  
都訥副都統八月復調阿勒楚克副都統十八年九月河南教匪  
李文成滋事陷滑縣城 上命色爾滾偕副都統德英阿馳赴軍  
營協剿十一月直隸長垣一帶賊匪竄河南封邱等縣有西入太  
行之勢色爾滾帶兵堵截會李文成自滑縣遁輝縣色爾滾偕總  
兵楊芳躡蹤迎剿偵知賊黨屯司寨先設伏於白土岡遣兵誘之  
賊三千餘來迎轉戰入伏中官兵三面蹙之殺賊六百餘奔潰退  
踞山梁我軍合力仰攻復擊殺無算捷 聞下部議敘十二月乘

勝抵司寨賊潛伏不出我師自寨後毀垣入短兵相接且焚且攻李文成與其黨匿高樓色爾滾奮勇先登槍斃賊目劉國明賊勢蹙李文成自焚死餘黨盡殲奏入 賞加都統銜先換頭品頂帶並給雲騎尉世職二十四年調黑龍江副都統尋 命以都統銜充呼倫貝爾辦事大臣道光七年因病陳請開缺得 旨色爾滾著原品休致賞給全俸以養餘年十三年卒遺疏入 諭曰色爾滾前在軍營著有勞績賞給巴圖魯名號在乾清門行走有年因病不能當差加恩照原品賞給全俸調養茲聞溘逝朕心不勝憫惻應得卹典著該部查照都統例具奏任內一切降罰處分均著寬免仍由該處庫內動支銀二百兩賞給伊家辦理喪儀以示朕



惜念舊勳之至意尋 賜祭葬 予諡壯勇子明晉世襲佐領凌  
晉公中佐領靈琛副總管珠勒格善二品廕生二等侍衛孫濟克  
扎布世襲佐領兼一雲騎尉

右 國史館本傳





閻凌阿

閻凌阿鈕祜祿氏滿洲正白旗人嘉慶元年九月湖北鍾祥縣邪匪滋擾竄越河南境內上命都統巴克坦布等選帶火器營勁旅馳赴防剿閻凌阿由烏槍護軍隨往十一月抵豫剿賊於草店一帶連破賊屯十餘處十二月逆匪竄張家集我軍跟蹤兜擊大敗之二年正月由平岡進兵擊賊於山岡賊驚潰又敗之於五桂井擒斬甚夥旋分兵武勝關防賊北竄之路閻凌阿均在事出力並殲賊受傷四年回京五年補藍翎長六年升護軍校十二年補空花翎十四年升委署護軍參領十六年遷副護軍參領十八年遷護軍參領二十二年補掌關防營總二十三年補委烏槍翼長

二十四年補烏槍翼長道光三年擢鑲白旗蒙古副都統四年署鑲白旗漢軍副都統六年正月管理火器營事務二月署正紅旗護軍統領七年三月命充八旗左翼軍政大臣九月歷署鑲黃旗滿洲副都統正黃旗鑲黃旗護軍統領十一年署鑲白旗護軍統領十二年三月署正藍旗護軍統領九月調廣州漢軍副都統尋以年力就衰得旨著以原品休致十三年卒子吉山藍翎侍衛

右 國史館本傳

國勒明阿

國勒明阿富察氏滿洲鑲白旗人乾隆五十三年十一月由閒散承襲世管佐領十二月承襲一等輕車都尉嘉慶十一年揀發湖廣以參將委用十四年補武昌城守營參將十九年升竹山協副將道光元年升安徽壽春鎮總兵二年河南教匪朱瀛閣糾匪黨邢名章等竄安徽潁州府阜陽縣境肆行劫掠國勒明阿奏言潁州界連豫省上年曾有紅鬃捻匪往來滋擾節經設法會巡近已斂迹茲又突有匪徒滋事卽檄守備遊凌雲等帶兵會同營縣堵拏臣亦星馳潁郡督同搜捕維時匪徒盤踞阜陽縣之岳家莊築圍阻水爲負隅計莊內豎立帥字白旗匪黨百餘持矛抗拒遊擊

彭鎮川督帥弁兵鼓勇圍擊擒朱瀨閣斃邢名章共計殲擒首夥  
一百二十餘名莊內一律肅清此外有無匪黨見飭文武員弁慎  
密偵緝務期全獲解究無使漏網奏入報 聞六年以患病開缺  
回旗調理七年二月病痊 賞給頭等侍衛在大門上行走五月  
授哈密幫辦大臣十一月因回疆西四城全境肅清大兵凱撤偕  
辦事大臣恩銘奏言哈密糧臺前經長齡山大營覈定章程遵照  
備辦此時凱撤官兵陸續旋回者爲數無多卽令哈密通判志奎  
供支照料足資經理糧臺見無應辦要件請將委員書吏裁撤以  
節糜費又奏此次凱撤官兵換畱之馬其不堪餵養者隨時變價  
餘請歸入備撥廠內牧放各軍臺及營中差操兩項馬匹遇有倒



堯亦可由此項隨時彌補仍按數扣定年限俟用竣之日再向巴里坤調取俱得 旨允行八年逆西張格爾係解來京以國勒明阿接替護送諸絲妥協下部優敘旋調烏魯木齊領隊大臣十年核巴里坤總兵十三年卒子富色鏗額二品廕生襲一等輕車都尉兼世管佐領

右 國史館本傳



蘇布通阿

蘇布通阿吳里揚罕氏蒙古鑲白旗人駐防伊犁嘉慶五年由前鋒校補驍騎校十年遷防禦十四年升佐領十八年升協領道光六年七月逆回張格爾入卡滋擾蘇布通阿隨揚威將軍大學士長齡馳往協剿十一月賊匪屯據柯爾坪回莊阻大兵進剿之路我師取道利色爾湖分投抄截殲賊無算尋敗之於大郝紫爾卡倫七年三月師次大河拐賊黨夜犯大營我兵槍礮齊發擊卻之俘賊甚眾越日進攻洋阿爾巴特逆匪占據沙岡恃險抵禦官兵分路圍攻賊披靡逃竄追殺三十餘里殲賊萬餘擒賊三千餘奪獲旗幟器械無算賊復糾約夥匪於沙布都爾莊外臨渠排列施

放槍箭我師奮勇渡河短兵相接偪至渾水河大敗之陣殲賊目  
素丕卡克占巴克二名四月偵知賊竄阿瓦巴特回莊復糾合匪  
黨十餘萬依岡背河負嶠抗拒我師潛繞賊後而以大兵攻其前  
兩面兜剿乘風施放噴筒煙迷賊目賊猶冒煙衝突我軍鼓勇迎  
殺賊潰乘勝直上沙岡分路跟追殲賊目阿瓦子邁瑪底那爾巴  
特阿渾二名洋達瑪河一帶回莊逆匪搜剿殆盡復由北岸進攻  
賊躡淺潛渡我兵連夜追擊取道喀城賊率眾抵禦大軍四面圍  
剿賊潰喀城克復五月擊賊於毘拉滿大敗之生擒賊目噶爾勒  
斬賊二千餘克復和闐蘇布通阿俱在事有功捷 聞 賞加副  
都統銜閏五月四城戡定凱撤回營十一月授塔爾巴哈臺領隊

大臣十年因失察兵丁與哈薩克交結往來致釀命案下部議處  
尋議降一級畱任十三年卒子訥木京額官防禦

右 國史館本傳



K320.45

2

170-870  
170-870  
170-870

170-870  
170-870  
170-870

圖書分類法  
卷三百一十  
三

170-870



21101000160764